

## ପ୍ରେରିତ ମାନଙ୍କର କାର୍ଯ୍ୟ ପେରିଡ଼ ସିସ୍ତମନ୍ କାମ୍ବଲ ଇସାବ୍ ଏ ବଇ ବିସଇତେଇ ଜାନ୍ବାଟା

ପେରିଡ଼ ବଇ ଅଇଲାନି ମଣ୍ଡଲି ଆରାମ୍ ଅଇଲା ବଇ, ଆରି କେନ୍ତାରି ଜିରୁସାଲମେ ଅନି ଜିଉଦା ସମରିଆ, ଆରି ବିନ୍‌ବିନ୍ ଜାଗାମନ୍‌କେ ଜାନାଇ ଅଇଲା ୧:୮ । ଏଟା ଜିସୁ ସରଗେ ଜିବା ଆଗତୁ ତାର୍ ସିସ୍ତମନ୍‌କେ କଇ ରଇଲା, ପେରିଡ଼ ବଇ ଲୁକ୍‌ଲେକି ରଇଲା, ଜେକି ଲୁକ୍ ସୁବକବର୍ ମିସା ଲେକି ରଇଲା । ସେ ଗଟେକ୍ ଡାକ୍‌ଦର୍ ରଇଲା, ଆରି କାଇଟାମିସା ବୁଲ୍ ନ କର୍ତେ ଲେକ୍‌ବାକେ ମନ୍‌ଦିଆନ୍ ଦେଇତେ ରଇଲା । ସେ ସୁବକବର୍ ବଇଟାନେ ଆରି ପେରିଡ଼ ବଇ ଏ ଦୁଇଟା ବଇଟାନେଜାକ ତିଅପିଲ୍‌କେ ଜାନାଇ ଆଟେ । ଜନ୍ ଲକ୍‌କି ସେ ଗଟେକ୍ ଗିରିକ୍ ଲକ୍ ରଇଲା ଏ ଦୁଇଟାଜାକ ବଇ ଗିରିକ୍ ଆରି ଜିଉଦି ଲକ୍‌ମନ୍‌ର୍ ପାଇ ଅଇରଇଲା ପେରିଡ଼ ୧:୧ ।

ଜାନ୍‌ବାକେ ଗାଲେ ପେରିଡ଼ ବଇ ଜିସୁକିରିସ୍‌ଟ ଜନମ୍ ଅଇକରି ୬୦-୬୪ ବିଡ଼ରେ ଲେକାଅଇ ରଇଲା । କାଇକେବଇଲେ ପାଉଲ୍ ବନ୍ଦିଗରେ ରଇକରି ମୁକଲ୍‌ବା ଆଗତୁ ଏ ବଇର୍ ଲେକାକାମ୍ ସାରିରଇଲା । ଲୁକ୍ ମିସା ପାଉଲ୍‌ର୍ ସଙ୍ଗ୍ ବୁଲି ରଇଲା, ଆରି ପେରିଡ଼ ବଇ ଆନ୍ତିକିଆଇ ଅନି ଲେକାଅଇ ରଇଲା । ପେରିଡ଼ ବଇ ଲୁକ୍ ସୁବକବର୍‌ତେଇ ଅନି ଆରାମ୍ ଅଇଲା ଆଟେ, ଆରି ଜିସୁ ସରଗେ ଜିବାଟା ଆରାମ୍ ଅଇଲାନି ଲୁକ୍ ସୁବକବର୍‌ର୍ ଆଦେସ୍ ଆରି ପେରିଡ଼ର୍ ଲେକା ଆଦେସ୍ ସଙ୍ଗ୍ ସମାନ୍ ଆଟେ । ସେ ତିଅପିଲ୍‌କେ ଆରି ବିସ୍‌ବାସ୍ ବଡ଼ି ଆଇବା ଲକ୍‌ମନ୍‌କେ ନିକସଙ୍ଗ୍ ରଇବାକେ ମନ୍‌କଲାନି । ସେମନ୍‌କେ କାଇ ସିକିଆ ଦିଆ ଅଇରଇଲା ଜିସୁକିରିସ୍‌ଟର୍ ଜିବନ୍ ବିସଇ ଆରି ବଡ଼ିଆଇବା ବିସ୍‌ବାସିମନ୍‌ର୍ ବିସଇ କାଇବୁଲ୍ ନ କର୍ତେ ଇସାବ୍ ସଙ୍ଗ୍‌ଆଟେ । ପେରିଡ଼ ବଇଟାନେ ଆଗତୁର୍ ମଣ୍ଡଲି ଜିସୁକିରିସ୍‌ଟର୍ ଟାନେ ବିସ୍‌ବାସ୍ କରି ଜିଇବା କାଇବାକେ ଆମ୍‌କେ ଜାନାଇଲାନି । ଆମ୍‌କେ ପେରିଡ଼ମନ୍‌ର୍

ଟାନେଅନି ଜାନାଇଲାନି କି, ଆମେ କେନ୍ତାରି ସୁକଲ୍ ଆଡ଼ମାଟାନେ ରଇକରି ବିନ୍ଲକ୍ମନକେ ସୁବ୍‌କବର୍ ଜାନାଇ ଅଇସି ।

**ଏ ବଇ ବିଡ଼ରେ ରଇବା ମୁକିଆ ବିସଇ**

- ୧. ସୁକଲ୍ ଆଡ଼ମା ଆଇବାଟା ଆରି ମଣ୍ଡୁଲି ବଡ଼ବାଟା । ୧:୧-୮:୧
- ୨. ମଣ୍ଡୁଲିର୍ ଦୁକ୍‌କସ୍‌ଟ ଆରି ସୁବ୍‌କବର୍ ଅଦିକ୍ ଅଦିକ୍ ବଡ଼ବାଟା । ୮:୨-୧୨:୨୩
- ୩. ପାଉଲ୍ ପର୍ତୁମ୍ ତର୍ ସେବା କରବାକେ ଜିବାଟା । ୧୨:୨୪-୧୪:୨୮
- ୪. ନୁଆ ବିସ୍‌ବାସିମନର୍ ଦରକାର୍ ବିସଇ ଆରି ଜିରୁସାଲମର୍ ସେବା । ୧୫:୧-୩୫
- ୫. ପାଉଲ୍ ଦୁଇପାଲି ସେବାକାମେ ଜିବାଟା । ୧୫:୩୬-୧୮:୨୨
- ୬. ପାଉଲ୍ ତିନ୍‌ପାଲି ସେବାକାମେ ଜିବାଟା । ୧୮:୨୩-୨୦:୩୮
- ୭. ପାଉଲ୍ ଜିରୁସାଲମେ ବନ୍ଦିଅଇରଇଲାଟା । ୨୧:୨୭
- ୮. ପାଉଲ୍ ରମ୍ ରାଇଜେ ଜିବାଟା । ୨୭:୧-୨୮:୧-୩୧

**ସୁକଲ୍‌ଆଡ଼ମା ଦେଇରଇବା କାତା**

<sup>୧</sup> ✨ସାରଦାର୍ ତିଅପିଲ୍, ମର୍ ପର୍ତୁମ୍ ଲେକିରଇବା ଲୁକ୍‌ବଇଟାନେ ଆରାମେଅନି, ପର୍ମେସର୍ ତାକେ ସର୍ଗେ ନେବା ଦିନ୍ ଜାକ, ଜିସୁ କରିରଇବା ଆରି ସିକାଇରଇବା ସବୁ ବିସଇ ଲେକିରଇଲି । <sup>୨</sup> ତାର୍ ଆଗ୍ତୁ ସୁକଲ୍‌ଆଡ଼ମାର୍ ବପୁସଙ୍ ସେ ବାଟିରଇବା ପେରିଡ଼ମନକେ କେତେଟା ଆଦେସ୍ ଦେଇରଇଲା । <sup>୩</sup> ସେ ଦୁକ୍ କସ୍‌ଟ ଅଇଲାପତେ, ସେମନକେ ନିଜେ ବେସି ତର୍ ଦେକାଇଅଇଲା । ଚାଲିସ୍ ଦିନ୍‌ଜାକ ବିନ୍ ବିନ୍ ବେଲାଇ ଦେକାଇଅଇଲା । ମଲାତେଇଅନି ଉଟ୍‌ଲାଟା ସଡ଼ସଙ୍ ଜାନାଇଲା । ସେମନ୍ ତାକେ ଦେକ୍‌ଲାଇ, ଆରି ସେ ସେମନର୍‌ସଙ୍ ପର୍ମେସର୍‌ର ରାଇଜ୍ ବିସଇନେଇ କାତା ଅଇଲା । <sup>୪</sup> ✨ତରେକ୍ ସେମନର୍‌ସଙ୍ ମସିକରି କାଇବା ବେଲେ, ସେ ଏ ଆଦେସ୍ ଦେଲା, “ଜିରୁସାଲମ୍ ଚାଡାନାଇ । ମାତର୍ ଜନ୍‌ଟା ମର୍ ସରଗର୍ ବାବା, ଇନାମେ ଦେବିବଲି କଇଆଟେ, ସେଟା ନ ମିଲ୍‌ବା ଜାକ ଜାଗିରୁଆ । ✨<sup>୫</sup>କାଇକେବଇଲେ

---

✨ **୧:୧** ୧:୧ ଲୁକ୍ ୧:୧-୪ ✨ **୧:୪** ୧:୪ ଲୁକ୍ ୨୪:୪୯ ✨ **୧:୫** ୧:୫ ମାତିଜ ୩:୧୧; ମାର୍କ ୧:୮; ଲୁକ୍ ୩:୧୨; ଜଅନ୍ ୧:୩୩

ଜଅନ୍ ପାନିତେଇ ହୁବନ୍ ଦେଇରଇଲା, ମାତର କେତେ ଦିନ୍ ବିଡ଼ରେ ପରମେସର୍ ତମ୍‌କେ ସୁକଲ୍ ଆଡ଼ମାଇ ହୁବନ୍ ଦେଇସି ।”

### ଜିସୁ ସରଗେ ଜିବାଟା

<sup>୬</sup> ଦିନେକ୍ ପେରିଡ଼ ସିସ୍‌ମନ୍ ଗଟେକ୍‌ତେଇ ରୁଣ୍ଡିରଇଲା ବେଲେ ଜିସୁକେ ପାଚାରୁଲାଇ, “ମାପରୁ, ତମେ କାଇ ଏବେ ଇସ୍ରାଏଲର୍ ଲକ୍‌ମନ୍‌କେ ତାକର୍ ରାଇଜ୍ ଆରିତରେକ୍ ବାଉତାଇ ଦେଇସୁ କି ?” <sup>୭</sup> ଜିସୁ ସେମନ୍‌କେ କଇଲା, “ମର୍ ବାବା ତାର୍ ନିଜର୍ ଅଦିକାର୍‌ସଙ୍ଗ୍ ବେଲାଗତି ଟିକ୍‌କରି ସଙ୍ଗଇ ଆଚେ । ଏ ସବୁ କେବେ ଗଟସି, ସେଟା ତମର୍ ଜାନବା ଦରକାର ନାଇ । <sup>୮</sup> ✱ମାତର ସୁକଲ୍ ଆଡ଼ମା ତମର୍ ଉପ୍‌ରେ ଉଡ଼ରଲେ, ତମେ ପୁରାପୁରୁନ୍ ବପୁ ଅଇସା ଆରି ଜିରୁସାଲମ୍, ଜିଉଦାର୍ ସବୁଟାନେ, ସମିରଣ୍ ଆରି ଜଗତର୍ ସାରାସାରି ଜାକ ମର୍ ନାଉଁ ଦାରି ସାକି ଅଇସା ।” <sup>୯</sup> ✱ଏଡ଼କି କାତା ସେମନ୍‌କେ କଇସାରାଇଲା ପଚେ, ସେମନ୍ ଜିସୁକେ ସରଗେ ନେବାଟା ଦେକ୍‌ଲାଇ । ଗଟେକ୍ ଚେଲ୍‌କା ବାଦଲ୍ ଆସି ଡାବିଅଇଲାକେ ସେ ବାନା ଅଇଗାଲା । ଆରି ସେମନ୍ ତାକେ ଦେକି ନାପାରୁଲାଇ । <sup>୧୦</sup> ସେ ସରଗେ ଗାଲାପଚେ ମିସା ସେମନ୍ ଆକି ମରାଇକରି ଉପ୍‌ରେ ସେ ଦେକ୍‌ତେ ରଇଲାଇ । ସେଡ଼କିବେଲେ ଏଦେ ଦେକା ! ଦବ୍ ପଚିଆ ପିନ୍‌ଲା ଦୁଇ ଲକ୍, ସେମନ୍‌ର୍ ମୁଆଚେ ଆସି ଚିଆଅଇଲାଇ । <sup>୧୧</sup> ଆରି କଇଲାଇ “ଏ ଗାଲିଲିର୍ ଲକ୍‌ମନ୍, ତମେ କାଇକେ ଇତି ଚିଆଅଇ ଆକାସେ ଦେକ୍‌ଲାସି ? ଏ ଜିସୁକେ ପରମେସର୍ ତମ୍‌ଟାନେଅନି ସରଗେ ନେଲା ଆଚେ । ସେ ସରଗେ ଜେନ୍ତି ଜାଇରଇଲା, ସେନ୍ତାରିସେ ଦର୍ତ୍ତନିତେଇ ଆଇବାଟା ଦେକ୍‌ସା ।”

### ଜିଉଦାର୍ ଜାଗାଇ ମତିଆସ୍‌କେ ବାଡ଼ଲା

<sup>୧୨</sup> ତାର୍‌ପଚେ ପେରିଡ଼ ସିସ୍‌ମନ୍ ଜିଡ଼ ପର୍ବତେଅନି ଜିରୁସାଲମ୍ ବାଉଡ଼ି ଗାଲାଇ । ସେ ପର୍ବତ୍, ଜିରୁସାଲମ୍ ନଅରେଅନି ଗଟେକ୍ କିଲମିଟର୍ ଦୁର୍ ରଇଲା । <sup>୧୩</sup> ✱ଜିରୁସାଲେମ୍ ନଅରେ ଜାଇକରି

✱ ୧:୮ ୧:୮ ମାଡ଼ିଉ ୨୮:୧୯; ମାର୍‌କ ୧୬:୧୫; ଲୁକ୍ ୨୪:୪୭,୪୮ ✱ ୧:୯ ୧:୯ ମାର୍‌କ ୧୬:୧୯; ଲୁକ୍ ୨୪:୫୦,୫୧ ✱ ୧:୧୩ ୧:୧୩ ମାଡ଼ିଉ ୧୦:୨-୪; ମାର୍‌କ ୩:୧୬-୧୯; ଲୁକ୍ ୬:୧୪-୧୬

ସେମନ୍ ରଇବା ବାକରାଇ ପୁରୁଲାଇ । ପିତର, ଜଅନ୍, ଜାକୁବ୍ ଆରି ତାର ବାଇ ଆନ୍ଦରିୟ, ପିଲିପ୍, ତମା, ବାର୍ତଲମି, ମାତିଉ, ଆଲ୍ପିର୍ ପିଲା ଜାକୁବ୍, ଦେସ୍ ଆଲାଦକରବା ସିମନ୍ ଆରି ଜାକୁବର ପିଲା ଜିଉଦା, ଏମନ୍ ରଇଲା ତେଇର ପେରିଡ଼ ସିସମନ୍ ।<sup>୧୪</sup> ସେମନ୍ ତରକେତର ଗଟେକ୍ ଦଲ୍ ଇସାବେ ପାରତନା କରବାକେ ରୁଣ୍ଡତେ ରଇଲାଇ । ଆରି ସେମନରସଙ୍ଗ୍ ଜିସୁର୍ ଆୟା ମରିୟମ୍, ବିନ୍ ମାଇଜିମନ୍ ଆରି ଜିସୁର୍ ବାଇମନ୍ ମିସା ମିସ୍ତେରଇଲାଇ ।<sup>୧୫</sup> କେତେ ଦିନ୍ ଗାଲାପତେ ପାକାପାକି ସଏ କଡେ ଲକ୍ ବିସ୍ବାସି ବାଇମନ୍ ରଇଲା ଗଟେକ୍ ସବାଇ, ପିତର ଲକ୍ମନର ମୁଆଟେ ଉଟି ଚିଆଅଇ କଇଲା,<sup>୧୬</sup> “ଏ ମର ବାଇବଇନିମନ୍, ଜନ୍ ଇସ୍କାରିୟଡ଼ ଜିଉଦା ଜିସୁକେ ଦାରାଇଦେବାକେ ସତ୍ତରୁମନ୍କେ ବାଟ୍ ଦେକାଇ ଆନିରଇଲା, ତାର ବିସଇ, ଦାଉଦ୍ ସୁକଲ୍ଆଡ଼ମାଇ ପୁରୁନ୍ଅଇ ବବିସଡ଼କାତା ସୁନାଇ ରଇଲା । ଦରମ୍ ସାସ୍ତରର କାତା ସିଦ୍ ଅଇବାକେ ଏଟା ଗଟ୍ବାର୍ ରଇଲା ।<sup>୧୭</sup> ଏଲେମିସା ସେ ଆମର୍ ଦଲ୍ଲର୍ ଲକ୍ ରଇଲା । ଆରି ଆମର୍ ସଙ୍ଗ୍ କାମ୍ କରବାକେ ବାଟାଇଅଇ ରଇଲା ।”<sup>୧୮</sup> ✨ଜିଉଦା କିରିରଇବା କରାପ୍ କାମେଅନି ମିଲାଇଲା ଡାବୁକେ ଗଟେକ୍ ଜମି ଗେନାଅଇରଇଲା । ଆରି ସେ ଜମିତେଇ, ଉମ୍ତାଡ଼ିଅଇ ଅଦ୍ରି ମଲା । ତାର ପେଟ୍ ଚିରିଅଇ ଆଡ଼ି ବାରଇଗାଲା ।<sup>୧୯</sup> ଜିରୁସାଲମ୍ ନଅରେ ବାସାଅଇରଇବା ସବୁ ଲକ୍ମନ୍ ଏ ସବୁ ବିସଇ ସୁନ୍ଲାଇ । ସେମନର୍ ବାସାଇ ସେ ଜମିର୍ ନାଉଁ ଆକେଲ୍ଦାମା ତାର ଅରଡ଼ ଅଇଲାନି ବନିର୍ ପଦା ବଲି ନାଉଁ ଦେଲାଇ ଆଚଡ଼ ।

<sup>୨୦</sup> ଗିଡ଼ସଙ୍ଗିତା ବଇଟାନେ ଏ ବିସଇ ଲେକା ଅଇଲା ଆଟେ,  
“ତାର ଗଟ୍ ତୁଟା ଅଇଜାଅ,

ତେଇ ବାସା ଅଇବାକେ କେ ମିସା ନ ରଅଡ଼ ।”

ଆରି ମିସା ଲେକା ଅଇଲା ଆଟେ,

“ତାର ଜାଗାଇ ସେବା କରବାକେ ଆରି ଗଟେକ୍ ଲକ୍ ମିସ ।”

<sup>୨୧</sup> ✨“ସେଟାର୍ ପାଇ, ଜିସୁମାପୁରୁ ଆମର୍ ସଙ୍ଗ୍ ଗାଲାବେଲେ ଜେ ଆମର୍ ଦଲେ ସବୁବେଲେ ରଇଲା, ସେନ୍ତାରି ଗଟେକ୍ ଲକ୍କେ

✨ ୧:୧୮ ୧:୧୮ ମାଡ଼ିଉ ୨୭:୩-୮ ✨ ୧:୨୧ ୧:୨୧ ମାଡ଼ିଉ ୩:୧୭; ମାରକ ୧:୯; ଲୁକ୍ ୩:୨୧; ମାରକ ୧୭:୧୯; ଲୁକ୍ ୨୪:୫୧

ବାବୁବାବୁ ଆଚେ । ୨୨ ଜନ୍ ଲକ୍ଷ୍ମୀ ଆମେ ବାବୁ, ପରମେସ୍ୱର ଜିସୁକେ ଜେନ୍ତୁ ଜିବନ୍ କରି ଉଟାଇଲା, ସେ ବିସଇ ଆମରସଙ୍ଗ୍ ସେ ସାକି ଅଇବାବୁଆଚେ । ଜଅନ୍ ଜିସୁକେ ତୁବନ୍ଦେଲା ବେଲେଅନି, ପରମେସ୍ୱର ଆମରଗାନେଅନି ତାକେ ସରଗେ ନେବା ଜାକ, ସେ ଲକ୍ଷ୍ମୀ ଆମର ଦଲେ ରଇବାବୁ ଆଚେ ।” ୨୩ ସେମନ୍ ଦୁଇ ଲକ୍ଷ୍ମୀ ନାଉଁ ଦେଲା । ଜସେପ୍ ଜେକି ବରସବା ଆରି ଜୁସତକ୍ ବଲି ମିସା କଇବାଇ ଆରି ମଡ଼ିୟ । ୨୪ ଆରି ସେମନ୍ ପାରତନା କଲା, “ମାପୁରୁ ତମେତା ସବୁ ଲକ୍ଷ୍ମୀ ମନର୍ କାତା ଜାନାସ୍ । ଜିଉଦା ଜନ୍ ଜାଗାଇ ରଇବାବୁରଇଲା, ଟିକ୍ ତେଇ ଉଟିଗାଲା । ପଚେ ତାର୍ ଜାଗାଇ ତମେ ବାଟିରଇବା ଲକ୍ଷ୍ମୀ, ଏ ଦୁଇ ଲକ୍ଷ୍ମୀ ବିତରେ ଅନି କେ ଅଇରଇସି ? ୨୫ କେ ପେରିଡ଼ ସିସକାମ୍ କରିପାରସି, ତାକେ ଆମକେ ଜାନାଆ ।” ୨୬ ତାର୍ପଚେ ଦୁଇ ଲକ୍ଷ୍ମୀଗାନେଅନି ଗଟେକ୍ ଲକ୍ଷ୍ମୀକେ ବାବୁବାବୁକେ କେଡ଼ପୁଟାଇଲା । କେଡ଼ପୁଟାଇଲାକେ ମଡ଼ିୟସର୍ ନାଉଁ ପୁଟଲା । ସେନ୍ତାରି, ଏଗାର୍ଗା ସିସମନର୍ ଦଲେ ସେ ମିସଲା ।

## ୨

### ସୁକଲ୍‌ଆଡ଼ମା ଆଇବାଟା

୧ ଜନ୍ ଦିନେ ସେମନ୍ ପେନ୍‌ଟିକସ୍ ପରବ୍ ମାନତେରଇଲା, ଜିସୁକେ ବିସବାସ୍ କରବା ସବୁ ଲକ୍ଷ୍ମୀ ଗଟେକ୍ ଜାଗାଇ ରୁଣ୍ଡିରଇଲା । ୨ ଅଟାଡ଼ ଆକାସେଅନି ବେସି ପବନ୍ ଆଇଲାପାରା ଗଟେକ୍ ସବଦ୍ ଅଇଲା । ଆରି ଜନ୍ ଗରେ ସେମନ୍ ବସି ରଇଲା, ସେଟା ସେ ସବଦେ ପୁରୁନ୍ ଅଇଲା । ୩ ତାର୍ପଚେ ସେମନ୍ ଦେକ୍‌ଲା, କେତେଟା ଜଇଜିବ୍ ଉଦ୍‌ଲିକରି ବିଟି ଅଇଲା । ଆରି ତେଇ ରଇଲା ସବୁ ବିସବାସିମନ୍‌କେ ଚିଇଲା । ୪ ସେମନ୍ ସବୁଲକ୍ ସୁକଲ୍‌ଆଡ଼ମା ପୁରାପୁରୁନ୍ ଅଇଲା ଆରି ଆଡ଼ମା ଦେଲା ବପୁ ଇସାବେ ନାଜାନ୍‌ଲା ବାସାମନର୍ ସଙ୍ଗ୍ କାତା ଅଇବାବୁ ଦାରଲା ।

୫ ଜଗତର୍ ବିନ୍ ବିନ୍ ଦେସେଅନି ଆସିରଇଲା ଜିଉଦି ଲକ୍ଷ୍ମୀ ସେଡ଼କିବେଲେ ଜିରୁସାଲମେ ରଇଲା । ୬ ଏନ୍ତାରି ଅଇଲାଟା ଦେକି ସେମନ୍ ସାରଦା ଅଇଗାଲା । କାଇକେବଇଲେ ସେ ବିସବାସିମନ୍ ତାକର୍ ତାକର୍ ବାସାଇ କାତା ଅଇବାଟା ସେମନ୍ ସୁନ୍‌ଲା ।

୭ ସେମାନର ବୁଦ୍ଧିଗୁପିଗାଲା ଆରି କାବା ଅଇଜାଇ ପାଚାରଲାଇ,  
 “ଏନ୍ତାରି ବାସାଇ କାତା ଅଇବା ଲକ୍ମନ୍ ଗାଲିଲିଅନି ନଅଡ଼ କି  
 ? ” ଯେନ୍ତିଆଲେ ଆମେ କେନ୍ତି ସେମନ୍‌କେ ଆମର ନିଜର ନିଜର  
 ଜନମ୍ ଜାଗାର ବାସାଇ କାତା ଅଇବାଟା ସୁନିଆରୁ ? ୯ ଆମେ  
 ପାର୍ତିୟ, ମାଦିୟ, ଏଲୀମିୟ ଆରି ମେସପଟାମିୟ, ଜିଉଦା ଦେସ  
 ଆରି କାପ୍‌ପାଦକିଆ, ପନ୍ତୁ ଆରି ଆସିଆ, ୧୦ ପିରିଜିଆ ଆରି ପପୁଲିଆ,  
 ମିସର ଆରି କୁରିଣି ଲଗେ ରଇଲା ଲିବିଆ ଜାଗାର ଲକ୍ । ଆମର  
 ବିଡ଼ରେ ରମ୍‌ରାଇଜେଅନି ଆସିରଇବା, ଜନମେ ଅନି ଜିଉଦି ଅଇଲା  
 ଲକ୍ ଆରୁ ଆରି ପଚେ ଜିଉଦି ଦରମ୍ ନେଲା ଲକ୍ ମିସା ଆରୁ ।  
 ୧୧ ଆମର ବିଡ଼ରେଅନି କେତେଲକ୍ କିର୍ତିୟଅନି ଆରି ଆରବିୟଅନି  
 ଆଇଲୁ ଆରୁ । ଏନ୍ତି ଆମେ ସବୁ ବିନ୍ ବିନ୍ ଜାଗାଇଅନି ଆଇଲୁ ଆରୁ ।  
 ଏନ୍ତି ବଇଲେ ମିସା ପର୍ମେସର୍ କଲା ବଡ଼ ବଡ଼ କାବାଅଇଜିବା କାମ୍  
 ଏ ଲକ୍ମନ୍ ଆମର ନିଜର ନିଜର ବାସାଇ କାତାଅଇବାଟା ସୁନ୍‌ଲୁନି  
 ।” ୧୨ ଏନ୍ତି ବଲି ସେମନ୍ ବେସି କାବାଅଇଗାଲାଇ । ଆରି ସେମାନର  
 ବୁଦ୍ଧି ଆଜି ଗାଲା । ଆରି ତାକର ତାକର ବିଡ଼ରେ “ଏଟା କେନ୍ତାର  
 ଅଇଲା ତେବେ ?” ବଲି ସବୁ ବେଲେ ପାଚାର୍‌ଉଟାରୁ ଅଇତେ  
 ରଇଲାଇ । ୧୩ ମାତର୍ ବିନ୍ ଲକ୍ମନ୍ ବିସ୍‌ବାସିମନ୍‌କେ କିଜାଇକରି  
 କଇଲାଇ, “ସେମନ୍ ମାଡିଆଚଡ଼ !”

### ପିତର୍ କବର୍ ଜାନାଇବାଟା

୧୪ ପିତର୍ ତାର ସଙ୍ଘ ରଇଲା ଏଗାରଟା ପେରିଡ଼ ମନର୍ ସଙ୍ଘ  
 ଚିଆଅଇ ଆଉଲି ଅଇ କଇଲା, “ଏ ମର୍ ପାରା ଜିଉଦି ଲକ୍ମନ୍  
 ଆରି ଜିରୁସାଲମେ ରଇବା ସବୁ ବାଇମନ୍, ମର୍ କାତା ମନ୍‌ଦେଇ  
 ନିମାନ୍ ସୁନା । ଏଟା କାଇଟା ଅଇଲାନି ବଲି ମୁଇ ତମ୍‌କେ ବୁଜାଇ  
 କଇବି । ୧୫ ଏବେ ସାକ୍‌ଲିଆ ନଅଟା ବେଲା ଅଇଲା ଆଚେ । ତମେ  
 ବାବ୍‌ଲାପାରା ଏ ଲକ୍ମନ୍ ମାତର୍ ନାଇ । ୧୬ ଏଟା ଜଏଲ୍ ନାଉର୍  
 ବବିସଡ଼ବକ୍ତା କଇଲା କାତା ପାରା ଗଟ୍‌ନା ଗଟି ଆଚେ ।”

୧୭ ସେଟା କାଇଟା ବଇଲେ ପର୍ମେସର୍ କଇଲାନି,  
 “ସାରାସାରି ଦିନେ ମୁଇ ଏ ସବୁ ବିସଇ କରବି ।

ମର୍ ଆଡ଼ମା ଜବର୍ ଅଇତେ ସବୁବାଟର୍ ଲକ୍‌କେ ଦେବି ।  
 ତମର୍ ପିଲାଜିଲା ମୁଇ କଇବା କାତା କଇବାଇ ।

ତମର ଦାଙ୍ଗୁଡ଼ାପିଲାମାନଙ୍କେ ମୁଇ ଦର୍ସନ୍ ଦେକାଇବି ।  
 ଆରି ତକରା ଲକ୍ମନ ମର ବିସଇନେଇ ସପନ୍ ଦେକ୍‌ବାଇ ।  
 ୧୮ ସେ ଦିନମାନଙ୍କେ ମର ଆତ୍ମା ଜବର୍ ଅଇତେ ମର ଦାଙ୍ଗୁଡ଼ା  
 ଅଇରଇବା ମାଇଜିମୁନ୍‌ସମାନଙ୍କେ ଆଜାତି ଦେବି ।  
 ସେମନ୍ ମୁଇ କଇବା କାତା କଇବାଇ ।  
 ୧୯ ଆକାସେ କାବା ଅଇଜିବା କାମ୍ କରବି ।  
 ଦରତନି ତେଇ ମିସା କାବାଅଇଜିବା ଚିନ୍‌ମନ୍ କରବି ।  
 ଲକ୍ମନ ବନି, ଜଇ ଆରି କାଲିଆ ଦୁଆଁ ଦେକ୍‌ବାଇ ।  
 ୨୦ ବେଲ୍‌କେ ଆନ୍ଦାର୍ ଡିସ୍‌ଲା ପାରା କରାଇବି,  
 ଜନ୍, ବନି ପାରା ଡିସ୍‌ବାକେ କରାଇବି ।  
 ମୁଇ ବାଉଡ଼ି ଆଇବା ସେ ବଡ଼ ଉଜଲର୍ ଦିନ୍ ଆଗତୁ, ଏଟାସବୁ ଅଇସି  
 ।  
 ୨୧ ଜେଡ଼କି ଲକ୍ ମର ନାଉଁ ଦାରି ଡାକ୍‌ବାଇ,  
 ସେମାନଙ୍କେ ମୁଇ ରକିଆ କରବି ।”

୨୨ ପିତର କଇଲା, “ଏ ଇସ୍ରାଏଲ୍ ଦେସର୍ ଲକ୍ମନ ତମେ  
 ମୁଇ କଇବା କାତା ସୁନା । ପରମେସର୍‌ସେ ବାଟି ପାଟାଇଲା  
 ଲକ୍, ନାଜରିତ୍ ଗତର୍ ଜିସୁ ବଲିକରି ସେ ତମର ଲଗେ ରଇଲା  
 ବେଲେ, ଦେକାଇଦେଲା । ସେଟା କେନ୍ଦ୍ରା ବଇଲେ, ପରମେସର୍  
 ତାର୍‌ତେଇଅନି କାବା ଅଇଜିବା କାମ୍ କଲାଆତେ । ଏଟା ସତ୍ ବଲି  
 ତମେ ଜାନିଆଗାସ୍ । ୨୩ ☆ତାର୍ ଆଗତୁର୍ ଜଜ୍‌ନା ଇସାବେ ସେ  
 କାତା ଦେଇସାରାଇରଇଲା କି, ଜିସୁ ତମର ଆତେ ସର୍‌ପାଇ ଅଇସି  
 । ତାର୍‌ପତେ ତାର୍ ନିୟମ୍ ନ ମାନ୍‌ବା ଲକ୍ମନ ତାକେ କୁର୍‌ସେ  
 ଚଗାଇ ମରାଅତ୍ ବଲି ତମେ ତାକେ ଏନ୍ତି କଲାସ୍ । ୨୪ ☆ମାତର୍  
 ପରମେସର୍ ଜିସୁକେ ମଲାଟାନେଅନି ଆରି ତରେକ୍ ଉଟାଇଲା ।  
 ମରନର୍ ବପୁତେଇଅନି ତାକେ ମୁକ୍‌ଲାଇଲା । କାଇକେବଇଲେ କେ  
 ମିସା ତାକେ ମରାଇକରି ସେ ଜାଗାଇ ସଙ୍ଗଇ ନାପାରୁଲା । ୨୫ ଏ  
 ବିସଇ ଦାଉଦ୍ ରାଜା ଏନ୍ତି କଇ ଆତେ । ସେଟା କାଇଟା ବଇଲେ,  
 “ପରମେସର୍ ସବୁ ବେଲା ମର ମୁଆଟେ ରଇବାଟା ଦେକ୍‌ଲି ।  
 ସେ ମର ସଙ୍ଗ ଆତେ ।

☆ ୨:୨୩ ୨:୨୩ ମାତିଉ ୨୭:୩୫; ମାର୍କ ୧୫:୨୪; ଲୁକ୍ ୨୩:୩୩; ଜଅନ୍ ୧୯:୧୮ ☆ ୨:୨୪  
 ୨:୨୪ ମାତିଉ ୨୮:୫,୬; ମାର୍କ ୧୬:୬; ଲୁକ୍ ୨୪:୫

ସେଟାରପାଇ ମକେ କେ ମିସା କଟପଟ କରିନାପାରଡ଼ ।

୨୭ ସେଟାର ପାଇ ମୁଇ ସାରଦାସଙ୍ଗ୍ ଆତି ।

ଆରି ସାରଦାର କାତା କଇବି ।

ମର୍ ଏ ମର୍ବା ଗାଗଡ଼ ରଇଲେ ମିସା ମୁଇ ସବୁବେଲେ

ତମର୍ ତେଇ ଆସା କର୍ବି ।

୨୭ କାଇକେ ବଇଲେ ତୁଇ ମକେ ମଲାଲକ୍ମନର୍ ଜାଗାଇ ଚାଡ଼ି ନ ଦିଆସ୍ ।

ତମର୍ ସୁକଲ୍ ଦାଙ୍ଗ୍ତାକେ ସମାଦିଟାନେ କୁଇବାକେ ନ ଚାଡ଼ାସ୍ ।

୨୮ ତମେ ମକେ ଜିବନର୍ ବାଟ୍ ଦେକାଇ ଆଗାସ୍ ।

ତମେ ମର୍ ସଙ୍ଗ୍ ଆଗାସ୍, ସେଟାରପାଇ ମୁଇ ସାରଦା ସଙ୍ଗ୍ ରଇବି ।”

୨୯ ଆରି ପିତର୍ କଇଲା, “ଏ ଇସ୍ରାଏଲର୍ ବାଇବଇନିମନ୍, ଆମର୍ ଆନିଦାଦିବେଲର୍ ଦାଉଦ୍ ରାଜାର ବିସଇ ଡାଟ୍ସଙ୍ଗ୍ କଇବାକେ ମର୍ ଅଦିକାର୍ ଆଟେ । ସେ ମଲାକେ ତାକେ ତପି ଦେଲାଇ । ସେ ତପ୍ଲା ଜାଗା ଏବେ ଜାକ ଇତି ଆଟେ । ୩୦ ସେ ଗଟେକ୍ ବବିସଡ଼ବକ୍ତା ରଇଲା ଆରି ପର୍ମେସର୍ ସପଡ଼କରି କଇଲା ବିସଇ ଜାନିରଇଲା । ପର୍ମେସର୍ ତାକେ କାତା ଦେଇରଇଲା ଜେ, ତାର୍ ଗଟେକ୍ ନାଡ଼ିଡ଼ି ଦିନେକ୍ ତାର୍ପାରା ସାସନ୍ କର୍ସି । ୩୧ ଏ ବିସଇ ଆଗେ ସେ ଜାନି ରଇଲାଟପାଇ ପର୍ମେସର୍ ମସିଅକେ ମଲାତେଇଅନି ଆରିତରେକ୍ ଜିବନ୍ କରାଇସି ବଲି ସେ କଇପାରଲା ।”

“ପର୍ମେସର୍ ତାକେ ମରିକରିସେ ତେଇ ରଇବାକେ ଚାଡ଼ିଦେଏ ନାଇ

ଆରି ତାର୍ ଗାଗଡ଼ ସମାଦି ତେଇ କୁଇ ଜିବାକେ ଚାଡ଼େନାଇ ।”

୩୨ ଏବେ ଏ ଜିସୁକେ ପର୍ମେସର୍ ଜିବନ୍ ଦେଇ ଉଟାଇଆଟେ । ଆମେ ସବୁ ସେ ଗଟ୍ନାର୍ ସାକି । ୩୩ ପର୍ମେସର୍ ତାକେ ତାର୍ ଉଜାବାଟେ ବସ୍ବାକେ ଉଟାଇଆଟେ । ଆରି ସେ କାତା ଦେଲା ଇସାବେ ତାର୍ଟାନେଅନି ସୁକଲ୍ଆଡ଼ମା ପାଇଲାଆଟେ । ତମେ ଏବେ ଜନ୍ଟା ଦେକଲାସ୍ନି ଆରି ସୁନ୍ଲାସ୍ନି, ସେଟା ଅଇଲାନି ତାର୍ ଦାନ୍କରି ରଇବାଟା । ଜନ୍ଟା କି ସେ ଆମ୍ବକେ ଜବର୍ ଅଇତେ



ଆଜାଡ଼ି ଦେଲାଆଚେ । ୩୪ ସରଗେ ଗାଲା ଲକ୍ ଦାଉଦ୍ ନଏଁ । ମାତର୍ ସେ କଇଲା,

“ପର୍ମେସର୍ ମର୍ ମାପ୍‌ରୁକେ କଇଲା

ତମର୍ ସବୁ ସତ୍‌ରୁମନ୍‌କେ ଆରାଇବା ଜାକ ମର୍ ଉଜାବାଟେ  
ବସ୍ ଆରି ସାସନ୍ କର୍ ।”

୩୫ ଆରି ତର୍ ସତ୍‌ରୁମନ୍‌କେ ତର୍ ପାଦ୍‌ତଲେ ନ ଆନ୍‌ବା  
ଜାକ ମର୍ ଉଜାବାଟେ ବସି ର । ୩୬ ପିତର୍ ଆରି କଇଲା  
“ଏ ଇସ୍ରାଏଲର୍ ସବୁ ଲକ୍‌ମନ୍, ତମେ ଜନ୍ ଜିସୁକେ କୁର୍ସେ  
କୁଟିମାରି ମରାଇରଇଲାସ୍, ପର୍ମେସର୍ ତାକେ ମାପ୍‌ରୁ ଆରି  
ମସିଅ କଲାଆଚେ ବଲି ଡାଟ୍‌ସଙ୍ଗ୍ ଜାନ୍‌ବାର୍‌ଆଚେ ।” ୩୭ ଏ  
କାତା ପିତର୍‌ଟାନ୍‌ଅନି ସୁନ୍‌ଲା ସବୁ ଲକ୍‌ମନ୍ ତାକର୍ ନିଜର୍  
ଚୁଲ୍ ଏତାଇକରି ମନ୍ ବିତ୍‌ରେ କିଲ୍‌ବିଲ୍ ଅଇଗାଲାଇ । ସେମନ୍  
ପିତର୍‌କେ ଆରି ପେରିଡ଼ମନ୍‌କେ ପାଚାରୁଲାଇ, “ଏ ବାଇମନ୍ ଏନ୍ତାର୍  
ବଲି କଇଲେ ଆମେ କାଇଟା କର୍‌ବାର୍ ଆଚେ ?” ୩୮ ପିତର୍  
ସେମନ୍‌କେ କଇଲା, “ତମେ ଗଟେକ୍ ଗଟେକ୍ ଲକ୍ ପାପେଅନି  
ବାଉଡ଼ିକରି ଜିସୁ କିରିସ୍‌ଟର୍ ନାଉଁ ଦାରି ହୁବନ୍ ନେବାର୍ ଆଚେ,  
ଜେନ୍ତାରି କି ତମର୍ ପାପ୍ ସବୁ କେମା ଅଇସି ଆରି ପରମେସର୍  
ତମ୍‌କେ ସୁକଲ୍ ଆତ୍‌ମା ଦେଇସି । ୩୯ ଏ ସପତ୍ ତମର୍‌ପାଇ  
ଆରି ତମର୍ ପିଲାମନ୍‌ର୍‌ପାଇ । ଆରି ଇଡିଅନି ଦୁରିକେ ରଇବା  
ସବୁର୍‌ପାଇ । ଜନ୍ ସବୁଲକ୍‌କେ ସେ, ତାର୍ ଲଗେ ଡାକ୍‌ଲାନ୍ ।”  
୪୦ ଆରି ପିତର୍ ସେମନ୍‌କେ ଜାଗ୍‌ରଡ଼ କରାଇବାକେ ବେସି ବିସଇ  
କଇଲା ଆରି ସେମନ୍‌କେ ବାବୁଜିଆ କଲା । ବିସ୍‌ବାସ୍ ନ କର୍‌ବା  
ଜିଉଦି ବାଇମନ୍‌କେ ଆଇତେରଇବା ବଡ଼ ଡଣ୍ଡେଅନି ନିଜ୍‌କେ ରକିଆ  
କରା । ବଲି କଇଲା । ୪୧ ତେଇ ପିତରର୍ କାତା ସୁନି ବେସି ଲକ୍  
ବିସ୍‌ବାସ୍ କଲାଇ । ଆରି ସିସ୍‌ମନ୍ ସେମନ୍‌କେ ହୁବନ୍ ଦେଲାଇ । ସେ  
ଦିନେ ତିନିଅଜାର୍ ଲକ୍‌ମନ୍ ତାକର୍ ଦଲେ ମିସ୍‌ଲାଇ । ୪୨ ସେମନ୍  
ପେରିଡ଼ମନ୍ ସିକାଇଲା ବିସଇ ମାନ୍‌ଲାଇ । ମିସିବିଡ଼ି ରଇବାକେ,  
ମିସିକରି କାଇବାକେ, ଆରି ପାର୍‌ତନା କର୍‌ବାକେ ।

ବିସ୍‌ବାସିମନ୍‌ର ଜିଉନା କାଉନା

୪୩ ଆରି ଲକ୍ମନ୍ ଡରିଜାଇତେରଇଲା । ପରମେସର୍ ପେରିଡ଼ମନ୍ ତେଇଅନି ବେସି କାବାଅଇଜିବା କାମ୍ମନ୍ କରତେ ରଇଲା । ସବୁ ଲକ୍ମନ୍ ପରମେସର୍କେ ନାମ୍ଲା । ୪୪ \*ଜିସୁକେ ବିସ୍ବାସ୍ କଲା ଲକ୍ମନ୍ ଗଟେକ୍ ଗରର୍ ଲକ୍ପାରାଅଇ ରଇତେ ରଇଲା । ଆରି ତାକର୍ତେଇ କାଇକାଇଟା ରଇଲା, ସେଟା ସେମନ୍ ବାଟା କରତେରଇଲା । ୪୫ ତାକର୍ ବିଡ଼ରେ କେତେଲକ୍ ଜମି ଆରି ନିଜର୍ପାଇ ରଇବାଟା ବିକିକରି, ସେ ତାରୁ ଦରକାର୍ ଅଇଲା ଲକ୍ମନ୍କେ ଦେଇତେରଇଲା । ୪୬ ସବୁଦିନ୍ ପାର୍ତନା କରବା ମନ୍ଦିରେ ଗଟେକ୍ ଦଲ୍ ଅଇ ମିସ୍ତେରଇଲା । ଗରେ ଗରେ ମିସିବିଡ଼ି କାଇତେରଇଲା । ସାର୍ଦାସକ୍ ରଇକରି, ମନେ କାଇଟା ନ ବାବି ଦିଆନିଆ ଅଇତେରଇଲା । ୪୭ ସେମନ୍ ପରମେସର୍କେ ଡାକ୍ପୁଟା କରତେରଇଲା ଆରି ଜିରୁସାଲେମର୍ ସବୁଲକ୍ ସେମନ୍କେ ନିକ ବଲି ବାବ୍ତେରଇଲା । ମାପୁରୁ ଜନ୍ ଲକ୍ମନ୍କେ ମୁକ୍ତି କରତେରଇଲା, ଦିନ୍କେ ଦିନ୍ ସେମନ୍ ଦଲେ ମିସାଇତେରଇଲା ।

## ୩

### ଗଟେକ୍ ଚଟା ନିକ ଅଇଲା

୧ ଗଟେକ୍ ଦିନେ ପିତର୍ ଆରି ଜଅନ୍ ପାର୍ତନା କରବାକେ ମନ୍ଦିରେ ଗାଲାଇ, ଜେତେବେଲେ କି ପାର୍ତନା କରବା ବେଲା ମୁଇଦାନିଆ ତିନ୍ ଗାଁଟା ଅଇରଇଲା । ୨ ତେଇ ଗଟେକ୍ ଲକ୍ ରଇଲା । ସେ ଜନମେଅନି ଚଟା । ତାକେ ସବୁଦିନ୍ ଲକ୍ମନ୍ ବଇକରି ସୁନ୍ଦର୍ ବଲି କଇବା ମନ୍ଦିରର୍ ତିଆଗଡ଼ି, ନିଆ ଆନା କରତେରଇଲା । ସେ ଜେନ୍ତିକି ମନ୍ଦିରେ ଆଇଲା ଲକ୍ମନ୍କେ ବିକ୍ ମାଜି ପାର୍ସି । ୩ ପିତର୍ ଆରି ଜଅନ୍ ମନ୍ଦିର ବିଡ଼ରେ ପୁରବାଟା ଦେକି ସେ ସେମନ୍କେ କାଇଟା ମିସା ଦିଆ, ବଲି ବିକ୍ମାଗଲା । ୪ ପିତର୍ ଆରି ଜଅନ୍ ତାକେ ନିମାନ୍କରି ତିରିଆଇ ଦେକ୍ଲାଇ ଆରି ପିତର୍ କଇଲା, “ଆମର୍ ବାଟେ ଦେକ୍ !” ୫ ସେ କାଇଟାଆଲେ ପାଇବା ଆସାଇ ସେମନ୍ ବାଟେ ମୁ ରୁଲାଇ ଦେକ୍ଲା । ୬ ମାତର୍ ପିତର୍ ତାକେ କଇଲା, “ମର୍ଲଗେ ସୁନା କି ରୁପା ନାଇ, ମକେ ଜାଇଟା

\* ୨:୪୪ ୨:୪୪ ପେରିଡ଼ ୪:୩୨-୩୫

ଆରେ ସେଟା ତକେ ଦେଲିନି । ନାଜରିତର୍ ଜିସୁର୍ ନାଉଁଦାରି ମୁଇ ଆଦେସ୍ ଦେଲିନି, ଉଟ୍ ଆରି ଇଣ୍ଡୁ !” ୭ ଏନ୍ତୁ କଇକରି ପିତର୍ ତାକେ ଉଜା ଆଡ଼ ଦାରି ଉଟାଲଲା, ସେ ଦାପରେ ସେ ଲକର୍ ପାଦ୍ ଆରି ଗଡ଼ ସବୁ ଡାଟ୍ ଅଇଲା । ୮ ସେ ଚିକାଲନା ଡେଗଇକରି ଉଟ୍ଲା ଆରି ଇଣ୍ଡୁବାର୍ ଦାରଲା । ସେ ଇଣ୍ଡୁ ଇଣ୍ଡୁ ଡେଗଇ ଡେଗଇ ପରମେସରର୍ ଡାକ୍ପୁଟା କରକରି ଡାକର୍ ସଙ୍ଗ୍ ମନ୍ଦିରେ ଗାଲା । ୯ ତେଇ ରଇବା ଲକ୍ମନ୍ ତାକେ ଇଣ୍ଡୁବାଟା ଆରି ପରମେସରକେ ଡାକ୍ପୁଟା କରବାଟା ଦେକଲାଇ । ୧୦ ମନ୍ଦିରର୍ ସୁନ୍ଦର୍ ନାଉଁର୍ ଡିଆଗତି ବସି ରଇଲା ମାଙ୍ଗ୍ଡିଆ ବଲି ଚିନ୍ଲାଇ । ଆରି ତାକେ ଜାଇଟା ଗଟି ରଇଲା ସବୁ ଜାନି କାବାଅଇଜାଇ କାନାବାନା ଅଇଲାଇ ।

### ପାର୍ତନା ମନ୍ଦିରେ ପିତରର୍ ଜାନାଇବାଟା

୧୧ ସେ ଲକ୍ ପିତରକେ ଆରି ଜଅନ୍କେ ନ ଚାଡ଼ତେରଇଲା । ସଲ୍ମନର୍ ପିଣ୍ଡାଇ ଡାକର୍ ସଙ୍ଗ୍ ରଇବାଟା ଦେକି, ଲକ୍ମନ୍ କାବାଅଇଗାଲାଇ । ପଚେ ପାଲାଇ ଆଇଲାଇ । ୧୨ ପିତର୍ ସେମନ୍କେ ଦେକି କଇଲା, “ଏ ଇସ୍ରାଏଲର୍ ବାଇମନ୍, ତମେ କାଇକେ କାବାଅଇଜାଇ ଆମର୍ ବାଟେ ଏନ୍ତାଟ୍ ଦେକ୍ଲାସ୍ନି ? କାଇଟା ବାବ୍ଲାସ୍ନି ? ଆମର୍ ନିଜର୍ ବପୁସଙ୍ଗ୍ କି ଦରମ୍ପସଙ୍ଗ୍ ଏ ଲକ୍କେ ଇଣ୍ଡୁବା ବପୁ ଦେଲୁଆରୁ ? ୧୩ ଆମର୍ ଆନିଦାଦିମନର୍ ପରମେସର୍ ଅବ୍ରାଆମର୍, ଇସାକର୍ ଆରି ଜାକୁବର୍ ପରମେସର୍ ତାର ସେବାକାରିଆ ଜିସୁକେ ଡାକ୍ପୁଟା କଲାଆଚେ । ମାତର୍ ତମେ ତାକେ ସାସନ୍କାରିଆମନର୍ ଆତେ ସର୍ପିଦେଲାସ୍ । ଏନ୍ତୁ କି ପିଲାଡ଼ ତାକେ ଚାଡ଼ିଦେବାକେ ମନ୍କରି ରଇଲେ ମିସା ତାର୍ ମୁଆଟେ ଚାଡ଼ନାଇ ବଲି କଇଲାସ୍ । ୧୪ ✧ ସେ ଆକା ଗଟେକ୍ସେ ସୁକଲ୍ ଆରି ଦରମ୍ ଲକ୍ ରଇଲା । ମାତର୍ ତମେ ତାକେ ନାମାସ୍ ନାଇ ଆରି ତାର୍ ବାଦୁଲେ ଗଟେକ୍ ନର୍ମାରୁକେ ମୁକ୍ଲାଇବାକେ ପିଲାଡ଼କେ ଗୁଆରି କଲାସ୍ । ୧୫ ଜେ ଜିବନର୍ ବାଟ୍ ଦେକାଉ, ତାକେ ତମେ ମାର୍ଲାସ୍, ମାତର୍ ପରମେସର୍ ତାକେ ମଲାଟାନେଅନି ଆରି ତରେକ୍ ଜିବନ୍ କରି ଉଟାଲଲା । ଆମେ ଅଇଲୁନି ତାର୍ ସାକି । ୧୬ ତାର୍ ନାଉଁର୍

✧ ୩:୧୪ ୩:୧୪ ମାଡ଼ିଉ ୨୭:୧୫-୨୩; ମାର୍କ ୧୫:୬-୧୪; ଲୁକ୍ ୨୩:୧୩-୨୩; ଜଅନ୍ ୧୯:୧୨-୧୫

ବପୁ ସଙ୍ଗେ ଏ ଚଟା ନିମାନ୍ ଅଇଲାଆତେ । ଜନ୍ ଗର୍ନା ଏବେ ତମେ ନିଜେ ଦେକି ସତ୍ତ୍ୱ ବଲି ଜାନ୍‌ଲାସ୍, ସେଟା ଅବକା ତାର୍ ନାଉଁଦାରି ବିସ୍‌ବାସ୍ କଲାକେସେ ମିଲ୍‌ଲା ଆତେ । ଜିସୁକେ ବିସ୍‌ବାସ୍ କଲାକେ ସେ ନିମାନ୍ ଅଇଲା ଆତେ, ଏଟା ତମେ ଦେକ୍‌ଲାସ୍ ।”

୧୭ “ସେଟାର୍ ପାଇ ଏ ଇସରାଏଲର୍ ବାଇମନ୍, ତମେ ଆରି ତମର୍ ନେତାମନ୍ ଜିସୁକେ ଜାଇଟା କଲାସ୍, ସେଟା ନାଜାନିକରି କଲାସ୍, ଏଟା ମୁଇ ଜାନି । ୧୮ ବେସି ବରସ୍ ଆଗ୍‌ତୁ ତାର୍ ବବିସ୍‌ତ୍‌ବକ୍‌ତା ମନର୍‌ଟାନେ ଅନି ଜାନାଇରଇବା କାତା ଇସାବେ ଏବେ ସିଦ୍ ଅଇଲା ଜେ, ସେ ମସିଅ ଦୁକ୍‌ପାଇବାକେ ଅଇସି । ୧୯ ସେନ୍ତିଆଲେ ତମେ ମନ୍‌ବାଦ୍‌ଲାଇ କରି ପରମେସରର୍ ବାଟେ ବାଉଡି ଆସା । ତେବେ ସେ ତମର୍ ପାପ୍ କେମା କରସି ।” ୨୦ ଆରି ମାପ୍‌ରୁଟାନେଅନି ଆଡ୍‌ମାଇ ବପୁ ପାଇସା, ପରମେସର୍ ତମର୍‌ପାଇ ସେ ଆଗେଅନି ବାଟ୍‌ଲା, ମସିଅ ଜିସୁକେ ପାଟାଇସି । ୨୧ ପର୍‌ମେସର୍ ସବୁ ବିସଇ ନୁଆ କରବା ବେଲା ଜାକ ସେ ସର୍‌ଗେ ରଇସି । ଏଟା ପର୍‌ମେସର୍ ପୁର୍‌ବେ ରଇଲା ତାର୍ ସୁକ୍‌ଲ୍ ବବିସ୍‌ତ୍‌ବକ୍‌ତାମନ୍‌କେ ସପତ୍ କରଇଲା । ୨୨ ସେ ବିସଇ ମସା କଇରଇଲା, ତମର୍ ମାପ୍‌ରୁ ପରମେସର୍ ତମର୍ ଲଗେ ମର୍‌ପାରା ବବିସ୍‌ତ୍‌ବକ୍‌ତାକେ ପାଟାଇସି । ତମର୍ ବାଇମନ୍‌ ବିଡ୍‌ରେ ଅନି ଗଟେକ୍ ଲକ୍‌କେ ପାଟାଇସି । ସେ ଜେଡ୍‌କି ବିସଇ କଇସି, ସେଟା ସବୁ ତମେ ମାନ୍‌ବାର୍ ଆତେ । ୨୩ କେ ଜଦି ସେ ବବିସ୍‌ତ୍‌ବକ୍‌ତାର୍ କାତା ନ ନାମେ ତାକେ ପରମେସରର୍ ଲକ୍‌ମନ୍‌ଟାନେଅନି ଅଲ୍‌ଗା କରି କୁରୁପ୍‌ନାସ୍ କରିପାକାଇସି । ୨୪ ଜେଡ୍‌କି କବର୍ ସୁନିରଇବା ବବିସ୍‌ତ୍‌ବକ୍‌ତା ରଇଲା, ସାମ୍‌ଏଲ୍ ଆରି ଜେ ଜେ ତାର୍ ପଟେ ଆଇଲା ଆରି ଏବେ ଜାଇଟା ଗର୍‌ଲା, ସେ ବିସଇ କଇରଇଲା । ୨୫ ପର୍‌ମେସର୍ ବବିସ୍‌ତ୍‌ବକ୍‌ତାମନ୍‌ ଟଣ୍ଡେଅନି ଜନ୍‌ସବୁ କାତା ଦେଲାଆତେ ସେଟା ତମର୍ ପାଇସେ ଟିକ୍ । ତମର୍ ଆନିଦାଦିମନ୍‌ ସଙ୍ଗ୍ ଜନ୍ ରାଜିନାମା କଲାଆତେ, ତମେ ମିସା ତେଇ ମିସିଆଟାସ୍ । ପର୍‌ମେସର୍ ଅବରାଆମ୍‌କେ କଇରଇଲା, “ମୁଇ ତମର୍ ନାତିତିତି ମନର୍‌ଟାନେଅନି ଜଗତର୍ ସବୁ ଲକ୍‌କେ ଆସିର୍‌ବାଦ୍ କରବି । ୨୬ ସେଟାର୍‌ପାଇ ପରମେସର୍ ତାର୍ ସେବାକାରିଆକେ ବାଟ୍‌ଲା ଆରି

ତମକେ ସବୁ ଲକ୍ଷ୍ୟକେ ବାନିଆ ବାଟେଅନି ବାଉଡ଼ାଇଆନ୍‌ବାକେ ଆରି ଆସିର୍‌ବାଦ୍ କର୍‌ବାକେ ପର୍‌ତୁମ୍ ତାକେ ତମର୍ ଲଗେ ପାଟାଇଲା ।”

### ୪

#### ଜିଉଦି ବଡ଼ସବାଇ ପିତର୍ ଆରି ଜଅନ୍

୧ ପିତର୍ ଆରି ଜଅନ୍ ଲକ୍ଷ୍ୟକେ ଏନ୍ତି ସିକିଆ ଦେଇତେ ରଇଲା ବେଲେ ମନ୍ଦିରର୍ କେତେଟା ପୁଜାରି ଆରି ଜାଗୁଆଲ୍‌ମନ୍‌ର୍ ସେନାପତି ଆରି କେତେଟା ସାଦୁକିମନ୍ ଆସି କେଟ୍‌ଲାଇ । ୨ ସେମନ୍ ରିସା ଅଇଗାଲାଇ କାଇକେ ବଇଲେ ପେରିଡ଼ ସିସ୍ ଦୁଇଲକ୍ ଜିସୁ ମଲାତେଇଅନି ଉଟ୍‌ଲା ଆଚେ ବଲି ସିକାଇତେରଇଲାଇ । ଏନ୍ତି ସିକାଇଲେସରି ଲକ୍ଷ୍ୟମ୍ ମଲାଟାନେଅନି ଉଟ୍‌ବାଇବଲି ପର୍‌ମାନ୍ କର୍‌ତେ ରଇଲାଇ । ୩ ସେଟାର୍‌ପାଇ ସେ ଦୁଇଟା ପେରିଡ଼ ସିସ୍‌ମନ୍‌କେ ଦାରି ବାନ୍‌ଲାଇ । ଆରି ସେ ଦିନେ ବେସି ଅଲ୍‌ସମ୍ ଅଇଜାଇରଇଲାକେ ଆର୍‌କର୍ ଦିନ୍ ଜାକ ବନ୍ଦିଗରେ ରକିରଇଲାଇ । ୪ ମାତର୍ ବେସି ଲକ୍ ସେମନ୍‌ର୍ ସିକିଆ ସୁନିକରି ବିସ୍‌ବାସ କଲାଇ, ଆରି ତାକର୍ ବିଡ଼ରେଅନି ମୁନୁସ୍‌ପିଲା ସେ ଅଦିକ୍ ଅଇକରି ପାକାପାକି ପାଁର୍‌ଅଜାର୍ ଅଇଲାଇ ।

୫ ତାର୍ ଆର୍‌କର୍ ଦିନେ ଜିଉଦି ନେତାମନ୍, ଆରି ପାର୍‌ତିନ୍‌ମନ୍ ଆରି ନିୟମ୍ ସିକାଉମନ୍ ଜିରୁସାଲମେ ରୁଣ୍ଡିଲାଇ । ୬ ସେମନ୍‌ର୍ ବିଡ଼ରେ ବଡ଼ପୁଜାରି ଆନାନ୍, କାୟାପା, ଜଅନ୍, ଆଲେକ୍‌ଜାଣ୍ଡାର୍ ଆରି ବଡ଼ ପୁଜାରିର୍ କୁଟୁମେ ରଇବା ବିନ୍ ଲକ୍ଷ୍ୟମ୍ ମିସ୍‌ଲାଇ । ୭ ପେରିଡ଼ମନ୍‌କେ ସେମନ୍‌ର୍ ମୁଆଟେ ତାକାଇ ପାଟାରୁଲାଇ, “ତମେ ଏଟା ସବୁ କେନ୍ତାର୍ କଲାସ୍‌ନି ? କାର୍ ବପୁସଙ୍ ନଇଲେ କାର୍ ନାଉଁଦାରି ଏଟା କଲାସ୍‌ନି ?”

୮ ସେଟାର୍‌ପାଇ ପିତର୍ ସୁକଲ୍‌ଆଡ଼ମାଇ ପୁରାପୁରନ୍ ଅଇ ସେମନ୍‌କେ କଇଲା, “ତମେ ଜେ କି ଆମର୍ ସାସନ୍‌କାରିଆମନ୍ ଆରି ପାର୍‌ତିନ୍‌ମନ୍ ! ୯ ଜଦି ଆଜି ଏ ଚଟାର୍ ପାଇ କରିରଇଲା ନିମାନ୍ କାମର୍‌ଲାଗି ଆମ୍‌କେ ପର୍‌ସନ୍ କଲାସ୍‌ନି ଆରି ସେ କେନ୍ତାର୍ ନିମାନ୍ ଅଇଲା ବଲି ଜାନ୍‌ବାକେ ମନ୍ କଲାସ୍‌ନି, ୧୦ ତେବେ ତମେ ଆରି ଇସ୍ରାଏଲର୍ ସବୁ ଲକ୍ ଜାନ୍‌ବାର୍ ଦର୍‌କାର୍ ଜେ, ତମର୍ ମୁଆଟେ ଚିଆଅଇରଇଲା ଏ ଲକ୍ ଅବ୍‌କା ନାଜ୍‌ରିଡ଼ ଗଡ଼ର୍ ଜିସୁକିରିସ୍‌ଟର୍

ବପୁସଙ୍ଗ ପୁରାପୁରୁନ୍ ନିମାନ୍ ଅଇଲା ଆଚେ । ସେ ଜିସୁକେ ତମେ କୁରସେ ମରାଇଲାସ୍ । ମାତର୍ ପର୍ମେସର୍ ତାକେ ମଲାତେଇଅନି ଆରି ତରେକ୍ ଉଟାଇଲା ଆଚେ ।” ୧୧ ଜିସୁର୍ ବିସଇ ଦରମ୍ ସାସ୍ତରେ ଲେକା ଅଇଲାଆଚେ,

ଗର୍ ତିଆରକରୁମନ୍ ଜନ୍ ପାକ୍ନା ନର୍ବ୍ ବଲି ପିଙ୍ଗିଦେଇ ରଇଲାଇ,  
ସେଟାସେ କନର୍ ମୁକିଅ ପାକ୍ନା ଅଇଲା ।

୧୨ ସେ ଆକା ଆମ୍ବେ ମୁକ୍ତି ଦେଇସି । ଗୁଲାଇ ଜଗତର୍ପାଇ ପର୍ମେସର୍ ତାକେସେ ଦେଲା ଆଚେ । ଜେ କି ଆମ୍ବେ ରକିଆ କରସି । ୧୩ ବଡ଼ସବାର୍ ଲକ୍ମନ୍ ପିତର୍ ଆରି ଜଅନର୍ ସାଆସ୍ ଦେକି କାବା ଅଇଗାଲାଇ । ସେମନ୍ ପାଟ୍‌ସାଟ୍ ନ ପଡି ଅବକା ଲକ୍ମନ୍‌ସେ ବଲି ଜାନିରଇଲାଇ । ଆରି ସେମନ୍ ଦୁଇ ଲକ୍ ଜିସୁର୍ ସଙ୍ଗ ରଇଲାଇ ବଲି ଚିନିରଇଲାଇ । ୧୪ ମାତର୍ ତାକର୍ ବିରୁଦେ କାଇବଲି କଇନାପାର୍‌ଲାଇ, କାଇକେ ବଇଲେ ନିମାନ୍ ଅଇଲା ଲକ୍‌କେ ପିତର୍ ଆରି ଜଅନ୍‌ସଙ୍ଗ ଚିଆଅଇରଇଲାଟା ଦେକ୍‌ଲାଇ । ୧୫ ସେଟାର୍ ପାଇ ସେମନ୍ ସିସମନ୍‌କେ ସେ ସବାଇଅନି ବାଠକରାଇଦେଇକରି ତାକର୍ ତାକର୍ ବିତ୍‌ରେ କାତାବାର୍‌ତା ଅଇବାର୍ ଦାର୍‌ଲାଇ । ୧୬ ସେମନ୍ କାତା ଅଇଲାଇ, “ଆମେ ଏମନ୍‌କେ କାଇଟା କରୁ ? ଏମନ୍ କରିରଇବା ଏ କାବା ଅଇଜିବା କାମ୍ ବିସଇ ଜିରୁସାଲମର୍ ସବୁ ଲକ୍ ଜାନିଗାଲାଇ ଆଚତ୍ । ଏ ସତ୍ ଗଟେନାଇ କି ନାଜାନୁ ବଲି କଇ ନାପାରୁ । ୧୭ ମାତର୍ ଏ କାତା ଲକ୍‌ମନ୍‌ର୍ ବିତ୍‌ରେ ଆରି ଅଦିକ୍ ଉଡ଼ରା ଅଇ ନ ଜାଅ, ଜିସୁର୍ ବିସଇ ଆରି କେବେ କାର୍ ମୁଆଟେ ନ କଇବାକେ ସେମନ୍‌କେ ଆମେ ତାଟ୍ ସଙ୍ଗ୍ ଜାଗ୍‌ରତ୍ କରାଇଦେଉଁ ।” ୧୮ ସେଟାର୍ ପାଇ ସେମନ୍ ପିତର୍ ଆରି ଜଅନ୍‌କେ ଆରି ତରେକ୍ ବିତ୍‌ରେ ତାକ୍‌ଲାଇ । ଆରି କେବେମିସା ଜିସୁର୍ ନାଉଁ ଦାରି କାଇମିସା କାତା ନ କଇବାକେ ଆରି ସିକିଆ ନ ଦେବାକେ ଜାଗ୍‌ରତ୍ କରାଇଦେଲାଇ । ୧୯ ମାତର୍ ପିତର୍ ଆରି ଜଅନ୍ କଇଲାଇ, “ତମର୍ ବାଦିଅ ଅଇରୁ, କି ପର୍ମେସର୍‌ର୍ ବାଦିଅ ଅଇରୁ, କନ୍ ବିସଇ ପର୍ମେସର୍‌ର୍ ମୁଆଟେ ଟିକ୍ ସେଟା ତମେ ବିଚାର୍ କରା । ୨୦ କାଇକେ ବଇଲେ ଆମେ ଜାଇଟା ଦେକ୍‌ଲୁ ଆତୁ ଆରି ସୁନ୍‌ଲୁ ଆତୁ ସେଟା ନ କଇକରି ରଇନାପାରୁ ।” ୨୧ ମାତର୍ ବଡ଼ସବାର୍ ଲକ୍ ଆରି ତାଟ୍‌ସଙ୍ଗ୍ ସେମନ୍‌କେ ଦମ୍‌କାଇକରି ଚାଡି ଦେଲାଇ । ସେମନ୍‌କେ

ତଣ୍ଡଦେବାଟା କସ୍ତ ବଲି ସେମନ୍ ଜାନିପାରୁଲା । କାଇକେ  
ବଇଲେ ସେ କାବାଅଇଜିବା କାମର୍ ଲାଗି ଲକ୍ମନ୍ ପର୍ମେସର୍କେ  
ଜୁଆର୍ କର୍ତେ ରଇଲା । ୨୨ ଜନ୍ ଲକ୍ କାବା ଅଇଜିବା  
କାମର୍ଲାଗି ନିମାନ୍ ଅଇରଇଲା, ତାକେ ଚାଲିସ୍ ବରସେଅନି ଅଦିକ୍  
ଅଇରଇଲା ।

### ନ ଡର୍ବା ପାଇ ପାର୍ତନା

୨୩ ପିତର୍ ଆରି ଜଅନ୍ ମୁକଲ୍ଲା ଦାପ୍ରେ ନିଜର୍ ଦଲେ  
ବାଉଡିଗାଲା ଆରି ମୁକିଅ ପୁଜାରିମନ୍ ଆରି ପାର୍ତିନମନ୍ ଜାଇଟା  
କଇରଇଲା, ସେଟା ସେମନ୍କେ ଜାନାଇଲା । ୨୪ ବିସବାସିମନ୍  
ସବୁ କାତା ସୁନା ପତେ ଗଟେକ୍ ଅଇ ପର୍ମେସର୍କେ ଏ ପାର୍ତନା  
କଲା, ଏ ମାପରୁ ! ସରଗ, ଦର୍ତନି, ସମ୍ବୁର୍ ଆରି ତେଇ  
ରଇବା ସବୁ ବିସଇ ତମେସେ ତିଆର୍ କଲାସ୍ ! ୨୫ ତମେ  
ସୁକଲ୍ ଆଡ଼ମାଇଅନି ଆମର୍ ଆନିଦାଦିମନ୍ ଆରି ତମର୍ ଦାଙ୍ଗଡା  
ଦାଉଦର୍ ଟଣ୍ଡେଅନି ଏ କାତା ସୁନାଇ ରଇଲାସ୍ । ସେ କଇରଇଲା,  
ଜିଉଦି ନଇଲା ଲକ୍ମନ୍ କାଇକେ ରିସା ଅଇଲା ?  
ଲକ୍ମନ୍ କାଇକେ ତୁଚାଇ ସଡ଼ଜିତର୍ କଲା ?

୨୬ ମାପରୁର୍ ବିରଦେ ଆରି

ତାକର ମସିଆର୍ ବିରଦେ

ଜଗତର୍ ରାଜାମନ୍ ଆରି ସାସନ୍କାରିଆମନ୍

ଜୁଦ୍ବାକେ ନିଜକେ ତିଆର୍ ଅଇ ରୁଣ୍ଡିଲା ।

୨୭ ☆କାଇକେବଇଲେ ଏ ନଅରେ ଏରଦ୍ ଆରି ପନ୍ତିୟ ପିଲାଡ଼  
ଇସ୍ରାଏଲିୟମନ୍ ସଙ୍ଗ୍ ଆରି ଜିଉଦି ନ ଅଇରଇବା ଲକ୍ମନ୍ସଙ୍ଗ୍  
ମିସି ଜିସୁର୍ ବିରଦେ ଜଜନା କଲା । ସେ ସେ ତମର୍ ସୁକଲ୍  
ଦାଙ୍ଗଡା ଆରି ତମେ ବାଟଲା ମସିଅ । ୨୮ ତମର୍ ବପୁ ଆରି ମନ୍  
କଲାଟା ଇସାବେ ଜାଇଟା ସବୁ ଗଟାଇବାପାଇ ତମେ ଟିକ୍ କରି  
ରଇଲାସ୍, ସେମନ୍ ଗଟେକ୍ ଅଇ ସେ ସବୁ କର୍ବାକେ ଲାଗିପଡ଼ଲା ।  
୨୯ “ଏ ମାପରୁ, ସେମନ୍ ଆମକେ ଜନ୍ ଦମକ୍ ଦେଲା ଆତଡ଼  
ସେ ବିସଇ ସୁନା ଆରି ନ ଡର୍ତେ ତମର୍ କାତା ଜାନାଇବାକେ ତମର୍  
ଏ ଦାଙ୍ଗଡାମନ୍କେ ଡାଟ୍ କରା । ୩୦ ନିମାନ୍ କର୍ବାକେ ତମର୍ ଆଡ଼

☆ ୪:୨୨ ୪:୨୭ ଲୁକ୍ ୨୩:୭-୧୧; ମାତିଉ ୨୭:୧,୨; ମାର୍କ ୧୫:୧; ଲୁକ୍ ୨୩:୧; ଜଅନ୍  
୧୮:୨୮,୨୯

ଲୀମାଆ ଆରି ତମର ସୁକଲ ଦାଙ୍ଗତା ଜିସୁର ନାଏଁ ନ ଅଇବା କାମ୍ ଆରି କାବା ଅଇଜିବା କାମ୍‌ମନ୍ ସାଦନ୍ କରାଆ ।”

୩୧ ସେମନ୍ ପାର୍ତନା କରିସାରାଇଲା ପତେ ଜନ୍ ଜାଗାଇ ରୁଣ୍ଡିରଇଲାଇ, ସେଟା ତୁଲ୍‌ତୁଲିଗାଲା । ସେମନ୍ ସବୁ ସୁକଲ୍‌ଆତ୍‌ମାଇ ପୁରାପୁରୁନ୍ ଅଇଲା । ଆରି ନ ଡର୍ତେ ପର୍ମେସରର୍ କାତା ଜାନାଇବାର୍ ଦାରୁଲାଇ ।

**ବିସ୍‌ବାସିମନ୍ ନିଜର୍ ନିଜର୍ ସଁମ୍‌ପତିକେ ବାଗ୍ ମିସ୍‌ବାଟା**

୩୨ ✧ ସବୁ ବିସ୍‌ବାସିମନ୍ ଗଟେକ୍ ବିସଇ ଚିନ୍ତା କରି ମନ୍ କଲାଇ । କେ ମିସା ନିଜର୍ ସଁମ୍‌ପତି ନିଜର୍ ବଲି ଦାବି ନ କରତେ ରଇଲାଇ । ତାକର୍‌ଟାନେ ଜେଡକି ରଇଲା ସେଟା ସବୁଲକ୍ ସମାନ୍ କରି ବାଟାସାଟା କରତେ ରଇଲାଇ । ୩୩ ପେରିଡ଼ ସିସ୍‌ମନ୍ ବପୁସଙ୍ଗ୍ ସାକି ଦେବାର୍ ଦାରୁଲାଇ । ପର୍ମେସର୍ ମାପରୁ ଜିସୁକେ କେନ୍ଦ୍ରିକରି ମଲାଟାନେଅନି ଉଟାଇଲା ବଲି । ଆରି ପର୍ମେସର୍ ସବୁ ବିସ୍‌ବାସିମନ୍‌କେ ଅଦିକ୍ ଅଦିକ୍ ଜିବନ୍ ଦୁକାଇଲା । ୩୪ ତାକର୍ ଦଲେ ଜିଇବା କାଇବାକେ କାକେ ମିସା ଅବାଦ୍ ନ ରଇଲା । ଜନ୍ ଲକ୍‌ମନ୍‌କେ ଗର୍ ଆରି ଜମିରଇଲା, ସେମନ୍ ସେଟା ବିକିକରି ତାବୁ ଆନି, ୩୫ ପେରିଡ଼ମନ୍‌କେ ସର୍ପିଦେଇରଇଲା । ସେ ତାବୁ, ପେରିଡ଼ ମନ୍ ଅବାବେ ରଇଲା ଲକ୍‌ମନ୍‌କେ ବାଟାକରି ଦେଇତେରଇଲାଇ ।

୩୬ ସାଇପରସ୍ ନାଉଁର୍ ଗଟେକ୍ ଜାଗାଇ ଜନମ୍ କରିରଇବା ଲେବି କୁଟୁମର୍ ଜସେପ୍, ଜାକେ ପେରିଡ଼ ସିସ୍‌ମନ୍ ବରନବା ବଲି ନାଉଁ ଦେଇ ରଇଲାଇ । ବରନବାର୍ ଅରଡ଼ ଦୁକ୍ ସାରାଇବା ପିଲା । ସେ ତାର୍ ଜମି ବିକ୍‌ଲା ଆରି ୩୭ ତାବୁ ପେରିଡ଼ ସିସ୍‌ମନ୍‌କେ ସର୍ପିଦେଲା ।



**ଅନନିୟ୍ ଆରି ସପିରା**

୧ ସେ ଦଲର୍ ଅନନିୟ୍ ନାଉଁର୍ ଗଟେକ୍ ଲକ୍ ଆରି ତାର୍ ମାଇଜି ସପିରା ସେମନର୍ କେତେକ୍ ଜମି ବିକ୍‌ଲାଇ । ୨ ମାତର୍ ମାଇଜିମୁନ୍‌ସ୍ ରାଜିଅଇକରି ବିକିକରି ପାଇଲା କେତେକ୍ ତାବୁ ଅନନିୟ୍ ନିଜର୍

✧ ୪:୩୨ ୪:୩୨ ପେରିଡ଼ ୨:୪୪,୪୫



ପାଇ ସଙ୍ଗଇଲା । ଅଗଲ୍‌ଲାଟା ସେ ପେରିଡ଼ ସିସ୍‌ମନ୍‌କେ ଦେଲା । ୩ ପିତର ତାକେ କଇଲା, “ଅନନିୟ୍ ତୁଇ କେନ୍ତି ସଇତାନର୍ ପାନ୍ଦେପଡ଼ି ଜମି ବିକି ଆନିରଇବା ତାରୁ କେତେକ୍ ନିଜର୍ ପାଇ ସଙ୍ଗଇକରି ସୁକଲ୍ ଆଡ଼ମାର୍ ମୁଆଟେ ମିର୍ କଇଲୁସ୍ ? ୪ ବିକ୍‌ବା ଆଗତୁ ସେ ଜମି ତମର୍ ରଇଲା । ବିକ୍‌ଲା ପଟେ ମିସା ସେ ତାରୁ ତମର୍‌ଟାସେ । ଏନ୍ତି କାମ୍ କରବାକେ କାଇକେ ମନ୍ କଲୁସ୍ ? ତୁଇ ଲକ୍‌ମନ୍‌କେ ନାଡ଼ାଉସ୍ ନାଇ ମାତର୍ ପର୍‌ମେସର୍‌କେ ନାଡ଼ାଇଆରୁସ୍ ।” ୫ ଅନନିୟ୍ ଏ କାତା ସୁନ୍‌ଲା ଦାପ୍‌ରେ ତଲେ ଆପ୍‌ଟି ଅଇ ଅଦ୍‌ରି ମରିଗାଲା । ଜନ୍ ଲକ୍‌ମନ୍ ଏ କାତା ସୁନ୍‌ଲାଇ ସେମନ୍ ସବୁଲକ୍ ବେସି ଡରିଗାଲାଇ । ୬ ଦଲର୍ ଦାଙ୍‌ଡାମନ୍ ଅନନିୟ୍‌ର୍ ମଲା ଗାଗଡ଼ ଲୁଗାଇ ଗୁଡ଼ିଆଇକରି ବାଇରେ ବଇକରି ଦାରିଗାଲାଇ ଆରି ତପିଦେଲାଇ ।

୭ ପାକାପାକି ତିନ୍‌ଗାଁଟା ପଟେ ଅନନିୟ୍‌ର୍ ମାଇଜି ତେଇ ଆସି କେଟ୍‌ଲା । ସେ, ଏ ଗଟ୍‌ନା ନାଜାନି ରଇଲା । ୮ ପିତର ତାକେ ପାଚାରୁଲା “ମକେ କ ପନି, ତୁଇ ଆରି ତର୍ ମୁନ୍‌ସ୍ ଜେଡ଼କି ଜମି ବିକ୍‌ଲାସ୍, ଏଟା କାଇ ତାର୍ ପୁରାଦାମ୍ କି ?” ସେ କଇଲା, “ଉ ଏଡ଼କିସେ ।”

୯ ପିତର ତାକେ କଇଲା, “ମାପରୁର୍ ଆଡ଼ମାକେ ପରିକା କରବାକେ ତୁଇ ଆରି ତର୍ ମୁନ୍‌ସ୍ କାଇକେ ରାଜିଅଇଲାସ୍ ? ଜନ୍ ଲକ୍‌ମନ୍ ତର୍ ମୁନ୍‌ସ୍‌କେ ସମାଦି ଦେଲାଇ ଆଗଡ଼, ବାଟ୍ ତିଆଗତି କେଟ୍‌ଲାଇବେ, ସେମନ୍ ତକେ ମିସା ବଇ ଦାରିଜିବାଇବେ ।”

୧୦ ସେ ଦାପ୍‌ରେ ସେ ମିସା ପିତରର୍ ପାଦ୍‌ତଲେ ଅଦ୍‌ରି ମରିଗାଲା । ଦାଙ୍‌ଡାମନ୍ ବିଡ଼ରେ ଆସି ତାର୍ ମଲା ଗାଗଡ଼ ବଇନେଲାଇ ଆରି ତାର୍ ମୁନ୍‌ସ୍‌ର୍ ଲଗେ ତାକେ ମିସା ସମାଦି ଦେଲାଇ । ୧୧ ଜିରୁସାଲେମର୍ ଗୁଲାଇ ମଣ୍ଡଲିର୍ ଲକ୍‌ମନ୍ ଆରି ଜେଡ଼କି ଲକ୍ ଏ କାତା ସୁନ୍‌ଲାଇ, ସବୁଲକ୍ ଡରିଗାଲାଇ ।

### କାବାଅଇଜିବା କାମ୍ ଆରି ଚିନ୍

୧୨ ପେରିଡ଼ ସିସ୍‌ମନ୍‌ର୍ ଟାନେଅନି ଲକ୍‌ମନ୍‌ର୍ ବିଡ଼ରେ ବେସି କାବା ଅଇଜିବା କାମ୍‌ମନ୍ ଆରି ଚିନ୍‌ମନ୍ ସାଦନ୍ ଅଇତେ ରଇଲା । ସବୁ ବିସ୍‌ବାସିମନ୍ ସଲ୍‌ମନ୍‌ର୍ ମଣ୍ଡପେ ରୁଣ୍ଡେତେ ରଇଲାଇ ।

୧୩ ସେମାନର ବିସଇ ବିନ୍‌ଲକ୍‌ମନ୍ ନିମାନ୍ କାତା କଇତେ ରଇଲା । ମାତର୍ ଦଲ୍ ବାଇରେ ରଇଲା ଲକ୍‌ମନ୍ କେ ମିସା ଦଲେ ମିସ୍‌ବାକେ ସାଆସ୍ ନ କରତେ ରଇଲା । ୧୪ ଏଲେ ମିସା ପର୍ମେସର୍‌କେ ବିସ୍‌ବାସ୍ କରି ଅଦିକ୍ ଅଦିକ୍ ମାଇଜିଟକି ଆରି ମୁନ୍‌ସ୍ ପିଲାମନ୍ ଏ ଦଲେ ମିସ୍‌ଲା । ଆରି ସେ ଦଲ୍ ଦିନକେ ଦିନ୍ ଅଦିକ୍ ଅଦିକ୍ ବଡ଼ତେ ଗାଲା । ୧୫ ପେରିଡ଼ ସିସ୍‌ମନ୍‌କାମ୍ ଅଦିକ୍ ବଡ଼ି ବଡ଼ି ଗାଲା । ଏକ୍ତିକି ପିତର୍ ଇଣ୍ଡିଗାଲାବେଲେ ତାର୍ ଚାଇଆଲେ ଅଲ୍‌ପ୍ ପଡ଼ବଲି ଲକ୍‌ମନ୍ ରଗିମନ୍‌କେ ବଇଆନି ବାଟ୍‌ପାଲି କଟେ ଆରି ଟାଟିମନ୍ ଅଚାଇକରି ସୁଆଇ ଦେଇତେ ରଇଲା । ୧୬ ଜିରୁସାଲମର୍ ଚାରିବେଟ୍‌ତି ରଇବା ଗଡ଼ର୍ ରଗି ଆରି ତୁମାଦାରଲା ଲକ୍‌ମନ୍‌କେ ପେରିଡ଼ମନ୍‌କେ ଲଗେ ଆନ୍‌ତେ ରଇଲା । ଆରି ସେମନ୍ ସବୁ ଲକ୍ ନିମାନ୍ ଅଇତେ ରଇଲା ।

### ପେରିଡ଼ ସିସ୍‌ମନ୍‌କେ ଡାଡ଼ନା

୧୭ ତାର୍ ପଟେ ବଡ଼ ପୁଜାରି, ତାର୍‌ସଙ୍ଗ୍ ରଇବା ଲକ୍‌ମନ୍ ଆରି ସାଦୁକି ଦଲ୍‌ର୍ ଲକ୍‌ମନ୍, ସିସ୍‌ମନ୍‌କେ ଇସା ଅଇଗାଲା । ଆରି ସେମନ୍‌ର୍ ବିରୁଦ୍ଧେ କାଇଟାଆଲେ କରୁ ବଲି ଜଜ୍‌ନା କଲା । ୧୮ ସେମନ୍ ପେରିଡ଼ ସିସ୍‌ମନ୍‌କେ ଦାରି ବାନ୍ଦିକରି ବନ୍ଦିଗରେ ସଙ୍ଗାଇଲା । ୧୯ ମାତର୍ ସେ ରାତି ମାପ୍‌ରୁର୍ ଗଟେକ୍ ଦୁଡ଼ ବନ୍ଦିଗରର୍ କାପାଟ୍ ଉଗାଡ଼ିଦେଲା ଆରି ସେମନ୍‌କେ ମୁକ୍‌ଲା ଆନି କଇଲା, ୨୦ “ଜା ଆରି ମନ୍ଦିରେ ଟିଆଅଇକରି ଲକ୍‌ମନ୍‌କେ ଏ ନୁଆ ଜିବନ୍ ବିସଇ ସବୁ କାତା କୁଆ ।” ୨୧ ସିସ୍‌ମନ୍ ସେ ଦୁଡ଼ର୍ କାତା ମାନି ସାକାଲ୍ ସାକାଲ୍ ମନ୍ଦିରେ ପୁରି ସିକିଆ ଦେବାର୍ ଦାରଲା ।

ବଡ଼ ପୁଜାରି, ତାକର୍ ସଙ୍ଗାରିମନ୍ ଆରି ଇସ୍ରାଏଲର୍ ପାର୍‌ଟିମନ୍ ଗଟେକ୍ ପୁରା ସବା ପାଇ ଡାକାଇ ପାଟାଇଲା । ତାର୍ ପଟେ ପେରିଡ଼ ସିସ୍‌ମନ୍‌କେ ବନ୍ଦିଗରେ ଅନି ସବାଇ ଆନ୍‌ବାକେ ବନ୍ଦିଗରର୍ ଜାଗୁଆଲମନ୍‌ର୍ ମୁକ୍‌ଆମନ୍‌କେ ଆଦେସ୍ ଦେଲା । ୨୨ ମାତର୍ ସେ ମୁକ୍‌ଆମନ୍ ବନ୍ଦିଗରେ କେଟ୍‌ଲାକେ ପେରିଡ଼ମନ୍‌କେ ତେଇ ଦେକଡ଼ନାଇ । ସେଟାର୍‌ପାଇ ସେମନ୍ ବଡ଼ସବାଇ ବାଡ଼ତି ଆଇଲା । ଆରି ଲକ୍‌ମନ୍‌କେ କଇଲା, ୨୩ “ଆମେ ବନ୍ଦି ଗରେ କେଟି ଦେକ୍‌ଲୁ ଜେ ଦୁଆର୍ ନିକସଙ୍ଗ୍

ତାରି ଅଇରଇଲା । ଆରି ଜାଗୁଆଲ୍‌ମନ୍ ମିସା ଜାଗିରଇଲା । ମାତର୍ କାପାଟ୍ ଉଗାଡ଼ୁଲା ପତେ ଆମେ ବିଡ଼ରେ କାକେ ମିସା ଦେକ୍ ନାଇ ।” ୨୪ ଏ କାତା ସୁନି ମୁକିଅ ପୁଜାରିମନ୍ ଆରି ମନ୍ଦିର୍ ଜାଗୁଆଲ୍‌ମନ୍ ଦାଇତେ ରଇଲା ଲକ୍‌ମନ୍ କାବାଅଇଗାଲା । ପେରିଡ଼ ସିସ୍‌ମନ୍‌କେ କାଇଟା ଅଇଲାଆତେ ବଲି ସେମନ୍ ବୁଜି ନାପାରୁଲା । ୨୫ ସେଡ଼କିବେଲେ ଗଟେକ୍ ଲକ୍ ଆସି କଇଲା “ସୁନା ! ଜନ୍ ଲକ୍‌ମନ୍‌କେ ବନ୍ଦି ଗରେ ରକିରଇଲାସ୍, ସେମନ୍ ଏବେ ମନ୍ଦିରେ ଲକ୍‌ମନ୍‌କେ ସିକିଆ ଦେଲାଇନି ।” ୨୬ ମନ୍ଦିରର୍ କାମକରୁମନ୍ ଜାଗୁଆଲ୍‌ମନ୍ ସଙ୍ଗ୍ ଜାଇ ପେରିଡ଼ ସିସ୍‌ମନ୍‌କେ ସୁଡ଼ରାଇକରି ଆରିତରେକ୍ ଡାକିଆନ୍‌ଲା । ସେମନ୍ ଡରାବିଡ଼ରା କରଡ଼ ନାଇ । କାଇକେବଇଲେ ସେମନ୍‌କେ ଲକ୍‌ମନ୍ ପାକ୍‌ନାପୁକ୍‌ନି ମାର୍‌ବାଇ ବଲି ଡରିଜାଇତେରଇଲା ।

୨୭ ପେରିଡ଼ ସିସ୍‌ମନ୍‌କେ ବିଡ଼ରେ ଡାକିଆନି ବଡ଼ସବାର୍ ମୁଆଟେ ଚିଆ କରାଇଲା, ଆରି ବଡ଼ ପୁଜାରି ସେମନ୍‌କେ ପାଚାରୁଲା । ୨୮ ✨“ଏ ଜିସୁର୍ ନାଉଁ ଦାରି କାଇମିସା ସିକିଆ ନ ଦେବାକେ ତମ୍‌କେ ତାଟ୍ ସଙ୍ଗ୍ ଆଦେସ୍ ଦେଇରଇଲୁ, ମାତର୍ ଦେକା, ତମେ କାଇଟା କରିଆଗାସ୍ ! ତମେ ଦେଇରଇବା ଏ ସିକିଆ ଜିରୁସାଲମେ ରଇଲା ଲକ୍‌ମନ୍‌ଟାନେ କେଟ୍‌ଲା ଆତେ । ଆରି ତାର୍ ମରନ୍ ପାଇ ଆମ୍‌କେ ଦାଇ କରବାକେ ଚେସ୍‌ଟା କଲାସ୍‌ନି !”

୨୯ ପିତର୍ ଆରି ବିନ୍ ସିସ୍‌ମନ୍ କଇଲା, “ଆମେ ତମର୍ ଆଦେସ୍ ମାନ୍‌ବା ବାଦୁଲେ ପର୍‌ମେସର୍ ଆଦେସ୍ ମାନ୍‌ବୁ । ୩୦ ତମେ ଜିସୁକେ କୁର୍‌ସେ ଚଗାଇ ମରାଇଲାପତେ, ଆମର୍ ଆନିଦାଦିମନ୍ ପର୍‌ମେସର୍ ତାକେ ମଲାଟାନେଅନି ଉଟାଇଲାଆତେ । ୩୧ ଇସ୍ରାଏଲର୍ ଲକ୍‌ମନ୍ ତାକର୍ ପାପେଅନି ବାଅଡ଼ ଆରି ପାପ୍ କେମା ଅଅଡ଼ ବଲି ପର୍‌ମେସର୍ ତାକେ ତାର୍ ଉଜା ବାଟେ ବସାଇଆତେ । ଜେଡ଼ିକି ସେ ଆମର୍ ସାସନ୍‌କାରିଆ ଆରି ରକିଆକର୍‌ବା ଲକ୍ ଅଇସି । ୩୨ ଆମେ ଏ ସବୁ ବିସଇର୍ ସାକି ଆରୁ । ଆରି ଜନ୍ ସୁକଲ୍ ଆଡ଼ମାକେ ପର୍‌ମେସର୍ ତାକର୍ ଆଗିଆଁକାରିମନ୍‌କେ ଦାନ୍‌କଲାଆତେ, ସେ ମିସା ଏଟାର୍ ସାକି ।”

୩୩ ବଡ଼ସବାର ଲକ୍ମନ ଏ କାତା ସୁନି ଏତେକ୍ ରିସାଅଇଗାଲାଇ ଜେ, ପେରିଡ଼ମନ୍କେ ମରାଇବାକେ ମନ୍ କଲାଇ । ୩୪ ମାତର୍ ସେମନର୍ ବିଡ଼ରେଅନି ଗମଲିଏଲ୍ ନାଉର୍ ଗଟେକ୍ ପାରୁସି ଲକ୍ ରଇଲା । ସେ ନିୟ୍ମ୍ ସିକାଇତେ ରଇଲା । ତାକେ ଲକ୍ମନ ମାନିଅ କର୍ତ୍ତେରଇଲାଇ । ସେ ବଡ଼ ସବାଇ ଟିଆଅଇ ପେରିଡ଼ମନ୍କେ ଚନେକର୍ ପାଇ ବାଇରେ ନେବାକେ ଆଦେସ୍ ଦେଲା । ୩୫ ଆରି ବଡ଼ ସବାର ଲକ୍ମନ୍କେ କଇଲା, “ଏ ଇସ୍ରାଏଲିୟ୍ ବାଇମନ୍, ଏ ଲକ୍ମନ୍କେ ଜାଇଟା କର୍ବାକେ ଗାଲାସ୍ନି ଅଲପ୍ ବାବିଚିନ୍ତି କରି କରା । ୩୬ ତମର୍ ମନେରଇସି, ଅଲପ୍ ଆଗ୍ତୁ ତିଉଦା ନାଉର୍ ଗଟେକ୍ ଲକ୍ ରମିୟ୍ମନର୍ ବିରୁଦେ ଉର୍ଲା । ସେ ନିଜେ ବଡ଼ଲକ୍ ବଲି ଲକ୍ମନ୍କେ କଇଲାକେ ତାର୍ ସଙ୍ଗ୍ ଚାରିସଅ ଲକ୍ ମିସି ରଇଲାଇ । ମାତର୍ ତାକେ ମରାଇଲାଇ, ତାର୍ପଟେ ତାର୍ସଙ୍ଗ୍ ଲକ୍ମନ୍ ଚିନ୍ବିନ୍ ଅଇଗାଲାଇ ଆରି ତାର୍ ଦଲ୍ ବୁଡ଼ିଗାଲା । ୩୭ ତାର୍ପଟେ ଗାଲିଲି ଅନି ଜିଉଦା ନାଉର୍ ଆରି ଗଟେକ୍ ଲକ୍ ରମିୟ୍ମନର୍ ବିରୁଦେ ଉର୍ଲା । ରମିୟ୍ ସର୍କାର ଲକ୍ମନର୍ ନାଉଁ ଲେକାଇବା ବେଲେ ଏଟା ଅଇଲା । ବେସି ଲକ୍କେ ତାର୍ ଦଲେ ମିସାଇବାକେ ସୁଡ଼ରଇଲା । ମାତର୍ ତାକେ ମିସା ମରାଇଲାଇ । ଆରି ତାର୍ ସବୁ ସିସ୍ମନ୍ ଚିନ୍ବିନ୍ ଅଇଗାଲାଇ । ୩୮ ସେଟାର୍ ପାଇ ଜିସୁର୍ ସିସ୍ମନର୍ ବିସଇ ମୁଇ ତମ୍କେ କଇଲିନି, ସେମନ୍ କର୍ବା କାମ୍ ତେବାଆ ନାଇ, ଚାଡ଼ିଆସ୍ । ସେମନ୍ କର୍ବା କାମ୍ ଆରି ଜଜନା ଜଦି ଲକ୍ମନର୍ଟାନେଅନି ଆସିରଇସି, ତେବେ ସେମନ୍ ମିସା ଆରିଜିବାଇ । ୩୯ ମାତର୍ ସେଟା ଜଦି ପର୍ମେସରର୍ଟାନେ ଆସିରଇସି ବଇଲେ, ତାକେ ତମେ ଦବାଇନାପାରାସ୍ । ସେଡ଼କିଅନି ଡିସ୍ସି ଜେ ତମେ ପର୍ମେସରର୍ ବିରଦେ ଜୁଜଲାସ୍ନି ।”

ବଡ଼ସବାର ଲକ୍ମନ ଗମଲିଏଲ୍ କଇଲା କାତା ମାନଲାଇ । ୪୦ ସେମନ୍ ପେରିଡ଼ ସିସ୍ମନ୍କେ ବଡ଼ସବାର ବିଡ଼ରେ ଆନବାକେ ଆଦେସ୍ ଦେଲାଇ । ତାକିଆନିକରି ସେମନ୍କେ କର୍ତ୍ତା ସଙ୍ଗ୍ ମାରାଇଲାଇ । ଆରି ଜିସୁର୍ ନାଉଁଦାରି କାଇମିସା କାତା ନ କଇବାକେ ଆଦେସ୍ ଦେଇ ଚାଡ଼ିଦେଲାଇ । ୪୧ ପେରିଡ଼ ସିସ୍ମନ୍ ସାର୍ଦାସଙ୍ଗ୍ ବଡ଼ସବାଇଅନି ବାରଇଲାଇ, କାଇକେବଇଲେ

ପରମେସର ଦେକ୍‌ବା ଇସାବେ ଜିସୁର ସିସ୍ ଅଇକରି ଅପ୍‌ମାନ ପାଇବାକେ ଅଦିକାର ପାଇରଇଲା । ୪୨ ଆରି ସେମନ୍ ସବୁ ଦିନ୍ ମନ୍ଦିରେ ଆରି ଲକ୍‌ମନର୍ ଗରେ ଗରେ ମସିଅ ଜିସୁର ବିସଇର୍ ସୁବ୍‌କବର୍ ଜାନାଇଲା ଆରି ସିକିଆ ଦେବାର୍ ଦାରଲା ।



### ସାତ୍‌ଟା ସେବାକାରିଆମନ୍

୧ ସେ ବେଲା, ବେସି ଜିଉଦି ଲକ୍‌ମନ୍ ଜିସୁର ସିସ୍ ଅଇ ଆଇଲା । ଗିରିକ୍ ବାସା କଇତେରଇବା ଜିଉଦିମନ୍, ଏବ୍‌ରି ବାସା କଇତେରଇବା ଜିଉଦିମନ୍‌ର ବିରୁଦେ କାତା ଉଟାଇଲା । କାଇକେବଇଲେ ଗିରିକ୍ ବାସାଇ କାତା ଅଇବା ଜିଉଦିମନ୍, ରାଣ୍ଡିମନ୍‌କେ ଦିନ୍‌କର୍ କାଦି ବାଟା କଲାବେଲେ ତାକର୍ ରାଣ୍ଡିମନ୍‌କେ ଏଲା କରତେରଇଲା ପନି । ୨ ସେଟାର୍ ପାଇ ବାଟ୍‌ଟା ପେରିଡ଼ ସିସ୍‌ମନ୍ ସବୁ ବିସ୍‌ବାସିମନ୍‌କେ ରୁଣ୍ଡାଇକରି କଇଲା, “କାଇବାଟା ବାଟାକର୍‌ବାର୍ ଆତେ ବଲିକରି ପରମେସରର୍ ବାକିଅ ସିକାଇବାଟା ଜଦି ଆମେ ଏଲା କର୍‌ରୁ ବଇଲେ ସେଟା ନିକ ବିସଇ ନର୍ । ୩ ସେଟାର୍ ପାଇ ଏ ବାଇବଇନିମନ୍, ତମର୍ ବିତ୍‌ରେଅନି ସୁକଲ୍‌ଆତ୍‌ମାଇ ଆରି ଗିଆନେ ପୁରାପୁରୁନ୍ ଅଇରଇବା ଲକ୍ ବଲି ସବୁଲକ୍ ଜାନିରଇବା ସାତ୍ ଲକ୍‌କେ ବାଟା । ଆମେ ସେମନ୍‌କେ ଏ ସବୁ ବିସଇ କର୍‌ବାକେ ଦାଇଡ଼ ଦେବୁ । ୪ ସେନ୍ତାର୍ ଆଲେ ପାର୍‌ତନା ଆରି ପରମେସରର୍ ବାକିଅ ସିକାଇବାକେ ଆମେ ସବୁ ଦିଆନ୍ ଦେଇପାରିଅଇସି ।”

୫ ଦଲର୍ ସବୁ ଲକ୍ ପେରିଡ଼ ସିସ୍‌ମନ୍‌ର କଇଲା କାତାଇ ରାଜିଅଇଲା, ଆରି ଏ କାମ୍ କର୍‌ବାକେ ବିସ୍‌ବାସ୍ ଆରି ସୁକଲ୍‌ ଆତ୍‌ମାଇ ପୁରୁନ୍ ଅଇରଇବା ତିପାନ୍ ନାଉର୍ ଗଟେକ୍ ଲକ୍, ଆରି ପିଲିପ୍, ପକ୍‌ରସ୍, ନିକାନର, ତିମନ୍, ପର୍‌ମନା ଆରି ଆଗେ ଜିଉଦି ଦରମ୍ ବିସ୍‌ବାସ୍ କରିରଇବା, ଆନ୍‌ଟିକିୟଇ ଅନି ଆସିରଇବା ଗଟେକ୍ ଜିଉଦି ନ ଅଇଲା, ନିକଲାୟକେ ବାଟ୍‌ଲା । ୬ ବିସ୍‌ବାସିମନ୍ ଏ ସାତ୍‌ଲକ୍‌କେ ପେରିଡ଼ମନ୍‌ର ଲଗେ ଆନ୍‌ଲା । ସେମନ୍‌କେ, ଆତ୍ ସଙ୍ଗଇ ପାର୍‌ତନା କଲା ।

୭ ଏନ୍ତାରି ପରମେସରର ବାକିଅ ଗୁଲାଇବାଟର ଲକ୍ ସୁନ୍‌ଲାଇ । ଜିରୁସାଲମେ ଅଦିକ୍ ଅଦିକ୍ ସିସ୍‌ମନ୍ ବଡ଼ବାଟ ଦାଉଲାଇ, ବେସି ପୁଜାରିମନ୍ ମିସା ଜିସୁକେ ବିସ୍‌ବାସ୍ କଲାଇ ।

### ତିପାନ୍‌କେ ଦାରିନେଲାଇ

୮ ପରମେସରଟାନେ ବେସି ଆସିରବାଦ୍ ପାଇ ଆରି ବପୁ ସଙ୍ଗ୍ ପୁରୁନ୍ ଅଇରଇବା ତିପାନ୍, ଲକ୍‌ମନ୍‌ର ବିତ୍‌ରେ ବେସି ନ ଅଇବା କାମମନ୍, କାବା ଅଇଜିବା କାମମନ୍ ସାଦନ୍ କଲା । ୯ ମାତର କେତେଲକ୍ ତାକେ ବିରଦ୍ କଲାଇ । ଏମନ୍ ଗତି କଟ୍‌ବାତେଇଅନି, ମୁକ୍‌ଲିରଇବା ଜିଉଦିମନ୍‌କେ ନେଇ, ଅଇରଇବା ପାର୍‌ତନା ଗରର୍ କେତେ ଲକ୍, ସେମନ୍‌ର ବିତ୍‌ରେଅନି କେତେଲକ୍ ସାରିଆ ଅନି, କେତେକ୍ ଆଲେକ୍‌ଜାଣ୍ଡ୍‌ରିଆ ଅନି । ସେମନ୍ ସିଲିସିଆ ଅନି ଆରି ଆସିଆଇଅନି ଆସିରଇବା ବିନ୍ ଜିଉଦିମନ୍‌ର ସଙ୍ଗ୍ ମିସିକରି ତିପାନ୍‌ର ବିରଦେ ଦଦାପେଲା ଅଇଲାଇ । ୧୦ ମାତର ସୁକଲ୍ ଆଡ଼ମା ତିପାନ୍‌କେ ଏନ୍ତି ଗିଆନ୍ ଦେଲାଜେ, କେମିସା ତାର୍ କାତା ଚାଡ଼ାଇକରି କଇ ନାପାର୍‌ତେ ରଇଲାଇ । ୧୧ ଏଲେମିସା ସେ “ମସାର୍ ବିରଦେ ଆରି ପରମେସରର୍ ବିରଦେ କାତା କଇବାଟା ଆମେ ସୁନ୍‌ଲୁ ।” ବଲି, ଏ ମିର୍ ସାକି ଦେବାକେ କେତେ ଲକ୍‌କେ ଲାଁର୍ ଦେଇ ଉସକାଇଲାଇ । ୧୨ ଏନ୍ତାରିକରି ସେମନ୍ ଲକ୍‌ମନ୍‌କେ, ପାର୍‌ଚିନ୍‌ମନ୍ ଆରି ସାସ୍‌ତର୍ ସିକାଉମନ୍‌କେ ରିସା ଅଇବା କାତା କଇଲାଇ । ଆରି ତିପାନ୍‌କେ ଦାରି ବଡ଼ସବାଇ ନେଲାଇ । ୧୩ ତାର୍ ପଚେ ସେମନ୍ ତାର୍ ବିରୁଦେ ମିର୍ ସାକି ଦେବାକେ କେତେଟା ଲକ୍‌ମନ୍‌କେ ବିତ୍‌ରେ ଆନ୍‌ଲାଇ । ସେମନ୍ କଇଲାଇ, “ଏ ଲକ୍ ସବୁବେଲେ ଆମର୍ ସୁକଲ୍ ମନ୍ଦିର୍ ଆରି ମସାର୍ ରିତିନିତି ବିରୁଦେ ନିନ୍ଦା କାତା କଇବୁଲ୍‌ଲାଇନି । ୧୪ ନାଜରିତର୍ ଜିସୁ ମନ୍ଦିର୍ ବାଙ୍ଗାଇ ପାକାଇସି ଆରି ଆମେ ମସାର୍ ଟାନେଅନି ପାଇ ରଇବା ସବୁ ବିଦିବିଦାନ୍ ବାଦ୍‌ଲାଇ ଦେଇସି ବଲି ଏ ଲକ୍ କଇବାଟା ଆମେ ସୁନି ଆବୁ ।” ୧୫ ସେଡ଼କି ବେଲେ ବଡ଼ସବାଇ ବସି ରଇବା ସବୁ ଲକ୍ ଆକିଗାଡ଼ି ତିପାନ୍‌ର ବାଟେ ଦେକ୍‌ଲାଇ ଜେ, ଏଦେ ଦେକା ! ତାର୍ ମୁ ସରଗର୍ ଦୁଡ଼ ପାରା ତିସ୍‌ତେ ରଇଲା ।



### ତିପାନ୍ କଇବାଟା

<sup>୧</sup> ବଡ଼ ପୁଜାରି ତିପାନ୍‌କେ ପାଚାରୁଲା, “ତର୍ ବିରୁଦେ କଇବା ଏ ସବୁ କାତା ସଡ଼ କି ?”

<sup>୨</sup> ତିପାନ୍ କଇଲା, “ଇତି ରଇବା ମର୍ ବାଇମନ୍ ଆରି ବାବାମନ୍ ଅଲପ୍ ସୁନା, ଆମର୍ ଆନିଦାଦି ଅବ୍ରାଆମ୍ ଆରନେ ବାସା ଅଇବାକେ ଜିବା ଆଗ୍ତୁ ମଇମା କର୍ବା ପର୍ମେସର୍ ମେସପଟାମିଆଇ ଦେକାଇଅଇଲା ।” <sup>୩</sup> ଆରି ତାକେ କଇଲା, ‘ତମର୍ ଦେସ୍ ଆରି ତମର୍ କୁଟୁମ୍‌କେ ଚାଡ଼ିକରି ମୁଇ ଜନ୍ ଦେସ୍ ଦେକାଇବି, ସେ ଦେସେ ଜା ।’ <sup>୪</sup> ତେବର୍‌ପାଇ ସେ ତାର୍ ଦେସ୍ ଚାଡ଼ିକରି ଆରାନ୍ ନାଉଁର୍ ଗଟେକ୍ ଦେସେ ବାସା ଅଇବାକେ ଗାଲା । ଅବ୍ରାଆମର୍ ବାବା ମଲା ପଟେ, ପର୍ମେସର୍ ତାକେ, ତମେ ରଇବା ଏ ଦେସେ ଆନ୍‌ଲା । <sup>୫</sup> ସେବେଲେ ପର୍ମେସର୍ ଅବ୍ରାଆମ୍‌କେ ଏ ଦେସେ କାଇ ଅଦିକାର୍ କି ପାଦେକ୍ ଜମି ମିସା ଦେଇ ନ ରଇଲା । ମାତର୍ ତାକେ ଏ ଦେସ୍ ପଟେ ଦେବାକେ ପର୍ମେସର୍ କାତାଦେଇରଇଲା । ଆରି ସେଟା ତାର୍ ନାଡ଼ିଡ଼ି ମନର୍ ପାଇ ଅଇସି ବଲି ସପଡ଼ କଲା । ପର୍ମେସର୍ ଏ କାତା ଦେଇରଇଲା ବେଲେ ଅବ୍ରାଆମ୍‌କେ ପିଲାଟକି ନ ଅଇରଇଲା । <sup>୬</sup> ସେବେଲେ ପର୍ମେସର୍ ଅବ୍ରାଆମ୍‌କେ ଏନ୍ତିବଲି କଇରଇଲା, “ତମର୍ ନାଡ଼ିଡ଼ିମନ୍ ବିନ୍ ଦେସେ ଚାଲିସ୍ ବରସ୍ ଜାକ ଗତି ଅଇକରି ରଇବାଇ । ସେ ଦେସର୍ ଲକ୍ ସେମନ୍‌କେ କରାପ୍ ଚଲାଚଲ୍‌ତି ଦେକାଇବାଇ । <sup>୭</sup> ମାତର୍ ସେମନ୍ ଜନ୍ ଲକ୍‌ମନର୍ ସେବା କର୍ବାଇ, ମୁଇ ସେ ଲକ୍‌ମନ୍‌କେ ବିଚାର୍ କର୍ବି । ପଟେ ତମର୍ ନାଡ଼ିଡ଼ିମନ୍ ସେ ଦେସେଅନି ବାରଇ ଆଇବାଇ ଆରି ଏ ଜାଗାଇ ମର୍ ଉପାସନା କର୍ବାଇ ।” <sup>୮</sup> ତାର୍‌ପଟେ ପର୍ମେସର୍ ଅବ୍ରାଆମର୍ ସଙ୍ଗ୍ କାତାଦେଇ ରଇବା ରାଜିନାମାର୍ ତିନ୍ ଇସାବେ ସୁନଡ଼ କର୍ବା ବିଦି ତିଆର୍ କଲା । ଇସାକ୍ ଜନମ୍ ଅଇ ଆବ୍‌ଦିନ୍ ପଟେ ଅବ୍ରାଆମ୍ ତାକେ ସୁନଡ଼ କଲା । ପଟେ ଇସାକ୍ ତାର୍ ପଅ ଜାକୁବ୍‌କେ ସେନ୍ତାରି କଲା । ସେନ୍ତାରିସେ ଜାକୁବ୍ ତାର୍ ବାର୍‌ଟା ପଅମନ୍‌କେ ସୁନଡ଼ କଲା, ଜନ୍ ଲକ୍‌ମନ୍ କି ଆମର୍ ତାକ୍‌ପୁଟା ସଙ୍ଗ୍ ରଇବା ଆନିଦାଦିମନ୍ ।

୯ “ଜାକୁବର ପଅମନ୍ ତାକର ସାନ୍ ବାଇ ଜସେପ୍‌କେ ଛାଁସା ଅଇକରି, ମିସର୍ ଦେସର୍ ବେବାର୍‌ମନ୍‌କେ ବିକିଦେଲାଇ । ମାତର୍ ପର୍ମେସର୍ ଜସେପର୍ ସଙ୍ଗ ରଇଲା । ୧୦ ଆରି ସବୁ ଦୁକ୍ କସ୍‌ଟେଇଅନି ତାକେ ରକିଆ କଲା । ଜେଡେବେଲେ ଜସେପ୍ ମିସର୍ ରାଜାର ମୁଆଟେ ଚିଆଅଇଲା, ପର୍ମେସର୍ ତାକେ ଚିଆନ୍ ଦେଲା । ଆରି ସବୁଲକ୍ ମନ୍‌କଲାପାରା ଚଲାଚଲ୍‌ତି ଦେଲା । ପାର ରାଜା ଜସେପ୍‌କେ ସେ ଦେସର୍ ସାସନ୍‌କାରିଆ ଆରି ତାର୍ କୁଟୁମ୍‌ର୍ ସବୁ ଦେକାରକା କର୍‌ବା ଦାଇଡ଼୍ ସର୍‌ପି ଦେଲା । ୧୧ ଜସେପ୍ ସାସନ୍‌କାରିଆ ରଇଲାବେଲେ ମିସର୍ ଆରି କିଶାନ୍ ଦେସେ ମର୍‌ତି ଅଇଲା ଜେ ଲକ୍‌ମନ୍ ବେସି ଅଇରାନ୍ ଅଇଗାଲାଇ । ସେବେଲେ ଆମର୍ ଆନିଦାଦିମନ୍‌କେ କାଇଟା ମିସା କାଇବାଟା ମିଲେନାଇ । ୧୨ ମିସର୍ ଦେସେ ଦାନ୍ ମିଲ୍‌ସି, ବଲି ସୁନି ଜାକୁବ୍ ପର୍‌ଡୁମ୍‌ତର୍ ତାର୍ ପିଲାମନ୍‌କେ କାଦି ଗେନ୍‌ବାକେ ପାଟାଇଲା । ଜେକି ଆମର୍ ଆନିଦାଦିମନ୍ ଅଇବାଇ । ୧୩ ତେଇ ସେମନ୍ ପର୍‌ର୍ ପାଲି ଗାଲାବେଲେ ଜସେପ୍ ତାର୍ ନିଜର୍ ବାଇମନ୍‌କେ ଚିନାଇ ଅଇଲା ଆରି ମିସର୍‌ର୍ ରାଜା ପାର ଜସେପର୍ କୁଟୁମ୍‌କେ ଜାନ୍‌ଲା । ୧୪ ତାର୍ ପଟେ ଜସେପ୍ ତାର୍ ବାବା ଜାକୁବ୍ ଆରି ତାର୍ କୁଟୁମ୍‌ର୍ ସବୁକେ ମିସାଇ ସତୁରି ପାଁର୍ ଲକ୍‌କେ ମିସରେ ଆଇବାକେ କବର୍ ପାଟାଇଲା । ୧୫ ଜାକୁବ୍ ମିସର୍ ଦେସେ ଗାଲା, ତେଇ ସେ, ତାର୍ ପଅମନ୍‌ର୍ ମରନ୍ ଅଇଲା । ୧୬ ସେମନ୍‌ର୍ ମଲା ଗାଗଡ଼୍ ସେକିମେ ନେଲାଇ । ଆରି ଅବ୍ରାଆମ୍ କେତେକ୍ ତାବୁଦେଇ ଆମ୍ ନାଉଁର୍ ଗଟେକ୍ କୁଟୁମେ ଅନି ଗେନ୍‌ଲା ମସ୍‌ନେ ନେଇ ସେମନ୍‌କେ ସଙ୍ଗାଇଲାଇ ।”

୧୭ ପର୍‌ମେସର୍ ଅବ୍ରାଆମ୍ ଜନ୍ ସପଡ଼ ଦେଇ ରଇଲା ସେଟା ସିଦ୍‌ଅଇଲା । ମିସର୍‌ଦେସେ ଆମର୍ ଜାଡିର୍ ଲକ୍‌ମନ୍ ବେସି ବଡ଼ି ଗାଲାଇ । ୧୮ ସାରାସାରି, ଜସେପର୍ ବିସଇ ଜାନି ନ ରଇବା ଗଟେକ୍ ରାଜା, ମିସର୍ ଦେସ୍ ସାସନ୍ କଲା । ୧୯ ସେ ଆମର୍ ଆନିଦାଦିମନ୍‌କେ ବେସି ନାଡାଇଲା । ଆରି ବେସି ଅଇରାନ୍ କଲା । ସେମନ୍‌ର୍ କଅଁଲା ପିଲାମନ୍‌କେ ନିପାଡ଼୍ କରି ବାଇରେ ପିଙ୍ଗି ଦେବାକେ ଆଦେସ୍ ଦେଲା । ୨୦ ସେ ବେଲାଇ ମସା ଜନମ୍ ଅଇଲା । ସେ ଗଟେକ୍ ବେସି ସୁନ୍‌ର୍ ପିଲା ରଇଲା । ତାକେ ତିନ୍ ମାସ୍ ଜାକ ଗରେସେ ପସ୍‌ଲାଇ ।



୨୧ ଆରି ଜେଡେବେଲେ ବାଇରେ ଲୁଟାଇଦେଲାକ୍, ପାର ରାଜାର୍ କନିଆ ତାକେ ମିଲାକକରି ନିଜର୍ ପିଲାପାରା ପସ୍ପାଲ୍ କଲା ।  
 ୨୨ ମିସର୍ ଦେସେ ଜେଡ଼କି ଗିଆନ୍ ରଇଲା, ସେ ସବୁ ଗିଆନ୍ ମସାକେ ସିକାଇଲାକ୍ । ସେ ବଡ଼ିକରି ତାର କାତାବାର୍ତା ଆରି କାମର୍ ଲାଗି ଗଟେକ୍ ଡାକ୍ପୁଟା ଲକ୍ ବଲାଅଇଲା ।

୨୩ ଜେଡେବେଲେ ମସାକେ ଚାଲିସ୍ ବରସ୍ ଅଇଲା, ସେ ତାର ଇସ୍ରାଏଲର୍ ବାଇମନ୍ କାମ୍ କରବା ଜାଗା ଦେକ୍ବାକେ ମନ୍କଲା ।  
 ୨୪ ଇସ୍ରାଏଲିଅ ମନର୍ ବିଡ଼ରେଅନି ଗଟେକ୍କେ ମିସରିୟର୍ ଗଟେକ୍ ଲକ୍ ସାଦବାନ୍ କରବାଟା ଦେକି ମସା ତାକେ ରକିଆ କଲା । ଆରି ସେ କରବାଟା ସୁଜାଇବି ବଲି ମିସରିଅକେ ସେ ମରାଇଲା ।  
 ୨୫ ମସା ବାବିରଇଲା, ସେମନ୍କେ ମୁକ୍ଲାକବାକେ ପର୍ମେସର୍ ତାକେ ବାଟ୍ଲାଆଟେ ବଲି ତାର ନିଜର୍ ବାଇମନ୍ ଏତାଇବାକ୍ । ମାତର୍ ସେମନ୍ ସେଟା ବୁଜନ୍ନାଇ । ୨୬ ତାର ଆରକର୍ ଦିନେ ଦୁଇଟା ଇସ୍ରାଏଲିଅ ମନ୍ ମାରାମାରି ଅଇତେରଇବାଟା ଦେକ୍ଲା । ଆରି ସେମନ୍ ମିସର୍ ବଲି ବୁଜାଇବାକେ ଚେସ୍ଟା କଲା । ସେ କଇଲା, “ସୁନା ତମେ ଦୁଇ ଲକ୍ତା ଇସ୍ରାଏଲର୍ ବାଇବାକ୍ ଅଇସା । କାଇକେ ଏନ୍ତାରି ମାରାମାରି ଅଇଲାସ୍ନି ?” ୨୭ ମାତର୍ ଜନ୍ ଲକ୍ ଆରିଗଟେକ୍ ଲକ୍କେ କାରାପ୍ କାତା କଇ ଲାଗ୍ତେରଇଲା, ସେ ମସାକେ ଏତାଇଦେଇ କଇଲା, “ଆମ୍କେ ସାସନ୍ କରବାକେ ଆରି ଆମ୍କେ ବିଚାର୍ କରବା ଅଦିକାର୍, କେ ତକେ ଦେଇଆଟେ ?” ୨୮ କାଲି ଜେଣ୍ଟି ଗଟେକ୍ ମିସରିୟକେ ମରାଇଲୁସ୍, ସେଣ୍ଟି ମକେ ମିସା ମରାଇବାକେ ମନ୍ କଲୁସ୍ନି କି ?” ୨୯ ଏଟା ସୁନିକରି ମସା ମିସର୍ଦେସେଅନି ଉଟିପାଲାକଲା ଆରି ମିଦିଅନ୍ ଦେସେ ଜାଇ ବାସାକଲା । ତେଇ କେତେ ବରସ୍ ରଇକରି ଆରି ତାର ଦୁଇଟା ପିଲା ଜନମ୍ ଅଇଲାକ୍ ।

୩୦ “ଚାଲିସ୍ ବରସ୍ ରଇଲା ପଟେ, ମରୁବାଲି ରଇବା ଜାଗାର୍ ସିନୟ ନାଉର୍ ପର୍ବତେ ଗଟେକ୍ ଜଇ ଲାଗ୍ବା ବୁଟାର୍ ମଜାଇ ପର୍ମେସରର୍ ଗଟେକ୍ ଦୁଡ଼, ମସାକେ ଦେକାଇ ଅଇଲା ।” ୩୧ ମସା ଏଟା ଦେକି ବେସି କାବା ଅଇଗାଲା, ଆରି କଣ୍ଟେକ୍ ନିକକରି ଦେକ୍ବି ବଲି ବୁଟା ଲଗେ ଗାଲା । ମାତର୍ ତେଇ ସେ ମାପ୍ପରୁର୍ କାତା ସୁନ୍ଲା । ୩୨ “ମୁଇ ତମର୍ ଆନିଦାଦି ଅବରାଆମ୍, ଇସାକ୍ ଆରି ଜାକୁବର୍

ପରମେସର୍ ।” ମସା ଡରିକରି ତରତର ଗଜଗଜ୍ ଅଇ ଦେକ୍‌ବାର୍ ନାପାରଲା । ୩୩ ମାପୁରୁ ତାକେ କଇଲା, “ତୁଇ ପିନ୍‌ରଇବା ପାଣ୍ଡୁଇ ବେଟ୍ । କାଇକେବଇଲେ ତୁଇ ଜନ୍ ଜାଗାଇ ଟିଆଅଇଆରୁସ୍, ସେଟା ସୁକ୍‌ଲା ଜାଗା । ୩୪ ମିସର୍ ଦେସେ ମର୍ ଲକ୍‌ମନ୍ କସ୍‌ଟ ଅଇବାଟା ଦେକିଆତି । ମୁଇ ସେମନର୍ କାନ୍ଦାବୁବା ସୁନିଆତି ଆରି ସେମନ୍କେ ମୁକ୍‌ଲାଇ ଆନ୍‌ବାକେ ଉଡ଼ି ଆଇଲିଆତି । ଏବେ ଆଉ, ମୁଇ ତକେ ମିସର୍ ଦେସେ ପାଟାଇବି ।”

୩୫ ମସାକେ ଇସ୍ରାଏଲର୍ ଲକ୍‌ମନ୍ ନିର୍‌ତେରଇଲାଇ । ସେମନ୍ ପାଟାରି ରଇଲାଇ, “ଆମ୍‌କେ ସାସନ୍ କରବାକେ ଆରି ଆମ୍‌କେ ବିଚାର୍ କରବାକେ କେ ଅଦିକାର୍ ଦେଇଆଟେ ?” ମାତର୍ ପରମେସର୍ ଆକା ନିଜେ ମସାକେ ସେ ଲକ୍‌ମନର୍ ଉପରେ ସାସନ୍ କରବାକେ ଆରି ସେମନ୍କେ ମୁକ୍‌ଲାଇ ଆନ୍‌ବାକେ ପାଟାଇରଇଲା । ଜଇଲାଗ୍‌ବା ବୁଟାଇ ଦରସନ୍ ଇସାବେ ଦେକାଇଅଇଲା । ୩୬ ମିସର୍ ଦେସେ, ଲଇଡ଼ ସାଗରେ ଆରି ଚାଲିସ୍ ବରସ୍ ମରୁବାଲି ବୁର୍‌ କେଡେକ୍ କେଡେକ୍ କାବା ଅଇଜିବା କାମ୍‌ମନ୍ ଆରି ଚିନ୍‌ମନ୍ କଲା । ୩୭ ମସା ନିଜେ ଇସ୍ରାଏଲର୍ ଲକ୍‌ମନ୍କେ କଇରଇଲା, “ମକେ ଜେନ୍ତି ପରମେସର୍ ପାଟାଇଲା । ସେନ୍ତାରିସେ ତମର୍ ବାଇମନର୍ ଲଗେ ଗଟେକ୍ ବବିସଡ଼ବକ୍‌ତାକେ ପାଟାଇସି, ସେ ତମର୍ ନିଜର୍ ଲକ୍‌ମନର୍ ଟାନେଅନିସେ ଅଇସି ।” ୩୮ “ଇସ୍ରାଏଲିଅ ଲକ୍‌ମନ୍ ମରୁବାଲି ବୁର୍‌ ରଇଲାବେଲେ ସେ ସେମନର୍ ସଙ୍ଗ୍ ରଇଲା । ସିନୟ୍ ପରବତେ ଆମର୍ ଆନିଦାଦିମନର୍ ସଙ୍ଗ୍ ଦୁଡ଼ କାତା ଅଇଲାବେଲେ ସେ ରଇଲା । ଆରି ସେ ପରମେସର୍‌ଟାନେଅନି ଜିବନ୍ ଦେବା ବାକିଅ ମିଲାଇକରି ଆମ୍‌କେ ଜାନାଇଲା ।”

୩୯ “ମାତର୍ ଆମର୍ ପୁରବର୍ ଆନିଦାଦିମନ୍ ମସାର୍ କାତା ସୁନଡ଼ ନାଇ । ମିସର୍ ଦେସେ ବାଉଡ଼ି ଜୁ ବଲି ମନ୍‌କଲାଇ ।” ୪୦ ସେଟାର୍‌ପାଇ ସେମନ୍ ଆରଣିକେ କଇଲାଇ, “ଆମ୍‌କେ ମିସର୍ ଦେସେଅନି ବାର୍‌କରାଇ ଆନ୍‌ଲା ମସା କେନେ ଗାଲାଆଲେ, ଆମ୍‌ନେ ନାଜାନୁ । ଏବେ ଆମ୍‌କେ ବାଟ୍ ଦେକାଇ ନେବାକେ କେଡେଟା ପୁଡ଼ିଲା ବନାଇ ଦେ । ସେମନ୍ ଆମର୍ ଦେବ୍‌ତା ଅଇ ବାଟ୍‌ଦେକାଇବାଇ ।” ୪୧ ସେବେଲେ ସେମନ୍ ତେଇ ଗଟେକ୍ ବାଟାପିଲା ପାରା ଡିସ୍‌ବା ପୁଡ଼ିଲା ଡିଆର୍କଲାଇ । ଆରି ତାର୍‌ଲାଗି

ପୁଜାକରୁ ବଳି ଚଗାଇଲା । ଆରି ନିଜେ ତିଆର କରିରଇବା ସେ ମୁରୁତିକେ ସନ୍ତମାନ୍ ଦେବାକେ ଗଟେକ୍ ବଜି କଲା ।  
 ୪୭ ସେଟାର୍‌ପାଇ ପର୍ଯ୍ୟେସର୍ ସେମନ୍‌କେ ଦେକେନାଇ ଆରି ସେମନ୍‌କେ, ଆକାସର୍ ତାରାମନ୍ ପୁଜା କରତ୍ ବଳି ଚାଡ଼ିଦେଲା । ଏ ବିସଇ ବବିସତ୍‌ବକ୍‌ତାର୍ ବଇଟାନେ ଲେକା ଆଚେ,

“ଏ ଇସରାଏଲ୍ ବସର୍ ଲକ୍‌ମନ୍, ମରୁବାଲି ବୁଏଁ ଚାଲିସ୍‌ବରସ୍ ଜାକ ତମେ ପସୁମନ୍‌କେ ମରାଇକରି ବଳି ଇସାବେ ଦେଲାସ୍ ।

ମାତର୍ ସେଟା ମର୍‌ପାଇ ଦେଇ ନ ରଇଲାସ୍ ।

୪୩ ମଲେକ୍ ପୁଡ଼ଲାକେ ପର୍ଯ୍ୟେସର୍ ବଳି ତାର୍ ତମ୍ ଗଟେକ୍ ଜାଗାଇଅନି ଆରିଗଟେକ୍ ଜାଗାଇ ବଇନେଲାସ୍ ।

ରେପାନ୍ ତାରାର୍ ପୁଡ଼ଲା ମିସା ଗଟେକ୍ ଜାଗାଇଅନି ଆରିଗଟେକ୍ ଜାଗାଇ ବଇନେଲାସ୍ ।

ଏ ସବୁଜାକ ପୁଡ଼ଲାମନ୍‌କେ ତମେ ପୁଜାବିଦି କରବାକେ ବନାଇରଇଲାସ୍ । ସେଟାର୍‌ପାଇ ମୁଇ ତମ୍‌କେ ତମର୍ ନିଜର୍ ଦେସେଅନି ବାବିଲନ୍ ଦେସର୍ ତେନ୍‌କେ ନେବାକେ ଜଜନା କରବି ।”

୪୪ ତିପାନ୍ ଆରି କଇଲା, “ମରୁବାଲିବୁଏଁ ଆମର୍ ଆନିଦାଦିମନ୍ ରଇଲାବେଲେ ପର୍ଯ୍ୟେସର୍ ସେମନ୍‌କେ ଲେକି ଦେଇରଇବା ନିୟମ୍ ମନ୍ ବିତ୍‌ରେ ରଇଲା । ସେଟା ପର୍ଯ୍ୟେସର୍ ମସାକେ ଜେନ୍ତି ତମ୍ ତିଆର କରବାକେ କଇରଇଲା, ଆରି ତାକେ ଜନ୍ କାମ୍ ଦେକାଇ ରଇଲା, ଏଟା ସେନ୍ତାରିସେ ତିଆର ଅଇରଇଲା ।”

୪୫ “ପଚେ ଆମର୍ ଆନିଦାଦିମନ୍ ସେମନ୍‌ର ଆନିଦାଦିମନ୍‌ ଟାନେଅନି ମିଲାକକରି ସେ ତୁମ୍ ଜିଅସୁଅ ସଙ୍ଗ୍ ବଇ ଦାରିଗାଲା । ଆରି ପର୍ଯ୍ୟେସର୍ ବାର୍‌କରାଇ କେଦି ରଇବା ବିନ୍ ଜାତିମନ୍‌ ଦେସ୍, ସେମନ୍ ଅଦିକାର୍ କଲା । ଦାଉଦର୍ ସାସନ୍ ବେଲେ ଜାକ ସେ ତମ୍ ତେଇସେ ରଇଲା । ୪୬ ଦାଉଦ୍ ପର୍ଯ୍ୟେସରର୍ ମନ୍‌କେ ଜାଇରଇଲାଜେ ଜାକୁବର୍ ପର୍ଯ୍ୟେସରର୍ ପାଇ ଗଟେକ୍ ମନ୍ଦିର୍ ତିଆର କରବି ବଳି ତାର୍ ଆଦେସ୍ ପାଇବାକେ ମନ୍ କରତେ ରଇଲା । ୪୭ ପଚେ ସେ ମନ୍ଦିର୍ ଦାଉଦର୍ ପଅ ସଲ୍‌ମନ୍ ତିଆର କର ବଳି ମନ୍‌କଲା ।”

୪୮ ଅଇଲେ ମିସା ସବୁର ଉପରର ପର୍ଯ୍ୟେସର ଲକ୍ଷ୍ମୀନ୍ ତିଆର୍ କଲା ଗରେ ବାସା ନ କରେ । ଏ ବିସଇ ବବିସଡ଼ବକ୍ତା ଲେକ୍ଲା ଆଚେ,

୪୯ ମାପୁରୁ କଇଲାନି, ସରଗ୍ ମର୍ ବସ୍ବା ଜାଗା ଦରତନି ଅଇଲାନି ମର୍ ପାଦର୍ ପିଡ଼ା ।

ତମେ ମର୍ପାଇ କେନ୍ତାରି ଗର୍ ତିଆର୍ କରସା ? ମୁଇ ପୁଣ୍ଡବାକେ କନ୍ତି ଜାଗା ଆଚେ କି ?

୫୦ “ମୁଇ ନିଜେ କାଇ ଏ ସବୁ ବିସଇ ତିଆର୍ କରି ନାଇ କି ?”

୫୧ ତିପାନ୍ ଆରି କଇଲା, “ତମେ ବିଲ୍ଲକୁଲ୍ କାତା ନ ମାନବା ଲକ୍ଷ୍ମୀନ୍ ।” ତମର୍ ମନ୍ ତାଟ୍ ଅଇଗାଲା ଆଚେ । ମାପୁରୁ ବାକିଅର୍ପାଇ ପୁରାପୁରୁନ୍ ବଇରା ଅଇଆଚାସ୍ । ତମେ ସମାନ୍ ତମର୍ ଆନିଦାଦିମନର୍ ପାରା । ସବୁବେଲେ ସୁକଲ୍ ଆଡ଼ମାକେ ବିରୁଦ୍ଧ କଲାସ୍ନି । ୫୨ ତମର୍ ଆନିଦାଦିମନ୍ ବବିସଡ଼ବକ୍ତାମନକେ ନ ସାଦିକରି ଚାଡ଼ିରଇଲାଇ କି ? ମସିଅ ଆଇସି ବଲି କେତେ କେତେ ବରସ୍ ଆଗତ୍ ଜାନାଇବା ପର୍ଯ୍ୟେସରର୍ କାତାଜାନାଉମନକେ ମରାଇଲାଇ । ଏବେ ତମେ ତାକେ ବିସ୍ବାସେ ବିସ୍ ଦେଲାପାରା କରି ମରାଇଆଚାସ୍ । ୫୩ ତମେ ସରଗର୍ ଦୁଡ଼ମନ୍ ଜାନାଇରଇବା ରିତିନିତି ଦାରିଆଚାସ୍ । ମାତର୍ ସେଟା ମାନାସ୍ ନାଇ ।

### ତିପାନ୍ ମରନ୍

୫୪ ବଡ଼ ସବାର୍ ଲକ୍ଷ୍ମୀନ୍ ତିପାନ୍ କାତା ଅଇବାଟା ସୁନିକରି ବେସି ରିସା ଅଇଗାଲାଇ ଆରି ରିସାର୍ ମାଡେ ଦାଡ଼ କାଡ଼ି ଅଇଲାଇ । ୫୫ ମାତର୍ ତିପାନ୍ ସୁକଲ୍ ଆଡ଼ମାଇ ପୁରାପୁରୁନ୍ ଅଇ ସରଗ୍ ବାଟେ ମୁ କଲା । ଆରି ପର୍ଯ୍ୟେସରର୍ ମଇମା ଆରି ଜିସୁ ତାର୍ ଉଜାବାଟେ ଚିଆଅଇରଇବାଟା ଦେକ୍ଲା ।

୫୬ ତିପାନ୍ କଇଲା, “ଏଦେ ଦେକା ! ସରଗ୍ ଉଗାଡ଼ି ଅଇବାଟା ଆରି ନରପିଲା ପର୍ଯ୍ୟେସରର୍ ଉଜାବାଟେ ଚିଆ ଅଇରଇବାଟା ଦେକ୍ଲିନି ।”

୫୭ ବଡ଼ ସବାର୍ ଲକ୍ଷ୍ମୀନ୍ ସେ କାତା ସୁନିକରି ଆଡ଼ ସଙ୍ଗ୍ କାନେ ତୁଟିଅଇଦେଲାଇ, ଆରି ବେସି ଆଉଲିଅଇଲାଇ । ତାର୍ପଟେ ସବୁଲକ୍ ଗଟେକ୍ ଅଇକରି ତିପାନ୍ ବାଟେ ଉଦ୍ଲି ଆଇଲାଇ । ୫୮ ତାକେ ନଅରର୍ ବାଇରେ ଜିକିନେଇକରି ତାର୍ ଉପ୍ରେ ପାକ୍ନା

ସଙ୍ଘ ମାର୍ବାର ଦାରଲାଇ । ସାକି ଦେଉମନ୍ ତିପାନ୍ ପିନ୍ଦିରଇଲା  
 ବସ୍ତର ସାଉଲ୍ ନାଉର୍ ଗଟେକ୍ ଦାଙ୍ଗ୍ତାକେ ଜିମାଦେଇ ଚାଡ଼ି  
 ଜାଇରଇଲାଇ । <sup>୫୯</sup> ସେମନ୍ ତିପାନର୍ ଉପରେ ପାକ୍ନା ମାର୍ବାର  
 ବେଲେ ସେ ମାପରୁକେ ପାର୍ତନା କରି କଇଲା, “ମାପରୁ ଜିସୁ,  
 ମର ଆଡ଼ମାକେ ସଙ୍ଘୁଆ !” <sup>୬୦</sup> ତିପାନ୍ ମାଣ୍ଡିକୁଟା ଦେଇ ଆକ୍ମାରି  
 କଇଲା, “ମାପରୁ, ଏମନର୍ ବିରଦେ ଏ ପାପ୍ ଆରି ଏତାଆ ନାଇ କି  
 ତଣ୍ଡି ଦିଆସ୍ନାଇ ।” ଏଡ଼କି କଇଲା ଦାପ୍ରେ ତାର୍ ଜିବନ୍ ଚାଡ଼ିଗାଲା  
 ।

## ୮

### ମଣ୍ଡଲିକେ ତାଡ଼ନା

<sup>୧</sup> ସାଉଲ୍ ତିପାନର୍ ମରନେ ରାଜିଅଇକରି ତେଇ ରଇଲା ।

ସେ ଦିନେଅନି ଜିରୁସାଲାମେ ରଇବା ମଣ୍ଡଲିମନ୍ଦକେ ଲକ୍ମନ୍  
 ଜବର୍ ତାଡ଼ନା ଦେବାର୍ ଆରାମ୍ କଲାଇ । ସେଟାର୍ପାଇ ପେରିଡ଼  
 ସିସ୍ମନ୍ ତେଇରଇଲାଇ ଆରି ବିନ୍ ବିସ୍ବାସିମନ୍ ଜିବନ୍ ଆଡେଦାରି  
 ଜିଉଦା ଆରି ସମିରଣ୍ ଜାଗାଇ ପାଲାଇଲାଇ । <sup>୨</sup> ପର୍ମେସରକେ  
 ନାମ୍ବା କେଡେକ୍ ଲକ୍ ଆକ୍ମାରି କାନ୍ଦିକରି ତିପାନର୍ ମଲା ଗାଗଡ଼  
 ନେଇ ସମାଦି କଲାଇ ।

<sup>୩</sup> ✧ମାତର୍ ସାଉଲ୍ ମଣ୍ଡଲିକେ କୁରୁପ୍ନାସ୍ କର୍ବାକେ ଚେସଟା  
 କଲା । ସେ ଗରେ ଗରେ ଜାଇ ଜିସୁକେ ବିସ୍ବାସ୍ କର୍ବା ମୁନୁସ୍ ପିଲା  
 ଆରି ମାଇଜି ଟକିମନ୍ ସବୁକେ ଜିକି ଆନି ବନ୍ଦି ଗରେ ପୁରାଇ ଦେଲା  
 ।

### ସମିରଣ୍ ଜାଗାଇ ସୁବ୍‌କବର୍ ଜାନାଇବାଟା

<sup>୪</sup> ଜିରୁସାଲାମେଅନି ପାଲାଇରଇବା ବିସ୍ବାସିମନ୍ ଗୁଲାଇବାଟେ  
 ଜାଇ ସୁବ୍‌କବର୍ ଜାନାଇବାର୍ ଦାରଲାଇ । <sup>୫</sup> ସେମନର୍ ବିଡ଼ରେଅନି  
 ପିଲିପ୍ ବଲି ଗଟେକ୍ ଲକ୍ ସମିରଣ୍ ମୁକିଅ ନଅରେ ଜାଇ, ତେଇ  
 ରଇବା ଲକ୍ମନ୍ଦକେ ମସିଅ କଇରଇବା କାତା ଜାନାଇଲା । <sup>୬</sup> ପିଲିପ୍  
 କଇବା କାତା ସୁନି ଆରି ସେ କରିରଇବା କାବା ଅଇଜିବା କାମମନ୍  
 ସବୁ ଦେକି ଲକ୍ମନ୍ ତାକେ ଅଦିକ୍ ମନ୍ଦିଆନ୍ ଦେଇ ସୁନ୍‌ବାର୍  
 ଦାରଲାଇ । <sup>୭</sup> କେଡେ କେଡେ ଲକ୍ମନର୍ ଟାନେଅନି ଭୁମାମନ୍

କିରକିରି କରି ବାରଇ ଗାଲାଇ । କେତେ କେତେ ଚେରେଙ୍ଗ୍ ରଗି  
ଆରି ଆଡ଼ ଗଡ଼ ନ ଆଇବାଟାମନ୍ ନିକ ଅଇଗାଲାଇ ।<sup>୮</sup> ଏଟାର ପାଇ  
ସେ ନଅର୍ ସାଇସାରଦା ଅଇରଇଲା ।

<sup>୯</sup> ସମରିଆ ଜାଗାଇ ସିମନ୍ ନାଉଁର୍ ଗଟେକ୍ ଲକ୍ ତାର  
ଜନ୍ତୁର୍ ମନ୍ତୁର୍ ବିଦିଆ କରକରି ତେଇର୍ ଲକ୍ମନ୍‌କେ କାବା  
କରାଇତେରଇଲା ।<sup>୧୦</sup> ସେ, ମୁଇ ନିଜେ ଗଟେକ୍ ବଡ଼ ଲକ୍  
ବଲାଅଇତେରଇଲା । ଆରି ସେ ନଅରେ ରଇବା ସାନ୍ ବଡ଼ ସବୁ  
ତାକେ ମାନିରଇଲାଇ । ପର୍ମେସରର୍ ଜନ୍ ବପୁ ମଆନ୍ ସେ ବପୁ  
ଏଟା ଆକା ବଲି ଲକ୍ମନ୍ କଇତେ ରଇଲାଇ ।<sup>୧୧</sup> ବେସି ବରସ୍  
ଦାରି ତାର ଗୁନି ବିଦିଆର୍ ବପୁ ସଙ୍ଗ୍ ତେଇର୍ ଲକ୍ମନ୍‌କେ କାବା  
କରାଇତେରଇଲା । ସେଟାରପାଇ ଗୁଲାଇ ସମିରଣିୟ ଲକ୍ମନ୍  
ତାକେ ମାନିକରି ରଇଲାଇ ।<sup>୧୨</sup> ମାତର୍ ପିଲିପର୍ ଟାନେଅନି  
ପର୍ମେସରର୍ ରାଇଜ ଆରି ଜିସୁର୍ ବିସଇ ସୁନ୍‌ଲାଇ । ସୁନିକରି  
ତେଇର୍ ଲକ୍ମନ୍ ମାପୁରୁକେ ବିସବାସ୍ କଲାଇ । ଆରି ସେ ଜାଗାର  
ବିସବାସ୍ କଲା ମନସ୍ ପିଲା ଆରି ମାଇଜିଟକିକେ ପିଲିପ୍ ତୁବନ୍  
ଦେଲା ।<sup>୧୩</sup> ସିମନ୍ ନିଜେ ପିଲିପ୍ ଜାନାଇରଇବା ମାପୁରୁର୍ ବାକିଅ  
ସୁନି ବିସବାସ୍ କଲା । ଆରି ପିଲିପ୍ ତାକେ ତୁବନ୍ ଦେଲା । ସେ  
ପିଲିପର୍ ସଙ୍ଗ୍ ସବୁଜାଗାଇ ଜିବାର୍ ଦାରଲା । ପିଲିପ୍ କରିରଇବା  
କାବା ଅଇଜିବା କାମମନ୍ ଆରି ଚିନ୍ମନ୍ ଦେକିକରି ସେ କାବା  
ଅଇଜାଇତେରଇଲା ।

<sup>୧୪</sup> ସମରିଆର୍ ଲକ୍ମନ୍ ପର୍ମେସରର୍ ବାକିଅ ବିସବାସ୍ କଲାଇ  
ଆଡ଼ ବଲି ଜିରୁସାଲାମ୍ ରଇବା ପେରିଡ଼ ସିସମନ୍ ସୁନ୍‌ଲାଇ  
। ପିତର୍ ଆରି ଜଅନ୍‌କେ ସେମନର୍ ଲଗେ ପାଟାଇଲାଇ ।  
<sup>୧୫</sup> ସେମନ୍ ତେଇ କେଟ୍‌ଲା ପତେ ସମିରଣର୍ ବିସବାସିମନ୍ ସୁକଲ୍  
ଆଡ଼ମା ପାଇବାକେ, ପାରତନା କଲାଇ ।<sup>୧୬</sup> କାଇକେ ବଇଲେ  
ସେଡ଼କିବେଲ୍ ଜାକ କାର୍ ଉପରେ ସୁକଲ୍ ଆଡ଼ମା ଉଡ଼ି ନ  
ରଇଲା । ସେମନ୍‌କେ ଜିସୁକିରିସଟର୍ ନାଉଁଦାରି ଅବକାସେ ତୁବନ୍  
ଦେଇରଇଲା ।<sup>୧୭</sup> ପିତର୍ ଆରି ଜଅନ୍ ସେମନର୍ ଉପରେ ଆଡ଼  
ସଙ୍ଗାଇଲା ଦାପରେ ସେମନ୍ ସୁକଲ୍ ଆଡ଼ମା ପାଇଲାଇ ।

<sup>୧୮</sup> ପେରିଡ଼ ସିସମନ୍ ବିସବାସିମନ୍ ଉପରେ ଆଡ଼ ସଙ୍ଗାଇଲାକେ  
ସୁକଲ୍‌ଆଡ଼ମା ପାଇଲାଟା ଦେକି, ସିମନ୍, ପିତର୍ ଆରି ଜଅନ୍‌କେ

ତାକୁ ଜାଣି ଆରି କଇଲା, <sup>୧୯</sup> “ମୁଇ ବିନ୍ ଲକର ଉପରେ ଆଡ଼ ସଙ୍ଗିଲଲେ, ସେମନ୍ ଜେନ୍ତି ସୁକଲ୍ ଆଡ଼ମା ପାଇପାରବାଇ, ସେଟାର ପାଇ ମକେ ସେ ବପୁ ଦିଆ ।” <sup>୨୦</sup> ମାତର୍ ପିତର୍ ତାକେ କଇଲା, “ତର୍ ତାକୁ ତର୍ ସଙ୍ଗ୍ ନସ୍ ଅ । ତର୍ ସଙ୍ଗ୍ ତର୍ ତାକୁ ମିସା ନରକେ ଜାଅ । କାଇକେବଇଲେ ପରମେସରର୍ ଦାନ୍ ତାକୁସଙ୍ଗ୍ ଗେନ୍ଦି ବଲି ବାବ୍ଲୁସ୍ନି । <sup>୨୧</sup> ଆମର୍ କାମ୍ଟାନେ ତର୍ କାଇମିସା ବାଗ୍ ନାଇ, କାଇକେବଇଲେ ପରମେସର୍ ଦେକ୍‌ବା ଇସାବେ ତର୍ ମନ୍ ନିକ ନାଇ । <sup>୨୨</sup> ସେଟାର ପାଇ ତମର୍ ଏ କରାପ୍ ବାବ୍ନାର୍ ପାଇ ମନ୍ ବାଦ୍‌ଲାଆ । ଏନ୍ତାରି ବିସଇ ଚିନ୍ତାକଲାର୍ ପାଇ ମାପୁରୁ ଜେନ୍ତାରି କେମା ଦେଇସି, ତାର ଲାଗି, ମାପୁରୁକେ ପାର୍ତନା କର୍ । <sup>୨୩</sup> କାଇକେ ବଇଲେ ମୁଇ ଦେକ୍‌ଲିନି ଜେ ତର୍ ମନ୍ ଆକାରେ ବର୍ତ୍ତି ଅଇଆଟେ । ତୁଇ ପାପର୍ ବନ୍ଦନେ ବନ୍ଦିଅଇ ଆରୁସ୍ ।”

<sup>୨୪</sup> ସିମନ୍ ସେମନ୍‌କେ କଇଲା, “ତମେ ଜାଇଟା ସବୁ କଇଲାସ୍ ସେଟା ଜେନ୍ତି ମର୍ ଉପରେ ନ ଗଟ । ମୁଇ ତମ୍‌କେ ବାବୁଜିଆ କଲିନି ମରପାଇ ମାପୁରୁକେ ପାର୍ତନା କରା ।” <sup>୨୫</sup> ନିଜର୍ ଜିବନେ ଅଇରଇବା ବିସଇର୍ ସାକି ଆରି ମାପୁରୁର୍ ସୁବ୍ କବର୍ କଇସାରାଇଲା ପଟେ ପିତର୍ ଆରି ଜଅନ୍ ଜିରୁସାଲାମେ ବାଅଡ଼ଲାଇ । ବାଅଡ଼ବା ବାଟେ ସେମନ୍ ସମିରଣର୍ ବେସି ଗାଉଁମନ୍‌କେ ସୁବ୍‌କବର୍ ଜାନାଇଲାଇ ।

### ପିଲିପ୍ ଆରି ଇତିଅପିଆର୍ କାମ୍‌କରୁ

<sup>୨୬</sup> ପରମେସରର୍ ଗଟେକ୍ ଦୁଡ଼ ପିଲିପ୍‌କେ କଇଲା, “ତିଆର୍ ଅ, ଆରି ଦକିଣ୍ ଦିଗେ ଜିରୁସାଲମେଅନି ଗାଜା ବଲି ଗଟେକ୍ ଜାଗାଇ ଜିବାବାଟେ ଜା । ଆଜିକାଲି ଏବାଟେ ଆରି ଲକ୍‌ମନ୍ ଆସ୍ ଜା କରଡ଼ ନାଇ ।” <sup>୨୭</sup> ପିଲିପ୍ ତିଆର୍ ଅଇ ସେବାଟେ ଗାଲା । ଏଦେ ଦେକା ! ଇତିଅପିଆର୍ ଗଟେକ୍ ଲକ୍ ! ସେ ଗଟେକ୍ ବେଜୁ ରଇଲା । ସେ ଜିରୁସାଲମେ ପାର୍ତନା କର୍ବାକେ ଆସିରଇଲା । <sup>୨୮</sup> ସେ ଗଟେକ୍ ମୁକିଅ ଆରି ଇତିଅପିଆ ରାନିର୍ ବାଣ୍ଟାରଗରିଆ ରଇଲା । ସେ ପରମେସର୍କେ ଉପାସନା କର୍ବାକେ ଜିରୁସାଲେମ୍ ଜାଇରଇଲା । ତାର ରତେ ବସି ଗରେ ବାଉଡ଼ି ଆଇତେରଇଲା । ବସିକରି ଜିସାୟ ବବିସଡ଼ବକ୍‌ତାର୍ ବଇଟାନେଅନି ଆଉଲି ଅଇ ପଡ଼ତେରଇଲା ।

୨୯ ସୁକଲ୍‌ଆଡ଼ମା ପିଲିପ୍‌କେ କଇଲା, “ସେ ରତେ ଜା ଆରି ସେ ଲକର୍ ଲଗେ ର ।” ୩୦ ପିଲିପ୍ ପାଲାଅ ପାଲାଅ ଗାଲା ଆରି ସେ ଲକ୍ ଜିସାୟ ବବିସଡ଼ବକ୍‌ତାର ବଇ ପଡ଼ବାଟା ସୁନ୍‌ଲା । ସେ ତାକେ ପାଟାରଲା “ତୁଇ ଜାଇଟା ପଡ଼ଲୁସ୍‌ନି, ସେଟା ବୁଜିପାରଲୁସ୍‌ନିକି ?”

୩୧ ସେ ବାଣ୍ଟାର ଗରିଆ କଇଲା, “କେ ମିସା ଗଟେକ୍ ଲକ୍ ବୁଜାଇ ନ ଦେଲେ ମୁଇ କେନ୍ତ୍ର ବୁଜିପାରବି ?” ତାର ସଙ୍ଗ୍ ରତେ ବସ୍‌ବାକେ ସେ ପିଲିପ୍‌କେ ଡାକ୍‌ଲା । ପିଲିପ୍ ଜାଇ ବସ୍‌ଲା । ୩୨ ଦରମ୍ ସାସ୍‌ତରର୍ ଏ ପଦ୍ ପଡ଼ତେ ରଇଲା,

“ମରାଇବାକେ ନେବା ମେଣ୍ଟାପାରା, ଲକ୍‌ମନ୍ ତାକେ ଡାକିନେଲାଇ,  
ଗଟେକ୍ ମେଣ୍ଟାର ବାଲ୍ କାଟ୍‌ବା ବେଲେ ଜେନ୍ତ୍ର ସେ  
ଟିମ୍‌ରାଇଅଇରଇସି,

ସେନ୍ତ୍ରାରି ସେ ପଦେକ୍ ମିସା କାତା କଏ ନାଇ ।

୩୩ ଲକ୍‌ମନ୍ ନିନ୍ଦା କଲାବେଲେ ତାକେ ନିଆଇ ମିଲେ ନାଇ

ତାର କୁଟ୍‌ମର୍ ଲକର୍ ବିସଇ, କେ କଇ ନାପାରଡ଼,

କାଇକେବଇଲେ ମର୍‌ପୁରେ ତାର ଜିବନ୍ ସାରିଗାଲା ଆତେ ।”

୩୪ ବାଣ୍ଟାରଗରିଆ ପିଲିପ୍‌କେ ପାଟାରଲା, “ମୁଇ ତକେ ଗୁଆରି କଲିନି । ବବିସଡ଼ବକ୍‌ତା କାର ବିସଇ କଇଲାନି, ମକେ କୁଆ । ତାର ନିଜର୍ ବିସଇ କି ଆରି କାର ବିସଇ ?” ୩୫ ପିଲିପ୍ ଦରମ୍ ସାସ୍‌ତରର୍ ଏ ପଦେଅନି ଆରାମ୍ କରି ଜିସୁର୍ ବିସଇର୍ ସୁର୍ କବର୍ ତାକେ ଜାନାଇଲା । ୩୬ ସେମନ୍ ଜାଉ ଜାଉ ଗଟେକ୍ ବସ୍ ଲଗେ କେଟ୍‌ଲାଇ । ସେ ବାଣ୍ଟାରଗରିଆ କଇଲା, ୩୭ “ଇତି ପାନି ଆତେ, କାଇ ଅସୁବିଦା ନ ରଇଲେ ମକେ ତୁବନ୍ ଦିଆ ।”

୩୮ ସେ ଲକ୍ ରଡ଼ ତେବାଇବାକେ ତିଆରଲା । ପିଲିପ୍ ଆରି ସେ, ପାନି ବିଡ଼ରେ ଗାଲାଅ ଆରି ପିଲିପ୍ ତାକେ ପାନିତେଇ ତୁବନ୍ ଦେଲା । ୩୯ ସେମନ୍ ପାନିତେଇଅନି ବାରଇ ଆଇଲା ପତେ, ମାପ୍‌ରୁର୍ ଆଡ଼ମା ପିଲିପ୍‌କେ ଆରିଗଟେକ୍ ଜାଗାଇ ମାୟା କରି ଦେଲା, ସେ ଲକ୍ ପିଲିପ୍‌କେ ଆରି କେବେ ଦେକି ନାପାରଲା, ମାତର୍ ସାର୍‌ଦାଇ ପୁରନ୍ ଅଇ ତାର ବାଟେ ଉଟିଗାଲା । ୪୦ ଚନେକ୍ ଗାଲା ପତେ ପିଲିପ୍ ଦେକ୍‌ଲାଜେ ସେ ଅସଦର୍ ବଲି ଗଟେକ୍ ଜାଗାଇ କେଟିଆତେ । ତେଇଅନି ସେ କାଇସେରିଆଇ ଗାଲା ଆରି ବାଟେ ରଇବା ସଅର୍‌ମନ୍‌କେ ସୁର୍ କବର୍ ଜାନାଇଲା ।





ସାଉଲ୍ ମନ୍ ବାଦ୍‌ଲାଇଲା

<sup>୧</sup> ସେ ସବୁ ଗଟ୍‌ବା ବେଳେ, ସାଉଲ୍ ମାପ୍‌ରୁର ସିସ୍‌ମନ୍‌କେ ମରାଇଦେବି ବଲି ଦମ୍‌କାଇତେ ରଇଲା । ସେ ବଡ଼ ପୁଜାରିର୍ ଲଗେ ଗାଲା । <sup>୨</sup> ଜାଇକରି ଦାମାସ୍କାସେ ଜିଉଦିମନର୍ ପାର୍‌ତନା ଗରେ ଦେବାକେ ଅଦିକାରର୍ ଚିଟି ମାଙ୍ଗ୍‌ଲା । ଦାମାସ୍କାସେ ଜନ୍ ମାଇଜି ଆରି ମୁନୁସ୍‌ମନ୍ ମାପ୍‌ରୁର ବାଟେ ଆଇଲାଇ ଆଚଡ଼, ସେମନ୍‌କେ ବନ୍ଦିକରି ଡଣ୍ଡ ଦେବାକେ, ଜିରୁସାଲମର୍ ଜିଉଦି ନେତାମନର୍‌ଟାନେ ଆନିଅଇସି । ବାନ୍ଦିକରି ଜିରୁସାଲମେ ଆନ୍‌ବାକେ ସାଉଲ୍‌କେ ଏ ଚିଟି ଅଦିକାର୍ ଦେଲା ।

<sup>୩</sup> ସାଉଲ୍ ଦାମାସ୍କସ୍ ନଅର୍ ଲଗାଲଗି ଅଇବା ବେଳେ, ଅଟାଡ଼ ବାଦ୍‌ଲେଅନି ଗଟେକ୍ ଉଜଲ୍ ସାଉଲ୍‌ର୍ ଚାରିବେଡ଼ତି ଜଗ୍‌ଜଗି ଗାଲା । <sup>୪</sup> ତେଇ ସେ ତଲେ ଅଦ୍‌ରି ଗାଲା ଆରି ଗଟେକ୍ କଇବା କାତା ସୁନ୍‌ଲା “ଏ ସାଉଲ୍ ତୁଇ ମକେ କାଇକେ ସାଦ୍‌ଲୁସ୍‌ନି ?”

<sup>୫</sup> ସେ କଇଲା, “ତମେ କେ ମାପ୍‌ରୁ ?”

“ତୁଇ ଜାକେ ସାଦ୍‌ଲୁସ୍‌ନି, ସେ ଜିସୁ ମୁଇ । <sup>୬</sup> ଏବେ ଉଟ୍, ନଅରେ ଜା, କାଇଟା କର୍‌ବାକେ ଅଇସି, ତେଇ ତକେ ଜାନାଇବି ।”

<sup>୭</sup> ସାଉଲ୍‌ର୍ ସଙ୍ଗ୍ ଜିବା ଲକ୍‌ମନ୍ କାବାଅଇଜାଇ ତେବିଦେଲାଇ, ତାକର୍ ଟଣ୍ଡେଅନି ପଦେକ୍ କାତା ବାରଏ ନାଇ । କଇବା ସବଦ୍ ସେମନ୍ ସୁନ୍‌ଲାଇ, ମାତର୍ କାକେ ଦେକି ନାପାର୍‌ଲାଇ । <sup>୮</sup> ସାଉଲ୍ ଉଟି ଆଁକି ଦେକ୍‌ଲା ମାତର୍ ତାକେ କାଇଟା ଡିସେ ନାଇ । ତେବେ ତାର୍ ସଙ୍ଗର୍ ଲକ୍‌ମନ୍ ଆତେ ଦାରି ଦାମାସ୍କସ୍ ଡାକିନେଲାଇ । <sup>୯</sup> ତିନ୍‌ଦିନ୍ ଜାକ ସେ କାଇଟା ଦେକି ନାପାର୍‌ଲା ଆରି ତିନ୍‌ଦିନ୍ ଜାକ କାଏ ନାଇ କି ପିଏ ନାଇ ।

<sup>୧୦</sup> ଦାମାସ୍କସେ ଅନନିୟ ନାଉର୍ ଗଟେକ୍ ବିସ୍‌ବାସି ଲକ୍ ରଇଲା, ସେ ମାପ୍‌ରୁର ଦର୍‌ସନ୍ ପାଇଲା, ମାପ୍‌ରୁ ତାକେ କଇଲା, “ଅନନିୟ !”

ସେ କଇଲା, “ମୁଇ ଇତି ଆତି ମାପ୍‌ରୁ, କୁଆ ।”

<sup>୧୧</sup> ମାପ୍‌ରୁ କଇଲା, “ତିଆର୍ ଅ । ସଲକ୍ ନାଉର୍ ବାଟ୍‌ଦାରି ଜିଉଦାର୍ ଗରେ ଜା । ତେଇ ତାର୍‌ସସେଅନି ଆସି ରଇବା ସାଉଲ୍ ନାଉର୍ ଗଟେକ୍ ଲକ୍‌କେ କଜ୍ । ସେ ପାର୍‌ତନା କଲାନ୍ତି । <sup>୧୨</sup> ସେ

ଦରସନ୍ ଦେକଲାବେଳେ ଅନନିୟ ବଳି ଗଟେକ୍ ଲକ୍ ତାର ଗରେ ପୁରବାଟା ସେ ଦେକିଆଚେ, ତୁଇ ଜା ଆରି ସେ ଜେଡ଼ିକି ଆରିତରେକ୍ ଦେକିପାରସି ତାର ଉପରେ ଆଡ଼ ସଙ୍ଗ ।”

<sup>୧୩</sup> ମାତର ଅନନିୟ କଇଲା, “ମାପୁରୁ ଏ ଲକ୍ ଜିରୁସାଲାମେ ତମର ଲକ୍ମନକେ ଜେଡ଼ିକି ପାପ୍ କାମ୍ କଲା ଆଚେ, ସେ ବିସଇ କେତେ କେତେ ଲକ୍ ମକେ ଜାନାଇ ଆଚଡ଼ । <sup>୧୪</sup> ଆରି ସେ ଲକ୍ ମୁକିଅ ପୁଜାରିମନର୍ ଟାନେଅନି ଅଦିକାର୍ କାଗଜ୍ ନେଇକରି ଦାମାସକସେ, ତମକେ ପାରତନା କର୍ବା ଲକ୍ମନକେ ଦାରି ନେବାକେ ଆସିଆଚେ ।”

<sup>୧୫</sup> ମାପୁରୁ ତାକେ କଇଲା, “ଜାଆ ଜିଉଦି ନ ଅଇଲା ଲକ୍ମନ, ତାକର ରାଜାମନ୍ ଆରି ଇସ୍ରାଏଲର୍ ଲକ୍ମନକେ, ମର୍ ନାଉ ଜାନାଇବାକେ ଆରି ମର୍ ସେବା କର୍ବାକେ ମୁଇ ତାକେ ବାଚ୍ଲି ଆଚି । <sup>୧୬</sup> ସେ ମର୍ ପାଇ ଜେଡ଼ିକି ସବୁ କସର୍ ମୁରର୍ବାର୍ ଆଚେ, ମୁଇ ନିଜେ ତାକେ ଜାନାଇବି ।”

<sup>୧୭</sup> ଅନନିୟ ଗାଲା ଆରି ସାଉଲ୍ ରଇବା ଗରେ କେଟଲା । ସାଉଲ୍‌କେ ବେଟ୍‌ଅଇ ତାର ଉପରେ ଆଡ଼ ସଙ୍ଗଇ ତାକେ କଇଲା, “ଏ ବାଇ ସାଉଲ୍, ଇତି ତର୍ଟାନେ ଆଇବାକେ ମାପୁରୁ ଜିସୁ ମକେ ପାଟାଇଆଚେ । ତୁଇ ଇତି ଆଇବା ବାଟେ ସେସେ ତକେ ଦେକାଇଅଇଲା । ତୁଇ ଜେଡ଼ିକି ଆରି ତରେକ୍ ଦେକି ପାରୁସ୍ ଆରି ସୁକଲ୍ ଆଡ଼ମାଇ ପୁରାପୁରୁନ୍ ଅଇପାରୁସ୍ । ସେଟାର୍‌ପାଇ ପରମେସର୍ ମକେ ପାଟାଇଆଚେ ।” <sup>୧୮</sup> ଅନନିୟ ଏ କାତା କଇଲା ଦାପୁରେ ଏଦେ ଦେକା ! ସାଉଲ୍‌ର୍ ଆଁକିଅନି ମାଟ୍ କସ୍ଲି ପାରାଟା କୁସ୍ଲି ଅଦର୍ଲା । ସେ ଆରି ତରେକ୍ ଦେକି ପାରଲା । ସେ ଉଟ୍‌ଲା ଆରି ଅନନିୟ ତାକେ ତୁବନ୍ କଲା । <sup>୧୯</sup> ଆରି କାଆପିଆ ଅଇ ବପୁ ଅଇଲା । ସାଉଲ୍ ଜିସୁକେ ବିସ୍‌ବାସ୍ କର୍ବା ଲକ୍ମନର୍ ସଙ୍ଗ୍ ଦାମାସକସେ କେତେ ଦିନ୍ ରଇଲା ।

**ଦାମାସକସେ ସାଉଲ୍‌ର୍ ମାପୁରୁର୍ କାତା ଜାନାଇବାଟା**

<sup>୨୦</sup> ସେ ସିଦା ପାରତନା କର୍ବା ଗର୍ମନକେ ଜାଇ ଜିସୁସେ ପରମେସରର୍ ପଅ ବଲି ଜାନାଇବାର୍ ଦାରଲା ।

<sup>୨୧</sup> ଜନ୍ ଲକ୍ମନ ତାର କାତା ସୁନ୍‌ଲାଇ, କାବାଅଇଜାଇକରି ପାଟାରଲାଇ, “ଜିରୁସାଲାମେ ଜିସୁକେ ବିସ୍‌ବାସ୍ କରି ପାରତନା

କରୁବା ଲକ୍ଷ୍ମୀଙ୍କୁ କେ ଜନ୍ମଲକ୍ଷ୍ମୀଙ୍କୁ ମରାଇତେ ରଇଲା, ଏ କାଲ ସେ ଲକ୍ଷ୍ମୀ ନିଏଁ କି ? ସେମାନଙ୍କୁ ମୁକ୍ତି ପ୍ରଦାନକାରୀଙ୍କୁ ଲଗେ ଦାରିନେବାକେ ସେ କାଲ ଇତି ଆସି ନ ରଇଲା କି ?”

୨୭ ମାତର୍ ସାଉଲ୍ ଦରମ୍ ସାସ୍ତରେ ଅନି, ଜିସୁ ଆକା ମସିଅ ବଲି ସତ୍ ଦେକାଇଲା । ଏ ବିସଇଟାନେ ତାର କଇବା କାତା ଏତେ ବପୁ ରଇଲା ଜେ, ଦାମାସ୍କସେ ବାସାଅଇ ରଇବା ଜିଉଦିମନ୍ ତାର କଇବା କାତାର ଗଟେକ୍ ମିସା ଉତର୍ ଦେଇନାପାରୁଲା ।

୨୮ ✱କେତେଦିନ୍ ଗାଲା ପତେ ଜିଉଦିମନ୍ ଗଟେକ୍ ଅଇକରି ସାଉଲ୍‌କେ ମରାଇବାକେ ପାଟ୍‌ନା କଲା । ୨୪ ମାତର୍ ସାଉଲ୍ ସେମାନର୍ କୁଟ୍ କାତା ଜାନୁଲା । ସାଉଲ୍‌କେ ମରାଇବାକେ ସେମନ୍ ଦିନ୍ ରାତି ନଅରର୍ ସବୁ ଦୁଆରମନ୍‌କେ ଜାଗୁଲା । ୨୫ ମାତର୍ ଦିନେକ୍, ରାତିବେଲେ ସାଉଲ୍‌ର୍ ସିସ୍‌ମନ୍ ତାକେ ଡାଲାଇ ସାଜାତି ନଅରର୍ ଚାରିବେଟ୍ଟି ରଇବା ପାରୁରିର୍ କାଣା ବାଟେ ତଲେ ଉଡ଼ରାଇଦେଲା ।

### ଜିରୁସାଲମେ ସାଉଲ୍

୨୬ ସାଉଲ୍ ଜିରୁସାଲମେ ଜାଇ ସିସ୍‌ମନ୍‌ର୍ ସଙ୍ଗ୍ ମିସ୍‌ବାକେ ଚେସ୍‌ଟା କଲା । ମାତର୍ ସେମନ୍ ସାଉଲ୍‌କେ ଗଟେକ୍ ସିସ୍ ବଲି ମୁଲ୍‌କେ ବିସ୍‌ବାସ୍ କରନ୍ ନାଇ । ସବୁ ଲକ୍ଷ୍ମୀ ତାକେ ଡରତେ ରଇଲା । ୨୭ ମାତର୍ ପତେ, ବରନବା ତାକେ ପେରିଡ଼ ସିସ୍‌ମନ୍‌ର୍ ଲଗେ ନେଲା । ଦାମାସ୍କସର୍ ବାଟେ କେନ୍ତ୍ର ସାଉଲ୍ ମାପୁରୁର୍ ଦର୍ସନ୍ ପାଇରଇଲା, ଆରି ମାପୁରୁ ତାକେ କାତା କଇରଇଲା, ଏ ସବୁ ବିସଇ ସେମନ୍‌କେ ବୁଜାଇକରି କଇଲା । ଦାମାସ୍କସେ ସାଉଲ୍ ନ ଡରତେ କେନ୍ତ୍ରାରି ଜିସୁର୍ ନାଉଁ ଦାରି ତାର ବାକିଅ ଜାନାଇରଇଲା, ସେମନ୍‌କେ ଟିକି ନିକି ବୁଜାଇ କରି କଇଲା । ୨୮ ଆରି ସାଉଲ୍, ପେରିଡ଼ ସିସ୍‌ମନ୍‌ର୍ ସଙ୍ଗ୍ ରଇଲା ଆରି ଜିରୁସାଲମର୍ ଗୁଲାଇବାଟେ ଜାଇ, ନ ଡରତେ ମାପୁରୁର୍ ବାକିଅ ଜାନାଇଲା । ୨୯ ସାଉଲ୍ ଏ ସବୁ ବିସଇ ଗିରିକ୍ ବାସା କଇବା ଜିଉଦିମନ୍‌ର୍ ସଙ୍ଗ୍ ଦଦାପେଲା ଅଇଲା । ମାତର୍ ସେମନ୍ ସାଉଲ୍‌କେ ମରାଇବାକେ ଚେସ୍‌ଟା କଲା । ୩୦ ବିସ୍‌ବାସି ବାଇମନ୍ ଏ କାତା ଜାନିକରି ସାଉଲ୍‌କେ କାଇସରିଆ ନାଉଁର୍ ଗଟେକ୍ ଜାଗାଇ

ଦାରିଗାଲାଇ । ଆରି ତେଇଅନି ତାକେ ତାର୍‌ସିସ୍ ବଲି ବିନ୍ ଗଟେକ୍ ଜାଗାଇ ପାଟାଇ ଦେଲାଇ ।

୩୧ ଜିଉଦା, ଗାଲିଲି ଆରି ସମିରଣେ ରଇବା ମଣ୍ଡଲିମନର୍ ପାଇ ସେବେଲା ଗଟେକ୍ ସାନ୍ତିର୍ ବେଲା ରଇଲା । ସୁକଲ୍ ଆଡ଼ମା ସେମନର୍ ସଙ୍ଗ୍ ରଇଲା ଜେ ଲକ୍‌ମନ୍ ଦିନକେଦିନ୍ ଅଦିକ୍ ଅଦିକ୍ ଅଇ ତାଟ୍ ଅଇଲାଇ । ଜିସୁକେ ବିସ୍‌ବାସକର୍‌ବା ଲକ୍‌ମନ୍, ମାପୁରୁକେ ଡରିକରି ଆରି ମାନିକରି ଜିଇତେ ରଇଲାଇ ।

### ଲୁଦା ଆରି ଜପ୍‌ପା ଜାଗାଇ ପିତର୍

୩୨ ପିତର୍ ବିନ୍ ବିନ୍ ଜାଗାଇ ବୁଲି ବୁଲି ତରେକ୍ ଲୁଦାଇ ବାସାଅଇରଇବା, ମାପୁରୁର୍ ଲକ୍‌ମନର୍ ସଙ୍ଗ୍ ମିସ୍‌ବାକେ ଗାଲା ।

୩୩ ତେଇ ଏନିୟ୍ ନାଉର୍ ଗଟେକ୍ ଲକ୍‌କେ ସେ ବେଟ୍ ଅଇଲା, ଏନିୟ୍‌କେ ତେରେଙ୍ଗ୍ ବାଡ଼ ଦାରି ଆଟ୍ ବରସ୍ ଅଇଜାଇରଇଲା । ସଇଲାଟାନେଅନି ଉଟି ନାପାର୍‌ତେ ରଇଲା । ୩୪ ପିତର୍ ତାକେ କଇଲା, “ଏନିୟ୍ ଜିସୁ ମାପୁରୁ ତକେ ନିକ କରିଆତେ । ଉଟ୍ ଆରି ତର୍ ଅର୍‌ନା ସାଜାଡ଼ ।” ୩୫ କଇଲା ଦାପ୍‌ରେ ଏନିୟ୍ ଉଟି ଚିଆଅଇଲା । ଏଟା ଦେକି କରି ଲୁଦା ଆରି ସାରନେ ବାସା ଅଇରଇବା ସବୁ ଲକ୍‌ମନ୍ ମାପୁରୁର୍ ବାଟେ ଆଇବାକେ ମନ୍ କଲାଇ ।

୩୬ ଜପାଇ, ଟାବିତା ନାଉର୍ ଗଟେକ୍ ବିସ୍‌ବାସି ମାଇଜି ବାସା ଅଇରଇଲା । ତାର୍ ଗିରିକ୍ ନାଉଁ, ଦାର୍‌କାସ୍ । ତାର୍ ଅରଡ଼ କର୍‌ରା । ସେ ସବୁବେଲା ସଡ଼ କାମ୍ କରି, ରଗି ଦୁକ୍‌ମନର୍ ସେବା କର୍‌ତେ ରଇଲା । ସେବେଲେ ସେ ରଗ୍‌ବେମାର୍ ଅଇ ମରିଗାଲା । ୩୭ ତାର୍ ଲକ୍‌ବାକ୍‌ମନ୍ ଟାବିତାର୍ ମଲାମଡ଼ ପାନିଦୁଆଇଲାଇ ଆରି ଲୁଗା ସଙ୍ଗ୍ ଗୁଡ଼ିଆଇ ଉପର୍ ତାଲାର୍ ବାକ୍‌ରାଇ ସୁଆଇଦେଲାଇ । ୩୮ ଜପା ଜାଗା ଲୁଦାଇଅନି ଦୁରିକେ ନ ରଇଲା । ପିତର୍ ଲୁଦାଇ ଆତେ ବଲି ସୁନିକରି ଜପାଇ ରଇବା ବିସ୍‌ବାସିମନ୍ ଦୁଇ ଲକ୍‌କେ ପିତରର୍ ଲଗେ କଇ ପାଟାଇଲାଇ । “ଅଲସମ୍ ନ କରି, ଦାପେ ଆମର୍ ଲଗେ ଚନେକ୍ ଆସା ।” ୩୯ ପିତର୍ ତିଆର୍ ଅଇକରି ସେମନର୍ ସଙ୍ଗ୍ ଗାଲା । ତେଇ ସେ କେଟ୍‌ଲା ଦାପ୍‌ରେ ଲକ୍‌ମନ୍ ତାକେ ଉପର୍ ତାଲାର୍ ବାକ୍‌ରାଇ ଡାକି ନେଲାଇ । ରାଣ୍ଡି ମାଇଜିମନ୍ ଚାରିବେଡ଼ି ଅଇକରି କାନ୍ଦି କାନ୍ଦି ଦାର୍‌କାସ୍ ଜିବନ୍ ରଇଲାବେଲେ ସିଲାଇ ରଇବା ବସ୍‌ତର୍ ଆରି ଲୁଗାମନ୍ ସବୁ ପିତର୍କେ ଦେକାଇଲାଇ । ୪୦ ପିତର୍ ବାକ୍‌ରାଇଅନି

ସବୁକେ ବାରକରାଇ ଦେଲା ଆରି ମାଣ୍ଡିକୁଟା ଦେଇ ପାର୍ତନା କଲା । ତାରପଟେ ଦରକାସର ମଲା ଗାଗଡ଼ରବାଟେ ଦେକିକରି କଇଲା, “ଗାବିତା ଉଟ୍ !” ଏଦେ ଦେକା ! ଦରକାସ୍ ଆଁକି ଦେକ୍ଲା ଆରି ପିତରକେ ଦେକି ଉଟିକରି ବସ୍ଲା । <sup>୪୧</sup> ପିତର ଆଡ଼ ଲାମାଇ ତାକେ ଉଟାଇଲା । ତାର ପଟେ ତେଇ ରୁଣ୍ଡି ରଇଲା ସବୁ ବିସ୍ବାସି ଆରି ରାଣ୍ଡି ମାଇଜିମନ୍‌କେ ଡାକି ଦରକାସ୍‌କେ ସରପିଦେଲା । <sup>୪୨</sup> ଏ କବର ଜପାର ଗୁଲାଇ ବାଟର ଲକ୍ ସୁନ୍‌ଲାଇ ଆରି କେତେ କେତେ ଲକ୍‌ମନ୍ ମାପରୁକେ ବିସ୍ବାସ୍ କଲାଇ । <sup>୪୩</sup> ପିତର ବେସି ଦିନ୍ ଜପାଇ ସିମନ୍ ନାଉଁର ଗଟେକ୍ ଲକ୍, ଜେକି ପସୁମନ୍‌ର ଚାମ୍ ସଙ୍ଗ୍ କାଇକାଇ ଜିନିସ୍‌ମନ୍ ତିଆର୍ କରି ବଢ଼ତେ ରଇଲା, ତାର ଗରେ ରଇଲା ।

## ୧୦

### ପିତର ଆରି କରନିଲିଅ

<sup>୧</sup> କାଇସରିଆ ଅନି କରନିଲିଅ ନାଉଁର ଗଟେକ୍ ଲକ୍ ରଇଲା । ସେ, ଇଟାଲି ଅନି ଆଇବା ଗଟେକ୍ ବଡ଼ ଦଲର ରମିୟ ସନିଅମନ୍‌ର, ନେତା ରଇଲା । <sup>୨</sup> ସେ ଗଟେକ୍ ଦରମ୍ ଲକ୍ ରଇଲା । ସେ ଆରି ତାକର ଗରର ଲକ୍‌ମନ୍ ସବୁ ପର୍ମେସରକେ ଉପାସନା କରତେ ରଇଲାଇ । ସେ ରକିଦୁକି ଜିଉଦିମନ୍‌କେ ବେସି ଉପକାର୍ କରତେ ରଇଲା । ଆରି ଜେତେବେଲ୍ ମିସା ପର୍ମେସରକେ ପାର୍ତନା କରତେ ରଇଲା । <sup>୩</sup> ଦିନେକ୍ ଆଡ଼ବେଲାର୍ ତିନ୍‌ଟା ବେଲେ କରନିଲିଅ ପାର୍ତନା କଲାବେଲେ, ଗଟେକ୍ ଦରସନ୍ ପାଇଲା । ତେଇ ପର୍ମେସରର ଦୁଡ଼ ଆସି ତାକେ “କରନିଲିଅ !” ବଲି ଡାକ୍‌ବାଟା ନିକ ସଙ୍ଗ୍ ଦେକ୍ଲା ।

<sup>୪</sup> ସେ ଡରିକରି ସରଗର୍ ଦୁଡ଼ବାଟେ ଦେକିକରି କଇଲା, “କାଇଟା ବଲି କଇଲୁସ୍‌ନି ମାପରୁ ?”

ସରଗର୍ ଦୁଡ଼ କଇଲା, “ପର୍ମେସର ତର ପାର୍ତନା ଆରି ଦୁକିରକିମନ୍‌କେ ଦାନ କରବାଟା ଦେକି ସାର୍‌ଦା ଅଇଲା । ଆର୍ ବାଦୁଲେ କାଇଟାଆଲେ ଦେବାକେ ସେ ମନ୍ କଲାନି । <sup>୫</sup> ଏବେ ସିମନ୍ ପିତର ନାଉଁର ଗଟେକ୍ ଲକ୍‌କେ ଇତି ଡାକି ଆନବାକେ, ଜପାଇ ଲକ୍ ପାଟାଆ । <sup>୬</sup> ସେ ସମ୍‌ଦୁର କଣ୍ଡି ବାସାଅଇରଇବା ସିମନ୍

ନାଉଁର ଗଟେକ୍, ପସୁମନର୍ ଚାମ୍ ସଙ୍ଗ୍ କାଇକାଇଟା ତିଆର୍ କର୍ବା ଲକର୍ ଗରେ ରଇଲାନି ।”<sup>୭</sup> ଏଡ଼କି କାତା କଇ ସରଗର୍ ଦୁଡ଼ ଉଟିଗାଲା । କର୍ନିଲିଅ ତାକର୍ ଗରର୍ ଦୁଇଟା ଗତିଦାଙ୍ଗ୍ତାକେ ଆରି ତାକେ ସେବା କର୍ତେରଇବା ଆରି ପର୍ମେସର୍କେ ଉପାସନା କର୍ତେରଇବା ଗଟେକ୍ ସଇନକେ ଡାକାଇଲା ।<sup>୮</sup> ସେ ସେମନ୍କେ ଦୁଡ଼ କଇରଇବା ସବୁ କାତା ଜାନାଇ କରି ଜପାଇ ପାଟାଇଲା ।

<sup>୯</sup> ତାର୍ ଆର୍କର୍ ଦିନେ ଆଡ଼ବେଲାଇ ସେମନ୍ ଜପାର୍ ଲଗାଲଗି ଅଇଲାବେଲେ, ପିତର୍ ପାର୍ତନା କର୍ବାକେ ମେଡ଼ଗରର୍ ଚାଉନି ଉପ୍ରେ ଜାଇ ରଇଲା ।<sup>୧୦</sup> ସେ ଉପାସ୍ ସାରାଇକରି, କାଇଟାଆଲେ କାଇବାକେ ମନ୍ କଲା ଆରି କାଦି ତିଆର୍ ଅଇବା ବେଲାଇ ସେ ଗଟେକ୍ ଦରସନ୍ ଦେକ୍ଲା ।<sup>୧୧</sup> ଏଦେ ଦେକା ! ଆକାସ୍ ଉଗାଡ଼ିଅଇଲାଟା ଆରି ଗଟେକ୍ ବଡ଼ ଚାଦର୍ ଚାରିକନେ ବାନ୍ଧିଅଇକରି ଦର୍ତନି ଉପ୍ରେ ଉଡ଼ରି ଆଇବାଟା ଦେକ୍ଲା ।<sup>୧୨</sup> ତେଇ ଜଗତେ ରଇବା ରକାମ୍ ରକାମର୍ ଗଡ଼ ସଙ୍ଗ୍ ଇଣ୍ଡୁବା ପସୁ, ରାଙ୍ଗ୍ବା ଜନ୍ତୁ ଆରି ଉଡ଼ବା ଚଡ଼ଇମନ୍ !<sup>୧୩</sup> ଆରି ସେ ଗଟେକ୍ କାତା ଅଇବା ସବଦ୍ ସୁନ୍ଲା, “ପିତର୍ ! ଉର୍ ସେମନ୍କେ ମାରିକରି କାଆ !”

<sup>୧୪</sup> ମାତର୍ ପିତର୍ କଇଲା, “ନାଇ ମାପୁରୁ, ଆମର୍ ଜିଉଦି ନିୟମ୍ ଇସାବେ ଅସୁକଲ୍ ବଲି କଇବା କାଇ ମାଉସ୍ ମିସା କାଇନାଇ ।”

<sup>୧୫</sup> ସେ ସବଦ୍ ଆରି କଇଲା “ପର୍ମେସର୍ ଜନଟା ସୁକଲ୍ କଲାଆଟେ ସେଟା ନିର୍ବାର୍ ନାଇ ।”<sup>୧୬</sup> ଏନ୍ତାରି ତିନ୍ତର୍ ଅଇଲା ପଟେ ଚାଦର୍ ସରଗ୍ ବାଟେ ଚଗାଇ ଦାରି ଗାଲାଇ ।

<sup>୧୭</sup> ପିତର୍ ଜନ୍ ଦରସନ୍ ପାଇରଇଲା, ତାର୍ ଅରଡ଼ କାଇଟା, ସେଟା ବାବି କାନାବାନା ଅଇଗାଲା । ଟିକ୍ ସେନ୍ତି ଅଇଲାବେଲେ, ଏଦେ ଦେକା ! କର୍ନିଲିଅ ପାଟାଇଲା ଲକ୍ମନ୍ ସିମନ୍କେ କଜି କଜି ଆସି, ତାର୍ ଗରର୍ ବାଟ୍ଡିଆଗତି ଲଗେ ଟିଆଅଇଲାଇ ।<sup>୧୮</sup> ସେମନ୍ ଡାକିକରି ପାଟାରୁଲାଇ, “ସିମନ୍ ପିତର୍, ନାଉଁର ଗତିଆ ଲକ୍ ଇତି ଆଟେ କି ?”<sup>୧୯</sup> ପିତର୍ ସେ ଦରସନ୍ ବିସଇ ଚିନ୍ତା କର୍ତେ ରଇଲାବେଲେ ଆଡ଼ମା ତାକେ କଇଲା, “ସୁନ୍ ! ତକେ ତିନ୍ ଲକ୍ କଜିଲାଇନି ।”

୨୦ “ଉଡ଼, ତଲେ ଜାଆ । ଏ ଲକ୍ମନର ସଙ୍ଗେ ଜିବାକେ ନିର୍ଦ୍ଦାୟ, କାଇକେବଇଲେ ମୁଇ ସେମନ୍‌କେ ପାଟାଇଆତି ।”

୨୧ ତେଇଅନି ପିତର ସେ ଲକ୍ମନର ଲଗେଜାଇ କଇଲା, “ତମେ ଜାକେ କଜ୍‌ଲାସ୍‌ନି, ସେ ଲକ୍ମ ମୁଇ, ତମେ କାଇକେ ଆସି ଆଟାସ୍ ?”

୨୨ ସେମନ୍ କଇଲା, “କର୍‌ନିଲିଅ ନାଉଁର୍ ରମିୟ ସଇନମନର୍ ନେତା ଆମ୍‌କେ ପାଟାଇଆଟେ । ଜେ କି ଗଟେକ୍ ଦରମ୍ ଲକ୍ ଆରି ପରମେସର୍‌କେ ନାମ୍‌ସି । ଗୁଲାଇ ଜିଉଦି ଲକ୍ମନ ତାକେ ନାମ୍‌ବାଇ । ତୁଇ କଇବାଟା ସୁନ୍‌ବାକେ, ସେ ତକେ ତାର୍ ଗରେ ଡାକାଇଆଟେ । ଏନ୍ତାରି କର୍‌ବାକେ ପରମେସର୍ ପାଟାଇଲା ଦୁଡ଼ ତାକେ ତିଆର୍‌ଲା ଆଟେ ।” ୨୩ ପିତର ସେମନ୍‌କେ ବିତ୍‌ରେ ଡାକିନେଇକରି ସେ ରାତି ତେଇ ରଇବାକେ ଗୁଆରି କଲା ।

ତାର୍ ଆରକର୍ ଦିନେ ସେ ଉଟି ସେମନର୍ ସଙ୍ଗେ ଗାଲା । ଆରି ଜପା ନାଉଁର୍ ଜାଗାର୍ କେତେଟା ବିସ୍‌ବାସି ବାଇମନ୍ ମିସା ସେମନର୍ ସଙ୍ଗେ ଗାଲା । ୨୪ ଆରି ଗଟେକ୍ ଦିନେ ସେମନ୍ ସିସେରିଆଇ କେଟ୍‌ଲା । ତେଇ କର୍‌ନିଲିଅ ତାର୍ ମଇତର୍‌ମନ୍‌କେ ଆରି କୁଟୁମର୍ ଲକ୍ମନକେ ରୁଣ୍ଡାଇକରି ପିତରକେ ଜାଗିରଇଲା । ୨୫ ପିତର ଗର୍ ବିତ୍‌ରେ ଜିବାବେଲେ କର୍‌ନିଲିଅ ତାକେ ବେଟ୍‌ଅଇ, ତାର୍ ପାଦେ ଡାଣ୍ଡାସନ୍ ପଡ଼ି ଜୁଆର୍ କଲା । ୨୬ ପିତର ତାକେ ଉଟାଇକରି କଇଲା, “ଟିଆ ଅ, ମୁଇ ମିସା ତର୍‌ପାରା ଗଟେକ୍ ମୁନ୍‌ସ୍‌ସେ ।” ୨୭ ପିତର କର୍‌ନିଲିଅର୍ ସଙ୍ଗେ କାତା ଅଇ ଅଇ ଗର୍ ବିତ୍‌ରେ କେଟ୍‌ଲା ଆରି ତେଇ ବେସିଲକ୍ ରୁଣ୍ଡିରଇବାଟା ଦେକ୍‌ଲା । ୨୮ ସେ ସେମନ୍‌କେ କଇଲା, “ଜିଉଦି ନ ଅଇଲା ଲକ୍ମନର ସଙ୍ଗେ ମିସ୍‌ବାଟା କି ତାକର୍ ଗରେ ଜିବାଟା ଆମର୍ ଜିଉଦି ଲକ୍ମନର ବିଦି ନାଇ । ସେଟା ତମେ ନିକକରି ଜାନାସ୍ । ଏଲେମିସା କନ୍‌ଆଲେ ଗଟେକ୍ ଲକ୍‌କେ ଅସୁକଲ୍ ଇସାବେ ଦେକ୍‌ବାର୍ ନାଇ ବଲି ପରମେସର୍ ମକେ କଇଲାଆଟେ । ୨୯ ତେବେ ମକେ ଡାକାଇଲା ଦାପ୍‌ରେ କାଇଟା ନ ବାବିକରି ଆଇଲି । ମକେ କାଇକେ ଡାକାଇଲୁସ୍ ତେବେ ? ସେଟା ମୁଇ ଜାନ୍‌ବାକେ ମନ୍ କଲିନି ।”

୩୦ କର୍‌ନିଲିଅ କଇଲା, ତିନ୍‌ଦିନ୍ ଆଗ୍‌ତୁ ଆଡ଼ବେଲାର୍ ତିନ୍‌ଟା ସମାନ୍ ଏଡ଼କି ବେଲାଇ, ମୁଇ ଗରେ ପାର୍‌ତନା କର୍‌ତେ ରଇଲି । ସେଡ଼କି ବେଲେ, ଏଦେ ଦେକା ! ଦବ୍ ପଟିଆ ପିନ୍ ରଇବା ଗଟେକ୍

ଲକ୍ ମର୍ ମୁଆଟେ ଚିଆଅଇଲା, ଆରି କଇଲା, ୩୧ “କର୍ନିଲିଅ ! ପର୍ମେସର୍ ତର୍ ପାର୍ତନା ସୁନ୍ଲା ଆରି ତମେ ଦୁକିରକିକେ ସାଇଜ କରବାଟା ଦେକି ସାର୍ଦା ଅଇଆଟେ । ୩୨ ସିମନ୍ ପିତର୍ ନାଉର୍ ଗଟେକ୍ ଲକ୍‌କେ ଆନ୍‌ବାକେ ଜପା ନାଉର୍ ଜାଗାଇ, ଲକ୍‌ମନ୍‌କେ ପାଟାଆ । ସେ ସମଦୁର୍ କଣ୍ଡି ବାସାଅଇରଇବା ପସୁମନର୍ ଚାମ୍ ସଙ୍ଗ୍ କାଇକାଇଟା ତିଆରକରୁ ସିମନ୍‌ର ଗରେ ଗତିଆ ଅଇଆଟେ । ୩୩ ତେବର୍ ପାଇ, ମୁଇ ତକେ ଦାପ୍‌ରେ ଡାକାଇଲି, ଆରି ତମେ ମର୍ କାତା ମାନିକରି ଆସି ଆଟାସ୍ । ଏବେ ଆମେ ସବୁ ଲକ୍ ପର୍ମେସର୍ ରଇବା ଏ ଜାଗାଇ ରୁଣ୍ଡିଆତୁ । ମାପ୍‌ରୁ ତକେ ଜନ୍‌ଟା କଇବାକେ ଆଦେସ୍ ଦେଲା ଆଟେ, ସେଟା ସୁନ୍‌ବାକେ ଜାଗିଆତୁ ।”

### ପିତରର ଉପଦେସ୍

୩୪ ସିତିଅନି ପିତର୍ କଇଲା, “ଏବେ ମୁଇ ବୁଜିପାର୍‌ଲିନି ଜେ ପର୍ମେସର୍ କେତେଟା ଦଲ୍‌ମନ୍‌କେସେ ଡାକ୍‌ସି, ସେନ୍ତାରି ନଏଁ, ମାତର୍ ସବୁକେ ସମାନ୍ ଇସାବେ ଡାକ୍‌ସି । ୩୫ ଜନ୍ ଜାତିର୍ ଲକ୍ ମିସା ତାକେ ଡରିକରି, ତାର୍ ମୁଆଟେ ସଡ଼କାମ୍ କଲେ, ମାପ୍‌ରୁ ତାକେ ଡାକ୍‌ସି । ୩୬ ଇସରାଏଲିଅ ମନର୍ ଲଗେ ପର୍ମେସର୍ ଜନ୍ କବର୍ ପାଟାଇରଇଲା, ସେଟା ତୁଇ ଜାନିଆତୁସ୍ । ଜିସୁ କିରିସ୍‌ଟ ଜେ କି ସବୁର୍ ମାପ୍‌ରୁ, ସେ କରିରଇବା କାମେଅନି ସବୁଲକ୍‌ମନ୍ ସାନ୍ତିସଙ୍ଗ୍ ମିସ୍‌ବାଇ, ବଲି ପର୍ମେସର୍ ଆମ୍‌କେ ଜାନାଇଲାଆଟେ । ୩୭ ତୁବନ୍ ଦେଉ ଜଅନ୍ ପାପ୍ କାମ୍ କରବାଟାନେଅନି ବାଉଡ଼ବା ବିସଇ ଆରି ତୁବନ୍ ନେବା ବିସଇ କଇଲାପଟେ, ଗାଲିଲିଅନି ଆରାମ୍ କରି ଗୁଲାଇ ଜିଉଦାର୍ ସବୁବାଟେ ଜନ୍ ଗଟ୍‌ନାସବୁ ଗଟ୍‌ଲା ଆଟେ, ସେଟା ତୁଇ ଜାନୁସ୍ । ୩୮ ନାଜରିତର୍ ଜିସୁର୍ ବିସଇ ଆରି ପର୍ମେସର୍ ତାକେ କେନ୍ତ୍ର ସୁକଲ୍ ଆଡ଼ମା ଆରି ବପୁ ପୁରାପୁରୁନ୍ ଦେଇରଇଲା, ସେଟା ଜାନୁସ୍ । ଆରି ଜାନିଆତୁସ୍, ସେ ସବୁ ବାଟେ ଜାଇ ନିକନିକ କାମାମନ୍ କରିରଇଲା । ସଇତାନର୍ ବାନ୍‌ନେ ରଇଲା ଲକ୍‌ମନ୍‌କେ ମୁକ୍‌ଲାଇଲା । କାଇକେବଇଲେ ପର୍ମେସର୍ ତାର୍ ସଙ୍ଗ୍ ରଇଲା । ୩୯ ଜିସୁ ଇସରାଏଲ ଦେସେ ଆରି ଜିରୁସାଲାମେ ଜେଡ଼କି ସବୁ କାମାମନ୍ କଲା, ଆମେ ସବୁ ଲକ୍ ତାର୍ ସାକି ଆତୁ । ତାର୍‌ପଟେ ତାକେ କୁର୍‌ସେ କୁଟି ମାରି, ମରାଇଲାଇ । ୪୦ ମାତର୍ ପର୍ମେସର୍



ତାକେ ଡିନ୍ଦିନ୍ ଅଇଲାକେ ମଲାତେଇଅନି ଉଟାଇ ଜିବନ୍ କରାଇ, କେତେଲକ୍ତକେ ଦେକାଇଦେଲା । ୪୧ ସବୁଲକ୍ତ ତାକେ ଦେକ୍ବାକେ ପରମେସର୍ ଦେଏନାଇ, ଅବ୍‌କା ସେ ବାଟ୍‌ଲା ସାକିମନ୍‌କେସେ । ତାକେ ଆରିତରେକ୍ ଜିବନ୍ କରାଇଲାପତେ, ତାର୍ ସଙ୍ଗ୍ କାଆ ପିଇ ଅଇରଇଲା ଲକ୍ତମନ୍ ଆମେସେ । ୪୨ ଲକ୍ତମନ୍‌ର୍ ଲଗେ ସୁବ୍‌କବର୍ ଜାନାଇବାକେ ସେ ଆମ୍‌କେ ଆଦେସ୍ ଦେଲା । ବଠିରଇବା ଲକ୍ତର୍ ଆରି ମଲା ଲକ୍ତର୍ ବିଚାର୍‌କାରିଆ ଇସାବେ ତାକେସେ ବାଟ୍‌ଲା ଆରେ, ଏ କାତାର୍ ସାକିଦେବାକେ ମିସା ସେ ଆମ୍‌କେ ଆଦେସ୍ ଦେଲାଆରେ । ୪୩ ସବୁ ବବିସତ୍‌ବକ୍ତାମନ୍ ତାର୍ ବିସଇନେଇ, ଏ କବର୍ କଇରଇଲାଇ । ଜେ ମସିଅକେ ବିସ୍‌ବାସ୍ କର୍ସି, ମସିଅ କରିରଇବା କାମର୍ ଲାଗି, ପରମେସର୍ ତାର୍ ପାପ୍‌କେମା କର୍ସି ।”

### ବିସ୍‌ବାସ୍ ନ କରିରଇବା ଲକ୍ତ୍ ସୁକଲ୍ ଆତ୍‌ମା ପାଇଲାଇ

୪୪ ପିତର୍ ସିକିଆ ଦେବା ବେଲେ ଜେତେ ଲକ୍ତ୍ ସୁନ୍‌ତେ ରଇଲାଇ, ସେ ସବୁ ଲକ୍ତର୍ ଉପ୍‌ରେ ସୁକଲ୍ ଆତ୍‌ମା ଉଡ୍‌ରି ତାବିଅଇଲା । ୪୫ ଜିଉଦିନଇଲା ଲକ୍ତମନ୍‌ର୍ ଉପ୍‌ରେ ମିସା ପରମେସର୍‌ର୍ ସୁକଲ୍ ଆତ୍‌ମା ଡାବିଅଇବାଟା ଦେକି ଜପାଇଅନି ପିତର୍ ସଙ୍ଗ୍ ଆସିରଇବା ଜିଉଦି ବିସ୍‌ବାସିମନ୍ କାବାଅଇଗାଲାଇ । ୪୬ କାଇକେବଇଲେ ସେମନ୍ ପରମେସର୍‌କେ ଡାକ୍‌ପୁଟା କର୍ବାଟା, ଆରି ବିନ୍‌ବିନ୍ ବାସାଇ କାତାଅଇବାଟା, ଜିଉଦି ବିସ୍‌ବାସିମନ୍ ସୁନ୍‌ଲାଇ । ଜପାଇଅନି ଆସିରଇବା ଜିଉଦି ବିସ୍‌ବାସିମନ୍‌କେ ପିତର୍ କଇଲା, ୪୭ “ପରମେସର୍ ଆମ୍‌କେ ଜେନ୍ତି ସୁକଲ୍‌ଆତ୍‌ମା ଦେଲାଆରେ, ସେନ୍ତାରିସେ ଏ ଲକ୍ତମନ୍‌କେ ମିସା ଦେଲାଆରେ । ସେମନ୍‌କେ ତୁବନ୍ ନ ନିଆ ବଲି କେ ମିସା ଅଟ୍‌କାଇପାରସି କି ?” ୪୮ ସେଟାର୍ ପାଇ ପିତର୍ ସେମନ୍‌କେ ଜିସୁକିରିସ୍‌ଟର୍ ନାଉଁ ଦାରି ତୁବନ୍ ଦେଲାପତେ କର୍ନିଲିଅ ଆରି ତାର୍ ସଙ୍ଗ୍ ରଇବାଲକ୍ତମନ୍ ତାକେ ଆରି କେତେ ଦିନ୍ ସେମନ୍‌ର୍ ସଙ୍ଗ୍ ରଇବାକେ ବାରୁଜିଆ କଲାଇ ।

## ୧୧

ଜିରୁସାଲମ୍ ମଣ୍ଡଳିକେ ପିତର୍ ଜାନାଇବାଟା

୧ ଜିଉଦି ନଇଲା ଲକ୍ମନ୍ ମିସା ପର୍ଯ୍ୟନ୍ତ ବାକିଆ ନାମି ଆଚଡ଼ ବଲି ପେରିଡ଼ ସିସ୍ତାନ୍ ଆରି ଜିଉଦା ରାଇଜର୍ ବିନ୍ ବିସ୍ତାସି ବାଇମନ୍ ସୁନ୍‌ଲା । ୨ ପିତର୍ କାଇସେରିଆ ଅନି ଜିରୁସାଲମ୍ ଗାଲା । ଜିଉଦି ନଇଲା ଲକ୍ମନ୍‌କେ ସୁନ୍‌ଡ଼ କରୁ ବଲି କଇବା ଲକ୍ମନ୍ ତାକେ ବାକାନିକରି କଇଲା, ୩ “ତୁଇ ଜିଉଦି ନଇଲା ଗରେ, ଅବକା ଗତିଆଅଇ ଜାଉସ୍ ନାଇ, ତେଇ କାଇଲୁସ୍ ମିସା ।” ୪ ମାତର୍ ମୁଲେଅନି କର୍ନିଲିଅକେ କାଇକାଇଟା ଗଟିରଇଲା, ସେଟା ବୁଜାଇବାକେ ପିତର୍ କଇଲା । ୫ “ମୁଇ ଜପା ନାଉର୍ ନଅରେ ପାର୍ତନା କରବା ବେଲେ ଗଟେକ୍ ଦର୍ସନ୍ ଦେକଲି । ଗଟେକ୍ ବଡେଟା ଚାଦର୍ ଚାରିକନେ ଡରସକ୍ ବାସି ଜୁଲାଇଅଇ ଆକାସେଅନି ଉତରଲା ଆରି ସେଟା ମର୍ଲଗେ ଅଟକଲା ।” ୬ ସେ ବିଡରେ, ଗରେପସ୍‌ବା ପସୁ, ଡଙ୍ଗରେ ରଇବା ପସୁ, ରାଜି ବୁଲବାଟାମନ୍ ଆରି ବିନ୍ ବିନ୍ ରକାମର୍ ଚଡ଼ଇମନ୍ ରଇଲାଟା ନିକକରି ଦେକଲି । ୭ ତାର୍‌ପତେ ଗଟେକ୍ କର୍ ସୁନ୍‌ଲି, “ପିତର୍ ! ଉଟ୍, ମାରିକରି କାଆ ।” ୮ ମାତର୍ ମୁଇ କଇଲି, “ନାଇ ମାପୁର ! ମୁଲ୍‌କେ ନିଟି ! ଆମର୍ ଜିଉଦିମନ୍‌ର ନିୟ୍ ମନାକରିରଇବା ଇସାବେ, ଏବେ ଜାକ କାଇମିସା ମାଉସ୍ ଟଣ୍ଡେ ଚିଆଇ ନାଇତା ।” ୯ ସର୍ଗେଅନି ଆରିତରେକ୍ ଏ କର୍ ଆଇଲା, “ପର୍ଯ୍ୟନ୍ତ କାଇଟା ଆଲେ କାଇ ଅଇସି ବଲି କଇଲେ ସେଟା ନିର୍‌ବାର୍ ନାଇ ।” ୧୦ ଏନ୍ତାରି ତିନ୍‌ତର୍ ଅଇଲା ପତେ, ସେ ଜିଉଦିମନ୍ ରଇଲାଟା ସକ୍ ସେ ଚାଦର୍ ସରଗ୍ ଉପରେ ଜିକିନେଲା । ୧୧ ସମାନ୍ ବେଲାଇସେ, କର୍ନିଲିଅ ପାଟାଇଲା ତିନ୍ ଲକ୍ ସିସେରିଆଇ ଅନି ମୁଇ ରଇବା ଗରେ ଆସି କେଟ୍‌ଲା । ୧୨ ତୁଇମିଆ ନ ଅଇ ସେମନ୍‌ର ସକ୍ ଜିବାକେ ମକେ ସୁକଲ୍‌ଆଡ଼ମା ଚାଲ୍‌ନା ଦେଲା । ଜପାର୍‌ର ଏ ଚଅଟା ବିସ୍‌ବାସି ବାଇମନ୍ ମିସା ମର୍ ସକ୍ ସିସେରିଆଇ ଗାଲା ଆରି ଆମେ ସବୁ ଲକ୍ କର୍ନେଲିଅର୍ ଗରେ କେଟ୍‌ଲୁ । ୧୩ ତାର୍ ଗରେ ସେ କେନ୍ତ୍ର ସରଗ୍ ଦୁତର୍ ଦର୍ସନ୍ ପାଇରଇଲା, ସେ ବିସଇ ଆମ୍‌କେ ଜାନାଇଲା । ସରଗ୍ ଦୁତ୍ ତାକେ ଏନ୍ତ୍ର କଇରଇଲା, ଜପାତେଇ ରଇବା ପିତର୍‌କେ, ତାର୍ ଆରି ଗଟେକ୍ ନାଉଁ ଅଇଲାନି ସିମନ୍, ତାକେ ଇତି ଡାକି ଆନ୍‌ବାକେ ଲକ୍ ପାଟା । ୧୪ ସେ ଆସି

ତମ୍ଭଙ୍କେ ସିକିଆ ଦେଇସି ଆରି ସିତିଅନି ତମ୍ଭଙ୍କେ ଆରି ତମ୍ଭର ଗରୁ ଲକ୍ଷ୍ମୀଙ୍କେ ପରମେସ୍ୱର ରକିଆ କରସି । ୧୫ ଆରି ମୁଇ ଜେଡେବଲ୍ ସିକିଆଦେବାର୍ ଆରାମ୍ କଲି, ଆଗେ ସୁକଲ୍ ଆତ୍ମା ଜେନ୍ତାରି ଆମ୍ଭର ଉପରେ ଡାବିଅଇରଇଲା, ସେନ୍ତାରି ସେମନ୍ତର ଉପରେ ଡାବିଅଇଲା । ୧୬ \*ତାର୍ପତେ ମୁଇ ମାପୁରୁର୍ ଏ ବାକିଅ ଏତାଇଲି, ଜଅନ୍ ତମ୍ଭଙ୍କେ ପାନି ସଙ୍ଗ୍ ହୁବନ୍ ଦେଲା, ମାତର୍ ପରମେସ୍ୱର ତମ୍ଭଙ୍କେ ସୁକଲ୍ଆତ୍ମା ହୁବନ୍ ଦେଇସି । ୧୭ “ଏଟା ପୁରାପୁରନ୍ ସତ୍ ଜେ, ଆମେ ମାପୁରୁ ଜିସୁକିରିସ୍ତକେ ବିସ୍ୱାସ୍ କଲାକେ ପରମେସ୍ୱର ଆମ୍ଭଙ୍କେ ଜନ୍ ଦାନ୍ ଦେଲାଆଚେ, ଜିଉଦିନଇଲା ଲକ୍ଷ୍ମୀଙ୍କେ ମିସା ସେ ଦାନ୍ ଦେଲା ଆଚେ । ଜଦି ପରମେସ୍ୱର ମନ୍ କରସି ବଇଲେ, ମୁଇ କେ ଜେ ପରମେସ୍ୱରର୍ ଏ କାମ୍ ଅଟ୍ଟକାଇବି !”

୧୮ ଜିଉଦି ବିସ୍ୱାସିମନ୍ ଏଟା ସୁନ୍ଲା ପତେ ଆରି ନ ବାକାନିକରି ପରମେସ୍ୱରକେ ଡାକ୍ପୁଟା କଲାଇ, “ସେନ୍ତାରି ଆଲେ ଜିଉଦିନଇଲା ଲକ୍ଷ୍ମୀଙ୍କେ ମିସା ପାପ୍ କଲାଟା ମାନିଅଇକରି ନ ସାର୍ବା ଜିବନ୍ ପାଇବାକେ ସେ ସୁଜଗ୍ ଦେଲାଆଚେ ।”

### ଆନ୍ତିୟକର୍ ମଣ୍ଡଳି

୧୯ \*ଜିରୁସାଲେମ୍ବର୍ ଲକ୍ଷ୍ମୀଙ୍କେ ତିପାନ୍ତକେ ମରାଇଲାପତେ ବିସ୍ୱାସିମନ୍ତକେ ତାଡ଼ନା ଦେଲାଇ । ତେଇଅନି କେତେଲକ୍ଷ୍ମୀ ଚିନ୍ତବିନ୍ ଅଇଗାଲାଇ । ସେମନ୍, ପିନିସିଆ, ସାଇପରସ୍ ଆରି ଆନ୍ତିୟକ୍ ଟାନେ ଜାଇ ଅବ୍କା ଜିଉଦିମନ୍ତକେସେ ସୁବ୍ କବର୍ ଜାନାଇଲାଇ । ୨୦ ମାତର୍ କେତେଟା ସାଇପରସ୍ ଆରି କୁରିନିୟର୍ ବିନ୍ ବିସ୍ୱାସିମନ୍, ଆନ୍ତିୟକେ ଜାଇ ଜିଉଦି ନଇଲା ଲକ୍ଷ୍ମୀଙ୍କେତେଇ ଜିସୁ ମାପୁରୁର୍ ସୁବ୍ କବର୍ ଜାନାଇଲାଇ । ୨୧ ପରମେସ୍ୱରର୍ ବପୁ ସେମନ୍ତ ସଙ୍ଗ୍ ରଇଲା ଆରି ବେସି ଲକ୍ଷ୍ମୀ ବିସ୍ୱାସ୍ କରି ମାପୁରୁର୍ ବାଟେ ମନ୍ ବାଉଡାଇଲାଇ ।

୨୨ ଆନ୍ତିୟକିଆଇ ବେସି ଲକ୍ଷ୍ମୀଙ୍କେ ଜିସୁଟାନେ ବିସ୍ୱାସ୍ କଲାକାନି ବଲି ଜିରୁସାଲେମ୍ବର୍ ମଣ୍ଡଳିମନ୍ ସୁନ୍ଲାଇ । ଆରି ସେମନ୍ ବରନବାକେ ଆନ୍ତିୟକିଆଇ ପାଟାଇଲାଇ । ୨୩ ବରନବା ତେଇ କେଟିକରି ପରମେସ୍ୱର ସେ ଲକ୍ଷ୍ମୀଙ୍କେ କେନ୍ତି ଆସିରବାଦ୍

କଲାଆରେ, ସେଟା ଦେକି ସାର୍ଦ୍ଦା ଅଇଲା । ଆରି ମନ୍ଦପରାନ୍ ଦେଇକରି ମାପୁରୁକେ ବିସ୍ୱାସ୍ କରି ଚଲାଚଲ୍ଡି କରବାକେ ସେମନ୍ଦକେ ସିକିଆ ଦେଇ ସାର୍ଦ୍ଦା କଲା । <sup>୨୪</sup> ବରନବା ସୁକଲ୍‌ଆଡ଼ମାଇ ଆରି ବିସ୍ୱାସେ ପୁରୁନ୍ ଅଇ ରଇବା ଗଟେକ୍ ଦରମ୍ ଲକ୍ ରଇଲା । ସେ କବର୍ ଜାନାଇଲାକେ ବେସି ଲକ୍ ମାପୁରୁର୍ ଲଗେ ଆଇଲାଇ ।

<sup>୨୫</sup> ତାର୍ ପଟେ ବରନବା ସାଉଲ୍‌କେ କଜ୍‌ବାକେ ତାର୍‌ସସ୍ ଜାଗାଇ ଗାଲା । <sup>୨୬</sup> ତେଇ ତାକେ ବେଟ୍‌ପାଇ ବରନବା ଆନ୍‌ଟିଅକେ ଡାକି ଦାରିଆଇଲା । ପୁରା ଗଟେକ୍ ବରସ୍ ଜାକ ବରନବା ଆରି ସାଉଲ୍‌ ତେଇ ମଣ୍ଡଲିର୍ ବିସ୍ୱାସିମନ୍‌ର୍ ସଙ୍ଗ୍ ମିସି, ଲକ୍‌ମନ୍‌କେ ସିକିଆ ଦେଲାଇ । ଏ ଆନ୍‌ଟିଅକର୍ ବିସ୍ୱାସିମନ୍‌କେସେ ଲକ୍‌ମନ୍‌ ସିଗ୍ ପରଡୁମ୍ କିରିସ୍‌ଟାନ୍ ବଲି କଇରଇଲାଇ ।

<sup>୨୭</sup> ସେବେଲାଇ କେତେଟା ବବିସ୍‌ଡ଼ବକ୍‌ତାମନ୍ ଜିରୁସାଲମେଅନି ଆନ୍‌ଟିଅକେ ଆଇଲାଇ । <sup>୨୮</sup> ☆ସେମନ୍‌ର୍ ବିଡ଼ରେଅନି ଆଗାବ୍ ନାଉର୍ ଗଟେକ୍ ଲକ୍ ଆଡ଼ମାର୍ ବପୁ ସଙ୍ଗ୍ ପୁରୁନ୍ ଅଇ, ଗୁଲାଇ ଦେସେ ଗଟେକ୍ ବଡ଼ ମରଡ଼ି ଅଇସି ବଲି ବବିସ୍‌ଡ଼ କାତା ସୁନାଇ ରଇଲା । ଏଟା ବଡ଼ ସାସନ୍‌କାରିଆ କଲ୍‌ଡିୟ୍ ରମ୍‌ଦେସେ ସାସନ୍‌ କଲାବେଲେ ଗଟି ରଇଲା । <sup>୨୯</sup> ଆନ୍‌ଟିକିଅର୍ ସିସ୍‌ମନ୍‌ ଜିଉଦାଇ ରଇଲା ବିସ୍ୱାସି ବାଇମନ୍‌କେ ତାକର୍ ପାର୍‌ଲା ଏଡ଼କି ତାବୁ ପାଟାଇବାକେ ଟିକ୍ କଲାଇ । <sup>୩୦</sup> ସେମନ୍‌ ତାବୁ ଜମାଇକରି ବରନବା ଆରି ସାଉଲ୍‌ର୍ ଆଡେ, ମଣ୍ଡଲିର୍ ପାର୍‌ଟିମନ୍‌ର୍ ଲଗେ ପାଟାଇ ଦେଲାଇ ।

## ୧୨

### ଅଦିକ୍ ତାଡ଼ନା

<sup>୧</sup> ଏ ବେଲାଇ, ଏରଡ଼ ରାଜା ଜିରୁସାଲେମ୍ ମଣ୍ଡଲିର୍ କେତେକ୍ ବିସ୍ୱାସିମନ୍‌କେ ତାଡ଼ନା ଦେବାର୍ ଦାରୁଲା । <sup>୨</sup> ଜଅନର୍ ବାଇ ଜାକୁବ୍‌କେ କାଣ୍ଡା ସଙ୍ଗ୍ ମାରି ମରାଇଲା, ଜାକୁବ୍ ଜଅନର୍ ବଡ଼ ବାଇ ରଇଲା । <sup>୩</sup> ଜାକୁବ୍‌କେ ମରାଇଲାଟା ଜିଉଦିମନ୍‌କେ ସାର୍ଦ୍ଦା କରାଇଲା । ଏଟା ଦେକି ଏରଡ଼ ପିତରୁକେ ମିସା ବନ୍ଦି

କରବାକେ ତିଆରଲା । ଏଟା ଜିଉଦିମନ୍ କମିର୍ ନ ମିସାଇତେ ରୁଟିକରବା ପରବ୍ ବେଲେ ଅଇରଇଲା । ୪ ସଇନମନ୍ ପିତରକେ ବାନ୍ଦିକରି ବନ୍ଦିଗରେ ପୁରାଇଲା । ରକିଆ ପାଇବା ପରବର୍ ପଚେ ସବୁ ଲକର୍ ମୁଆଟେ ବିଚାରନା କରବି ବଲି ଏରଦ୍ ବାବି ରଇଲା । ସେଟାପାଇ ଗଟେକ୍ ଦଲେ ଚାରିଲକ୍ ଲାକା ଅଇ, ଚାରିଟା ଦଲ୍ କରି ସନିଅମନ୍ ତାକେ ଜାଗିରଇଲା । ୫ ପିତର୍ ବନ୍ଦିଗରେ ରଇଲାବେଲେ ଜିରୁସାଲେମେ ରଇବା ମଣ୍ଡଲିର୍ ବିସବାସିମନ୍ ଗଟେକ୍ ଅଇକରି ତାପାଇ ପର୍ମେସର୍କେ ପାରିତନା କର୍ତେରଇଲା ।

### ପିତର୍ ବନ୍ଦିଗରେ ଅନି ମୁକଲ୍ବାଟା

୬ ଜନ୍ ଦିନେ ଏରଦ୍ ପିତରକେ ଲକ୍ମନର୍ ମୁଆଟେ ଆନ୍ବାକେ କାତା ଦେଇରଇଲା, ତାର ଆଗତୁର୍ ରାତି ପିତର୍ ବନ୍ଦିଗରେ ଦୁଇଟା ଜାଗୁଆଲ୍ମନର୍ ମଜାଇ ସଇରଇଲା । ତାକେ ସନିଅମନ୍ ମିସ୍ତେ ଦୁଇଟା ଆତେ ଦୁଇଟା ସିକ୍ଲି ସଙ୍ଗ୍ ବାନ୍ଦିରଇଲା । ଆରି ଜାଗୁଆଲ୍ମନ ବନ୍ଦିଗରର୍ ଦୁଆରେ ଜାଗିରଇଲା । ୭ ସେ ଦାପ୍ରେ, ଏଦେ ଦେକା ! ମାପ୍ରେ ଗଟେକ୍ ଦୁଡ୍ ଆସି ପିତରର୍ ମୁଆଟେ ଚିଆଅଇଲା ଆରି ଗୁଲାଇ ବାକରା ଉଜଲ୍ ଅଇଗାଲା । ସରଗର୍ ଦୁଡ୍ ପିତରକେ କନ୍ଦେ ଦାରି ଚୁଲ୍ବୁଲାଇଲା ଆରି ସଇଲାଟାନେଅନି ଉଟାଇକରି କଇଲା “ଦାପ୍ରେ ଉଟ୍ !” ଉଟ୍ଲା ଦାପ୍ରେ ବାନ୍ଦି ଅଇରଇଲା ସିକ୍ଲି କୁସ୍ଲିଗାଲା । ୮ ତାପଚେ ଦୁଡ୍ କଇଲା, “ଆଁଟାଇ ତୁଆଲ୍ ବାନ୍ଦିଅ ଆରି ପାଣ୍ଡୁଇ ପିନ୍ ।” ପିତର୍ ସେକ୍ତି କଲା ପଚେ ଦୁଡ୍ କଇଲା, “ତାଦର୍ ତାବିଅଇକରି ମର୍ ସଙ୍ଗ୍ ଆଉ ।” ୯ ପିତର୍ ଦୁଡ୍ ପଚେ ପଚେ ବନ୍ଦିଗରେ ଅନି ବାରଇ ଆଇଲା । ଦୁଡ୍ ଜନ୍ଟା କର୍ତେରଇଲା, ସେଟା ସଡ୍ କି ନର୍ବ୍ ବଲି ଜାନି ନାପାରିତେରଇଲା । “ଏଟା ଗଟେକ୍ ଦରସନ୍ ଦେକ୍ଲିନି ।” ବଲି ବାବ୍ତେରଇଲା । ୧୦ ସେମନ୍ ଜାଗୁଆଲ୍ମନ ରଇବା ଦୁଇଟା ଜାଗା ଜିତିକରି ପଚେ ନଅରେ ପୁର୍ବା ଲୁଆ କାପାଟ୍ ରଇବା ଲିଗେ ଆଇଲା । ତାକର୍ପାଇ ଲୁଆ କାପାଟ୍ ତାମନ୍କେସେ ଉଗାଡିଅଇଗାଲା ଆରି ସେମନ୍ ବାରଇ ଉଚିଆଇଲା । ସେମନ୍

ବାଟେ ଇଣ୍ଡୁ ଇଣ୍ଡୁ ଅଟାଡ଼ ସରଗର ଦୁଡ଼ ପିତରକେ ଚାଡ଼ି ମାୟା ଅଇଗାଲା ।

୧୧ ତାର୍‌ପତେ ଜାଇଟା ଗଟିରଇଲା, ସେଡ଼କିବେଲେ ତାକେ କାଇଟା ଅଇରଇଲା, ସେଟା ପିତର ଜାନିପାରି କଇଲା, “ଏଟା ସଡ଼ ବଲି ମୁଇ ଜାନିଆଟି । ଏରଦର ଟାନେଅନି ଆରି ଜିଉଦି ଲକମନ୍ ଜାଇଟା ଗଟସି ବଲି ଆସା କରିରଇଲାଇ, ତେଇଅନି ମକେ ରକିଆ କରବାକେ ମାପୁରୁ ସରଗର ଦୁଡ଼କେ ପାଟାଇରଇଲା ।”

୧୨ ନିଜର ବିସଇ ଜାନିକରି ସେ ଜଅନ୍ ମାରକର ଆୟା ମରିୟମର ଗରେ ଗାଲା । ତେଇ ବେସି ବିସବାସିମନ୍ ରୁଣ୍ଡିକରି ପିତରର ପାଇ ପାରତନା କରତେ ରଇଲାଇ । ୧୩ ପିତର ବାଇରର କାପାଟେ ଟକଟକ କରି ମାରଲାକେ, ରଦା ନାଉର ଗଟେକ୍ ଗଡ଼ିଦାଈଡ଼ି କାପାଟ୍ ଉଗାଡ଼ବାକେ ଆଇଲା । ୧୪ ପିତରର କଟ୍‌ସର ଜାନିପାରି ସେ ଏତେକ୍ ସାରଦା ଅଇଲା ଜେ କାପାଟ୍ ନ ଉଗାଡ଼ି ବିଡ଼ରେ ପାଲାଇକରି ତେଇର ବିସବାସିମନ୍‌କେ କଇଲା, “ପିତର ବାଇରେ ଚିଆଅଇଲା ଆଟେ ।” ୧୫ ସେମନ୍ ତାକେ କଇଲାଇ, “ତୁଇ ବାୟାଅଇଲୁସନି ! ମାତର ‘ଏଟା ସଡ଼’ ବଲି ସେ ତାଟ୍ ସଙ୍ଗ୍ କଇଲାଗଲାକେ, ସେମନ୍ ଏଟା ତାର ଦୁଡ଼ କାଇକି,” ବଲି ବାବ୍‌ଲାଇ ।

୧୬ ପିତର ତରକେ ତର କାପାଟେ ମାରତେ ରଇଲା । ସାରାସାରି ସେମନ୍ କାପାଟ୍ ଉଗାଡ଼ି ତାକେ ଦେକି କାବାଅଇଗାଲାଇ । ୧୭ ସେ ଆଡ଼ ସାଗିଆକରି ସେମନ୍‌କେ ଚିମରା ଅଇବାକେ କଇଲା । ଆରି ମାପୁରୁ କେନ୍ତ୍ର ତାକେ ବନ୍ଦି ଗରେଅନି ବାରକରାଇ ଆନ୍‌ଲା, ସେ ବିସଇ ସେମନ୍‌କେ କଇଲା । ତାର୍ ପତେ ଏ ସବୁ କାତା ଜାକୁବ୍ ଆରି ବିନ୍ ସବୁ ବାଇମନ୍‌କେ ଜାନାଆ ବଲି କଇଲା । ପତେ ସେ ତେଇଅନି ବିନ୍‌ବାଟେ ଉଟିଗାଲା ।

୧୮ ସାକାଲ୍ ପାଇଲାକେ “ପିତର କେନେଗାଲା ?” ବଲି ଜାଗୁଆଲ୍‌ମନ୍ କିଲ୍‌ବିଲ୍ ଅଇଗାଲାଇ । ୧୯ ଏରଦ୍ ଏଟା ସୁନିକରି ପିତରକେ କଜ୍‌ବାକେ ତାର୍ ସନିଅମନ୍‌କେ ଆଦେସ୍ ଦେଲା । ମାତର ସେମନ୍ ତାକେ ମିଲାଇ ନାପାରୁଲାଇ । ତେବେ ସାରାସାରି ଜାଗୁଆଲ୍‌ମନ୍‌କେ ପାଟାରୁଲା । କେନ୍ତ୍ର ଏଟା ଅଇଲାଟା କଇନାପାରୁଲାକେ ସେମନ୍‌କେ ମରନର ଡ଼ଣ୍ଡୁ ଦେବାକେ ଆଦେସ୍ ଦେଲା ।

ତାର ପତେ ଏରଦ୍ ଜିଉଦା ରାଇଜେଅନି ଜାଇ କେତେ ଦିନର୍ପାଇ କାଇସରିଆଇ ବାସା ଅଇରଇଲା ।

### ଏରଦର୍ ମରନ୍

<sup>୨୦</sup> ସେ ବେଲାଇ ଏରଦ୍ ସର୍ ଆରି ସିଦନର୍ ଲକ୍ମନ୍‌କେ ବେସି ରିସା ଅଇରଇଲା । ସେଟାର ପାଇ ତେଇର୍ ଲକ୍ମନ୍ ଗଟେକ୍ ଦଲ୍, ତାକେ ବେଟ୍ ଅଇବାକେ ଗାଲାଇ । ପର୍ତ୍ତୁମ୍ ସେମନ୍ ରାଜା ସଇବା ଗର୍ ଦାଇତେ ରଇଲା ବାଲ୍‌ସ୍‌ଟ୍‌ସ୍‌କେ ବୁଜାଇ, ତାର୍ ସାଇଜ ପାଇଲାଇ । ତାର୍ ପତେ ସେମନ୍ ଏରଦର୍ ଲଗେ ଜାଇ ସାନ୍ତ୍ରସଙ୍ଗ୍ ରଉଁ ବଲି କାତା ଅଇଲାଇ, କାଇକେ ବଇଲେ ଏରଦର୍ ରାଇଜେଅନି ସେମନ୍‌ର୍ ଦେସେ କାଇବା ଜିନିସ୍ ଜାଇତେରଇଲା ।

<sup>୨୧</sup> ଜନ୍ ଦିନେ ଏରଦର୍ ସଙ୍ଗ୍ ସେମନ୍ ବେଟ୍ ଅଇବାକେ ଟିକ୍ କରିରଇଲାଇ, ସେ ରାଜାମନ୍ ପିନ୍‌ବା ବସ୍‌ତର୍ ପିନ୍‌ଲା ଆରି ତାର୍ ବସ୍‌ବା ଜାଗାଇ ବସି ଲକ୍ମନ୍‌କେ ଗଟେକ୍ ବାସନ୍ ଦେଲା । <sup>୨୨</sup> ସୁନ୍‌ବା ଲକ୍ମନ୍ ଆଉଲିଅଇଲାଇ, “ଜେ କାତା ଅଇଲାନି, ସେ ଲକ୍ ନର୍ସ୍, ମାତର୍ ପର୍‌ମେସର୍ !” <sup>୨୩</sup> “ମୁଇ ପର୍‌ମେସର୍ ନଇ,” ବଲି କଏ ନାଇକେ ଦାପରେ ମାପୁରୁର୍ ଦୁଡ୍ ଏରଦ୍‌କେ ରଗି କରାଇଲା । ସେଟାର୍‌ପାଇ ତାର୍ ଗୁଲାଇଗାଗଡ୍ କିଡା କାଇଲାଇ ଆରି ମରିଗାଲା ।

<sup>୨୪</sup> ଏ ବେଲାଇ ବିସ୍‌ବାସିମନ୍ ପର୍‌ମେସରର୍ ବାକିଅ ସୁନ୍‌ଲାଇ ଆରି ବିସ୍‌ବାସ୍ କର୍‌ବା ଲକ୍ମନ୍ ବଡିଗାଲାଇ । <sup>୨୫</sup> ଜିଉଦା ଦେସର୍ ବିସ୍‌ବାସିମନ୍‌କେ ତାରୁ ଦେଇ ସାରାଇକରି ବର୍‌ନବା ଆରି ସାଉଲ୍, ଆନ୍‌ଟିଅକିଆଇ ଆଇଲାଇ । ଜଅନ୍ ଆରି ମାର୍‌କକେ ମିସା ସେମନ୍ ସଙ୍ଗ୍ ନେଇ ଜିରୁସାଲମେ ବାଅଡ୍‌ଲାଇ ।

## ୧୩

ବର୍‌ନବା ଆରି ସାଉଲ୍‌କେ ପେରିଡ଼ ସିସ୍ ଇସାବେ ବାଟି ପାଟାଇଲାଇ

<sup>୧</sup> ଆନ୍‌ଟିଅକି ମଣ୍ଡଲିତେଇ କେତେଟା ବବିସଡ୍‌ବକ୍‌ତା ଆରି ସିକିଆ ଦେବା ଗୁରୁ ରଇଲାଇ । ସେମନ୍‌ର୍ ବିଡ୍‌ରେ ରଇଲାଇ ବର୍‌ନବା, ସିମନ୍ ଜାକେ କି ନିଗର୍ ଡାକ୍‌ତେରଇଲାଇ, ଲୁସିଅସ୍, ଜେ କି କୁରିନିୟ୍ ଅନି ଆସିରଇଲା, ମନର୍‌ମ୍ ଜେ କି ଏରଦର୍ ଗରେ ବଡି ରଇଲା ଆରି ସାଉଲ୍ । <sup>୨</sup> ସେମନ୍ ମାପୁରୁର୍ ସେବା ଆରି

ଉପାସ୍ କଲାବେଳେ, ସୁକଲ୍ ଆତ୍ମା ସେମନ୍ତେ କଇଲା, “ମୁଇ ଜନ୍ କାମପାଇ ସାଉଲ୍ ଆରି ବରନବାକେ ଡାକଲି ଆଟି, ସେଟାର୍ ପାଇ ସେମନ୍ତେ ଅଲ୍ଟା କରା ।”

୩ ସେଟାର୍ପାଇ ସେମନ୍ତ ଉପାସ୍ କଲାଆରି ପାରତନା କରି ଡାକର୍ ଉପରେ ଆତ୍ ସଙ୍ଗଇ ସେମନ୍ତେ କବର୍ କଇବା କାମେ ପାଟାଇଲାଇ ।

### ସାଇପରସ୍ ତେଇ ସେବା କାମ୍

୪ ସୁକଲ୍ ଆତ୍ମାଅନି ଆଦେସ୍ ପାଇକରି ଜାଇରଇବା ବରନବା ଆରି ସାଉଲ୍ ସେଲୁକିଆଇ ଗାଲାଇ । ଆରି ତେଇଅନି ପାନି ଜାଜେ ବସି ସାଇପରସ୍ ସମ୍ପୁର୍ ମଜାଇ ରଇବା ଜାଗାଇ ଗାଲାଇ । ୫ ସାଲାମି ଗଡେ କେଟି ଜିଉଦିମନର୍ ପାରତନା ଗର୍ମନ୍ତେ ପରମେସରର୍ ବାକିଅ ଜାନାଇଲାଇ । ଜଅନ୍ ମାର୍କ ମିସା ସେମନ୍ତର୍ ସଙ୍ଗ୍ ରଇକରି ସେମନ୍ତେ ସାଇଜ କର୍ତେ ରଇଲାଇ ।

୬ ସେମନ୍ତ ସାଇପରସ୍ ଜାଗା ଚାଡି ପାପତେ ନାଉର୍ ଜାଗାଇ ଗାଲାଇ । ତେଇ ବାର୍ଜିସୁ ନାଉର୍ ଗଟେକ୍ ମର୍ତର୍ ସିକିରଇବା ଜିଉଦିକେ ବେଟ୍ଅଇଲାଇ । ସେ ନିଜକେ ମିର୍ରେ ବସିସତ୍ବକତା ବଲି କଇତେ ରଇଲା । ୭ ସେ ସମ୍ପୁର୍ ମଜାଇ ରଇଲା ଜାଗାର୍ ସାସନ୍ କାରିଆର୍ ସର୍ଗିଅ ପାଉଲର୍ ମଇତର୍ ରଇଲା । ସର୍ଗିଅସ୍ ଗଟେକ୍ ଗିଆନି ଲକ୍ ରଇଲା । ସେ ପରମେସରର୍ ବାକିଅ ସୁନ୍ବାକେ ମନ୍ କରି ବରନବା ଆରି ପାଉଲ୍ତେ ଡାକାଇଲା । ୮ ମାତର୍ ଗୁନିଆଁ ଏଲିମାସ୍, (ଏଟା ତାର୍ ଗିରିକ୍ ନାଉଁ) ସେମନ୍ତେ ନିରୁ ବଲି କଇଲା, କାଇକେ ବଇଲେ, ସେ ସାସନ୍ କାରିଆ କିରିସ୍ତକେ ବିସ୍ବାସ୍ ନ କର ବଲି ବାବ୍ତେ ରଇଲା । ୯ ମାତର୍ ସାଉଲ୍ ଜାର୍ ନାଉଁକି ପାଉଲ୍, ସୁକଲ୍ ଆତ୍ମା ପୁରୁନ୍ ଅଇ, ମର୍ତର୍ ଜାନିରଇବା ଲକର୍ ବାଟେ ନିକ ଦେକ୍ଲା । ୧୦ ଆରି କଇଲା, “ଏ ସଇତାନର୍ ପିଲା ! ତୁଇ, ସବୁ ନିମାନ୍ ବିସଇ ବିରଦ୍ କଲାସ୍ନି । ତୁଇ ସବୁ ରକାମର୍ କରାପ୍ କାମେ ପୁରୁନ୍ ଅଇ ଆତୁସ୍ ଆରି ସବୁବେଳେ ପରମେସରର୍ କାମ୍ ମିର୍ ବଲି ଦେକାଇବାକେ ଚେସ୍ଟା କଲୁସ୍ନି । ୧୧ ଏବେ ମାପୁରୁର୍ ଆତେ ତଣ୍ଡ ପାଇସୁ । ତୁଇ କାଣା ଅଇଜାଇକରି ଚନେକର୍ପାଇ ବେଲର୍ ଉଜଲ୍ ଦେକି ନାପାରୁସ୍ ।”



ସେଦାପ୍ତରେ ଏଲିଫାସର ଆଁକି ଦୁର୍ଭର ଆନ୍ଦାର ଅଇଗାଲାପାରା ଲାଗଲା । ଆରି ତାକେ ଆଡେ ଦାରି ତାକିନେବାକେ ଗଟେକ୍ ଲକ୍‌କେ ଏନେତେନେ ଆଣ୍ଟାଲି ଅଇ କଜି ବୁଲୁଲା ।<sup>୧୭</sup> ଏଟା ଦେକି ସାସନ୍‌କାରିଆର୍ ବିସ୍‌ବାସ୍ ଅଇଲା, କାଇକେ ବଇଲେ ମାପୁରୁର୍ ସିକିଆ ସୁନି ସେ କାବା ଅଇଜାଇରଇଲା ।

### ପିସିଦିଆର୍ ଆନ୍‌ଟିୟକ୍ ତେଇ ସେବା କାମ୍

<sup>୧୩</sup> ପାଉଲ୍ ଆରି ତାର୍ ସଙ୍ଗ୍ ଜିବା ଲକ୍‌ମନ୍ ପାପସ୍ ଜାଗାଇ ଅନି ପାନିଜାଜେ ଜାଇ ପପୁଲିଆର୍ ପରଗା ନାଉଁ ଜାଗାର୍ ଗଟେକ୍ ଗଡେ କେଟ୍‌ଲାଇ । ଜଅନ୍‌ମାର୍‌କ୍ ତେଇ ସେମନ୍‌କେ ଚାଡିକରି ଜିରୁସାଲାମ୍ ବାଡ଼ତିଗାଲା ।<sup>୧୪</sup> ସେମନ୍ ପରଗାଇଅନି ଜାଇ ପିସିଦିଆର୍ ଆନ୍‌ଟିଅକେ କେଟ୍‌ଲାଇ । ଆରି ବିସ୍‌ରାମ୍‌ବାର୍ ଦିନେ ପାର୍‌ତନା ଗରେ ଜାଇ ବସ୍‌ଲାଇ ।<sup>୧୫</sup> ମସାର୍ ନିୟମ୍ ଆରି ବବିସ୍‌ତ୍‌ବକ୍‌ତାମନ୍‌ର ଲେକା ପଡ଼ଲା ପଟେ, ପାର୍‌ତନା ଚାଲାଉମନ୍ ସେମନ୍‌କେ ଏ କାତା କଇପାଟାଇଲାଇ, “ବାଇମନ୍ ଜଦି ଲକ୍‌ମନ୍‌ର ସାର୍‌ଦା ବଡ଼ାଇବାପାରା ଉପଦେସ୍ ଦେବାର୍ ଆଟେ, ତେବେ କୁଆ ।”<sup>୧୬</sup> ପାଉଲ୍ ଟିଆଅଇ ଲକ୍‌ମନ୍‌କେ ଚିମ୍‌ରାଇ ଅଇବାକେ ଆଡ଼ ସାଗିଆ କରି କଇଲା ।

“ଇତି ରୁଣ୍ଡିଅଇଲା ଇସ୍ରାଏଲ୍ ବାଇମନ୍ ଆରି ପରମେସ୍‌ରକେ ପାର୍‌ତନା କର୍‌ବା ଜିଉଦି ନଇଲା ଲକ୍‌ମନ୍, ମର୍ କାତା ସୁନା !<sup>୧୭</sup> ଇସ୍ରାଏଲ୍ ଜାତିର୍ ପରମେସ୍‌ର ଆମର୍ ଆନିଦାଦିମନ୍‌କେ ବାଟ୍‌ଲା । ଆରି ମିସ୍‌ର୍ ଦେସେ ସେମନ୍ ପରଦେସିଅଇ ରଇତେ ରଇଲା ବେଲେ, ଗଟେକ୍ ବଡ଼ ଜାତି କଲା । ପରମେସ୍‌ର ତାର୍ ବଡ଼ ବପୁ ସଙ୍ଗ୍ ସେମନ୍‌କେ ମିସରେଅନି ବାର୍‌କରାଇ ଆନ୍‌ଲା ।<sup>୧୮</sup> ଆରି ଚାଲିସ୍ ବରସ୍ ଜାକ ମରୁବାଲିରୁଏଁ ସେମନ୍‌ର ସାଦ୍‌ବାନ୍ କଲାଟା ମୁରୁରୁଲା ।<sup>୧୯</sup> ସେ କିଣାନେ ସାଡ଼ଟା ଦଲ୍‌କେ ନସ୍‌ଟ୍ କରି ତାର୍ ବାଟ୍‌ଲା ଲକ୍‌ମନ୍‌କେ ସେ ଦେସ୍ ଦେଲା ।<sup>୨୦</sup> ପାକାପାକି ଚାର୍ ସଅ ପଚାସ୍ ବରସ୍ ବିଡ଼ରେ ଏ ସବୁ ଗଟ୍‌ନା ଗଟିଗାଲା ।”

“ତାର୍ ପଟେ ସାମୁଏଲ୍ ବବିସ୍‌ତ୍‌ବକ୍‌ତାର୍ ବେଲା ଜାକ ପରମେସ୍‌ର ସେମନ୍‌ର ଉପରେ ବିଚାର୍‌ପଡ଼ିମନ୍‌କେ ବାଟ୍‌ଲା ।<sup>୨୧</sup> ଜେଡେବେଲେ ସେମନ୍ ଗଟେକ୍ ରାଜା ଦର୍‌କାର୍ ବଲି କଇଲାଇ,

ପରମେସର୍ ସେମନକେ ଚାଲିସ୍ ବରସ୍ ଜାକ ସାସନ୍ କର୍ବାକେ ବେନଜାମିନ୍ କୁଟୁମର୍ କିସ୍ଅର୍ ପଅ ସାଉଲକେ ବାଚ୍ଲା । ସାଉଲ୍ ଇସ୍ରାଏଲିୟମନକେ ଚାଲିସବରସ୍ ସାସନ୍ କଲା । ୨୨ ତାର୍ ପଚେ ପରମେସର୍ ତାକେ ରାଜା ପଦ୍ ଚାତାଇକରି ଦାଉଦକେ ସେମନର୍ ରାଜା କଲା ।” ପରମେସର୍ ତାର୍ ବିସଇ କଇରଇଲା, “ମୁଇ ଜନ୍ ରକାମେ ଲକ୍ମନକେ ଆଲାଦ୍ କର୍ବି, ଜେସିର୍ ପଅ ଦାଉଦ୍ ସେନ୍ତାରି ଗଟେକ୍ ଲକ୍ । ସେ ମୁଇ ମନକଲା ଇସାବେ ସରୁଜାକ କାମ୍ କର୍ସି ।” ୨୩ ଏ ଦାଉଦର୍ କୁଟୁମର୍ ଲକର୍ଟାନେଅନି ପରମେସର୍ ସେ କାତା ଦେଲା ଇସାବେ ଜିସୁକେ ଇସ୍ରାଏଲ୍ ଜାତିର୍ ମୁକ୍ତିକାରିଆ କଲାଆଚେ । ୨୪ ☆ଜିସୁ ତାର୍ କାମ୍ ଆରାମ୍ କର୍ବା ଆଗ୍ରୁ, ଜଅନ୍ ଇସ୍ରାଏଲର୍ ସରୁ ଲକର୍ ଲଗେ ଜାନାଇକରି, ସେମନକେ ପାପେଅନି ମନ୍ ବାଉତାଇ ଭୁବନ୍ ନେବାକେ ଅଇସି ବଲି କଇରଇଲା । ୨୫ ☆ଆରି ଜଅନ୍ ତାର୍ ସେବା କାମ୍ ସାରାଇବା ଆଗ୍ରୁ ଲକ୍ମନକେ ପାଚାରଲା, “ମର୍ ବିସଇ ତମେ କାଇଟା ବାବ୍ଲାସ୍ନି ? ତମେ ଜାକେ ଜାଗି ଆଚାସ୍, ମୁଇ ସେ ନଇ । ମାତର୍ ସୁନା ! ସେ ଦାପ୍ରେ ଆଇଲାନି । ତାର୍ ଗତିଦାଙ୍ଗତା ଅଇକରି ପାଣ୍ଡଇର୍ ପିତା ମିସା କୁସ୍ଲାଇବାକେ ମର୍ ଅଦିକାର୍ ନଇ ।”

୨୬ ଏ ମର୍ ଇସ୍ରାଏଲର୍ ବାଇମନ୍, ଅବ୍ରାଆମର୍ ନାତିତିମନ୍ ଆରି ପରମେସର୍କେ ପାର୍ତନା କର୍ବାକେ ଇତି ରୁଣ୍ଡଲା ଜିଉଦି ନଇଲା ଲକ୍ମନ୍, ଆମ୍କେ ସେ ମୁକ୍ତିର୍ କବର୍ ମିଲ୍ଲା ଆଚେ । ୨୭ ମାତର୍ ସେ ଆକା ଉଦାରକାରିଆ । ଜିରୁସାଲମର୍ ଲକ୍ ଆରି ସେମନର୍ ନେତାମନ୍ ବିସ୍ରାମ୍ବାରେ ବବିସଡ୍‌ବକ୍ତାମନର୍ ଲେକାଇଅନି ପଡ୍‌ଲାଟା ଲକ୍ମନ୍ ରୁଜଡ୍‌ନାଇ । ଏଲେମିସା ଜିସୁକେ ଦସି କରି ବବିସଡ୍‌ବକ୍ତାମନର୍ କାତା ସିଦ୍ କଲାଇ । ୨୮ ☆ଜିସୁକେ ବେସି ଲକ୍ ଦସ୍‌ଦେଲାଇ । ମାତର୍ କେ ମିସା ମରନର୍ ଡଣ୍ଡ ପାଇବା ଏଡ୍‌କି ଦସ୍ କଜି ନାପାରଲାଇ । ଏଲେମିସା ତାକେ ମରନର୍ ଡଣ୍ଡ

☆ ୧୩:୨୪ ୧୩:୨୪ ମାରକ ୧:୪; ଲୁକ୍ ୩:୩ ☆ ୧୩:୨୫ ୧୩:୨୫ ଜଅନ୍ ୧:୨୦; ମାତିଉ ୩:୧୧; ମାରକ ୧:୭; ଲୁକ୍ ୩:୧୭; ଜଅନ୍ ୧:୨୭ ☆ ୧୩:୨୮ ୧୩:୨୮ ମାତିଉ ୨୭:୨୨,୨୩; ମାରକ ୧୫:୧୩,୧୪; ଲୁକ୍ ୨୩:୨୧-୨୩; ଜଅନ୍ ୧୯:୧୫

ଦେବାକେ ପିଲାତୁକେ ବାଦିଅ କଲାଇ । ୨୯ ✨ସାସ୍ତରେ ଜନ୍ ସବୁ ବିସଇ ଲେକା ଆତେ, ସେ ଇସାବେ ସବୁ କାମ୍ କଲାପତେ ସେମନ୍ ତାକେ କୁର୍ସେଅନି ଉଡ଼ରାଇ ଆନ୍ଲାଇ । ବିନ୍ଲକ୍ମନ୍ ଆସିକରି ତାର୍ ଗାଗଡ଼ ନେଇ ସମାଦିଟାନେ ସଙ୍ଗଇଲାଇ । ୩୦ ମାତର୍ ପର୍ମେସର୍ ତାକେ ମଲାତେଇଅନି ଉଟାଇଲା । ୩୧ ✨ବେସି ଦିନ୍ ଜାକ, ତାର୍ ସଙ୍ଗ୍ ଗାଲିଲିଅନି ଜିରୁସାଲମ୍ ଆଇବାଜିବା ଲକ୍ମନ୍ ତାକେ ଦେକ୍ଲାଇ । ଏବେ ସେମନ୍ ଇସ୍ରାଏଲ୍ ଲକ୍ମନ୍‌ତେଇ ତାର୍ ସାକି ଆତଡ଼ । ୩୨ ଆମର୍ ଆନିଦାଦିମନକେ ପର୍ମେସର୍ କାତା ଦେଇରଇଲା ଇସାବେ ଆମେ ତମ୍‌କେ ଏ ସୁବ୍ କବର୍ ଜାନାଇଲୁନି । ୩୩ ପର୍ମେସର୍ ଜିସୁକେ ମଲାତେଇଅନି ଉଟାଇକରି ସେଟା ସିଦ୍ କଲାଆତେ । ସେମନ୍‌ର୍ ପିଲାମନ୍ ଆମକେ, ଆମର୍ ବିଡ଼ରେ ସେ କାତା ଦେଲାଟା ସିଦ୍ ଅଇଲା ଆତେ । ଗିଡ଼ ସଙ୍ଗିତାର୍ ଦୁଇ ଲମର୍ ଗିତେ ଦାଉଦ୍ ଏନ୍ତାରି ଲେକିଆତେ,  
“ତମେ ମର୍ ପଅ,

ଆଜି ମୁଇ ସବୁକେ ଦେକାଇ ଆଚି ଜେ ସତଇସେ ମୁଇ ତର୍ ବାବା ।”

୩୪ ଆରି ପର୍ମେସର୍ ପୁର୍ବେଅନି ସପଡ଼ କରି କାତାଦେଇରଇଲା । ମୁଇ ତାକେ ମଲାତେଇଅନି ଉଟାଇବି । ତାର୍ ଗାଗଡ଼ ସମାଦିତେଇ କୁଇ ଜିବାକେ ନ ଦେଇ ।

ଦାଉଦ୍‌କେ ଦେଇ ରଇବା ସପଡ଼ ଇସାବେ

ସତଇସେ ମୁଇ ତମ୍‌କେ ସୁକଲ୍ କରି ସବୁ ଆସିର୍ବାଦ୍ ଦେବି ।

୩୫ ଦାଉଦ୍ ଆରି ଗଟେକ୍ ଗିତସଙ୍ଗିତାଇ ଲେକ୍ଲାଆତେ,  
ମୁଇ ମରିଗାଲେ ମର୍ଗାଗଡ଼ ଦୁଇ ସମାଦିତେଇ କୁଇ ଜିବାକେ ଚାଡ଼ି ନ ଦେଉସ୍ ।

୩୬ ଦାଉଦ୍ ସାସନ୍ କଲାବେଲେ ପର୍ମେସର୍ ମନ୍ କଲା ଇସାବେ କାମ୍ କରି ସାରାସାରି ମଲା । ଆରି ଆନିଦାଦିମନ୍‌ର୍ ସଙ୍ଗ୍ ତପିଅଇଲା । ତାର୍ ଗାଗଡ଼ ସମାଦିତେଇ କୁଇଲା । ୩୭ ମାତର୍ ପର୍ମେସର୍ ଜାକେ ମଲାଟାନେଅନି ଉଟାଇଲା, ତାର୍ ଗାଗଡ଼ କୁଏ ନାଇ । ୩୮ ତେବର୍ପାଇ ମର୍ ଏ ଇସ୍ରାଏଲ୍‌ର୍ ବାକ୍ମନ୍, ତମେ ଏଟା ଜାନିରୁଆ । ଜିସୁ କରିରଇବା କାମେଅନି ସେ, ତମର୍ ପାପ୍ କେମା

✨ ୧୩:୨୯ ୧୩:୨୯ ମାତିଉ ୨୭:୫୭-୬୧; ମାର୍କ ୧୫:୪୨-୪୭; ଲୁକ୍ ୨୩:୫୦-୫୬; ଜଅନ୍ ୧୯:୩୮-୪୨ ✨ ୧୩:୩୧ ୧୩:୩୧ ପେରିଡ଼ ୧:୩

ଅଛସି । ୩୯ ମସାର ନିୟମ୍ ମାନିକରି ଆତୁ ବଇଲେ ପାପ୍ କେମା  
ନ ଅଇତା । ମାତର୍ ଜିସୁର୍ ଟାନେ ବିସ୍ବାସ୍ କଲାପାଇ ଆମେ  
ସବୁଲକ୍ ପାପେ ଅନି ମୁକ୍ତି ଆତୁ, ସେଟା ତମେ ଜାନ୍‌ବାର୍ ଆଟେ ।  
୪୦ ଜାଗ୍ରତ୍, ବବିସ୍ତବକ୍ତାମନ୍ ଜାଇଟା କଇଲାଅ ଆତଡ଼, ସେଟା  
ଜେନ୍ତୁକି ତମ୍‌କେ ନ ଗଟ । ୪୧ ପର୍‌ମେସର୍ କଇଲା,

ଏ ମକେ କିଜାଇବା ଲକ୍‌ମନ୍ ! ତମେମନ୍ କିଲ୍‌ବିଲ୍ ଅଇ ମରା !  
କାଇକେ ବଇଲେ ତମ୍‌ର୍ ବେଲାଅ ମୁଇ ଜନ୍ କାମ୍ କର୍‌ବାକେ  
ଗାଲିନି,

ସେଟା ଜେ ମିସା ବୁଜାଇ କଇଲେ, ତମେ ବିସ୍ବାସ୍ ନ କରାସ୍ ।

୪୨ ପାଉଲ୍ ଆରି ବର୍‌ନବା ପାର୍‌ତନା ଗରେଅନି ବାରଇବା  
ବେଲେ, ଆରି ଗଟେକ୍ ବିସ୍‌ରାମ୍‌ବାରେ ବାଉଡ଼ି ଆସି ଏ ସବୁ ବିସଇ  
ଆରି ବୁଜାଇବାକେ, ଲକ୍‌ମନ୍ ବାବୁଜିଆ କଲାଅ । ୪୩ ଲକ୍‌ମନ୍  
ପାର୍‌ତନା ଗରେଅନି ଉଟିଗାଲା ପଟେ, ବେସି ଜିଉଦିମନ୍ ଆରି  
ଜିଉଦି ଦରମ୍ ନେଇରଇବା ଜିଉଦି ନ ଅଇଲା ଲକ୍‌ମନ୍, ସାଉଲ୍  
ଆରି ବର୍‌ନବାର୍ ସଙ୍ଗ୍ ଜିବାର୍‌ଦାର୍‌ଲାଅ । ପେରିଡ଼ ସିସ୍‌ମନ୍ ତାକର୍  
ସଙ୍ଗ୍ କାତା ଅଇ ପରମେସର୍‌ର୍ ଜିବନ୍‌ଦୁକାଇଲାଟାକେ ମାନିକରି  
ଜିଇବାକେ ସେମନ୍‌କେ ସାର୍‌ଦା କରାଇଲାଅ ।

୪୪ ତାର୍ ଆରକର୍ ବିସ୍‌ରାମ୍‌ବାରେ ଆନ୍‌ଟିଅକିଅ ଗତର୍ ସବୁ  
ଲକ୍ ମାପ୍‌ରୁର୍ ବାକିଅ ସୁନ୍‌ବାକେ ଜିଉଦିମନ୍‌ର୍ ପାର୍‌ତନା ଗରେ  
ରୁଣ୍ଡିଲାଅ । ୪୫ ବେସି ଲକ୍ ରୁଣ୍ଡିଲାଟା ଦେକି, ଜିଉଦି ନେତାମନ୍  
ଈସା ଅଇଲାଅ । ଆରି ପାଉଲ୍ କଇବା କାତା, ବିରଦ୍ କରି  
ନିନ୍ଦା କଲାଅ । ୪୬ ମାତର୍ ପାଉଲ୍ ଆରି ବର୍‌ନବା ଅଦିକ୍ ଡାଟ୍  
ସଙ୍ଗ୍ କଇଲାଅ, “ପର୍‌ତମେ ପରମେସର୍‌ର୍ ବାକିଅ ତମ୍‌ର୍ ଲଗେ  
ଜାନାଇବାର୍ ଦରକାର୍ ରଇଲା । ମାତର୍ ତମେ ସେଟା ନିର୍‌ଲାସ୍‌ନି  
। ଆରି ତାର୍ ସଙ୍ଗ୍ ନ ସାର୍‌ବା ଜିବନ୍ ପାଇବାକେ ଅଦିକାର୍ ନାଅ  
ବଲି ବିଚାର୍ କଲାସ୍‌ନି । ସେଟାପାଇ ଆମେ ତମ୍‌କେ ଚାଡ଼ି, ଏ  
କାତା ଜିଉଦି ନଇଲା ଲକ୍‌ମନ୍‌କେ କଇବାର୍ ଗାଲୁନି । ୪୭ କାଇକେ  
ବଇଲେ ମାପ୍‌ରୁ ଆମ୍‌କେ ଏ ଆଦେସ୍ ଦେଲା ଆଟେ ।”

ଆନ୍ଦାରେ ଉଜଲ୍ ଅଇଲାପାରା

ଜିଉଦି ନ ଅଇଲା ଲକ୍‌ମନ୍‌କେ ମର୍ ବିସଇ ଜାନାଇବାକେ ମୁଇ  
ତମ୍‌କେ ବାଟିଆଟି ।

ଜେନ୍ତାରି କି ମୁଞ୍ଚ ସେମାନଙ୍କେ ରକିଆ କରି ପାରବି ବଲି ଦୁନିଆର୍ ସବୁ ଲକ୍ଷ୍ମୀନଙ୍କେ ତମେ କଇପାରାସ୍ ।

୪୮ ଜିଉଦି ନଇଲା ଲକ୍ଷ୍ମୀନ ଏଟା ସୁନି ବେସି ସାରଦା ଅଇଗାଲାଇ ଆରି ପର୍ମେସରର୍ କବର୍ ପାଇ ଜୁଆର୍ କଲାଇ । ଜନ୍ ଲକ୍ଷ୍ମୀନ ନ ସାରବା ଜିବନର୍ ପାଇ ବାଟାଇ ଅଇରଇଲାଇ, ସେମନ୍ ସେ କବର୍ ସୁନି ବିସ୍ବାସ୍ କଲାଇ ।

୪୯ ତେଇର୍ ବିସ୍ବାସିମନ୍ ସେ ଜାଗାଇ ବୁଲି ବୁଲି ମାପୁରୁର୍ ବାକିଅ ଜାନାଇଲାଇ । ୫୦ ମାତର୍ ସେ ଗତର୍ ବଡ଼ ଲକ୍ଷ୍ମୀନ ଆରି ପର୍ମେସର୍କେ ଉପାସନା କର୍ବା ଉପର୍କେ ରଇବା ଜିଉଦି ନ ଅଇଲା ମାଇଜିମନ୍‌କେ ସୁତରାଇକରି, ତେଇର୍ ଜିଉଦିମନ୍, ପାଉଲ୍ ଆରି ବର୍ନବାକେ ବିରଦ୍ କଲାଇ । ସେମନ୍ ତାଉଁକେ ତାଡ଼ନା ଦେବାର ଆରାମ କଲାଇ । ଆରି ସେ ଜାଗାଇଅନି ବାର୍ କରଦେଲାଇ । ୫୧ ☆ତେଇଅନି ଜିବାବେଲେ ପେରିଡ଼ ସିସ୍ମାନ୍ ସେ ଲକ୍ଷ୍ମୀନର୍ ବିରଦେ ତାକର୍ ପାଦର୍ ଦୁଲି ପାପୁଡିଦେଇ ଇକନିଅତେଇ ଗାଲାଇ । ୫୨ ଆନଟିଅକର୍ ବିସ୍ବାସିମନ୍ ସୁକଲ୍ ଆଡ଼ମାଇ ଆରି ସାରଦାଇ ପୁରୁନ୍ ଅଇଲାଇ ।

# ୧୪

## ଇକନିୟତେଇ କାମ୍

୧ ଜନ୍‌ଟା ଆନଟିଅକିତେଇ ଗଟିରଇଲା, ସେ ସମାନ୍ ବିସଇ ଆକିଅଟାନେ ମିସା ଅଇଲା । ପାଉଲ୍‌ଆରି ବର୍ନବା ପାରତନା ଗରେ ଏନ୍ତି ଡାଟ୍ ସଙ୍ଗ୍ ପର୍ଚାର୍ କଲାଇ ଜେ ବେସି ଜିଉଦି ଆରି ଗିରିକ୍ ଲକ୍ଷ୍ମୀନ ଜିସୁକେ ବିସ୍ବାସ୍ କଲାଇ । ୨ ମାତର୍ ଜନ୍ ଜିଉଦିମନ୍ ସେ ବାକିଅ ବିସ୍ବାସ୍ କରତନାଇ, ସେମନ୍ ଜିଉଦି ନ ଅଇଲା ଲକ୍ଷ୍ମୀନଙ୍କେ ବେମଜା କରି, ବିସ୍ବାସି ବାଇମନ୍‌କେ ବିରଦ୍ କରାଇଲାଇ । ୩ ଏଲେମିସା ପାଉଲ୍ ଆରି ବର୍ନବା ତେଇ ବେସିଦିନ୍ ରଇକରି ଡାଟ୍ ସଙ୍ଗ୍ ମାପୁରୁର୍ ବିସଇ ଜାନାଇଲାଇ । ମାପୁରୁ ଏମନ୍‌କେ କାବା ଅଇଜିବା କାମ୍‌ମନ୍ କରି ଦେକାଇବାକେ ବପୁଦେଲା । ଏନ୍ତାରି ମାପୁରୁ ତାର ଜିବନ୍ ଦୁକାଇଲା ବାକିଅ ସତ୍‌ବଲି

☆ ୧୩:୫୧ ୧୩:୫୧ ମାତିଉ ୧୦:୧୪; ମାର୍କ ୬:୧୧; ଲୁକ୍ ୯:୫;୧୦:୧୧

ଦେକାଇଲା । ୪ ଇକନିଆ ନଅରର ଲକ୍ଷ୍ମୀନ୍ ଦୁଇଟା ଦଲେ ବାଗ୍ ଅଇଲା । ସେମାନର ବିତ୍ତରେଅନି କେତେ ଲକ୍ଷ୍ମୀ ଜିଉଦିମାନର ବାଗେ ଆରି କେତେ ଲକ୍ଷ୍ମୀ ପେରିଡ଼ ସିସ୍ମାନର ବାଗେ ଅଇଲା ।

\* ତାରପରେ କେତେଟା ଜିଉଦି ନଇଲା ଲକ୍ଷ୍ମୀ ଆରି ଜିଉଦିମାନ ସେମାନର ନେତାମାନର ସଙ୍ଗେ ଏକଜୁଟ୍ ଅଇ ପେରିଡ଼ ସିସ୍ମାନକେ ବେସି କାରାପ୍ ଚଲାଚଲ୍ତି କରି ସେମାନର ଉପରେ ପାକ୍ନା ମାରି ମରାଇଦେବାକେ ପାଁଚୁଲା । ୬ ମାତର ପାଉଲ୍ ଆରି ବରୁନବା ସେଟା ଜାନିକରି ଲୁକାନିଆଇ ରଇବା ଲୁସ୍ତାରା ଆରି ଦରବି ଗଡ଼ ଚାରିବେଡ଼ତିର ଜାଗାଇ ଦାପରେ ପାଲାଇଲା । ୭ ଆରି ସିତି ସୁବ୍ କବର ଜାନାଇଲା ।

### ଲୁସ୍ତାରା ଆରି ଦରବିତେଇ ସେବା କାମ୍

୮ ଲୁସ୍ତାରାତେଇ ଜନ୍ମେଅନି ଗଡ଼ ବାଙ୍ଗି ରଇଲା ଗଟେକ୍ ଚଟା ଲକ୍ଷ୍ମୀ ରଇଲା । ସେ ବିଲ୍‌କୁଲ୍ ଇଣ୍ଡି ନାପାର୍‌ତେ ରଇଲା । ୯ ତେଇ ବସି, ସେ ପାଉଲ୍‌ର ସିକିଆ ସୁନ୍‌ତେ ରଇଲା । ତାର ମନେ ବିସ୍‌ବାସ୍ ଅଇଲାଆଚେ ଆରି ସେ ନିମାନ୍ ଅଇପାର୍‌ସି ବଲି ପାଉଲ୍ ଜାନି ପାର୍‌ଲା । ସେଟାର ପାଇ ତାରବାଗେ ଡିରିଆଇ ଦେକି, ୧୦ ଆଉଲିଅଇ କଇଲା, “ମଇତର ପାଦ୍ ମାଣ୍ଡିକରି, ସିଦା ଚିଆ ଅ !” ସେ ଲକ୍ଷ୍ମୀ ଡେଗଇ କରି ଚାରିବେଟ୍‌ତି ଇଣ୍ଡିବାର୍ ଦାରଲା । ୧୧ ତେଇ ରୁଣ୍ଡିଲା ଲକ୍ଷ୍ମୀନ୍ ପାଉଲ୍‌ର କାମ୍ ଦେକି ତାକର ଲୁକାନିଆ ବାସାଇ ସାର୍‌ଦା ଅଇ ଆଉଲିଅଇବାର୍ ଦାରଲା । “ଦେକା, ଏ ଲକ୍ଷ୍ମୀନ୍ ସତଇସେ ଦେବ୍‌ତା ଅଇରଇବାଇ । ନିଜେ ମନସ୍ ରୁପ୍ ଦାରି ଉଡ଼ିରି ଆଇଲାଇ ଆଚଡ଼ ।” ୧୨ ସେମନ୍ ବରୁନବାକେ ଜିଅସ୍ ବଲି ଜେ କି ତାକର ମୁକିଅ ଦେବ୍‌ତା ରଇଲା, ଆରି ପାଉଲ୍‌କେ ଏରମିସ୍ ବଲି ନାମ୍‌ଲା । ଏରମିସ୍ କାଇକେବଇଲେ ସେ ବେସି କାତା ଅଇତେରଇଲା । ୧୩ ଗଡ଼ ବାଇରର ମୁଆଚେ ରଇଲା ଜିଅସ୍ ମାନ୍‌ରର ପୁଜାରି, ଦୁଆର ଲଗେ କେତେଟା ପୁଲ୍ ମାଲା ପିନ୍‌ଇକରି, କେତେଟା ସଣ୍ଡିମନ୍‌କେ ଆନ୍‌ଲା । କାଇକେବଇଲେ ସେ ଆରି ସିତି ରୁଣ୍ଡିଲା ଲକ୍ଷ୍ମୀନ୍ ପେରିଡ଼ ସିସ୍ମାନର ପାଇ ବଲ୍‌ଦମନ୍‌କେ ବିରୁ କରବାକେ ମନ୍ କିରିରଇଲା ।

୧୪ ସେମନ୍ ଜନ୍ କାମ୍ କରବାକେ ଜାଇରଇଲାଇ, ବରନବା ଆରି ପାଉଲ୍ ସେଟା ସୁନ୍ଲା ଦାପ୍ରେ, ନିଜର୍ ବସ୍ତର୍ ଚିରିପାକାଇଲାଇ, ଲକ୍ମନର୍ ବିତ୍ରେ ପାଲାଇଜାଇ ଆଉଲିଅଇ କରି କଇଲାଇ, ୧୫ “ଏ ଲକ୍ମନ ତମେ କାଇକେ ଏଟା କଲାସନି ? ଆମେ ତମର୍ ପାରା ଲକ୍ ସେ । ତମକେ ସୁବ୍ କବର୍ ଜାନାଇବାକେ ଆଇଲୁଆରୁ । ଆରି ଏ ତୁଟାଇ ରଇବା ପୁଡ୍ଲାମନ୍କେ ପୁଜା କରବାଟା ଚାଡିକରି, ଜିବନ୍ ରଇବା ପର୍ମେସର୍କେ ଉପାସନା କରା ବଲି, କଇବାକେ ଆସିଆରୁ । ଏ ପର୍ମେସର୍ ସରଗ, ଦର୍ତନି, ସମଦୁର୍ ଆରି ତାର୍ ବିତ୍ରେ ରଇବା ସବୁ ବିସଇ ତିଆର୍ କଲାଆଟେ । ୧୬ ପୁର୍ବେ ନିଜେ ମନକରି ନିଜର୍ ବାଟେ ଜିବାକେ, ପର୍ମେସର୍ ଲକ୍ମନକେ ଚାଡିଦେଇ ରଇଲା । ୧୭ ମାତର୍ ତାକର୍ ସବୁ ନିମାନ୍ କାମେଅନି ସେ ସବୁବେଲାଇ ତିନ୍ ଦେକାଇଆଟେ; ସେ ଆକାସେଅନି ପାନି ଆରି ସମାନ୍ ବେଲାଇ କାଦି ପାଟାଇସି, ବେସି କାଦି ଜାଗାଇସି ଆରି ସାରଦା ସଙ୍ଗ୍ ତମର୍ ମନ୍ ପୁରୁନ୍ ଅଇଜାଇସି ।” ୧୮ ଏଡ୍ କଇଲେ ମିସା, ପାଉଲ୍ ଆରି ବରନବାର୍ପାଇ ବଲି ଦେବାର୍ ଆଟେଆକା ବଲି କଇଲାଇ ।

୧୯ ପଟେ ପିସିଆର୍ ଆନ୍ଟିଅକ ଆରି ଇକନିୟ୍ ଅନି କେତେଟା ଜିଉଦିମନ୍ ଆଇଲାଇ । ସେମନ୍ ଲକ୍ମନକେ ସୁଡ଼ରାଇକରି ତାକର୍ବାଟେ ନେଲାଇ । ପାଉଲ୍କେ ପାକ୍ନାମାରାଇଲାଇ ଆରି ତାକେ ମଲାବଲି ବାବି ଗଡ୍ ବାଇରେ ଅର୍ଗତି ଜିକିନେଲାଇ । ୨୦ ମାତର୍ ବିସ୍ବାସିମନ୍ ଆସି ତାର୍ ଚାରିବେଟ୍ତି ଚିଆଅଇଲାକେ, ସେ ଉଟିକରି ତାକର୍ ସଙ୍ଗ୍ ଗଡ୍ ବିତ୍ରେ ବାଅଡ୍ଲା । ତାର୍ ଆର୍କର୍ ଦିନେ ସେ ଆରି ବରନବା ଲୁସ୍ ଚାଡି ଦର୍ବିଏ ଗାଲାଇ ।

### ସିରିଆର୍ ଆନ୍ଟିୟକତେଇ ବାଅଡ୍ଲାଇ

୨୧ ପାଉଲ୍ ଆରି ବରନବା ଦର୍ବିତେଇ ସୁବ୍ କବର୍ ଜାନାଇକରି ବେସି ଲକ୍ମନକେ ସିସ୍ କଲାଇ । ତାର୍ ପଟେ ସେମନ୍ ଲୁସ୍ତାରା, ଦର୍ବି, ଇକନିଅ ଆରି ପିସିଆର୍ ଆନ୍ଟିଅକତେଇ ବାଉଡି ଗାଲାଇ । ୨୨ ସେମନ୍ ବିସ୍ବାସିମନ୍କେ ବିସ୍ବାସେ ତାଟ୍ ଅଇ ରଇବାକେ ସାରଦା କଲାଇ । ସେମନ୍ ସିକିଆ ଦେଇ କଇଲାଇ, “ପର୍ମେସର୍ ରଇଜେ କେଟ୍ବାକେ ଆଲେ ଆମକେ ବେସି ଦୁକ୍ କସ୍ ଦେଇ ଜିବାକେ ଅଇସି ।” ୨୩ ସବୁ ମଣ୍ଡଲିର୍ ପାର୍ତିନିମନ୍କେ ବାଟ୍ଲାଇ

ଆରି ଜନ୍ ମାପୁରୁତେଇ ସେମନ୍ ବିସ୍‌ବାସ୍ କରି ରଇଲାଇ, ସେମନ୍‌କେ ପାର୍ତନା ଆରି ଉପାସ୍ ସଙ୍ଗ୍ ସର୍ପାଇଲାଇ ।

<sup>୨୪</sup> ପିସିଦିଆ ବାଟ୍‌ଦେଇ ସେମନ୍ ପପୁଲିଆଇ ଆଇଲାଇ । <sup>୨୫</sup> ତାର୍‌ପତେ ପରଗାଇ କେଟ୍‌ଲାଇ । ଆରି ମାପୁରୁ କାତା ଜାନାଇ ଆତାଲିଆତେଇ ଗାଲାଇ । <sup>୨୬</sup> ଆତାଲିଆଇ ସେମନ୍ ପାନିଜାଜେ ଚଗି ଆନ୍‌ଟିଅକିଅତେଇ ବାଉଡି ଆଇଲାଇ । ଏ ଆନ୍‌ଟିଅକିଅର୍ ବିସ୍‌ବାସିମନ୍ ପାଉଲ୍ ଆରି ବରନବାକେ ପର୍‌ମେସର୍‌ଟାନେ ସର୍‌ପାଇଦେଇକରି ବିନ୍ ଜାଗାମନ୍‌କେ ମାପୁରୁ ବାକିଅ ଜାନାଇବାକେ ପାଟାଇରଇଲାଇ ।

<sup>୨୭</sup> ସେମନ୍ ଆନ୍‌ଟିଅକିଅ କେଟି ମଣ୍ଡୁଲିର୍ ଲକ୍‌ମନ୍‌କେ ରୁଣ୍ଡାଇଲାଇ । ପର୍‌ମେସର୍ ତାକରଟାନେ କରିରଇବା ସବୁ କାମ୍ ସେମନ୍‌କେ ଜାନାଇଲାଇ । ଜିଉଦି ନ ଅଇଲା ଲକ୍‌ମନ୍ ଜିସୁଟାନେ ବିସ୍‌ବାସ୍ କରବାକେ ପର୍‌ମେସର୍ କେନ୍ତ୍ର ବାଟ୍ ଉଗାଡୁଲା, ସେଟା ସବୁଜାକ ସେମନ୍‌କେ ଜାନାଇଲାଇ । <sup>୨୮</sup> ପାଉଲ୍ ଆରି ବରନବା ତେଇ ବିସ୍‌ବାସିମନ୍‌ର ସଙ୍ଗ୍ ବେସି ଦିନ୍ ଜାକ ରଇଲାଇ ।

## ୧୫

### ଜିରୁସାଲାମେ କିରିସ୍‌ଟିଆନ୍ ସବା

<sup>୧</sup> ଜିଉଦାଇଅନି କେତେକ୍ ଲକ୍ ଆନ୍‌ଟିଅକ୍ ନଅରେ ଆଇଲାଇ । ସେମନ୍ ଆନ୍‌ଟିଅକର୍ ବିସ୍‌ବାସି ବାଇମନ୍‌କେ ଏନ୍ତି କଇକରି ସିକାଇଲାଇ, “ମସାର ନିୟମ୍ ଇସାବେ ଜଦି ତମେ ସୁନଡ଼ ନ ଉଆସ୍, ତମର୍ ପାପର୍ ତଣ୍ଡେଅନି ମୁକ୍ତି ନ ପାଆସ୍ ।” <sup>୨</sup> ଏ ବିସଇ, ସେମନ୍‌ର ସଙ୍ଗ୍ ପାଉଲ୍ ଆରି ବରନବା ବେସି ଦଦାପେଲା ଅଇଲାଇ । ତେବର୍‌ପାଇ ଆନ୍‌ଟିଅକର୍ ବିସ୍‌ବାସିମନ୍ ରାଜି ଅଇଲାଇଜେ, ପାଉଲ୍ ଆରି ବରନବା ଆରି ଆନ୍‌ଟିଅକ୍ ମଣ୍ଡୁଲିଅନି କେତେ ଲକ୍ ଜିରୁସାଲାମେ ଜାଅଡ଼ ଆରି ତେଇର୍ ପାର୍‌ଟିନ୍ ଆରି ପେରିଡ଼ ସିସ୍‌ମନ୍‌ର ସଙ୍ଗ୍ ଏ ବିସଇ କାତା ଅଅଡ଼ ।

<sup>୩</sup> ଆନ୍‌ଟିଅକର୍ ମଣ୍ଡୁଲି ସେମନ୍ ଜିବାଟା ସୁବିଦା କରିଦେଇ ପାଟାଇଲାଇ । ସେମନ୍ ପିନିସିଆ ଆରି ସମିରଣ୍ ବାଟ୍ ଦେଇ ଜିବାବେଲେ, ଜିଉଦି ନଇଲା ଲକ୍‌ମନ୍ କେନ୍ତ୍ର ମନ୍ ବାଦ୍‌ଲାଇକରି ପର୍‌ମେସର୍‌କେ ନାମ୍‌ଲାଇ, ସେ ବିସଇ ଜାନାଇଲାଇ । ଏ କାତା ସୁନି



ବିସ୍‌ବାସି ବାଇମନ୍‌ ବେସି ସାର୍‌ଦା ଅଇଲା ।<sup>୪</sup> ସେମନ୍‌ ଜିରୁସାଲାମ୍‌ କେଟ୍‌ଲା ପତେ ମଣ୍ଡଲିର୍‌ ଲକ୍‌, ପେରିଡ଼ ସିସ୍‌ମନ୍‌ ଆରି ମଣ୍ଡଲିର୍‌ ପାର୍‌ତିନ୍‌ମନ୍‌କେ ବେଟ୍‌ଅଇଲା । ଆରି ପରମେସର୍‌ ତାକରଲଗେ କରିରଇବା କାମ୍‌ ବିସଇ ପାଉଲ୍‌ ଆରି ବରନ୍‌ବାକେ ଜାନାଇଲା ।<sup>୫</sup> ମାତର୍‌ ପାରୁସି ଦଲର୍‌ କେତେଟା ବିସ୍‌ବାସିମନ୍‌ ଟିଆଅଇ କଇଲା, “ ଜିଉଦି ନଇଲା ଲକ୍‌ମନ୍‌ ସୁନଡ଼ ଅଇବାର୍‌ ଆତେ ଆକା ଆରି ମସାର୍‌ ବିନ୍‌ ନିୟମ୍‌ମନ୍‌ ମାନ୍‌ବାକେ ମିସା ସେମନ୍‌କେ ସିକାଇବାର୍‌ ଆତେ ।”

<sup>୬</sup>ଏ ବିସଇ ଆଲଟନା କରବାକେ ପେରିଡ଼ ସିସ୍‌ମନ୍‌ ଆରି ମଣ୍ଡଲିର୍‌ ପାର୍‌ତିନ୍‌ ରୁଣ୍ଡୁଲା ।<sup>୬</sup> \*ବେସି ପର୍‌ ଦଦାପେଲା ଅଇଲା ପତେ ପିତର୍‌ ଟିଆଅଇ କଇଲା, “ମର୍‌ ବାଇବଇନିମନ୍‌ ଜିଉଦି ନଇଲା ଲକ୍‌ମନ୍‌, ସୁନିକରି ବିସ୍‌ବାସ୍‌ କରବାକେ ସେମନ୍‌ରଟାନେ ସୁବକବର ଜାନାଇବାକେ, ଆଗେଅନି ମକେସେ ବାଟ୍‌ଲାଆତେ । ଏଟା ତମେ ଜାନାସ୍‌ ।<sup>୮</sup> \*ସବୁ ଲକ୍‌ମନ୍‌ର୍‌ କାତା ଜାନ୍‌ବା ପରମେସର୍‌ ଆମ୍‌କେ ଜେନ୍ତି ସୁକଲ୍‌ ଆଡ଼ମା ଦାନ୍‌ କଲା ଆତେ, ସମାନ୍‌ ସେନ୍ତି ବିସ୍‌ବାସ୍‌ କରବା ଜିଉଦି ନଇଲା ଲକ୍‌ମନ୍‌କେ ମିସା ଦାନ୍‌ଦେଇ ସେମନ୍‌କେ ବାଟ୍‌ଲା ଆତେ ।<sup>୯</sup> ସେମନ୍‌ର୍‌ ଆରି ଆମର୍‌ ବିଡ଼ରେ, ସେ କାଇମିସା ବଡ଼ସାନ୍‌ ଦେକେ ନାଇ । ସେମନ୍‌ ଜିସୁକେ ବିସ୍‌ବାସ୍‌ କଲାପାଇ, ସେ ସେମନ୍‌କେ ସୁକଲ୍‌ କଲାଆତେ ।<sup>୧୦</sup> ସେନ୍ତି ଆଲେ ଗଟେକ୍‌ ବଡ଼ ବଜ୍‌ ପିଟିତେଇ ଲାଦିଦେଲାପାରା, ଆମର୍‌ ସବୁ ନିୟମ୍‌ ମାନ୍‌ବାର୍‌ ଆତେ ବଲି କଇକରି ପରମେସର୍‌କେ କାଇକେ ପରିକା କଲାସ୍‌ନି ? ଆଜି ଜନ୍‌ ବଜ୍‌ ବଇବାକେ, ଆମର୍‌ ଆନିଦାଦିମନ୍‌ କି ଆମେ ମିସା ବଇ ନାପାର୍‌ତେ ରଇଲୁ ।<sup>୧୧</sup> ନାଇ, ମନେ ଏତାଇଦେକା, ଆମେ ଜେନ୍ତି ବିସ୍‌ବାସ୍‌ କରି ମାପ୍‌ରୁ ଜିସୁ ଜିବନ୍‌ଦୁକାଇଲାକେ ମୁକ୍ତି ପାଇଆରୁ, ସେମନ୍‌ ମିସା ସେନ୍ତାରିସେ ।”

<sup>୧୨</sup> ତାର୍‌ପତେ ପାଉଲ୍‌ ଆରି ବରନ୍‌ବାଟାନେଅନି ଜିଉଦି ନଇଲା ଲକ୍‌ମନ୍‌ର୍‌ତେଇ ପରମେସର୍‌ ଜନ୍‌ ସବୁ କାବା ଅଇଜିବା କାମ୍‌ମନ୍‌ ଆରି ଚକିଡ଼ ବିସଇ କରି ରଇଲା, ସେ ସବୁ କାତା ସୁନି ଦଲର୍‌ ସବୁ ଲକ୍‌ ଟିମ୍‌ରାଅଇ ରଇଲା ।<sup>୧୩</sup> ସେମନ୍‌ କଇସାରାଇଲା

☆ ୧୫:୭ ୧୫:୭ ପେରିଡ଼ ୧୦:୧-୪୩

☆ ୧୫:୮ ୧୫:୮ ପେରିଡ଼ ୧୦:୪୪;୨:୪

ପଚେ ଜାକୁବ୍ କଇଲା, ଏ ମର୍ ବାଇବଇନିମନ୍ ମର୍ କାତା ସୁନା !  
 ୧୪ ପରମେସର୍ ପର୍ତମେ ଜିଉଦି ନଅଇଲା ଲକ୍ମନ୍‌କେ ଆଲାଦ୍  
 କରି, ତାର୍ ନିଜର୍ ଲକ୍ ଅଅଡ଼ ବଲି, ତାକର୍ ବିଡ଼ରେ ଅନି,  
 ଲକ୍ମନ୍‌କେ ବାଟଲାଇ । ଏ କାତା ସିମନ୍ ବୁଜାଇ ଦେଇଆଚେ  
 । ୧୫ ପରମେସର୍ କରିରଇବା ଏ କାମ୍ ବବିସଡ଼ବକ୍ତାମନ୍  
 କଇରଇବାଟା ସଙ୍ଗ୍ ସମାନ୍ ଆଚେ ।

୧୬ ମାପୁରୁ କଇଲା,

“ତାର୍ ପଚେ ମୁଇ ନିଜେ ଦିନେକ୍ ବାଉଡ଼ି ଆଇବି,  
 ଆରି ଦାଉଦର୍ ବାଙ୍ଗିଜାଇରଇବା ରାଇଜ୍ ଆରିତରେକ୍ ତିଆର୍  
 କରବି ।

ଜେନ୍ତୁକି ସେଟା ପୁରାପୁରୁନ୍ ତାଟ୍ ରଇସି ।

୧୭ ତେଇଅନି ସବୁଜାକ ମନସ୍ ଜାତି ମର୍ ଲଗେ ଆଇବାଇ,

ଜନ୍ ଜିଉଦି ନଇଲା ଲକ୍ମନ୍‌କେ ମାପୁରୁ ନିଜର୍

କରବାକେ ଡାକଲାଆଚେ

ସେମନ୍ ସବୁ ଲକ୍ ମକେ ନାମ୍‌ବାଇ ।

୧୮ ମାପୁରୁ ଏ କାତା କଇଲାନି,

ଜେ କି ବେସି ଆଗ୍‌ତୁ ଏ କାତା କଇରଇଲା ।”

୧୯ ଏବେ ଜାକୁବ୍ କଇବାକେ ଆରାମ୍‌କଲା । ସେ କଇଲା, “ମର୍  
 ବିଚାର୍ ଇସାବେ, ଜନ୍ ଜିଉଦି ନଇଲା ଲକ୍ମନ୍ ପରମେସର୍  
 ବାଟେ ବାଅଡ଼ଲାଇ ଆଚଡ଼, ଆମେ ଆରି ସେମନ୍‌କେ ଅଇରାନ୍ ନ  
 କରୁ । ୨୦ ଏଲେ ସେମନ୍ ଆରି ଜେନ୍ତୁକି ପୁଡ଼ଲା ଦେବ୍‌ତାମନ୍‌କେ  
 ସର୍ପିଦେଲା କାଇମିସା ଅସୁକଲ୍ କାଦି ନ କାଆ, ବିନ୍ ଲକର୍ ମାଇଜି  
 କି ମୁନ୍‌ସର୍ ସଙ୍ଗ୍ ମିସ୍‌ବାଟାନେଅନି ଦୁରିକେ ରଅଡ଼, ଟଟ୍‌ରି ପିଟ୍‌କି  
 ମରାଇରଇବା ପସୁର୍ ମାଉଁସ୍ କି ବନି, ନ କାଅଡ଼ ଏ ସବୁ ବିସଇଟାନେ  
 ସେମନ୍‌କେ ଉପ୍‌ଦେସ୍ ଦେଇ, ସେମନ୍‌ର ଲଗେ ଗଟେକ୍ ଚିଟି ଲେକୁ  
 । ୨୧ କାଇକେବଇଲେ ବେସି ଦିନେଅନି ସବୁ ବିସରାମ୍‌ବାରେ ଆମର୍  
 ପାର୍‌ତନା ଗର୍ମନ୍‌କେ ମସାର୍ ନିୟମ୍ ପଡ଼ଲାଇନି, ଆରି ସବୁ ଗଡେ  
 ସେ ନିୟମ୍‌ମନ୍ ଜାନାଇଲାଇନି ।”

ଜିଉଦିନଇଲା ବିସ୍‌ବାସିମନ୍‌ର ଲଗେ ଚିଟି

୨୨ ପଚେ ପେରିଡ଼ ସିସମନ୍, ମଣ୍ଡଲିର୍ ପାର୍‌ଚିନ୍‌ମନ୍, ଆରି  
 ସବୁ ମଣ୍ଡଲିର୍ ବାଇମନ୍ ରୁଣ୍ଡିଲାଇ । ସେମନ୍ ରାଜିଅଇରଇବା

କାତା ଆନୁଷ୍ଠିଅକର ବିସ୍‌ବାସିମନ୍‌କେ ଜାନାଇବାକେ ପାଉଲ୍ ଆରି ବରୁନବା ସଙ୍ଘ୍ ଜିବାକେ କେତେଲକ୍‌କେ ବାଟ୍‌ଲାଇ । ବରୁସବା ନାଉର୍ ଜିଉଦା ଆରି ସିଲାକେ ବାଟ୍‌ଲାଇ । ଏ ଦୁଇଲକ୍‌କେ ସବୁ ବିସ୍‌ବାସିମନ୍ ସନ୍‌ମାନ୍ ଦେଇତେରଇଲାଇ । ୨୩ ବିସ୍‌ବାସିମନ୍ ଏ ତଲେ ଲେକାଅଇଲା ଚିଟି, ସେ ଦୁଇ ଲକ୍‌ର ଆତେ ପାଟାଇଲାଇ ।

“ଆନୁଷ୍ଠିଅକ, ସିରିଆ ଆରି ସିଲିସିଆ ରଇବା ଜିଉଦିନଇଲା ଆମର୍ ବାଇମନ୍, ଜୁଆର୍ ! ଜିରୁସାଲମର୍ ପେରିଡ଼ମନ୍, ପାର୍‌ତିନ୍‌ମନ୍ ଆରି ତମର୍ ବାଇମନ୍, ଏ ଚିଟି ପାଟାଇଲୁନି । ୨୪ ଆମେ ସୁନ୍‌ଲୁନି ଜେ, ଆମର୍ ଦଲେଅନି କେତେ ଲକ୍‌ ତମର୍‌ଟାନେ ଆସି, ଜାଇଜାଇଟା ସିକାଇଆଟ୍, ତେଇଅନି ସେମନ୍ ତମ୍‌କେ କଟପଟ ଆରି ତେରେପେତେ କଲାଇଆଟ୍ । ମାତର୍ ଆମେ ସେମନ୍‌କେ ସେନ୍ତାରି କର୍‌ବାକେ, କାଇମିସା ଆଦେସ୍ ଦେଉନାଇ । ୨୫ ସେଟାର୍ ପାଇ ଆମେ ସବୁ ଲକ୍‌ ଗଟେକ୍ ଅଇକରି କେତେଟା କବର୍ କଉମନ୍‌କେ ବାଟି, ତମର୍ ଲଗେ ପାଟାଇବାକେ ଟିକ୍ କଲୁ । ସେମନ୍ ଆମର୍ ଆଲାଦର୍ ମଇତର୍‌ମନ୍, ବରୁନବା ଆରି ପାଉଲର୍ ସଙ୍ଘ୍ ଜିବାଇ । ୨୬ ଏ ମଇତର୍‌ମନ୍ ମାପ୍‌ରୁ ଜିସୁର୍ ସେବାତେଇ ନିଜର୍ ଜିବନ୍ ସର୍‌ପିଦେଇ ଆଟ୍ । ୨୭ ସେଟାର୍ ପାଇ ଜିଉଦା ଆରି ସିଲାକେ ତମର୍ ଲଗେ ପାଟାଇଲୁନି । ଆମେ ଜାଇଟା ଲେକିଆରୁ, ସେଟା ତମ୍‌କେ ସେମନ୍ ନିଜେ ବାତାଇଦେବାଇ । ୨୮ କେତେଟା ଦରକାର ରଇଲା ନିୟମ୍ ଚାଡ଼ି, ତମର୍ ଉପରେ ଆରି କାଇମିସା ବଜ୍ ନ ଲାଦ୍‌ବାକେ ଆମେ ସୁକଲ୍‌ଆଡ଼ମାଇ ଅନି ଚାଲ୍‌ନା ପାଇଲୁଆରୁ । ୨୯ ସେ କେତେଟା ନିୟମ୍ ଅଇଲାନି ପୁଡ଼ଲା ଦେବ୍‌ତାମନ୍‌କେ ପୂଜା କରିରଇବା କାଇମିସା କାଦି କାଇବାର୍ ନାଇ । ଟଟ୍‌ରି ପିବକି ମରାଇଲା କନ୍ ମିସା ପସୁର୍ ବନି କି ମାଉସ୍ କାଇବାର୍ ନାଇ । ଆରି ବିନ୍ ମାଇଜି କି ମୁନୁସର୍ ମିଲାମିସା ଟାନେଅନି ଦୁରିକେ ରଇବାର୍ । ଏ ସବୁ କାମ୍ ନ କର୍‌ବାକେ ତମେ ଜାଗ୍‌ରଡ଼ ରଇଲେ, ଅଇଜାଇସି । ଏଡ଼କିକେ ରଇଲୁନି ।”

୩୦ ଜନ୍ କବର୍ କଉମନ୍‌କେ ପାଟାଇ ରଇଲାଇ, ସେମନ୍ ଆନୁଷ୍ଠିଅକ୍‌ତେଇ ଜାଇ ବିସ୍‌ବାସିମନ୍‌ର ସବୁ ଦଲ୍‌କେ ରୁଣ୍ଡାଇକରି ସେ ଚିଟି ଦେଲାଇ । ୩୧ ତେଇର୍ ବିସ୍‌ବାସିମନ୍ ସେ ଚିଟି ପଡ଼ିକରି

ବେସି ସାର୍ଦ୍ଦା ଅଇଗାଲାଇ । ୩୨ ଜିଉଦା ଆରି ସିଲା ନିଜେ ଦୁଇ ଲକ୍ ବବିସତ୍ତବକ୍ତା ରଇଲାଇ । ସେମନ୍ ଆନ୍ତଟିଅକର୍ ବିସ୍ବାସି ବାଇମନ୍‌କେ ବେସିଦିନ୍ ରଇକରି, କବର୍ ଜାନାଇ, ସେମନ୍‌ର ବିସ୍ବାସ୍ ଡାଟ୍ କଲାଇ । ୩୩ ତେଇ କେତେ ଦିନ୍ ରଇଲା ପଚେ, ଜନ୍‌ଲକ୍‌ମନ୍ ସେମନ୍‌କେ ପାଟାଇରଇଲାଇ, ସେମନ୍‌ର ଲଗେ ବାଉଡି ଜିବାକେ, ବିସ୍ବାସି ବାଇମନ୍ ସେମନ୍‌କେ ସାନ୍ତି ସଙ୍ଗ୍, ପାଟାଇ ଦେଲାଇ । ୩୪ ମାତର୍ ସିଲା ତେଇସେ ରଇବାଟା ଟିକ୍ ବଲି ତେଇ ରଇବାକେ ମନ୍ କଲା ।

୩୫ ପାଉଲ୍ ଆରି ବର୍ନବା ଆନ୍ତଟିଅକ୍‌ତେଇ କେତେ ଦିନ୍ ରଇକରି ବେସି ଲକ୍‌ମନ୍‌ର ସଙ୍ଗ୍, ମିସିବିଡି ମାପୁରୁର୍ ବାକିଅ ଜାନାଇଲାଇ ଆରି ସିକିଆ ଦେଲାଇ ।

ପାଉଲ୍ ଆରି ବର୍ନବା ବିନେ ଅଇଲାଇ

୩୬ କେତେ ଦିନ୍ ପଚେ ପାଉଲ୍ ବର୍ନବାକେ କଇଲା, “ଜୁ, ଆମେ ବାଉଡି ଜୁ, ସବୁ ଗଡ଼ମନ୍‌କେ, ଆମର୍ ଜନ୍ ବାଇମନ୍‌କେ ମାପୁରୁର୍ ବାକିଅ ଜାନାଇ ରଇଲୁ, ସେମନ୍‌କେ ବେଟ୍ ଅଉଁ ଆରି ସେମନ୍ ବିସ୍ବାସେ କେନ୍ତି ଆତଡ଼ ବୁଜି ଦେକୁ ।” ୩୭ ଜଅନ୍ ମାର୍‌କକେ ମିସା ତାକର୍ ସଙ୍ଗ୍ ନେବାକେ ବର୍ନବା ମନ୍ କଲା । ୩୮ ☆ମାତର୍ ପାଉଲ୍ କଇଲା “ନିରୁ, କାଇକେ ବଇଲେ, ପପୁଲିଆଇ ଜନ୍ ଦିନେ ଆମର୍ କାମ୍ ସାରି ନ ରଇଲା, ସେ ଆମ୍‌କେ ଚାଡି ବାଉଡି ଉଟିଆଇଲା ।” ୩୯ ଏ ବିସଇ, ବେସି କୁଆବଲା ଅଇଲାଇ ଆରି ସେମନ୍ ବିନେ ଅଇଲାଇ । ବର୍ନବା ଜଅନ୍‌ମାରକକେ ନେଇ ସାଇପରସେ ଜିବା ପାନିଜାଜେ ଚଗ୍‌ଲାଇ । ୪୦ ମାତର୍ ପାଉଲ୍ ଡାଟ୍‌ସଙ୍ଗ୍ ଜିବାକେ ସିଲାକେ ବାଟ୍‌ଲା । ଆରି ମାପୁରୁର୍ ଜିବନ୍‌ଦୁକାନି ତେଇ ସେମନ୍‌କେ ସର୍ପିଦେଇ, ବିସ୍ବାସିମନ୍ ପାଟାଇ ଦେଲାଇ । ୪୧ ପାଉଲ୍ ଆରି ସିଲା, ସିରିଆ ଆରି ସିଲିସିଆଇ ବୁଲି ବୁଲି କରି ତେଇର୍ ମଣ୍ଡୁଲିମନ୍‌କେ ଡାଟ୍ କରାଇଲାଇ ।



ପାଉଲ୍ ଆରି ସିଲାର୍ ସଙ୍ଗ୍ ତିମତି ଜିବାଟା

୧ ତେଇଅନି ପାଉଲ୍ ଦର୍ବି ଆରି ଲୁସ୍ତାରାଇ ଆଇଲା । ସେ ନଅରେ ତିମତି ନାଉଁର୍ ଗଟେକ୍ ବିସ୍ବାସି ଲକ୍ ରଇଲା । ତାର୍ ମାଆ ଗଟେକ୍ ଜିଉଦି ବିସ୍ବାସି ରଇଲା । ମାତର୍ ତାର୍ ବାବା ଗଟେକ୍ ଗିରିକ୍ ଲକ୍ ରଇଲା । ୨ ଲୁସ୍ତାରା ଆରି ଇକନିଅତେଇ ରଇବା ସବୁ ବିସ୍ବାସି ବାଇମନ୍ ତିମତିକେ ସନ୍ମାନ କର୍ତ୍ତେରଇଲା । ୩ ପାଉଲ୍ ତାର୍ ସଙ୍ଗ୍ ତିମତିକେ ନେବାକେ ମନ୍ କଲା, ସେଟାର୍ପାଇ ଜିବା ଆଗ୍ତୁ ମସାର୍ ନିୟ୍ମ୍ ଇସାବେ ତାକେ ସୁନତ୍ କଲା । ଜେକ୍ରିକି ସେ ଜାଗାର୍ ଜିଉଦିମନ୍ ତାକେ ନିୟା ନ କରତ୍ । କାଇକେବଇଲେ ତେଇର୍ ଲକ୍ମନ୍ ତିମତିର୍ ବାବା ଗିରିକ୍ ଲକ୍ ବଲି ଜାନିରଇଲା । ୪ ସେମନ୍ କେଟ୍ଲା ସବୁ ଜାଗାଇ ଜିଉଦି ନ ଅଇଲା ବିସ୍ବାସିମନ୍ରପାଇ, ଜିରୁସାଲମର୍ ପାର୍ତିମନ୍ ଆରି ପେରିତ୍ମନ୍ ରାଜି ଅଇରଇବା ନିତିନିୟ୍ମ୍ ବିସଇ କଇଲା । ଏ ସବୁ ନିୟ୍ମ୍ ମାନ୍ବାକେ ବିସ୍ବାସିମନ୍କେ କଇଲା । ୫ ସେଟାର୍ପାଇ ମଣ୍ଡଲିମନ୍ର ଲକ୍ମନ୍ ବିସ୍ବାସେ ତାଟ୍ ଅଇଲା ଆରି ଦିନକେ ଦିନ୍ ତାକର୍ ବିସ୍ବାସ୍ ବତ୍ବାର୍ ଦାରଲା ।

ମାସିଦନିଆଇ ଜିବା ପାଇ ତରୟାତେଇ ପାଉଲ୍କେ ଚାଲ୍ନା ମିଲ୍ବାଟା

୬ ସୁକଲ୍ଆତ୍ମା ସେମନ୍କେ ଆସିଆ ଦେସେ ମାପ୍ପୁର୍ କାତା କଇବାକେ ଚାଲ୍ନା ଦେଅତ୍ନାଇକେ, ସେମନ୍ ପିରିଜିଆ ଆରି ଗାଲାତିଅ ଜାଗାଇ ଗାଲା । ୭ ମିସିଆର୍ ସନ୍ଦିଲଗେ କେଟି ବିତିନିଆ ରାଇଜେ ଜିବାକେ ଚେସ୍ଟା କଲା । ମାତର୍ ବାରଇଲାବେଲେ ଜିସୁରଲାଗି ତାକର୍ ବିତ୍ରେ ରଇବା ସୁକଲ୍ ଆତ୍ମା, ସେମନ୍କେ ଜିବାକେ ଚାଲ୍ନା ଦେଏନାଇ । ୮ ସେଟାର୍ ପାଇ ସେମନ୍ ମିସିଆବାଟ୍ ଦେଇ ତରୟାତେଇ ଗାଲା । ୯ ତରୟା ରଇଲାବେଲେ, ସେ ରାତିଆ ପାଉଲ୍ ଗଟେକ୍ ଦର୍ସନ୍ ଦେକଲା । ସେ ଦର୍ସନେ ମାସିଦନିଆର୍ ଗଟେକ୍ ଲକ୍ ଚିଆଅଇ ବାବୁଜିଆ କରି କଇଲା “ମାସିଦନିଆଇ ଆସି ଆମ୍ବକେ ସାଇଜ କରା !” ୧୦ ପାଉଲ୍ ଏ ଦର୍ସନ୍ ଦେକଲା ଦାପ୍ରେ, ମାସିଦନିଆଇ ଜିବାକେ ଆମେ ତିଆର୍ ଅଇଲୁ, କାଇକେବଇଲେ ଆମେ ନିକ ସଙ୍ଗ୍ ଜାନ୍ଲୁ, ପର୍ମେସର୍ ତେଇର୍

ଲକ୍ଷ୍ମୀନର ବିତ୍ତରେ, ସୁବ୍ କବର ଜାନାଇବାକେ ଆମ୍ଭେ ଡାକ୍ଲା ଆଚେ ।

### ପିଲିପିତେଇ ଲୁଦିଆର୍ ମନ୍ ପେରାନି

୧୧ ଆମେ ତରଆଅନି ଜାଜେ ଚଗି ସିଦା ସାମ୍ତରା ଗାଲୁ ଆରି ତାର୍ ଆରକର୍ ଦିନେ ନିଆପଲି କେଟ୍ଲୁ । ୧୨ ତେଇଆମେ ଉତ୍ତରିକରି ମାସିଦନିଆ ଜିଲାର୍ ମୁକିଅ ଗଡ୍ ପିଲିପେ ଗାଲୁ । ଏ ଗଡ୍ ଗଟେକ୍ ରମିୟ ଦଲ୍ ରଇବା ଗଡ୍ ରଇଲା । ତେଇ ଆମେ ବେସି ଦିନ୍ ଜାକ ରଇଲୁ । ୧୩ ବିସ୍ତରାମ୍ବାରେ ଗଡ୍ ବାଇରର୍ ଗାଡ୍ କଣ୍ଡି ଗାଲୁ । ତେଇ ଜିଉଦିମନ୍ ରୁଣ୍ଡିକରି ପାର୍ତନା କର୍ବାକେ ଗଟେକ୍ ଜାଗା ବଲି ବାବ୍ଲୁ । ଆମେ ତେଇ ବସ୍ତୁ ଆରି ତେଇ ରୁଣ୍ଡି ରଇବା ମାଇଜି ମନର୍ ସଙ୍ଗ୍ କାତାବାରତା ଅଇଲୁ । ୧୪ ସେମନର୍ ବିତ୍ତରେଅନି ତୁୟଟିରା ଗଡ୍ ଲୁଦିଆ ନାଉର୍ ଗଟେକ୍ ମାଇଜି, ଆମର୍ କାତା ସୁନ୍ତେରଇଲା । ସେ ବେସି ଦାମ୍ ଅଇବା ଜାମ୍ବଲିଆ ରଙ୍ଗର୍ ଲୁଗା ବିକ୍ତେରଇଲା । ସେ ପରମେସର୍କେ ପାର୍ତନା କର୍ବା, ଜିଉଦି ନ ଅଇଲା ଲକ୍ । ପାଉଲ୍ ମାପୁରୁର୍ କାତା କଇଲାବେଲେ ସେଟା ନାମ୍ବାକେ ମାପୁରୁ ତାର୍ ମନ୍ ଉଗାଡିଦେଲା । ୧୫ ବିସ୍ତାସ୍ କଲାପଟେ, ସେ ଆରି ତାର୍ କୁରୁମର୍ ଲକ୍ ହୁବନ୍ ନେଲାଇ । ତାର୍ ପଟେ ସେ ଆମ୍ଭେ ଡାକିକରି କଇଲା, “ଜିଦି ସତଇସେ ମୁଇ ମାପୁରୁକେ ବିସ୍ତାସ୍ କଲିନି ବଲି ତମେ ବାବ୍ଲାସ୍ନି, ତେବେ ଆସି ମର୍ ଗରେ ରୁଆ ।” ସେ ଏକ୍ତି କଇ ଆମ୍ଭେ ତାର୍ ଗରେ ଜିବାକେ ସୁଡ଼ରାଇଲା ।

### ପିଲିପିର୍ ବନ୍ଦି ଗରେ ପାଉଲ୍ ଆରି ସିଲା

୧୬ ଆରି ଗଟେକ୍ଦିନେ ଆମେ ପାର୍ତନା ଜାଗାଇ ଜାଇରଇଲୁ । ତେଇ ତୁମା ତସିରଇବା ଗଟେକ୍ ଗତିଦାଙ୍ଗ୍ଡିକେ ବେଟ୍ ଅଇଲୁ । ସେ ତାର୍ ବିତ୍ତରେ ରଇଲା କାରାପ୍ ଆଡ଼ମାର୍ ବପୁ ସଙ୍ଗ୍ ବବିସଡ୍ କାତା କଇପାର୍ତେ ରଇଲା । ସେ ଲକ୍ଷ୍ମୀନର ଆଡ୍ ଦେକି, ବବିସଡ୍ କାତା କଇଦେଇକରି, ସାଉକାର୍ମନକେ ବେସି ତାବୁ କାମାଇଦେଇତେରଇଲା । ୧୭ ଆମେ ତାର୍ଲଗେ ଗାଲାକେ, ସେ ପାଉଲ୍ ବଲି କିଚ୍କିରି ଆମର୍ ପର୍ ପର୍ ଆଇଲା । ଆରି କଇଲା, “ଏ ଲକ୍ଷ୍ମୀନ୍ ସବୁରଟାନେଅନି ବଡ୍ ପରମେସର୍ ସେବାକରୁମନ୍

। ତମେ କେନ୍ଦ୍ରି ମୁକ୍ତି ପାଇସା, ଏ କାତା ସେମନ୍ କଇଲାଇନି ।”  
୧୮ ସେ ଦାଙ୍ଗୁଡ଼ି ବେସି ଦିନ୍ ଦାରି ଏନ୍ତି କଲା । ସାରାସାରିପତେ ପାଉଲ୍  
ବିଜାର୍ ଅଇଲା । ସେ ପର୍ବାଟେ ପାସଲି ଦେକି କାରାପୁଆଡ଼ମାକେ  
ଦମ୍ଭକାଇକରି କଇଲା, “ଜିସୁ କିରିସ୍ଟର୍ ନାଉଁ ଦାରି ଆଦେସ୍  
ଦେଲିନି, ତାର୍ତେଇଅନି ବାରଇ ଜା ।” ସେ କଇଲା ଦାପ୍ରେ,  
କରାପୁ ଆଡ଼ମା ତାର୍ତେଇଅନି ବାରଇଗାଲା ।

୧୯ ଜେଡେବେଲ୍ ତାକର୍ ସାଉକାର୍ମନକେ ନିଜର୍ ଦନ୍  
ଅରଜ୍‌ବାଟା, ବୁଡ଼ିଗାଲା ବଲି ଜାନ୍‌ଲାଇ, ପାଉଲ୍ ଆରି ସିଲାକେ  
ଗଡ଼ର୍ ମଜାଇ ରଇବା ରମିଅ ଅଦିକାରିର୍ ଲଗେ ଜିକି ଆନ୍‌ଲାଇ  
। ୨୦ ସେମନ୍‌କେ ତାକର୍ ମୁଆଟେ ଆନି ଦସ୍‌ଦେଇ କରି କଇଲାଇ  
“ଏମନ୍ ଜିଉଦି ଲକ୍, ଆମର୍ ଗଡେ ଆସି ଗଣ୍ଡୁଗଲ୍ କଲାଇନି ।”  
୨୧ ଆମର୍ ନିୟମ୍ ବିରଦେ ରିତିନିତି ସିକାଇଲାଇନି । ଆମେ ରମିଅ  
ଲକ୍, ସେଟାର୍ ପାଇ ଏ ରିତିନିତି ମାନି ନାପାରୁ । ୨୨ ସାଉକାର୍ ମନର୍  
କାତାମିସାଇ ତେଇ ରଇଲା ଲକ୍‌ମନ୍, ପାଉଲ୍ ଆରି ସିଲାର୍ ବିରଦେ  
ଉଟ୍‌ଲାଇ ।

ସେ ଅଦିକାରିମନ୍ ପାଉଲ୍ ଆରି ସିଲାର୍ ବସ୍‌ତର୍ ଚିରିକରି କର୍ତ୍ତା  
ସଙ୍ଗ୍ ମାର୍‌ବାକେ ଆଦେସ୍ ଦେଲାଇ । ୨୩ ବେସି ମାଡ଼କାଇଲା ପତେ  
ସେମନ୍‌କେ ବନ୍ଦି ଗରେ ପୁରାଇଲାଇ ଆରି କୁଚିଦେଇ ଜାଗ୍‌ବାକେ  
ବନ୍ଦି ଗର୍ ଜାଗୁଆଲ୍‌କେ ଆଦେସ୍ ଦେଲାଇ । ୨୪ ଏ ଆଦେସ୍ ପାଇ  
ବନ୍ଦି ଗର୍ ଜାଗୁଆଲ୍ ସେମନ୍‌କେ ଗଟେକ୍ ବିତ୍‌ରର୍ ବାକ୍‌ରାଇ ପୁରାଇ  
ଦେଇ, ବଜ୍‌ରଇବା ଦାରୁମୁଟ୍‌ଲାଇ ତାକର୍ ଗଡ଼ ବାନ୍ଦିଦେଲା ।

୨୫ ପାଉଲ୍ ଆରି ସିଲା ମଜା ରାତି ବେଲାଇ ପର୍‌ମେସର୍‌କେ  
ପାର୍‌ତନା କରି ଗିଡ଼ ଗାଇତେ ରଇଲାଇ । ବନ୍ଦି ଗରେ ରଇବା  
ବିନ୍‌ଲକ୍‌ମନ୍ ସେଟା ସବୁ ସୁନ୍‌ତେ ରଇଲାଇ । ୨୬ ସେଡ଼କିବେଲେ,  
ଅଟାଡ଼ ବେସି ଦର୍‌ତନି ତୁଲ୍‌ତୁଲ୍‌ଲା ଆରି ବନ୍ଦି ଗରର୍ ପାକାଇଲା  
କୁନାଦି ପାକନା ଆଲିଗାଲା, ସେ ଦାପ୍ରେ କାପାଟ୍‌ମନ୍ ଉଗାଡ଼ି  
ଅଇଗାଲା ଆରି ସବୁ ବନ୍ଦିମନର୍ ସିକ୍‌ଲି କୁସ୍‌ଲି ଗାଲା । ୨୭ ବନ୍ଦି  
ଗରର୍ ଜାଗୁଆଲ୍ ତେତାଅଇ ଉଟ୍‌ଲା ଆରି ବନ୍ଦି ଗରର୍ କାପାଟ୍  
ଉଗ୍‌ତା ଅଇରଇଲାଟା ଦେକ୍‌ଲା । ସେ ବନ୍ଦିମନ୍ ସବୁ ପାଲାଇ ଆଟ୍  
ବଲି ବାବ୍‌ଲା । ସେଟାର୍ ପାଇ ସେ ତାର୍ କାଣ୍ଡା ବେଟି ବୁସି ଅଇ

ମରବାକେ ଜାଇତେ ରଇଲା । ୨୮ ମାତର୍ ପାଉଲ୍ ଆଉଲିଅଇ କଇଲା, “ନିଜେ ତର୍ ଗାଗଡ଼ କାଟିଅଇ ନସାନାଇ । ଆମେ ସବୁ ଲକ୍ ଇତି ଆତୁ ! କେ ପାଲାଉ ନାଇ ।”

୨୯ ବନ୍ଦି ଗର୍ ଜାଗୁଆଲ୍ ଗଟେକ୍ ବତି ଆନ୍ବାକେ ତିଆରଲା । ଆରି ସେ ବତି ଦାରଲା ଆରି ତରତରି ତରତରି ଆସି ପାଉଲ୍ ଆରି ସିଲାର ଗଡ଼ ତଲେ ଅଦରଲା । ୩୦ ତାର୍ ପତେ ସେମନ୍‌କେ ବାଇରେ ନେଇ ପାଟାରଲା, “ଆଗିଆଁମନ୍ ! ପରମେସରର୍ ତଣ୍ଡେଅନି ରକିଆ ପାଇବାକେ ମୁଇ କାଇଟା କରବାର୍ ଆତେ ?”

୩୧ ସେମନ୍ କଇଲାଇ, “ମାପରୁ ଜିସୁକେ ବିସ୍‌ବାସ୍ କଲେ, ତୁଇ ଆରି ତମର୍ କୁଟୁମର୍ ସବୁ, ମୁକ୍ତି ପାଇସା ।” ୩୨ ତାର୍ ପତେ ସେମନ୍ ତାକେ ଆରି ତାକର୍ ଗରର୍ ସବୁ ଲକ୍‌କେ ମାପରୁର ବାକିଅ କଇଲାଇ । ୩୩ ସେ ଦାପ୍‌ରେ ମଜାରାତି ବେଲେ, ବନ୍ଦି ଗର୍ ଜାଗୁଆଲ୍ ସେମନ୍‌କେ ଡାକିନେଇ ସେମନ୍‌ର୍ ଗାଉ ଅଇଲାଟା ସବୁ ଦଇଦେଲା । ତାର୍‌ପତେ ସେ ଆରି ତାର୍ କୁଟୁମର୍ ସବୁ ଲକ୍ ହୁବନ୍ ନେଲାଇ । ୩୪ ତାର୍‌ପତେ ସେ ପାଉଲ୍ ଆରି ସିଲାକେ ତାକର୍ ଗରେ ଡାକିନେଇ କାଇବାକେ ଦେଲା । ତେଇ ପରମେସର୍କେ ବିସ୍‌ବାସ୍ କଲାର୍ ପାଇ ସେ ଆରି ତାର୍ କୁଟୁମର୍ ସବୁ ଲକ୍‌ମନ୍ ସାରଦା ଅଇଗାଲାଇ ।

୩୫ ଆରିଗଟେକ୍ ଦିନର୍ ସାକାଲେ ରମିଅ ସାସନ୍‌କାରିଆମନ୍ ସେ ଲକ୍‌ମନ୍‌କେ ଚାଡ଼ି ଦିଆସ୍ ବଲି ଜାଗୁଆଲ୍‌ମନ୍‌କେ କଇକରି ପାଟାଇଲାଇ ।

୩୬ ସେଟାର୍ ପାଇ ବନ୍ଦିଗର୍ ଜାଗୁଆଲ୍ ପାଉଲ୍‌କେ କଇଲା, “ରମିଅ ସାସନ୍‌କାରିଆ ତମ୍‌କେ ଆରି ସିଲାକେ ଚାଡ଼ି ଦେବାକେ ଆଦେସ୍ ଦେଲା ଆତେ । ଏବେ ତମେ ଏ ଜାଗାଇଅନି ସାନ୍ତି ସଙ୍ଗ୍ ଉଟି ଜା ।” ୩୭ ମାତର୍ ପାଉଲ୍ ସନିଅମନ୍‌କେ କଇଲା, “କାଇମିସା ଅପରାଦେ ଦସି ଅଇ ନ ରଇଲେ ମିସା, ସେମନ୍ ଆମ୍‌କେ ଲକ୍‌ମନ୍‌ର୍ ମୁଆଟେ ମାରଲାଇ । ଆମେ ରମିଅ ଲକ୍, ମାତର୍ ସେମନ୍ ଆମ୍‌କେ ବନ୍ଦି କଲାଇ । ଏବେ ଆମ୍‌କେ ଲୁଟେ ଚାଡ଼ିଦେବାକେ ମନ୍ କଲାଇନି । ଏଟା କରବାକେ ଆମେ ନ ଦେଉଁ । ରମିୟ ଅଦିକାରି ନିଜେ ଆସି ଇତି ଆମ୍‌କେ ମୁକ୍‌ଲାଅ ।”

୩୮ ସନିଅମନ୍ ରମିଅ ସାସନ୍‌କାରିଆକେ ଏ କାତା ଜାନାଇଲାଇ । ପାଉଲ୍ ଆରି ସିଲା ରମିଅ ଲକ୍ ବଲି ସୁନି ସେମନ୍ ତରିଗାଲାଇ ।



। ୩୯ ସେଟାର୍‌ପାଇ ବନ୍ଦିଗରେ ଜାଇ ସେମନ୍‌କେ କେମା ମାଙ୍ଗ୍‌ଲାଇ ଆରି ସେମନ୍‌କେ ବନ୍ଦି ଗରେଅନି ବାରକରାଇ ଗଡ଼ ଚାଡ଼ି ଉଟିଜିବାକେ ବାରୁଜିଆ କଲାଇ । ୪୦ ପାଉଲ୍ ଆରି ସିଲା ବନ୍ଦି ଗରେଅନି ବାରଇ ଲୁଦିଆର୍ ଗରେ ଗାଲାଇ । ତେଇ ସେମନ୍ ବିସ୍‌ବାସି ବାଇମନ୍‌କେ ବେଟ୍ ଅଇ, ସେମନ୍‌କେ ସାର୍‌ଦା କରାଇ, ସେ ଜାଗା ଚାଡ଼ିଉଟିଗାଲାଇ ।

## ୧୭

### ତେସଲନିକିତେଇ ସେବା କାମ୍ କର୍‌ବାଟା

୧ ପାଉଲ୍ ଆରି ସିଲା ଅମ୍‌ପିପଲି ଆରି ଆପଲନିଆ ବାଟ୍‌ଦେଇ ତେସଲନି ଜାଗାଇ କେଟ୍‌ଲାଇ । ତେଇ ଜିଉଦିମନ୍‌ର ଗଟେକ୍ ପାର୍‌ତନା ଗର୍ ରଇଲା । ୨ ପାଉଲ୍ ତାର୍ ରିତିନିତି ଇସାବେ, ପାର୍‌ତନା ଗରେ ଗାଲା । ତେଇ ସେ ଲାଗି ଲାଗି ତିନ୍‌ଟା ବିସ୍‌ରାମ୍‌ବାରେ ଲକ୍‌ମନ୍‌ର ସଙ୍ଗ୍ କାତାବାର୍‌ତା କଲା । ୩ ଦରମ୍ ସାସ୍‌ତର୍ ପଡ଼ିକରି ବୁଜାଇଲା ଜେ, ମସିଅ ଦୁକ୍ ପାଇବାର୍ ରଇଲା ଆରି ପର୍‌ମେସର୍ ତାକେ ମଲାତେଇଅନି ଉଟାଇବାର୍ ରଇଲା । ପାଉଲ୍ କଇଲା, “ଜନ୍ ଜିସୁର୍ ବିସଇ ମୁଇ ଜାନାଇଲି, ସେ ଅଇଲାନି ମସିଅ ।” ୪ ସେମନ୍‌ର ବିଡ଼ରେଅନି କେତେ ଲକ୍ ଏଟା ବିସ୍‌ବାସ୍ କଲାଇ । ପାଉଲ୍ ଆରି ସିଲାର୍ ସଙ୍ଗ୍ ମିସଲାଇ । ସେକ୍ତି ଡାକ୍‌ପୁଟା ରଇବା ମାଇଜିମନ୍ ଆରି ପରମେସର୍‌କେ ପାର୍‌ତନା କର୍‌ବା ଗିରିକ୍ ମନ୍‌ର ଗଟେକ୍ ବଡ଼ ଦଲ୍ ମିସା ସେମନ୍‌ର ସଙ୍ଗ୍ ମିସଲାଇ ।

୫ ମାତର୍ କେତେଟା ଜିଉଦିମନ୍ ପାଉଲ୍ ଆରି ସିଲାକେ କୁଟ୍ କରି, କାଇ କାମ୍ ନ କର୍‌ବା ଅଲ୍‌ସିଆ ଲକ୍‌ମନ୍‌କେ ଏକ୍‌ଜୁଟ୍ କଲାଇ, ଆରି ଟୁଲିଆଇ, ଗୁଲାଇ ଗଡ଼ ଜାକର୍ ଲକ୍‌କେ ଉସକାଇ ରିସା କରାଇଲାଇ । ସେମନ୍ ପାଉଲ୍ ଆରି ସିଲାକେ କଜି ଆନ୍‌ବାକେ ଗଟେକ୍ ଜେସନ୍ ନାଉର୍ ଗରେ ଜାଇ, ତାର୍ ଗର୍ ଚପିପାକାଇଲାଇ । ୬ ମାତର୍ ତେଇ ପାଉଲ୍ ଆରି ସିଲା ଡିସଡ଼ ନାଇଜେ, ସେମନ୍ ଜେସନ୍ ଆରି ବିନ୍ କେତେଟା ବିସ୍‌ବାସି ବାଇମନ୍‌କେ, ଗଡ଼ର୍ ନେତାମନ୍‌ର ଲଗେ ଜିକିନେଇ ଆଉଲିଅଇ କଇଲାଇ, “ଏ ଲକ୍‌ମନ୍ ଚାରିବେଟ୍‌ତି ଗଣ୍ଡଗଲ୍ କଲାଇନି ! ଏବେ ଆମ୍‌ର୍ ଗତେ ମିସା ଆଇଲାଇ ଆତଡ଼ ୭ ଆରି ଏସନ୍ ସେମନ୍‌କେ ତାର୍ ଗରେ ରକିରଇଲା । ଜିସୁ

ନାଉଁ ଦାରି ଆରି ଗଟେକ୍ ରାଜା ଆଚେ ବଲି କଇକରି ସେମନ୍ ଆମର୍ ବଡ଼ ସାସନ୍‌କାରିଆର୍ ନିୟମ୍ ବାଙ୍ଗ୍‌ଲାଇନି ।” ୮ ଏ କାତା କଇ ସେମନ୍, ଲକ୍‌ମନ୍‌କେ ଆରି ସାସନ୍‌କାରିଆର୍ ବିରଦେ ଆଉଲି ଅଇକରି ବେସି ରିସା କରାଇଲାଇ ଆରି ଗଣ୍ଡଗଲ୍ କରାଇଲାଇ । ୯ ସାସନ୍ କରୁମନ୍ ଜେସନ୍ ଆରି ବିସ୍‌ବାସିମନ୍‌ଚ୍‌ତେଇଅନି ଚାଡ଼ବାକେ, ଜେଡ଼କି ତାରୁ ବାନ୍‌ବାକେ ରଇଲା, ଲା଼ ନେଇକରି ସେମନ୍‌କେ ଜାମିଲେ ଚାଡ଼ିଦେଲାଇ ।

### ବେରିଆଇ ସେବାକାମ୍

୧୦ ରାତି ଅଇଲା ଦାପ୍‌ରେ, ବିସ୍‌ବାସି ବାଇମନ୍ ପାଉଲ୍ ଆରି ସିଲାକେ ବେରିଆ ନାଉଁର୍ ଜାଗାଇ ପାଟାଇଦେଲାଇ । ସେମନ୍ ତେଇ କେଟି, ଜିଉଦି ଲକ୍‌ମନ୍‌ଚ୍ ପାର୍‌ତନା ଗରେ ଗାଲାଇ । ୧୧ ତେସଲନିର୍ ଜିଉଦିମନ୍‌ଚ୍ ଚାନେଅନି ବେରିଆର୍ ଜିଉଦିମନ୍ କୁଲାକୁଲି ମନ୍ ରଇବା ଲକ୍ ରଇଲାଇ । ସେମନ୍ ଅଦିକ୍ ମନ୍‌ଦିଆନ୍ ଦେଇ ସିସ୍‌ମନ୍‌ଚ୍ ସିକିଆ ସୁନ୍‌ଲାଇ । ଆରି ପାଉଲ୍ କଇଲା କାତା, ସଡ଼ କି ନାଇ ବଲି ଜାନ୍‌ବାକେ ସବୁ ଦିନ୍ ଦରମ୍ ସାସତ୍‌ଚ୍ ପଡ଼ତେରଇଲାଇ । ୧୨ ସେମନ୍‌ଚ୍ ବିଡ଼ରେଅନି ବେସି ଲକ୍ ବିସ୍‌ବାସି କଲାଇ । ବେସି ସାଉକାର୍ ଅଇ ସନ୍‌ମାନ୍ ପାଇବା ଗିରିକ୍ ମାଇଜି ଆରି ଗିରିକ୍ ଲକ୍‌ମନ୍ ମିସା ବିସ୍‌ବାସିମନ୍‌ଚ୍ ସଙ୍ଗ୍ ମିସ୍‌ଲାଇ । ୧୩ ମାତର୍ ଜେଡେବଲ୍ ତେସଲନିର୍ ଜିଉଦିମନ୍ ସୁନ୍‌ଲାଇ ଜେ ବେରିଆତେଇ ମିସା ପାଉଲ୍ ପରମେସରର୍ ବାକିଅ ଜାନାଇଲାନ୍, ସେମନ୍ ତେଇ ଆସି ପାଉଲ୍‌ଚ୍ ବିରଦେ ଗଣ୍ଡଗଲ୍ କର୍‌ବାକେ ଲକ୍‌ମନ୍‌କେ ଉସ୍‌କାଇଲାଇ । ୧୪ ସେ ଦାପ୍‌ରେ ବିସ୍‌ବାସି ବାଇମନ୍ ପାଉଲ୍‌କେ ସମଦ୍‌ଚ୍ ପାଲିବାଟେ ପାଟାଇଦେଲାଇ, ମାତର୍ ସିଲା ଆରି ତିମତି ଦୁଇ ଲକ୍ ବେରିଆଇ ରଇଲାଇ । ୧୫ ପାଉଲ୍‌କେ ଡାକିନେବା ଲକ୍‌ମନ୍, ତାର୍ ସଙ୍ଗ୍ ଆତେନସ୍ ଜାକ ଗାଲାଇ । ତେଇଅନି ସେମନ୍ ବେରିଆଇ ବାଉଡି ଆସି, ସିଲା ଆରି ତିମତିକେ କଇଲାଇ, “ତମ୍‌କେ ପାଉଲ୍ ବେଗି ମିସ୍‌ବାକେ କବର୍ ପାଟାଇ ଆଦେସ୍ ଦେଲାଆଚେ ।”

### ଆତେନେସ୍‌ତେଇ ପାଉଲ୍‌ଚ୍ ସେବାକାମ୍

୧୭ ସିଲ୍ଲା ଆରି ତିମତିକେ ଆତେନେସ୍ତେଇ ଜାଗି ରଇଲା ବେଲେ, ଗଡ଼ଜାକର୍ ଲକ୍ ପୁଜା କର୍ବା ଦେବ୍ତାମନର୍ ମୁର୍ତ୍ତିମନ୍ ଦେକ୍ତି, ପାଉଲର୍ ମନ୍ ବେସି ଉଡୁକ୍ତୁଡୁକ୍ ଅଇଗାଲା । ୧୭ ସେଟାର୍ପାଇ ସେ ଜିଉଦିମନର୍ ପାର୍ତନା ଗରେ ସେମନର୍ ସଙ୍ଗ୍, ଆରି ପରମେସର୍କେ ପାର୍ତନା କର୍ବା ଜିଉଦି ନଇଲା ଲକ୍ମନର୍ ସଙ୍ଗ୍, ଏ ବିସଇ ସବୁ ଦିନ୍ ଆଲ୍ଟରନା କର୍ବାର୍ ଦାରଲା । ଆଟେବାଟେ ଜିବାଆଇବା କର୍ବା ଲକ୍ମନର୍ ସଙ୍ଗ୍ ସେ ବିସଇ ଆଲ୍ଟରନା କଲା । ୧୮ କେତେଟା ଏପିକିଉରିଆନ୍ ଆରି ଟାଇକ୍ ସିକିଆ ଦେବା ଗୁରୁମନର୍ ସଙ୍ଗ୍ ଦଦାପେଲା ଅଇଲାଇ । ସେମନର୍ ବିତ୍ତରେଅନି କେତେ ଲକ୍ କଇଲାଇ, “ଏ ବକ୍ତୁଆ ବଡ଼ପନିଆ, କାଇଟା କଇବାକେ ଚେସ୍ଟା କଲାନି ?”

ବିନ୍ ଲକ୍ମନ୍ କଇଲାଇ, “ବିନ୍ ଦେସେ ରଇବା ଦେବ୍ତାମନର୍ ବିସଇ, ସେ ଜାନାଇଲାନି ପାରା ଲାଗ୍ଲାନି ।” ଜିସୁ ଆରି ତରେକ୍ ଜିବନ୍ ଅଇ ଉଟ୍ଲା ବିସଇ ପାଉଲ୍ ଜାନାଇବାଟା ସୁନି ସେମନ୍ ଏକ୍ତି କଇଲାଇ । ୧୯ ସେଟାର୍ପାଇ ସେମନ୍ ପାଉଲ୍କେ ଦାରି ସେ ନଅରର୍ ବିଚାର୍ କର୍ବା ଜାଗା, ଜନ୍ଟା କି ଏରିଅପାଗସ୍ ତେଇ ଆନ୍ଲାଇ । ଆରି ତେଇ କଇଲାଇ, “ତୁଇ ଜନ୍ ନୁଆ ସିକିଆ ବିସଇ କଇଲୁସ୍ନି, ସେ ବିସଇ ଆମେ ଜାନ୍ବାକେ ମନ୍ କଲୁନି ।” ୨୦ ତୁଇ କଇବା କେତେଟା କାତା ଆମେ ଆଗ୍ତୁ କେବେ ସୁନି ନ ରଇଲୁ । ଆମେ ତାର୍ ଅରଡ଼ ଜାନ୍ବାକେ ମନ୍ କଲୁନି । ୨୧ କାଇକେବଇଲେ ଆତେନେସର୍ ଲକ୍ ଆରି ତେଇ ରଇବା ବିନ୍ ଦେସର୍ ଲକ୍ମନ୍ ନୁଆ ବିସଇ ସୁନ୍ବାକେ ଆରି କଇବାକେ ବଲ୍ପାଇତେ ରଇଲାଇ । ତେଇ ସେମନ୍ ବେସି ବେଲା ଦେଇତେ ରଇଲାଇ ।

୨୨ ପାଉଲ୍ ସେ ଗଡ଼ର୍ ସବା ମୁଆଟେ ଟିଆ ଅଇ କଇଲା, ଆତେନିଅର୍ ଲକ୍ମନ୍, ତମେ ସବୁ ଦରମ୍ ଲକ୍ ବଲି ଜାନାପଡ଼ଲାନି । ୨୩ କାଇକେବଇଲେ, ମୁଇ ତମର୍ ନଅରେ ବୁଲି ଦେକ୍ଲା ବେଲେ, ତମର୍ ପୁଜା କର୍ବା ଜାଗାମନ୍ ଦେକ୍ଲି । ତେଇ ଗଟେକ୍ ବେଦି ରଇଲା । ଗଟେକ୍ ନ ଜାନ୍ଲା ଦେବ୍ତାକେ, ଲେକାରଇଲାଟା ମିସା ଦେକ୍ଲି । ତମେ ଜାକେ ନାଜାନି ପୁଜାକଲାସ୍ନି । ଏବେ ତାର୍ ବିସଇ

ତମ୍ଭଙ୍କେ ଜାନାଇଲିନି । <sup>୨୪</sup> ✠ ପରମେସର୍ ଦୁନିଆ ଆରି ତେଇ ରଇଲା ସବୁ ବିସଇ ତିଆର୍ କଲା । ସେ ସରଗ୍ ଆରି ଜଗତର୍ ମାପୁରୁ । ଲକ୍ମନ୍ ତିଆର୍ କଲା ମନ୍ଦିରେ ରଇବାକେ ମନ୍ ନ କରେ । <sup>୨୫</sup> ଆମେ ତାର ପାଇ କାମ୍ କରି ତାକେ ଦେଇପାରୁ ପାରା କାଇଟା ମିସା ସେ ମନ୍ କରେ ନାଇ । କାଇକେବଇଲେ ସେ ସବୁକେ ଜିବନ୍, ପବନ୍ ଆରି ସବୁ ଦରକାର ରଇଲାଟା ଦେଲାଆତେ । <sup>୨୬</sup> ଗଟେକ୍ ଲକ୍ମନ୍ ସେ ସବୁ ମୁନୁସ୍ ଜାତିକେ ତିଆର୍ କଲା । ଆରି ତାର୍ ଆଦେସ୍ ଇସାବେ ସେମନ୍ ଦୁନିଆର୍ ବିନ୍ ବିନ୍ ଜାଗାଇ ବାସା ଅଇଲାଇ ଆତଡ଼, ସେଟା ପୁରବେଅନି ପରମେସର୍ ଟିକ୍ କଲାଆତେ । <sup>୨୭</sup> ତାକର୍ ଆଦେସ୍ ରଇଲା ଜେ ସବୁ ଲକ୍ ତାକେ କଜି କରି ବେଟ୍ ଅଅଡ଼ । ମାତର୍ ସତଇସେ ପରମେସର୍ କାର୍ଗାନେଅନି ମିସା ଦୁରିକେ ନାଇ । <sup>୨୮</sup> ଏ ବିସଇ କେକି ଗଟେକ୍ ଲକ୍ କଇଲା ଆତେ,

“ତାର୍ ଲଗେ ଆକା ଆମର୍ ଜିବନର୍ କୁଟିକାତି ଆତେ ।”

ତମ୍ଭର୍ ବିତ୍ରେଅନି କେତେଲକ୍ କଇଆତଡ଼, ଆମେ ମିସା ତାର୍ ପିଲାଜିଲା ।

<sup>୨୯</sup> ଆମେ ପରମେସର୍ ପିଲାଜିଲା ଅଇଲାର୍ ପାଇ ମୁନୁସ୍ ତିଆର୍ କଲା ସୁନା, ରୁପା ନଇଲେ ପାକ୍ନା ସଙ୍ଗ୍ ତିଆର୍ କଲା ପୁଡ଼ଲା, ପରମେସର୍ ରୁପ୍ ବଲି ବାବି ନାପାରୁ । <sup>୩୦</sup> ଲକ୍ମନ୍ ପରମେସର୍କେ ଜାନି ନ ରଇଲା ବେଲେ, ସେ ଦସ୍ ଦାରି ନ ରଇଲା, ମାତର୍ ଏବେ ସବୁ ଜାଗାର୍ ସବୁ ଲକ୍ମନ୍କେ, ସେମନ୍ ପାପ୍ ବାଟେଅନି ବାଅଡ଼ବାକେ ଆଦେସ୍ ଦେଲାନି । <sup>୩୧</sup> ସେ ଗଟେକ୍ ଦିନ୍ ଟିକ୍ କଲା ଆତେ । ସେ ଦିନେ, ସେ ବାଟିରଇବା ଲକ୍ ସଙ୍ଗ୍ ଗୁଲାଇ ଦୁନିଆର୍ ବିଚାର କରସି । ସେ ଲକ୍ ମଲାଗାନେଅନି ଉଟି ଏ କାତା ସଡ଼ ବଲି, ସବୁକେ ଜାନାଇଲା ଆତେ ।

<sup>୩୨</sup> ପାଉଲ୍ ଗାନେ, ମଲାଗାନେଅନି ଉଟ୍ଲା ବିସଇ ସୁନି ସେମନ୍ ବିତ୍ରେଅନି କେତେ ଲକ୍ ତାକେ କିଜାଇଲାଇ, ମାତର୍ ବିନ୍ ଲକ୍ମନ୍ କଇଲାଇ, “ତମ୍ଭର୍ତେଇଅନି ଆମେ ଆରିତରେକ୍ ଏ ବିସଇ ସୁନ୍ବାକେ ମନ୍ କଲୁନି ।” <sup>୩୩</sup> ପାଉଲ୍ ସେ ଦିନର୍ ସବାଇ ଅନି ଉଟି ବାରିଗାଲା । <sup>୩୪</sup> ତାୟନିସିଅସ୍ ନାଉର୍ ସବାର୍ ଗଟେକ୍ ମେମର୍,

ଦାମାରି ନାଉଁର ଗଟେକ୍ ମାଇଜି ଆରି କେତେଟା ଲକ୍, ବିସ୍ବାସ୍ କରି ତାର୍ ସଙ୍ଗ୍ ମିସ୍ଲାଲ ।

# ୧୮

## କରନ୍ତିୟ ନଅରେ ପାଉଲର୍ ସେବାକାମ୍

<sup>୧</sup> ତାର୍ପତେ ପାଉଲ୍ ଆତେନ୍ସ୍ ଚାଡି କରନ୍ତିଅ ଗାଲା ।  
<sup>୨</sup> ତେଇ ପନ୍ତସ୍ତେଇ ଜନମ୍ କରିରଇବା ଆକିଲା ନାଉଁର ଗଟେକ୍ ଜିଉଦିକେ ବେଟ୍ ଅଇଲା । ବଡ୍ ସାସନ୍କାରିଆ କଲତିଅସ୍, ସବୁ ଜିଉଦିକେ ରମ୍ ଦେସ୍ ଚାଡବାକେ ଆଦେସ୍ ଦେଇରଇଲା । ସେଟାର୍ପାଇ, ସେ ଅଲପ୍ ଦିନ୍ ଆଗତୁ ତାର୍ ମାଇଜି ପିରିସ୍କିଲାର୍ ସଙ୍ଗ୍ ଇଟାଲିଅନି ଆସିରଇଲା । <sup>୩</sup> ପାଉଲ୍ ସେମନ୍କେ ବେଟ୍ ଅଇବାକେ ଜାଇ ସେମନ୍ର୍ ସଙ୍ଗ୍ ରଇଲା । କାଇକେବଇଲେ ସେ ମିସା ସେମନ୍ର୍ ପାରା ତୁମ୍ ତିଆର୍ କରି ଜିଉନାକାଉନା କରତେରଇଲା । <sup>୪</sup> ଜିଉଦି ଆରି ଗିରିକ୍ ମନ୍ ମାପୁରୁକେ ଅଦିକ୍ ବିସ୍ବାସ୍ କରାଇବାକେ, ସବୁ ବିସ୍ରାମ୍ବାରେ ପାର୍ତନା ଗରେ ଆଲ୍ଟନା କରତେ ରଇଲା ।

<sup>୫</sup> ସିଲା ଆରି ତିମତି ମାସିଦନ୍ଆଇଅନି ବାଉଡି ଆଇଲା ପତେ ପାଉଲ୍ ଜିଉଦିମନ୍ର୍ ଲଗେ ଜିସୁର୍ ସୁବ୍ କବର୍ ଜାନାଇବାକେ ପୁରାପୁରି ବେଲା ଦେଲା ଆରି ଜିସୁକେ ମସିଅ ବଲି ସାକି ଦେଲା । <sup>୬</sup> ମାତର୍ ସେମନ୍ ତାକେ ବିରଦ୍ କରି ତାର୍ କୁଟ୍ ପାଁର୍ବାର୍ ଦାରଲାଲ, ସେଟା ବିରଦ୍ କର୍ବା ଇସାବେ, ତାର୍ ବସ୍ତରର୍ ଦୁଲି ପାପ୍ଡିଦେଇ ସେ ସେମନ୍କେ କଇଲା, “ଜଦି ତମେ କୁରୁପ୍ନାସ୍ ଅଇସା, ତେବେ ସେଟାର୍ପାଇ ତମେ ନିଜେ ଦାଇ ଅଇସା । ମୁଇ ଏଟାର୍ପାଇ ଦାଇ ନଇ, ଏବେ ମୁଇ ଜିଉଦି ନଇଲା ଲକ୍ମନ୍ର୍ ଲଗେ ଜିବି ।” <sup>୭</sup> ସେଟାର୍ପାଇ ସେ ସେମନ୍କେ ଚାଡି ପର୍ମେସ୍ଟ୍ରେକେ ପାର୍ତନା କର୍ବା ତିତସ୍ ଜୁସ୍ତ ନାଉଁର ଗଟେକ୍ ଜିଉଦି ନଇଲା ଲକ୍ ଗରେ ରଇବାକେ ଗାଲା । ଜୁସ୍ତର୍ ଗର୍ ପାର୍ତନା ଗର୍ ଲଗେ ରଇଲା । <sup>୮</sup> ପାର୍ତନା ଗରର୍ ମୁକିଅ କିରିସ୍ପସ୍ ଆରି ତାର୍ କୁଟୁମର୍ ସବୁ ଲକ୍ ମାପୁରୁତେଇ ବିସ୍ବାସ୍ କଲାଲ ଆରି କରନ୍ତିଅର୍ ଅଦିକ୍ ଅଦିକ୍ ଲକ୍ ପାଉଲର୍ ସିକିଆ ସୁନି ବିସ୍ବାସ୍ କଲାଲ ଆରି ପାନିତେଇବୁଡି ତୁବନ୍ ନେଲାଲ ।

୯ ଗଟେକ୍ ରାତି, ପାଉଲ୍ ଦରସନ୍ ଦେକ୍ଲା । ଦରସନେ ମାପୁରୁ ତାକେ କଇଲା, “ତର୍ ନାଇ, ଜାନାଇତେ ରଅ, ସେଟା ତେବାନାଇ । ୧୦ କାଇକେ ବଇଲେ ମୁଇ ତର୍ ସଙ୍ଗ୍ ଆତି । କେ ତମ୍‌କେ କାଇଟା କରି ନାପାରଡ୍, କାଇକେବଇଲେ ଏ ନଅରେ ମର୍ ବେସି ଲକ୍ ଆବଡ୍ ।” ୧୧ ସେଟାରପାଇ ପାଉଲ୍ ପରମେସରର୍ ବାକିଅ ସିକିଆ ଦେଇ, ତେଇ ବର୍ସେକ୍ ତ ମାସ୍ ଜାକ ରଇଗାଲା ।

୧୨ ଗାଲିୟନ୍ ଆକାୟର୍ ରମିଅ ସାସନ୍‌କାରିଆ ରଇଲା ବେଲେ, ଜିଉଦିମନ୍ ଏକ୍‌କ୍‌ଟ୍‌ଅଇ ପାଉଲ୍‌କେ ଦାରି ବିଚାରନା ଜାଗାଇ ନେଲାଇ । ୧୩ ସେମନ୍ କଇଲାଇ, “ଏ ଲକ୍ ଆମର୍ ନିୟ୍‌ମ୍ ବିରଦେ ପରମେସର୍କେ ପାର୍‌ତନା କର୍‌ବାକେ ଲକ୍‌ମନ୍‌କେ ସୁଡ଼ରାଇଲାନି ।”

୧୪ ପାଉଲ୍ କାତା ଅଇବାକେ ଗାଲାବେଲେ, ଗାଲିଅ ଜିଉଦିମନ୍‌କେ କଇଲା, “ଜଦି ଇତି କାଇ ଦସ୍ ନଇଲେ ଅପରାଦର୍ ବିସଇ ରଇସି, ତେବେ ତମର୍ ବିସଇ ସମାଲି କରି, ତମର୍ କାତା ସୁନ୍‌ବାଟା, ମର୍ ଇସାବେ ଟିକ୍ ଅଇସି । ୧୫ ମାତର୍ ଏ କାତା ତମର୍ ବିଦିବିଦାନ୍ ଆରି ରିତିନିତିର୍ କାତା ଅଇଲାର୍ ପାଇ, ଏଟା ତମେ ଟିକ୍‌କର୍‌ବାଟା ନିକ ଅଇସି । ମୁଇ ଏନ୍ତି ବିଚାର ନ କରି ।” ୧୬ ଏନ୍ତି କଇକରି ସେମନ୍‌କେ ବିଚାରନା ଜାଗାଇଅନି କେଦିଦେଲା । ୧୭ ସେମନ୍ ପାର୍‌ତନା ଗରର୍ ମୁକିଆ ସସ୍‌ତନସ୍‌କେ ଦାରି ବିଚାରନା ଜାଗାର୍ ମୁଆଟେ ମାଡ଼ମାର୍‌ଲାଇ । ମାତର୍ ଗାଲିଅ ସେଟାକେ ମନ୍‌ଦେଏ ନାଇ ।

### ସିରିଆର୍ ଆନ୍‌ଟିୟ୍‌କ୍‌ତେଇ ପାଉଲ୍ ବାଅଡ଼ଲା

୧୮ ପାଉଲ୍ କରନ୍ତିତେଇ ବିସ୍‌ବାସି ବାଇମନ୍ ସଙ୍ଗ୍ ବେସି ବେଲା ଜାକ ରଇଲା । ତାରପଟେ ସେମନ୍‌କେ ଚାଡ଼ି ପିରିସ୍‌କିଲା ଆରି ଆକିଲାର୍ ସଙ୍ଗ୍, ସିରିଆ ଜିବାକେ ପାନିଜାଜେ ବାଟ୍ ଦାର୍‌ଲାଇ । ସେକେରିଆଅନି ଜିବାଟା ଆରାମ୍ କର୍‌ବା ଆଗ୍‌ତୁ ତାକର୍ ଗଟେକ୍ ମାନଡ୍ ଇସାବେ ପାଉଲ୍ ମୁଣ୍ଟ୍ କୁରାଇଅଇଲା । ୧୯ ସେମନ୍ ଏପିସିସ୍‌ତେଇ କେଟ୍‌ଲା ପଟେ ପାଉଲ୍ ପିରିସ୍‌କିଲା ଆରି ଆକିଲାକେ ପାଟାଇଦେଲା । ତେଇ ସେ ପାର୍‌ତନା ଗରେ ଜାଇ ଜିଉଦିମନ୍‌ର୍ ସଙ୍ଗ୍ କାତାବାରତା ଅଇଲା । ୨୦ ଲକ୍‌ମନ୍ ତାକେ ଆରି ବେସି ଦିନ୍ ରଇବାକେ କଇଲାଇ, ମାତର୍ ସେ ରାଜି ନଇଲା । ୨୧ ଜିବା ବେଲାଇ

ସେ ସେମାନଙ୍କେ କଇଲା, “ଜିଦି ପରମେସର୍ ମନ୍ କଲେ, ତମର୍ ଲଗେ ବାଉଡି ଆଇବି ।” ତାର୍ ପଚେ ସେ ଏପିସେ ଅନି ଜାଜେ ଚଗି ଗାଲା ।

<sup>୨୨</sup> ସେ ସିରିଆ କେଟିକରି ତେଇଅନି ଜିରୁସାଲାମେ ଗାଲା ଆରି ମଣ୍ଡଲିକେ ଜୁଆର୍ ଜାନାଇ ତେଇଅନି ଆନ୍ଟିକିଅ ଗାଲା । <sup>୨୩</sup> ତେଇ କେତେ ଦିନ୍ ରଇଲା ପଚେ, ସେ ଆରି ତରେକ୍ ଜିବାଟା ଆରାମ୍ କରି ଗାଲାତିଅ ଆରି ପିରିଜିଆ ବାଟ୍ ଦେଇ ଗାଲା । ବାଟେ ବିସ୍ବାସିମନ୍‌କେ ବିସ୍ବାସେ ଡାଟ୍ ଅଇରଇବାକେ ସାଆସ୍ ଦେଲା ।

### ଏପିସ୍ ଆରି କରନ୍ତିତେଇ ଆପଲ

<sup>୨୪</sup> ସେ ବେଲାଇ ଆଲେକ୍‌ଜାଣ୍ଡ୍ରିଆଇ ଜନମ୍ ଅଇ ରଇଲା, ଆପଲ୍ ନାଉର୍ ଗଟେକ୍ ଜିଉଦି ଏପିସେ ଆଇଲା । ସେ ଗଟେକ୍ ନିମାନ୍ ସଙ୍ଗ୍ କାତାକଉ ଆରି ଦରମ୍ ସାସ୍ତରେ ତାର୍ ବେସି ଗିଆନ୍ ରଇଲା । <sup>୨୫</sup> ସେ ମାପ୍‌ରୁ ଜିସୁର୍ ବାଟ୍ ବିସଇ ସିକିଆ ପାଇରଇଲା ଆରି ଆତ୍‌ମାଇ ପୁରାପୁରୁନ୍ ଅଇକରି ବେସି ସାର୍ଦା ସଙ୍ଗ୍ ସଡ୍ କାତା ବାଟ୍‌କରି, ସିକିଆ ଦେଇତେ ରଇଲା । ମାତର୍ କାଲି ଜଅନ ହୁବନ୍ ଦେବା ବିସଇ ଜାନି ରଇଲା ।

<sup>୨୬</sup> ପାର୍ତନା ଗରେ ସେ ନ ତର୍ତେ ସିକିଆ ଦେବାକେ ଲାଗଲା । ତାର୍ ସିକିଆ ସୁନି ପିରିସ୍‌କିଲା ଆରି ଆକିଲା ତାକର୍ ନିଜର୍ ଗରେ ଡାକିନେଲାଇ ଆରି ତେଇ ପରମେସରର୍ ବାଟ୍ ବିସଇ ଅଦିକ୍ ବୁଜାଇଦେଲାଇ । <sup>୨୭</sup> ତାର୍ ପଚେ ଆପଲ୍ ଆକାୟା ରାଇଜେ ଜିବାକେ ଟିକ୍ କଲାକେ, ଏପିସର୍ ବିସ୍ବାସି ବାଇମନ୍ ତାକେ ସାଇଜ୍ କଲାଇ ଆରି ତାକେ ସାର୍ଦା ସଙ୍ଗ୍ ଗତିଆ କର୍ବାକେ କଇ ଆକାୟାର୍ ବିସ୍ବାସିମନ୍‌କେ ଚିଟି ଲେକ୍‌ଲାଇ । ସେ ତେଇ କେଟିକରି ପରମେସର ଜିବନ୍ ଦୁକାଇଲାକେ ବିସ୍ବାସି ଅଇରଇବା ଲକ୍‌ମନ୍‌କେ ବେସି ସାଇଜ୍ କଲା । <sup>୨୮</sup> ଜିସୁ ଜେ ମସିଅ, ତାକର୍ ବେସି ଡାଟ୍ ଜୁକ୍‌ତି, ଦରମ୍ ସାସ୍ତରେଅନି ଜାନାଇ କରି, ଜିଉଦିମନ୍‌କେ ଆରାଇଲା ।

୧୯

ଏପିସିଏ ପାଉଲ୍

୧ ଆପଲ୍ କରନ୍ତିଏ ରଇଲାବେଳେ, ପାଉଲ୍ ସେ ରାଇଜର୍ ଉପର୍ ବାଗେ ଚୁଲି ଯାଆଇ, ଏପିସିଏ କେଟ୍‌ଲା । ତେଇ ସେ କେଡେଟା ସିସ୍‌ମନ୍କେ ବେଟ୍ ଅଇଲା । ୨ ସେମନ୍କେ ପାଚାରୁଲା “ତମେ ବିସ୍‌ବାସି ଅଇବା ବେଲାଇ ସୁକଲ୍ ଆତ୍‌ମା ପାଇରଇଲାସ୍ କି ?”

ସେମନ୍ କଇଲାଇ, “ସୁକଲ୍ ଆତ୍‌ମା ଆଟେ ବଲି ଆମେ କେବେ ମିସା ସୁନ୍ ନାଇ ।” ୩ ପାଉଲ୍ ପାଚାରୁଲା, “ସେନ୍ତି ଆଲେ ତମେ କେନ୍ତାରି ତୁବନ୍ ନେଇ ଆଟାସ୍ ?”

ସେମନ୍ କଇଲାଇ “ତୁବନ୍ ଦେଉ ଜଅନର୍ ତୁବନ୍ ।”

୪\*ପାଉଲ୍ କଇଲା, “ଜନ୍ ଲକ୍‌ମନ୍ ପାପେଅନି ବାଉତି ରଇଲାଇ, ଜଅନର୍ ତୁବନ୍ ସେମନର୍ ପାଇ ଟିକ୍ ରଇଲା । ମାତର୍ ତାର୍‌ପଟେ ଜେ ଆଇବାର୍ ରଇଲା, ଜନ୍‌ଟା କି, ଜିସୁ, ତାର୍ ଲଗେ ବିସ୍‌ବାସ୍ କରବାକେ, ଜଅନ୍ ଇସ୍ରାଏଲ୍ ଲକ୍‌ମନ୍କେ କଇରଇଲା ।”

୫ ଏଟା ସୁନି ସେମନ୍ ମାପୁରୁ ଜିସୁର୍ ନାଉଁ ଦାରି ତୁବନ୍ ନେଲାଇ । ୬ ପାଉଲ୍ ସେମନର୍ ଉପରେ ଆତ୍ ଚିଇଲା ଆରି ସୁକଲ୍ ଆତ୍‌ମା ତାକରଟାନେ ଉତରଲା । ସେମନ୍ ବିନ୍ ବିନ୍ ବାସାଇ କାତା କଇଲାଇ ଆରି ପରମେସରର୍ ସୁବ୍ କବର୍ ଜାନାଇଲାଇ । ୭ ସେମନ୍ ମୁନୁସ୍ ପିଲା ବାର ଲକ୍ ରଇଲାଇ ।

୮ ତାର୍ ପଟେ ପାଉଲ୍ ତିନ୍ ମାସ୍ ଜାକ ନ ଡରତେ ପାର୍‌ତନା ଗରେ କାତାବାର୍ କରି ପରମେସରର୍ ରାଇଜ୍ ବିସଇ ସେମନର୍ ମନେ ବିସ୍‌ବାସ୍ ଜନ୍‌ମାଇବାକେ ଚେସ୍‌ଟା କଲା । ୯ ମାତର୍ ସେମନର୍ ବିଡ୍‌ରେଅନି କେଡେକ୍ ଲକ୍‌ମନ୍ ତାର୍ ରଇଲା । ସେମନ୍ ବିସ୍‌ବାସ୍ କରନ୍‌ନାଇ । ଦଲର୍ ସବୁ ଲକ୍‌ମନ୍ ମୁଆଟେ ସେମନ୍ ମାପୁରୁର୍ ବାଟ୍ ବିସଇନେଇ, ତିପୁଲ୍ କାତା କଇଲାଇ । ସେଟାର୍‌ପାଇ ପାଉଲ୍ ସେମନ୍କେ ଚାଡି, ବିସ୍‌ବାସିମନ୍କେ ନେଇ, ସବୁ ଦିନ୍ ଚିରାନସ୍ ନାଉଁର୍ ଗରେ ନିଆଇ କରବାର୍ ଦାରୁଲାଇ । ୧୦ ଏଟା ତୁଇ ବରସ୍ ଦାରି ଚାଲୁଲା । ରମ୍ ଦେସର୍ ଆସିଆ ଦେସେ ବାସା କରିରଇବା ବେସି ଜିଉଦି ଆରି ଗିରିକ୍ ଲକ୍ ମିସା ମାପୁରୁର୍ ବାକିଅ ସୁନ୍‌ଲାଇ ।

### ଏସ୍‌କେବାର୍ ପଅମନ୍

\* ୧୯:୪ ୧୯:୪ ମାତିଉ ୩:୧୧; ମାର୍କ ୧:୪,୭,୮; ଲୁକ୍ ୩:୪,୧୭; ଜଅନ୍ ୧:୨୭,୨୭



୧୧ ପରମେସର ପାଉଲ୍‌ରତେଇଅନି ବେସି ବଡ଼ ବଡ଼ କାବାଅଇଜିବା କାମ୍‌ମନ୍ କଲା । ୧୨ ଏନ୍ତି କି ପାଉଲ୍ ପୁଟିଅଇବା ଭରମାଲ୍ ଆରି ବସ୍‌ତର୍ ରଗିମନର୍ ଲଗେ ନେଲେ, ସେମନ୍ ନିମାନ୍ ଅଇତେ ରଇଲାଇ । ସେମନର୍ ଗାଗ୍‌ତେଅନି କାରାପ୍ ଆଡ଼ମାମନ୍ ସବୁ ବାରଇଜାଇତେ ରଇଲାଇ । ୧୩ କେତେଟା ଏନେତେନେ ବୁଲ୍‌ବା ହୁମା ଚାଡ଼ାଇବା ଜିଉଦିମନ୍ ମିସା, ଜିସୁର୍ ନାଉଁ ଦାରି ହୁମା ଚାଡ଼ାଇବାକେ ଚେସ୍‌ଟା କଲାଇ । ସେମନ୍ କାରାପ୍ ଆଡ଼ମାମନ୍‌କେ କଇତେ ରଇଲାଇ, “ପାଉଲ୍ ଜାନାଇବା ଜିସୁର୍ ନାଉଁ ଦାରି ତକେ ଆଦେସ୍ ଦେଲିନି ।” ୧୪ ଏସ୍‌କେବା ନାଉଁର୍ ଗଟେକ୍ ଜିଉଦି, ବଡ଼ ପୁଜାରିର୍ ସାଡ଼ଟା ପିଲାମନ୍, ଏ ରକାମ୍ କରତେ ରଇଲାଇ ।

୧୫ ମାତର୍ କାରାପ୍ ଆଡ଼ମା ସେମନ୍‌କେ କଇଲା, “ମୁଇ ଜିସୁକେ ଜାନି ଆରି ପାଉଲ୍‌କେ ଚିନ୍‌ଲି ଆରି, ମାତର୍ ତମେ କେ ?”

୧୬ କାରାପ୍ ଆଡ଼ମା ଦାରିରଇଲା ଲକ୍, ସେମନ୍‌କେ ଦାରି ଚାବ୍‌କାତର୍ କରି ପାକାଇଲା । ସେମନର୍ ଲୁଗାପଟିଆ ଚିରି ହୁମଣ୍ଡା କରିଦେଲା । ସେମନ୍ କଣ୍ଡିଆ ବଣ୍ଡିଆ ଅଇ ତାର ଗରେଅନି ବାରଇ ପାଲାଇଲାଇ । ୧୭ ଏପିସେ ବାସାଅଇରଇବା ଜିଉଦି ବିସ୍‌ବାସିମନ୍ ଆରି ଗିରିକ୍ ଲକ୍‌ମନ୍, ଏ ବିସଇ ସୁନି ଡରିଗାଲାଇ ଆରି ତେଇ ମାପୁରୁ ଜିସୁର୍ ନାଉଁ ଅଦିକ୍ ଡାକ୍‌ପୁଟା ଅଇଲା । ୧୮ ବିସ୍‌ବାସିମନର୍ ବିଡ଼ରେଅନି ବେସି ଲକ୍ ସବୁର୍ ମୁଆଟେ ନିଜେ କଲା କାରାପ୍ କାମ୍ ମାନ୍‌ଲାଇ । ୧୯ ପାଙ୍ଗନ୍ ବିଦିଆ ଅବିଆସ୍ କରତେରଇବା ବେସି ଲକ୍‌ମନ୍ ତାକର୍ ବଇମନ୍ ଆନି ଚୁଲିଆଇକରି ସବୁ ଲକ୍‌ର୍ ମୁଆଟେ ପଡ଼ାଇ ଦେଲାଇ । ସବୁ ମିସିକରି ସେମନର୍ ବଇର୍ ଦାମ୍ ପଟାସ୍ ଅଜାର ରୁପାଟାଙ୍ଗା ଏଡ଼କି ରଇଲା । ୨୦ ଏକ୍ତିବାବ୍‌ରେ ପରମେସରର୍ ବାକିଅ ଅଦିକ୍ ଅଦିକ୍ ଗୁଲାଇବାଟେ ଉଡ଼ରା ଅଇଜାଇ ଅଦିକ୍ ବପୁ ଅଇବାର୍ ଦାରୁଲା ।

### ଏପିସ୍‌ତେଇ କିରମାର

୨୧ ଏ ସବୁ ଗର୍‌ନା ପଟେ ପାଉଲ୍ ମାସିଦନିଆ ଆରି ଆକାୟା ବାଟ୍ ଦେଇ ଜିରୁସାଲମେ ଜିବାକେ ଟିକ୍ କଲା । ସେ କଇଲା, “ତେଇ ଗାଲା ପଟେ, ମୁଇ ରମ୍ ଦେସେ ମିସା ଜିବାର୍ ଆଟେ ।” ୨୨ ସେଟାରପାଇ ସେ ତାର୍ ଦୁଇଟା ସଙ୍ଗାରି, ତିମତି ଆରି

ଏରାସ୍ତସ୍ତକେ ମାସିଦନିଆଇ ପାଟାଇଲା, ମାତର୍ ସେ ନିଜେ ଆସିଆ ଦେସେ ଆରି କେତେ ଦିନ ରଇଲା ।

୨୩ ଏଡ଼କି ବିତ୍ତରେ ମାପୁରୁ ଦେକାଇରଇବା ବାଟ୍ ବିସଇ ନେଇ, ଗଟେକ୍ ବେସି ବଡ଼ ଗଣ୍ଡଗଲ୍ ଅଇବାଟା ଉବଜ୍ଜଲା । ୨୪ ଦିମିତିରିୟ୍ ନାଉର୍ ଗଟେକ୍ ରୁପାର୍ ପୁଡ଼ଲା ତିଆର୍ କରୁ, ଆରତେମି ଦେବିର୍ ମନ୍ଦିରେ ପୁଡ଼ଲା ତିଆର୍ କରତେ ରଇଲା । ଏନ୍ତାରି ବେବାରକରି ପୁଡ଼ଲା ତିଆର୍ କରୁମନ୍, ବେସି ଲାବ୍ ପାଇତେ ରଇଲାଇ ।

୨୫ ସେଟାର୍ପାଇ ସେ ତାର୍ ସଙ୍ଗର୍ ବେବାରମନ୍ଦକେ ରୁଣ୍ଡାଇକରି କଇଲା, “ଆଗିଆମନ୍, ଏ ବେବାର୍ ଆମ୍ବକେ ସାଉକାର୍ କଲାଆତେ ବଲି ସବୁ ଲକ୍ ଜାନାସ୍ । ୨୬ ଏବେ, ଏ ଲକ୍ ପାଉଲ୍ କାଇଟା କଲାନି, ସେଟା ତମେ ନିଜେ ଦେକିପାରଲାସ୍ନି ଆରି ସୁନି ପାରଲାସ୍ନି । ସେ କଇଲାନି, ଲକର୍ ଆତେ ତିଆର୍ କଲା ଦେବତା ସବୁ ବିଲ୍କୁଲ୍ ଦେବତା ନଅଡ଼ । ସେ ଇତି ଏପିସେ ଆରି ସବୁ ଆସିଆ ଦେସେ ବେସି ଲକ୍ମନ୍ଦକେ ଏ ବିସଇ କଇ ଉସକାଇଲାନି । ୨୭ ସେଟାର୍ପାଇ ଆମର୍ ବେବାର୍ ବୁଡ଼ିଜିବାର୍ ଉପ୍ରେ ଆତେ । କାଲି ସେଡ଼କି ନଏଁ, ଜନ୍ ଦେବି ଆସିଆଇ ଆରି ଗୁଲାଇ ଜଗତେ ସବୁଟାମେଅନି ପୁଜାପାଇସି, ସେ ତାକ୍ପୁଟା ଆରତେମି ଦେବି, ମନ୍ଦିରର୍ ତାକ୍ପୁଟା ଆରି ନ ରଏ, ଆରି ଆରତେମି ଦେବିର୍ ମର୍ଜିତା ନସ୍ଟ ଅଇସି ।”

୨୮ ଲକ୍ମନ୍ ଏ କାତା ସୁନି ରିସା ଅଇଗାଲାଇ ଆରି ଆଉଲିଅଇ କଇଲାଇ, “ଏପିସିୟର୍ ଆରତେମି ବଡ଼ଦେବିର୍ ତାକ୍ପୁଟା ଅ !” ୨୯ ଏ ଗଣ୍ଡଗଲ୍ ଅଇଲାଟା ଗୁଲାଇ ନଅରେ କେଟିଗାଲା । ଲକ୍ମନ୍ ପାଉଲ୍ ସଙ୍ଗ୍ ରଇବା ମାକିଦନିଆର୍ ଗାୟ୍ ଆରି ଆରିସ୍ତାକସ୍, ଦୁଇଲକ୍କେ ଦାରି, ଦାପ୍ରେ ଜୁଇଦ୍ ବାଟେ ପାଲାଇଲାଇ । ୩୦ ତେଇ ପାଉଲ୍ ଏକ୍ଲାସେ ଲକ୍ମନ୍ର ବିତ୍ତରେ ଜିବାକେ ମନ୍ଦକଲା । ମାତର୍ ବିସ୍ବାସିମନ୍ ତାକେ ବିତ୍ତରେ ଜିବାକେ ଚାଡ଼ନ୍ତାଇ । ୩୧ ଆସିଆ ରାଇଜର୍ କେତେଟା ମୁକିଅ ସାସନ୍ କାରିଆମନ୍ ମିସା ପାଉଲ୍ ମଇତର୍ ରଇଲାଇଜେ, ପାଉଲ୍କେ ଜୁଇଦ୍ ପଡ଼ିଆଇ ନ ଜାଅ ବଲି, କବର୍ ପାଟାଇଲାଇ । ୩୨ ଏଡ଼କି ବିତ୍ତରେ ରୁଣ୍ଡିରଇବା ସବୁ ଲକ୍ ରିସା ଅଇଜାଇରଇଲାଇ । ଲକ୍ମନ୍ ଦଲ୍ଦଲ୍ ଅଇକରି ଏକାତା, ସେ କାତା କଇକଇ କରି ଆଉଲିଅଇ

ଜାଇତେ ରଇଲା । ମାତର୍ ସେମନ୍ତର୍ ବିତ୍ତରେଅନି କେତେକ୍ ଲକ୍, କାଇକେ ରୁଣ୍ଡିଆତଡ଼ ବଲି ନାଜାନିରଇଲା । ୩୩ ସେମନ୍ତର୍ ବିତ୍ତରେଅନି କେତେକ୍ ଲକ୍ ଏଟାର୍ପାଇ ଆଲେକ୍‌ଜାଣ୍ଡ୍ରାକେ ଦାଇ କଲା । କାଇକେବଇଲେ ଜିଉଦି ଲକ୍‌ମନ୍, ଆଗ୍‌ତୁ ତାକେ ଚିଆ କରାଇରଇଲା । ଆଲେକ୍‌ଜାଣ୍ଡ୍ରା ଲକ୍‌ମନ୍‌କେ ଆଡ଼ଟେକି ଚିମ୍‌ରାଇଅଇ ରଇବାକେ କଇଲା ଆରି ତାର୍ ବାସନ୍‌ଗାନେ ବିସ୍‌ବାସିମନ୍ତର୍ ବାଟେ ଅଇକରି ବୁଜାଇବାକେ ଚେସ୍‌ଟା କଲା । ୩୪ ମାତର୍ ସେ ଗଟେକ୍ ଜିଉଦିଲକ୍ ବଲି ଜାନିକରି ଲକ୍‌ମନ୍ ଏକାତରେକ୍ ଆଉଲିଅଇକରି “ଆରଡେମି ଦେବିର୍ ଜୟ ଜୟ ଅ !” ବଲି ଦୁଇ ଗଟା ଜାକ ଆଉଲି ଅଇ ରଇଲା ।

୩୫ ପଟେ ନଅରର୍ ଅଦିକାରେ ରଇବା ଗଟେକ୍ କାମ୍‌କରୁ, ଲକ୍‌ମନ୍‌କେ ବୁଜା ସୁଜା କରି ଚିମ୍‌ରା କଲା ଆରି କଇଲା, “ଏ ଏପିସିୟର୍ ବାଇମନ୍, ଏପିସିୟ ନଅରେ ବଡ଼ଦେବି ଆରଡେମିର୍ ମନ୍ଦିର୍ ଆରି ଆକାସେଅନି କସ୍‌ରି ଆଇଲା ସୁକଲ୍ ପାକ୍‌ନା ରକିଆ କର୍‌ବା ଦାଇଡ଼, ଏପିସିୟ ନଅରେ ରଇବା ଲକ୍‌ମନ୍ । ୩୬ କେ ମିସା ଏଟା ନଏଁ ବଲି କଇନାପାରଡ଼ । ସେଟାର୍ ପାଇ ତମେ ସବୁ ଲକ୍ ଚିମ୍‌ରାଇ ଉଆ । କାଇକାମ୍ ମିସା ବକୁଆପାରା କରାନାଇ । ୩୭ ଏ ଲକ୍‌ମନ୍ ମନ୍ଦିରେଅନି କାଇଟା ଚରି କରଡ଼ ନାଇ, କି ଆମର୍ ଦେବିର୍ ବିରଦେ, କାଇମିସା କାରାପ୍ କାତା କଅଡ଼ ନାଇ, ଏଲେମିସା ତମେ ଏମନ୍‌କେ ଦାରି ଆନିଆଟାସ୍ । ୩୮ ଜଦି ଦିମିଡିରିୟ ଆରି ତେଇର୍ ପୁଡ଼ଲା ତିଆରକରୁମନ୍‌କେ, କାର୍ ବିରଦେ ଦାବାକର୍‌ବାଟା ଆଟେ, ସେଟା ବିଟାର୍ କର୍‌ବାକେ ଆମର୍ ଲକ୍‌ମନ୍ ଆଟଡ଼ । ଆରି ବିଟାର୍ ଅଇବା ଗଟେକ୍ ଦିନ୍ ଆଟେ । ତେଇ ସେ ଦାବା ବିସଇ କଇପାରାସ୍ । ୩୯ ଜଦି ଆରଡେଇଅନି ଆରି ଅଦିକ୍ କାଇଟା ଜାନ୍‌ବାକେ ମନ୍ କଲାସ୍‌ନି, ତେବେ ଲକ୍‌ମନ୍ ଚିକ୍‌କଲା ନିୟମର୍ ସବାଇ, ସେଟା ଚିକ୍ କରାଅଇସି । ୪୦ ଆଜି ଜାଇଟା ଗଟ୍‌ଲା ଆଟେ, ତେଇ ଗଣ୍ଡିଗଲ୍ କର୍‌ବା ଆରି ଦାବା କର୍‌ବା ବିସଇ ଆମର୍ ବିରଦେ କାତା ଉଟିପାରେ । ଏ ଗଣ୍ଡିଗଲ୍ କାଇମିସା କାରନ୍ ଦେକାଇ ନାପାରୁ ।” ୪୧ ଏ ସବୁ କାତା କଇ ସେ ଲକ୍‌ମନ୍‌କେ ଚିମ୍‌ରା କରାଇ ସବା ସେସ୍ କଲା ।

## ୨୦

## ପାଉଲ୍ ମାସିଦନିଆ ଆରି ଆକାୟା ଜିବାଟା

<sup>୧</sup> ଗଣ୍ଡଗଲ୍ ବନ୍ଦ ଅଇଲା ପତେ, ପାଉଲ୍ ବିସ୍ବାସିମନ୍ଦକେ ଗଟେକ୍ତେଇ ରୁଣ୍ଡାଇ ସାର୍ଦାର୍ କାତା ସୁନାଇଲା । ସେମନ୍ଦକେ ଜିବିବେ ବଲି କଇ, ତେଇଅନି ବାରଇ ମାକେଦନିଆଇ ଗାଲା । <sup>୨</sup> ତେଇର୍ ସବୁ ଜାଗାଇ ଗାଲା, ଆରି ବେସି ଲକ୍ମନ୍ଦକେ ଉପ୍ଦେସ୍ ଦେଇ, ସାର୍ଦା କରାଇଲା, ତାର୍ପତେ ସେ ଗିରିସେ ଗାଲା । <sup>୩</sup> ତେଇ ସେ ତିନ୍ ମାସ୍ ରଇଲା, ଆରି ସିରିଆଇ ଜିବାକେ ତିଆର୍ ଅଇଲାବେଲେ, ଜିଉଦିମନ୍ ତାକର୍ ବିରଦେ କୁଟ୍ପାଁର୍ଲାଇନି ବଲି କବର୍ ପାଇ ମାକିଦନିଆବାଟେ ବାଉଡି ଜିବାକେ ଟିକ୍ କଲା । <sup>୪</sup> ବେରିଆତେଇ ରଇବା ପୁରର୍ ପଅ ସପାତର୍, ତେସ୍ଲନିକିୟ୍ ଆରିସ୍ତାକସ୍ ଆରି ସେକୁଦ୍, ଦରବିର୍ ଗାୟ୍, ଏସିଆ ଦେସର୍ ତୁକିକ୍, ତରପିମ୍ ଆରି ତିମତି । <sup>୫</sup> ସେମନ୍ ଆଗୁତୁ ଜାଇ ତରିୟାଇ ଆମ୍ବକେ ଜାଗି ରଇଲାଇ । <sup>୬</sup> କମିର୍ ନ ପାକାଇ ରୁଟି କାଇବା ପରବର୍ ପତେ, ଆମେ ପିଲିପେଅନି ପାନିଜାଜେ ଜାଇ ପାଁର୍ ଦିନ୍ ପତେ ତରିୟାଇ ସେମନ୍ଦର୍ ସଙ୍ଗ୍ ମିସ୍ଲୁ ଆରି ତେଇ ଗଟେକ୍ ଆର୍ ଜାକ ରଇଲୁ ।

## ପାଉଲ୍ ତରିୟାତେଇ ସାରାସାରି ଜାକ ରଇବାଟା

<sup>୭</sup> ଆଟର୍ ପର୍ତୁମ୍ ଦିନର୍ ସଞ୍ଜବେଲାଇ ଆମେ ସବୁଲକ୍ ମିସି କାଇବାକେ ରୁଣ୍ଡଲୁ । ପାଉଲ୍ ଲକ୍ମନ୍ଦକେ ମଜାରାତି ଜାକ ଉପ୍ଦେସ୍ ଦେଲା । କାଇକେବଇଲେ ତାର୍ ଆରକର୍ ଦିନେ ସେ ଜାଗା ଚାଡି ଜିବାର୍ ରଇଲା । <sup>୮</sup> ଜନ୍ ଉପର୍ ତାଲାର୍ ବାକ୍ରାଇ ଆମେ ସବା କର୍ତେ ରଇଲୁ, ତେଇ ବେସି ବତିମନ୍ ଲାଗିରଇଲା । <sup>୯</sup> ତେଇ ଇଉଟିକସ୍ ନାଉର୍ ଗଟେକ୍ ଦାଙ୍ଗଡା କିଡ୍ଡି ଲଗେ ବସି ରଇଲା । ପାଉଲ୍ କାତା କଇବା ବେଲାଇ, ତାକେ ଗୁନ୍ ଡାବି ଆଇଲା, ସେ ଗୁନ୍ ଲାଡେ, ତିନ୍ତାଲାର୍ ଗର୍ ଉପ୍ରେଅନି ତଲେ ଅଦ୍ରିଦେଲା । ସେମନ୍ ତାକେ ଉଟାଇବା ବେଲାଇ, ସେ ମରିଜାଇରଇଲା । <sup>୧୦</sup> ମାତର୍ ପାଉଲ୍ ତଲ୍ଲକେ ଉଡ୍ରି ଆସି ତାକେ ପାଟାଲି, ଦାରି କଇଲା, “ତରା ନାଇ । ତାକେ ଜିବନ୍ ଆଟେ ।” <sup>୧୧</sup> ତାର୍ପତେ ସେ ଉପ୍ରେ ବାଉଡିଜାଇ ରୁଟି ବାଙ୍ଗାଇ କାଇଲା, ଆରି ବେଲ୍ ଉଦ୍‌ବାଜାକ ସେମନ୍ଦର୍ ସଙ୍ଗ୍ ବେସି କାତାବାର୍ତା ଅଇ ତେଇଅନି

ବାରଇଲା । <sup>୧୭</sup> ଲକ୍ମନ ଦାଙ୍ଗଡାକେ ଜିବନ୍ ରଇଲାଟା ଦେକି ତାର୍ ଗରେ ଦାରିଗାଲାଅ ଆରି ସାର୍ଦା ଅଇଲାଅ ।

### ତରୟାଇ ଅନି ମିଲିଟସେ ଜିବାଟା

<sup>୧୮</sup> ଆମେ ଆଗତୁ ଜାଜେ ଚଗି, ଆସସେ ଜିବାକେ ବାରଇଲୁ । ତେଇଅନି ଆମେ ପାଉଲ୍‌କେ ଜାଜେ ନେଇଜିବାକେ ଚିକ୍ କରଇଲୁ । କାଇକେବଇଲେ ସେ ସମ୍‌ଦୁର୍ବାଟେ ଜାଇ, ସେ ଜାଗାଇ କେଟ୍‌ବି ବଲି କଇରଇଲା । <sup>୧୯</sup> ସେ ଜେଡେବେଲା ଆମ୍‌କେ ଆସସେ ବେଟ୍ ଅଇଲା, ଆମେ ତାକେ ଜାଜେ ଚଗାଇ ମିଡିଲିନି ଜାଗାଇ ଗାଲୁ । <sup>୨୦</sup> ତେଇଅନି ଆରି ଜିବାର୍‌ଦାରି ତାର୍ ଆରକର୍ ଦିନେ କିଅସ୍ ଲଗେ କେଟ୍‌ଲୁ । ତାର୍ ଆରକର୍ ଦିନେ ମିଲିଟସେ କେଟ୍‌ଲୁ । ଆରି ଗଟେକ୍ ଦିନ୍ ପଟେ ଆମସେ କେଟ୍‌ଲୁ । ତାର୍ ଆରକର୍ ଦିନେ ମିଲିଟସେ କେଟ୍‌ଲୁ । <sup>୨୧</sup> ଆସିଆ ରାଇଜେ ଆରି ବେସି ଦିନ୍ ନ ରଇକରି, ଏପିସସ୍ କଣ୍ଟିକଣ୍ଟି ଜାଜ୍ ଚାଲାଇବାକେ ପାଉଲ୍ ଚିକ୍ କଲା । ଜଦି ଅଇପାର୍‌ସି, ପେନ୍‌ଟିକସ୍‌ଟ୍ ଦିନେ ଜିରୁସାଲାମ୍ କେଟ୍‌ବାକେ ସେ ତେରେପେଡେ ଅଇଡେ ରଇଲା ।

### ଏପିସି ମଣ୍ଟଲିର୍ ନେତାମନ୍‌କେ ପାଉଲ୍‌ର୍ ପାଟାଇବା କାତା

<sup>୨୨</sup> ପାଉଲ୍ ମିଲିଟସେଅନି ଏପିସି ମଣ୍ଟଲିର୍ ପାର୍‌ଚିନ୍ ମନ୍‌କେ ତାର୍ ସଙ୍ଗ୍ ମିସ୍‌ବାକେ ତାକାଇଲା । <sup>୨୩</sup> ସେମନ୍ ଆସି କେଟ୍‌ଲାକେ ପାଉଲ୍ କଇଲା, “ରମିୟ ରାଇଜର୍ ଆସିଆଇ କେଟ୍‌ଲା ପର୍‌ଡୁମ୍ ଦିନେଅନି, କେନ୍ତ୍ର ତମର୍ ସଙ୍ଗ୍ ବେସି ବେଲା କାଟାଇଲି ଆଟି, ସେଟା ତମେ ଜାନିଆଟାସ୍ । <sup>୨୪</sup> ଜିଉଦିମନ୍‌ର୍ କୁଟ୍ ପାଁଟ୍‌ନାର୍ ଲାଗି, ମକେ ଜନ୍ ଦୁକ୍ କସ୍‌ଟ୍ ପାଇକରି ମୁରଟ୍‌ବାକେ ପଡ଼ଲା, ସେ ବିଡ଼ରେ ମୁଇ ପରମେସରର୍ ସେବାକାରିଆ ଇସାବେ ଆଁସୁପାନି ଜତାଇ, ମୁଣ୍ଡ ତଲେକରି, କାମ୍ କଲିଆଟି । <sup>୨୫</sup> ତମେ ଜାନିଆଟାସ୍, ଲକ୍ମନର୍ ଲଗେ କବର୍ ଜାନାଇଲାବେଲେ ଆରି ତମର୍ ଗର୍ମନ୍‌କେ ଉପ୍‌ଦେସ୍ ଦେଲାବେଲେ, ତମର୍ ଉପକାର୍ ଅଇଲାପାରି କାଇ ବିସଇ ମିସା ଜାନାଇବାକେ ମୁଇ ଦୁଇମନିଆ ଅଇନାଇ ।” <sup>୨୬</sup> ଜିଉଦି ଆରି ଗିରିକ୍ ଲକ୍ମନନ୍‌କେ ସବୁକେ ମୁଇ ତାଟ୍ ସଙ୍ଗ୍ ଜାଗରଟ୍ ରଇବା କାତା ସୁନାଇ ରଇଲି, ଜେନ୍ତାରିକି, ସେମନ୍ ପାପେଅନି ବାଉଡିକରି ପର୍‌ମେସରର୍ ବାଟେ ମନ୍ ଦେଅଡ୍ ଆରି ମାପୁରୁ ଜିସୁକେ

ବିସ୍ୱାସ କରନ୍ତୁ । ୨୨ ଏବେ ସୁକଲ୍‌ଆଡ଼ମାର ଚାଲ୍‌ନାଦେଲା ଆଦେସ୍  
ମାନିକରି, ମୁଇ ଜିରୁସାଲମେ ଗାଲିନି । ତେଇ ମକେ କାଇଟା ଅଇସି  
ନାଜାନି । ୨୩ ସୁକଲ୍‌ଆଡ଼ମା ମକେ ଜାଗରତ୍ କରିଦେଇ ଆଚେ ଜେ,  
ମୁଇ ସବୁ ନଅରେ ବନ୍ଦି ଗରେ ରଇକରି କସ୍‌ଟ ପାଇବି । ୨୪ ଙମର୍  
ନିଜର୍ ଜିବନ୍, ମର୍ ପାଇ, ମୁଇ ଇନ୍ କଲିନି । ପର୍ମେସରର୍ ଜିବନ୍  
ଦୁକାଇଲା ବିସଇ ଆରି ମାପ୍‌ରୁ ଜିସୁ ଜନ୍ କାତା ଜାନାଇବାକେ  
ମକେ ଦାଇଡ଼ ଦେଲାଆଚେ, ସେଟା ସାରାଇବି ଆରି ସୁବ୍ କବର୍  
ଜାନାଇବାଟା ପୁରାପୁରୁନ୍ କର୍ବି । ଏଡ଼କି ସେ ମୁଇ ମନ୍ କଲିନି ।

୨୫ “ପର୍ମେସରର୍ ରାଇଜ୍ ବିସଇ ଜାନାଇବାକେ ମୁଇ ତମର୍ ସବୁ  
ଲକର୍ ଲଗେ ଜାଇଆଚି । ଏବେ ମୁଇ ଜାନିଆଚି, ତମର୍ ବିଡ଼ରେଅନି  
କେମିସା ମର୍ ମୁଁ କେବେ ଦେକି ନାପାରାସ୍ । ୨୬ ତେବର୍ପାଇ  
ଆଜି ବେଲା ମିଲ୍‌ଲା ଆଚେ ବଲି ମୁଇ ଡାଟ୍ ସଙ୍ଗ୍ ତମ୍‌କେ  
ଜାନାଇଲିନି । ତମର୍ ବିଡ଼ରେଅନି କେ ଜଦି ବାଟ୍ ବାନା ଅଇଗାଲେ,  
ସେଟାପାଇ ମୁଇ ଦାଇ ନଇ । ୨୭ କାଇକେବଇଲେ ତମର୍ଟାନେ  
ପର୍ମେସରର୍ ସବୁଜାକ ଆଦେସ୍ ଜାନାଇବାକେ, ମୁଇ ଦୁଇମନିଆ  
ଅଇନାଇ । ୨୮ ତେବର୍ପାଇ ତମେ ନିଜର୍ ବିସଇ ଆରି ସୁକଲ୍‌ଆଡ଼ମା  
ଡାର୍ ସଡ଼ ଗିଆନେ ଜନ୍ ବିସ୍‌ବାସି ମାନ୍‌କେ ଦେକାରକାପାଇ  
ଚାଡ଼ିଦେଇ ଆଚେ, ସେ ସବୁ ବିସଇଟାନେ ଜାଗରତ୍ ଉଆ । ମେଣ୍ଡା  
ଚାରାଉ ଗଉଡ଼ପାରା ପରମେସରର୍ ମଣ୍ଡଲିର୍ ଜତନ୍ ନିଆ । ସେ  
ମଣ୍ଡଲିକେ ପରମେସର ଡାର୍ ନିଜର୍ ବନିଦେଇ ଗେନିଆଚେ ।  
୨୯ ମୁଇ ଜାନିଆଚି, ମୁଇ ଗାଲାପଚେ ତମର୍ ବିଡ଼ରେ ଅପର୍ବଲ୍  
ଗଦଡୁରକାମନ୍ ଆଇବାଇ ଆରି ମେଣ୍ଡାସାସିକେ ଚିନ୍ ଚତର୍ କରିସେ  
ଚାଡ଼ବାଇ । ୩୦ ବେଲା ଆଇସି, ତମର୍ ନିଜର୍ ଦଲ୍‌ର କେଡେ ଲକ୍  
ବିସ୍‌ବାସିମନ୍‌କେ ମିଟ୍ କାତା କଇ ତାକର୍ ବାଟେ ଡାକି ନେବାଇ ।  
୩୧ ସେ ବେଲେ ତମେ ଜାଗରତ୍ ଅଇ ରୁଆ । ମୁଇ ତିନ୍ ବରସ୍ ଜାକ  
ଦିନ୍ ରାତି ଆଁସୁପାନି ଜରାଇ, ତମ୍‌କେ ଗଟେକ୍ ଗଟେକ୍ କରି, ସବୁ  
ଲକ୍‌କେ ସିକାଇ ଆଚି, ଏ କାତା ଏତାଇରୁଆ ।”

୩୨ “ଏବେ ମୁଇ ତମ୍‌କେ ପରମେସରକେ, ଆରି ଡାର୍ ଜିବନ୍  
ଦୁକାଇବା ବାକିଅଟାନେ ସର୍ପି ଦେଲିନି । ସେ ବାକିଅ ତମ୍‌କେ

ଡାଟ୍ କରାଇସି ଆରି ପରମେସରର ଲକ୍ମନର ପାଇ ଅଇବା ସବୁ ଆସିରବାଦ୍ ତମକେ ଦେଇପାରସି । ୩୩ ମୁଇ କାର୍ ସୁନା, ରୁପା କି ଲୁଗାପଟିଆ ମିଲାଇବି ବଲି ଆସା କରିନାଇ । ୩୪ ମର୍ ଏ ଦୁଇଟା ଆତେ କସ୍ଟ କରି, ମର୍ ପାଇ ଆରି ମର୍ସଙ୍ଗ ରଇବାଲକର ପାଇ, ଦରକାର ରଇଲାଟା ପୁରାପୁରୁନ୍ କଲିଆଟି ଏଟା ତମେ ଜାନିଆଟାସ୍ । ୩୫ ମିଲାଇବାଟାନେଅନି ଦାନଦେବାଟା ଅଦିକ୍ ସାର୍ଦାର ବିସଇ ଅଇରଇସି । ନିଜେ ଜିସୁ ମାପୁରୁ ଏ ବାକିଅ ସୁମରନା କରିରଇଲା । ଏନ୍ତାରି କସ୍ଟ କାମେଅନି ନାପାରଲା ଲକ୍ମନକେ ସାଇଜ କରବାର୍ ଆତେ । ଏ ବିସଇ ମୁଇ ତମକେ ସବୁବେଲେ କରିଦେକାଇଆଟି ।”

୩୬ ଏ ସବୁ କାତା କଇସାରାଇ ପାଉଲ୍ ସେମନର୍ ସଙ୍ଗ୍ ମାଣ୍ଡିକୁଟା ଦେଇ ପାର୍ତନା କଲା । ୩୭ ସବୁ ଲକ୍ କାନ୍ଦି କାନ୍ଦି କରି ପାଉଲ୍‌କେ ପାଟାଲିକରି ତୁମ୍‌ଟାଟ୍ କରି ପାଟାଇଦେଲା । ୩୮ ପାଉଲ୍ ସେମନକେ “ତମେ ଆରି ମକେ ଦେକିନାପାରାସ୍ ।” ବଲି କଇରଇଲାକେ, ସେମନ୍ ବେସି ମନ୍‌ଦୁକ୍ ଅଇଜାଇରଇଲା । ଲକ୍ମନ ପାଉଲ୍‌କେ ପାଟାଇ ଦେବାକେ, ଜାଜେ ନେଇ ଚାଡ଼ୁଲା ।

## ୨୧

### ପାଉଲ୍ ଜିରୁସାଲାମେ ଜିବାଟା

୧ ସେମନକେ ପାଟାଇଦେଇକରି ଆମେ ତେଇଅନି ଜାଜେ ଚଗି ସିଦା କସ୍ ନାଉର୍ ଜାଗାଇ କେଟ୍‌ଲୁ । ତାର୍ ଆରକର୍ ଦିନେ ରଦେ କେଟ୍‌ଲୁ, ସମ୍‌ଦୁର୍ ପାଲି ପାଲି ଜାଇ ପାତାରା ନାଉର୍ ଜାଗାଇ ଗାଲୁ । ୨ ତେଇଅନି ପିନିସିଆଇ ଜାଇତେ ରଇବା ଗଟେକ୍ ଜାଜେ ଚଗି ଜିବାର୍ ଦାର୍‌ଲୁ । ୩ ତାର୍‌ପଟେ ଡିସ୍‌ତେରଇବା ସାଇପରସ୍ ନାଉର୍ ଗଟେକ୍ ଜାଗାଇ କେଟ୍‌ଲୁ । ତେଇଅନି ତାର୍ ଦକିଶଦିଗ୍ ବାଟେ ଜାଇ ସିରିଆଇ କେଟ୍‌ଲୁ । ଆମେ ଟାୟର୍ ନାଉର୍ ଗଟେକ୍ ଜାଗାଇ, ପାନିଜାଜେଅନି ଉତର୍‌ଲୁ, କାଇକେ ବଇଲେ, ଏ ଜାଜେଅନି ଦିନ୍‌ସୁମନ୍ ଉତ୍‌ରାଇବାର୍ ରଇଲା । ୪ ତେଇ ଆମେ କେତେଟା ବିସ୍‌ବାସିମନର୍ ସଙ୍ଗ୍ ବେଟ୍ ଅଇ ସେମନର୍ ସଙ୍ଗ୍ ଗଟେକ୍ ଆଟ୍ ରଇଲୁ, ସୁକଲ୍‌ଆଡ଼ମାର୍ ଚାଲ୍‌ନା ପାଇକରି ସେମନ୍, ଜିରୁସାଲାମେ ଜିବାକେ ପାଉଲ୍‌କେ ମନା କଲା । ୫ ମାତର୍ ସେମନର୍ ସଙ୍ଗ୍

ଗଟେକ୍ ଆର୍ ରଇଲା ପରେ, ଆମେ ସେମନ୍‌କେ ଚାଡ଼ିକରି ଆମର୍ ବାଟେ ଉଠି ଆଇଲୁ । ଆମ୍‌କେ ପାଟାଇ ଦେବାକେ ସେମନ୍ ନିଜର୍ ନିଜର୍ ପିଲା ମାଇଜି ସଙ୍ଗ୍ ଗଡ଼ ବାଇରେ ରଇବା, ସମଦୁର୍ କଣ୍ଡିଜାକ ଆଇଲାଇ । ତେଇ ଆମେ ସବୁ ଲକ୍ ମାଣ୍ଡିକୁଟା ଦେଇ ପାର୍‌ତନା କଲୁ ।<sup>୨</sup> ତାର୍‌ପଟେ ଆମେ ସେମନ୍‌ର୍ ସଙ୍ଗ୍, ଜୁଆର୍‌ବେଟ୍ ଅଇ ଜାଜେ ଚଗ୍ଲୁ, ସେମନ୍ ଗରେ ବାଉଡ଼ି ଗାଲାଇ ।

<sup>୩</sup> ଆମେ ଟାୟରେଅନି ପାନିଜାଜେ ବାରଇ ପଡ଼ଲମା ନାଉଁର୍ ଜାଗାଇ କେଟ୍‌ଲୁ, ତେଇ ବିସ୍‌ବାସି ବାଇମନ୍‌ର୍ ସଙ୍ଗ୍ ଜୁଆର୍‌ବେଟ୍ ଅଇ ଗଟେକ୍ ଦିନ୍ ରଇଲୁ ।<sup>୪</sup> ଆର୍‌କର୍ ଦିନେ ଆମେ ସେ ଜାଗା ଚାଡ଼ି, ସିସେରିଆ ନାଉଁର୍ ଜାଗାଇ କେଟ୍‌ଲୁ, ତେଇ ମାପୁରୁର୍ କାତା ଜାନାଇବା, ପିଲିପର୍ ଗରେ ରଇଲୁ, ଜିରୁସାଲମେ ସେବା କର୍‌ବାକେ ବାଟାଇଅଇରଇବା ସାଡ଼ ଲକ୍‌ର୍ ବିଡ଼ରେଅନି, ପିଲିପ୍ ଗଟେକ୍ ଲକ୍ ରଇଲା ।<sup>୫</sup> ପିଲିପର୍ ଚାର୍‌ଟା ଦାଙ୍ଗ୍‌ଡ଼ି ଚକିମନ୍ ବିବା ନ ଅଇକରି ରଇଲାଇ, ସେମନ୍ ପରମେସର୍ କଇଲା କାତା ଜାନାଇତେ ରଇଲାଇ ।<sup>୬</sup> ଆମେ ସେ ଜାଗାଇ ବେସି ଦିନ୍ ରଇଲା ପଟେ, ଜିଉଦା ରାଇଜେଅନି ଆଗାବ୍ ନାଉଁର୍ ଗଟେକ୍ ବବିସଡ଼ବକ୍‌ତା ତେଇ ଆଇଲା ।<sup>୭</sup> ସେ ଆମର୍ ଲଗେ ଆସି ପାଉଲର୍ ଆଟାବେଡ଼ା ନେଲା, ତେଇ ସେ ନିଜର୍ ଆଡ଼ ଗଡ଼ ବାନ୍ଧି କରି କଇଲା, “ସୁକଲ୍‌ଆଡ଼ମା ମକେ ଜାନାଇଲା ଆଟେ ଜେ, ଏ ଆଟାବେଡ଼ାର୍ ସାଉକାର୍‌କେ ଜିରୁସାଲାମର୍ ଜିଉଦିମନ୍, ଏନ୍ତି ବାନ୍ଧି ଜିଉଦିନଇଲା ଲକ୍‌ମନ୍‌କେ ସର୍‌ପିଦେବାଇ ।”

<sup>୮</sup> ଏଟା ସୁନି ଆମେ ଆରି ସେ ଜାଗାଇ ରଇଲା ବିନ୍‌ଲକ୍‌ମନ୍, ପାଉଲ୍‌କେ “ ଜିରୁସାଲାମେ ନ ଜାଆ” ବଲି ବାରୁଜିଆ କଲୁ ।<sup>୯</sup> ମାତର୍ ପାଉଲ୍ କଇଲା, “ତମେ ଏଟା କାଇଟା କଲାସ୍‌ନି, କାଇକେ ଏନ୍ତି କାନ୍ଦାବୁବା ଅଇ ମର୍ ମନ୍ କିଲ୍‌ବିଲ୍ କଲାସ୍‌ନି ? ଜିରୁସାଲାମ୍ ଅବ୍‌କା ବାନ୍ଧାଇ ଅଇବାକେସେ ନାଇ, ମାତର୍ ମୁଇ ମାପୁରୁ ଜିସୁର୍ ପାଇ ମର୍‌ବାକେ ମିସା ରାଜି ଆଟି ।”

<sup>୧୦</sup> ଆମେ ତାକେ ବୁଜାଇ ନାପାରି, ତେଇଅନି ଚିମ୍‌ରାଇ ଅଇ କଇଲୁ “ମାପୁରୁ ମନ୍ କଲାଟା ପୁରାପୁରୁନ୍ ଅ ।”



୧୫ ତେଜ କେତେଦିନ ରଇକରି, ଆମର ଦିନସୁପତର ସାଜାତି ଜିରୁସାଲମେ ଜିବାକେ ବାରଇଲୁ । ୧୬ ସିସ୍ତେରିଆର କେତେଟା ସିସ୍ତମନ୍, ଆରି ସାଜପରସର୍ ମନାସନ୍ ନାଉର୍ ବିସ୍ତବାସି ମିସା ଆମର ସଙ୍ଗ ଆଇଲା । ମନାସନ୍ ଗରେ ଆମେ ରଇବାକେ ଟିକ୍ ଅଇରଇଲା ।

### ଜାକୁବର ସଙ୍ଗ ପାଉଲ୍ ବେଟ୍ ଅଇବାଟା

୧୭ ଜିରୁସାଲମର ବିସ୍ତବାସି ବାଇମନ୍ ଆମ୍ଭେ ସାରଦାସଙ୍ଗ ଗତିଆ କଲାଇ । ୧୮ ତାର ଆରକର ଦିନେ ପାଉଲ୍ ଆମର ସଙ୍ଗ ଜାକୁବକେ ଦେକ୍‌ବାକେ ଗାଲା, ମଣ୍ଡଲିର ସବୁ ପାର୍ତିନମନ୍ ତେଜ ରୁଣ୍ଡି ରଇଲାଇ । ୧୯ ପାଉଲ୍ ସେମନ୍‌କେ ଜୁଆରବେଟ୍ ଅଇ ତାକର କାମେଅନି, ପରମେସର ଜିଉଦିନଇଲା ଲକ୍‌ମନର ବିତ୍‌ରେ ଜାଇଟା କରିରଇଲା ତାର ଗଟେକ୍ ଟିକିନିକିର ତାଲିକା ଦେଲା । ୨୦ ତାର କାତା ସୁନ୍‌ଲାପରେ ସେମନ୍ ସବୁ ଲକ୍ ପରମେସରର ଡାକ୍‌ପୁଟା କଲାଇ । ତାରପରେ କଇଲାଇ, “ବାଇ ପାଉଲ୍, ତମେ ଦେକ୍‌ଲାସିନି, କେନ୍ତି, ଏବେ ଅଜାର୍ ଅଜାର୍ ଜିଉଦିମନ୍ ମାପୁରୁ ଜିସୁକେ ମାନଲାଇନି ଆରି ସେମନ୍ ରିତିନିତି ମିସା ମାନଲାଇନି । ୨୧ ସେମନ୍ କବର ପାଇଆତଡ଼ ଜେ, ତମେ ଜିଉଦିନଇଲା ଦେସେ ବାସା ଅଇରଇଲା, ଜିଉଦିମନ୍‌କେ ମସାର ରିତିନିତି ଗତିଦେବାକେ, ସେମନ୍‌ର ପିଲାମନ୍‌କେ ସୁନଡ଼ ନ କର୍‌ବାକେ ଆରି ଜିଉଦି ରିତିନିତି ନ ମାନବାକେ ସିକିଆ ଦେଲାସିନି । ୨୨ ତମେ ଇତି କେଟିଆଗାସ୍ ବଲି ସେମନ୍ ସତ୍‌ସେ ସୁନ୍‌ବାଇ । ସେନ୍ତି ଆଲେ କାଇଟା କରିଅଇସି ? ୨୩ ଆମେ ମନ୍‌କଲୁନି ତମେ ଗଟେକ୍ କାମ୍ କରା ବଲି । ଇତି ରଇଲା ତାରିଲକ୍ ଗଟେକ୍ ମାନଡ଼ କଲାଇଆତଡ଼ । ୨୪ ସେମନ୍‌ର ସଙ୍ଗ ଜାଆ । ସୁକଲ୍ ଅଇବା ବିଦି ମାନବାତେଇ ସେମନ୍‌ର ସଙ୍ଗ ମିସା ଆରି ସେମନ୍‌ର କର୍‌ଟା ଦେ । ତାରପରେ ସେମନ୍ ନିଜର୍ ନିଜର୍ ମୁଣ୍ଡ କୁରାଇ ଅଅଡ଼ । ଇତିଅନି ଜାନାପଡ଼ୁସି ଜେ, ତମର୍ ବିସଇ ବାରଇରଇବା କାଇମିସା କବର ସତ୍ ନର୍ସ, ମାତର୍ ତମେ ମସାର ରିତିନିତି ଇସାବେ ଜିବନ୍ ଜିଇଲାସିନି । ୨୫ ☆ମାତର୍ ଜିଉଦି ନ ଅଇଲା ଲକ୍‌ମନ୍ ବିସ୍ତବାସି ଅଇଆତଡ଼ । ସେମନ୍‌କେ ଗଟେକ୍ ଟିକି

ଲେକି ଉପଦେଷ୍ ଦେଲୁଆରୁ ଜେ, ଆମର କଇଲା କାତା ଇସାବେ, ସେମନ୍ ପୁତୁଲାନକେ ବିରୁକଲା କାଦି ନ କାଅଡ଼, ବନି ନ କାଅଡ଼, ଚଟ୍ଟରି ପିଚକି ମରାଇରଇବା ପସୁର୍ ମାଉଁସ୍ ନ କାଅଡ଼ ଆରି ବିନ୍ ମାଇଜିମନର୍ ସଙ୍ଗ୍ ପାପ୍ କାମ୍ କର୍ବାଟାନେଅନି ଦୁରିକେ ରଅଡ଼ ।”

୨୭ ତାର ପର୍ଦିନେ ପାଉଲ୍ ସେ ଚାର୍ ଲକର୍ ସଙ୍ଗ୍ ସୁକଲ୍ ଅଇବା ବିଦି ମାନଲା । ତାର ପତେ ସେ ମନ୍ଦିରେ ଜାଇ ସୁକଲ୍ ଅଇବା କାମ୍ କେବେ ସାର୍ସି, ଆରି କେଡେବଲ୍ ବିରୁ କର୍ବାଟା ଅଇସି, ସେଟା ଜାନାଇଦେଲା ।

### ପାଉଲ୍ ମନ୍ଦିର ବିତ୍ରେ ବନ୍ଦି ଅଇଲା

୨୭ ଏ ସୁକଲ୍ ଅଇବା କାମର୍ ସାଡ଼ ଦିନ୍ ଗାଲା ପତେ, ଆସିଆ ରାଇଜର୍ କେଡେଟା ଜିଉଦିମନ୍ ପାଉଲ୍‌କେ ମନ୍ଦିରେ ଦେକ୍‌ଲାଇ, ସେମନ୍ ତେଇ ରୁଣ୍ଡୁଲା ଲକ୍‌ମନ୍‌କେ ଉସ୍‌କାଇକରି ପାଉଲ୍‌କେ ଦାରଲାଇ । ୨୮ ସେମନ୍ ଆଉଲି ଅଇକରି କଇଲାଇ, “ଏ ଇସ୍ରାଏଲର୍ ବାଇମନ୍ ଆମ୍‌କେ ସାଇଜ କରା ! ଏ ଲକ୍ ଚାରିବାଟେ ଜାଇକରି ଇସ୍ରାଏଲ୍ ମନର୍ ବିରଦେ, ମସାର ନିୟମ୍ ଆରି ଏ ମନ୍ଦିର ବିରଦେ, ସିକିଆ ଦେଲାନି । ଏବେ କେଡେଟା ଗିରିକ୍ ଲକ୍‌ମନ୍‌କେ ମନ୍ଦିର ବିତ୍ରେ ଆନି, ଏ ସୁକଲ୍ ଜାଗା ଅସୁକଲ୍ କଲା ଆତେ ।”

୨୯ ☆ସେମନ୍ ଗଡ଼ ବିତ୍ରେ ଏପିସସର୍ ତର୍ପିମ୍‌କେ ପାଉଲ୍ ସଙ୍ଗ୍ ଦେକି ରଇଲାର୍ ପାଇ ବାବ୍‌ଲାଇ ଜେ, ପାଉଲ୍ ତାକେ ମନ୍ଦିରେ ନେଲା ଆତେ ବଲି ।

୩୦ ଗଡ଼ର୍ ଗୁଲାଇ ବାଟେ ରିସାର୍ କିଲ୍‌ବିଲ୍ ତାବିଅଇଗାଲା । ଲକ୍‌ମନ୍ ପାଉଲ୍‌କେ ମନ୍ଦିର ବାଇରେ ଅର୍ଗଡ଼ି ଆନ୍‌ଲାଇ, ଆରି ମନ୍ଦିରର୍ କାପାଟ୍‌ମନ୍ ତାବିଦେଲାଇ । ୩୧ ରିସାଅଇଲା ଲକ୍‌ମନ୍ ପାଉଲ୍‌କେ ମରାଇବାକେ ଚେସ୍‌ଟା କଲାଇ, ମାତର୍ ସମାନ୍ ସେ ବେଲାଇ “ ଜିରୁସାଲାମେ ଗଣ୍ଡୁଗଲ୍ ଚାଲ୍‌ଲା ଆତେ ।” ବଲି ରମିୟ୍ ସନିଅମନ୍‌ର୍ କବର୍ ସୁନ୍‌ଲାଇ । ୩୨ ସେ କେଡେଟା ସେନାପତି କେଡେଟା ସନିଅମନ୍‌କେ ଦାରି ଦାପ୍‌ରେ, ଗଟ୍‌ନା ଗଟ୍‌ଲା ଜାଗାଇ ଆସି କେଟ୍‌ଲା । ଲକ୍‌ମନ୍ ସନିଅ ଆରି ସେନାପତିକେ ଦେକିକରି ପାଉଲ୍‌କେ ମାରବାଟା ଚାଡ଼ିଦେଲାଇ । ୩୩ ସେନାପତି ପାଉଲ୍‌କେ ବନ୍ଦିକରି, ତାକେ ଦୁଇଟା ସିକ୍‌ଲିଡେଇ ବାନ୍ଦବାକେ

ଆଦେସ୍ ଦେଲା, ତାର ପତେ ସେ ପାଚାରୁଲା, “ଏ ଲକ୍ କେ ? ଆରି ସେ କାଇଟା କଲା ଆତେ ?” <sup>୩୪</sup> ଲକ୍‌ମନର୍ ମାନ୍ଦାଇଅନି କେ କେତେ ରକାମ୍ କାତା କଇ ଆଉଲିଅଇଲାଇ । ଏନ୍ତି କିରମାର ଅଇଲା ଜେ, ସନିଅମନର୍ ମୁକିଆ, ସତ୍‌ସେ, ଏ ଗର୍‌ନା କାଇକେ ଅଇଲା ବଲି ବୁଜିନାପାରୁଲା । ସେଟାରପାଇ ସେ ପାଉଲ୍‌କେ ଗଡ଼ବିଡ଼ରେ ଦାରିଜିବାକେ ସନିଅମନ୍‌କେ ଆଦେସ୍ ଦେଲା । <sup>୩୫</sup> ସନିଅମନ୍ ପାଉଲ୍‌କେ ଦାରି ଚଗ୍‌ବା ପାଉରେ କେଟ୍‌ଲା ଦାପ୍‌ରେ, ତାର ଚାରିବେଡ଼ତି ରଇଲା ଲକ୍‌ମନ୍ ବେସି ଆଉଲି ଅଇଲାଇକେ ସନିଅମନ୍ ତାକେ ବଇ ଦାରିଗାଲାଇ । <sup>୩୬</sup> ବଇନେବା ବେଲେ ଲକ୍‌ମନ୍ ପର୍‌ପର୍ ଆସି ତାକେ ମରାଆ ବଲି ଆଉଲି ଅଇତେରଇଲାଇ ।

### ପାଉଲ୍ ନିଜର୍ ବିସଇ ସାକି ଦେବାଟା

<sup>୩୭</sup> ପାଉଲ୍‌କେ ସନିଅମନ୍ ଗଡ଼ବିଡ଼ରେ ନେବାବେଲେ ସେ ସନିଅମନର୍ ମୁକିଆକେ କଇଲା, “ମୁଇ ତମର୍ ସଙ୍ଗ୍ କାତା ଅଇପାର୍‌ବି କି ?”

ସନିଅମନର୍ ମୁକିଆ କଇଲା, “ତୁଇତା ଗିରିକ୍ କଇଲୁସ୍‌ନି । <sup>୩୮</sup> ସେନ୍ତି ଆଲେ କେତେ ଦିନ୍ ଆଗେ ମିସରର୍ ଜନ୍ ଲକ୍ ଚାରି ଅଜାର୍ କାଙ୍ଗାରମନର୍ ସଙ୍ଗ୍ କେଟିରଇଲା, ତମେ ସେ ଲକ୍ ନୁଆଁସ୍ !”

<sup>୩୯</sup> ପାଉଲ୍ କଇଲା, “ମୁଇ ସିଲିସିଆର ତାର୍‌ସିସେ ଜନମ୍ କରିରଇବା ଗଟେକ୍ ଜିଉଦି, ଗଟେକ୍ ମୁକିଅ ଗଡ଼ର୍ ଲକ୍ । ଏ ଲକ୍‌ମନ୍‌କେ ବୁଜାଇ କଇବାକେ ଦୟାକରି ମକେ ଅଲପ୍ ଆଦେସ୍ ଦିଆ ।”

<sup>୪୦</sup> ସେନାପତି ତାକେ ଆଦେସ୍ ଦେଲାକେ ପାଉଲ୍ ପାଉର୍ ଉପ୍‌ରେ ଚିଆଅଇ, ଲକ୍‌ମନ୍‌କେ ଚିମ୍‌ରା ଅଇବାକେ ଆଡ଼ ସାଗିଆ କଲା । ସେମନ୍ ଚିମ୍‌ରା ଅଇଲାଇକେ, ପାଉଲ୍ ଇବ୍‌ରୁ ବାସାଇ କଇଲା ।

## ୨୨

<sup>୧</sup> “ମର୍ ସଙ୍ଗାରି ଜିଉଦି ବାଇ ଆରି ବାବାମନ୍, ମର୍ ନିଜର୍‌ବାଟେଅନି ମୁଇ ଜାଇଟା କଇଲିନି ସେଟା ସୁନା !” <sup>୨</sup> ସେମନର୍ ସଙ୍ଗ୍ ସେ ଇବ୍‌ରୁ ବାସାଇ କାତା କଇବାଟା ସୁନି, ଲକ୍ ମାନ୍ଦା ତୁପ୍‌ଟାପ୍ ଅଇଲାଇ ଆରି ପାଉଲ୍ କଇବାକେ ଦାରୁଲା,

୩ ✨“ମୁଁ ଗଟେକ ଜିଉଦି ଲକ୍, ସିଲିସିଆର ତାର୍‌ସିସେ ମର ଜନମ, ମାତର ମୁଁ ଜିରୁସାଲମେ କାଇପିଇ ବଡ଼ ଅଇରଇଲି ଆରି ଗମଲିଏଲର ସିସ୍ ରଇଲି । ଆମର ଆନିଦାଦିମନର ରିତିନିତି, ମୁଁ ଟିକ୍ ଇସାବେ ସିକିରଇଲି ଆରି ତମର ପାରା ପରମେସରକେ ମାନିକରି ଜିଇତେରଇଲି । ✨ମାପୁରୁ ବାଟେ ଜିବା ଲକ୍‌ମନକେ ମାରଦାର କରି ସେମନକେ ମରାଇଦେଇତେ ରଇଲି । ମାଇଜିଟକି ମୁନ୍ସପିଲ୍ଲା ସବୁକେ ବାନ୍ଦିକରି ବନ୍ଦି ଗରେ ପୁରାଇ ଦେଇତେ ରଇଲି । ✨ ମର ଏ କାତା ପୁରା ସତ୍ । ବଡ଼ ପୁଜାରି ଆରି ବଡ଼ ସବାର ସବୁ ପାରୁନିମନ ସାକି ଆତଡ଼ । ଲକ୍‌ମନକେ ବନ୍ଦି କରି ସିକଲି ସଙ୍ଗ ବାନ୍ଦି ଜିରୁସାଲମ ଦାରିଆଇବାକେ, ମୁଁ ବଡ଼ ପୁଜାରିର୍ ଟାନେଅନି ଆଦେସ୍ ପତର ପାଇ, ଦାମାସ୍କସେ ରଇବା ଜିଉଦି ବାଇମନର୍ ଲଗେ ଗାଲି ।”

ପାଉଲ୍ ତାର୍ ମନ୍ ବାଦ୍‌ଲାଇଲା ବିସଇନେଇ ଟିକିନିକି କଇଲା

୨ “ମୁଁ ଜେଡେବେଲା ବାରଇ ଜିରୁସାଲମେ ଜିବାବେଲେ ଦାମାସ୍କସ୍ ଲଗାଲଗି ଅଇଲି, ପାକାପାକି ମୁଣ୍ଡବେଲାଇ, ଆକାସେଅନି ଗଟେକ ଉଜଲ୍ ମର ଚାରିବେଡ଼ି ଉଜଲ୍ ଅଇଗାଲା ।” ୨ ମୁଁ ବୁର୍‌ଉଁ ଉମ୍‌ତାଡ଼ିଅଇ ଅଦରିଗାଲି ଆରି ମର୍‌ପାଇ ଏ କାତା ସୁନ୍‌ଲି, ସାଉଲ୍, ସାଉଲ୍ ! ମକେ ତୁଇ କାଇକେ କସ୍‌ଟ ଦେଲୁସ୍‌ନି ? ୮ ମୁଁ ପାଚାର୍‌ଲି, “ମାପୁରୁ, ତମେ କେ ? ସେ ମକେ କଇଲା, ‘ତମେ ଜାକେ କସ୍‌ଟ ଦେଲାସ୍‌ନି’ ମୁଁ ସେ ନାଜରିତର୍ ଜିସୁ ।” ୯ ମର୍‌ସଙ୍ଗ୍ ରଇଲା ଲକ୍ ସେ ଉଜଲ୍ ଦେକ୍‌ଲାଇ, ମାତର ମର୍ ସଙ୍ଗ୍ କାତା ଅଇବା ଲକ୍‌ର ସର୍ ସୁନି ନାପାର୍‌ଲାଇ । ୧୦ ମୁଁ ପାଚାର୍‌ଲି, “ମାପୁରୁ, ମୁଁ କାଇଟା କରବି ?” ମାପୁରୁ ମକେ କଇଲା, “ଉଟ୍, ଆରି ଦାମାସ୍କସେ ଜାଆ, ପରମେସର୍ ତର୍ ପାଇ ଜନ୍ କାମ୍ ଟିକ୍ କଲା ଆଟେ, ସେଟା ତମକେ ତେଇ ଜାନାଇ ଦିଆଅଇସି ।” ୧୧ ସେ ଉଜଲ୍ ଏଡେକ୍ ଉଜଲ୍ ରଇଲା ଜେ, ସେ ଉଜଲ୍‌ର ବପୁ ସଙ୍ଗ୍, ମୁଁ କାଶା ଅଇଜାଇରଇଲି । ସେଟାର୍‌ପାଇ ମର୍ ସଙ୍ଗ୍, ଜିବା ଲକ୍‌ମନ, ମର୍ ଆଡେ ଦାରି, ମକେ ଦାମାସ୍କସେ ଡାକିନେଲାଇ ।

✨ ୨୨:୩ ୨୨:୩ ପେରିଡ଼ ୫:୩୪-୩୯

✨ ୨୨:୪ ୨୨:୪ ପେରିଡ଼ ୮:୩;୨୭:୯-୧୧

୧୭ ଦାମାସ୍କାସେ ଅନନିଅ ନାଉଁର୍ ଗଟେକ୍ ଦରମ୍ ଲକ୍ ରଇଲା । ସେ ଆମର୍ ରିତିନିତି ନାମି କରି ରଇଲା, ତେଇ ରଇବା ଜିଉଦିମନ୍ ସବୁ ତାକେ ବେସି ନାମ୍ତେ ରଇଲାଇ । ୧୩ ସେ ମର୍ଲଗେ ଆସି ଚିଆଅଇ କଇଲା, “ବାଇ ସାଉଲ୍, ତୁଇ ଆଁକି ଆରି ତରେକ୍ ଦେକ୍ ।” ଟିକ୍ ସେ ଦାପ୍ରେ, ମୁଇ ଆରି ତରେକ୍ ଦେକ୍ବା ବପୁ ପାଇଲି । ୧୪ ସେ କଇଲା, “ଆମର୍ ଆନିଦାଦିର୍ ମାପ୍ତୁ ସେ ମନକର୍ବାଟା ଜାନ୍ବାକେ, ତାର୍ ଦରମର୍ ଦାଙ୍ଗ୍ତାକେ ଦେକ୍ବାକେ ଆରି ତାର୍ କାତା ସୁନ୍ବାକେ, ତକେ ବାଟ୍ଲା ଆତେ । ୧୫ ତୁଇ କାକଟା ଦେକିଆରୁସ୍ ଆରି ସୁନି ଆରୁସ୍, ସେଟା ସବୁ ଲକର୍ ଲଗେ ଦେକାଇବାକେ ଆରି ସୁନାଇବାକେ ତାକର୍ ସାକି ଅଇସୁ । ୧୬ ଆରି କାଇକେ ଅଲ୍ସମ୍ କଲୁସ୍ନି ? ଉଟ୍, ତୁବନ୍ ନେ, ଆରି ତାକେ ପାର୍ତନା କରି ତର୍ ସବୁ ପାପେଅନି ପରିଚଲ୍ ଅ ।”

ଜିଉଦି ନଇଲା ଲକ୍ମନର୍ତେଇ ମାପ୍ତୁର୍ କାତା ଜାନାଇବାକେ ପାଉଲ୍କେ ଡାକ୍ତା ଆଇଲା

୧୭ “ମୁଇ ଜିରୁସାଲମେ ବାଉଡି ଜାଇ, ତେଇର୍ ମନ୍ଦିରେ ପାର୍ତନା କର୍ବାବେଲେ, ମକେ ମାପ୍ତୁର୍ ଦର୍ସନ୍ ମିଲ୍ଲା । ୧୮ ମାପ୍ତୁର୍ ମକେ ନିଜେ ଦେକାଇଅଇ କଇଲା, ଦାପ୍ରେ ଜିରୁସାଲମ୍ ଚାଡି ଉଟି ଜା, କାଇକେ ବଇଲେ ଇତିର୍ ଲକ୍ମନ୍ ମର୍ ବିସଇ, ତୁଇ ସାକିଦେବାଟା ନ ନାମ୍ତ ।” ୧୯ ମୁଇ କଇଲି “ମାପ୍ତୁର୍, ମୁଇ ପାର୍ତନା ଗର୍ମନ୍କେ ଜାଇ, ତମ୍କେ ବିସ୍ବାସ୍ କର୍ବା ଲକ୍ମନ୍କେ, କେନ୍ତାରି ବନ୍ଦି କରି ରଇଲି ଆରି ମାଡ୍ ମାରି ରଇଲି, ଏଟା ସେମନ୍ ନିକ ସଙ୍ଗ୍ ଜାନଡ୍ । ୨୦ ☆ଆରି ଜେଡେବେଲ୍ ତମର୍ ସାକି ଦେଇ ରଇବା ତିପାନ୍କେ ମରାଇଦେଲାଇ, ମୁଇ ନିଜେ ତେଇ ରଇଲି, ତାକେ ମାରି ମରାଇଦେବାକେ ରାଜିଅଇରଇଲି । ମାରୁମନର୍ ବେଟ୍ଲା ବସତର୍ ଜାଗି ରଇଲି ।” ୨୧ ମାପ୍ତୁର୍ ମକେ କଇଲା, “ଜାଆ ମୁଇ ତକେ ବେସି ଦୁରିକେ ଜିଉଦି ନଇଲା ଲକ୍ମନର୍ ଲଗେ ପାଟାଇବି ।”

୨୨ ପାଉଲ୍ ଏ କାତା କଇବାଜାକ ଲକ୍ମନ୍ ମନ୍ଦିଆନ୍ ଦେଇ ସୁନ୍ତେ ରଇଲାଇ, ମାତର୍ ତାର୍ ପତେ ସେମନ୍ ଆଉଲିଅଇକରି କଇଲାଇ, “ତାକେ ଜଗତେଅନି ବାରକରାଇ ଦିଆସ୍ ! ମରାଇ

ଦିଆସ୍, ସେନ୍ତା ଲକ୍ ଜିଇବାକେ ଲତା ନାଇ !” ୨୩ ସେମନ୍ ଆଉଲି ଅଇକରି ବସତର୍ ଉପରେ ଉଡ଼ାଇତେରଇଲା ଆରି ଦୁଲି ମିସା ଉପରେ ଉଡ଼ାଇତେ ରଇଲା । ୨୪ ରମିୟ୍ ସନିଅମନର୍ ମୁକିଆ ପାଉଲକେ ଗଡ଼ ବିଡ଼ରେ ଦାରିଜିବାକେ ସନିଅମନକେ ତିଆରଲା ଆରି ଜିଉଦିମନ୍ କାଇକେ ତାର ବିରୁଦେ ଆଉଲି ଅଇଲାଜନି, ସେଟା ଜାନବାକେ ପାଉଲକେ କରତା ସଙ୍ଗ୍ ମାରବାକେ ଆଦେସ୍ ଦେଲା । ୨୫ ମାତର୍ ସେମନ୍ ତାକେ କରତା ମାରବାକେ ବାନ୍ଧିରଇଲା ବେଲେ, ପାଉଲ୍ ତେଇ ରଇବା ଗଟେକ୍ ଅଦିକାରିକେ କଇଲା, “କାଇ ଦସ୍ ନ ରଇକରି ଏବେ ଜାକ ବିଚାରନା ନ ଅଇରଇବା ଗଟେକ୍ ରମିଅ ଲକ୍ କେ କରତା ସଙ୍ଗ୍ ମାରବାଟା, ଏଟା ତୁଇ ନିୟ୍ମ୍ ମାନଲୁସ୍ନି କି ?”

୨୬ ଏ କାତା ସୁନିକରି ସନିଅ ଗାଲା ଆରି ସନିଅମନର୍ ମୁକିଅକେ କଇଲା, “ତୁଇ କାଇଟା କଲୁସ୍ନି? ଏ ଗଟେକ୍ ରମିଅ ଲକ୍ !”

୨୭ ସନିଅମନର୍ ମୁକିଅ ପାଉଲର୍ ଲଗେ ଜାଇ ପାଟାରଲା, “ସତଇସେ ତମେ କାଇ, ରମିଅ ଲକ୍ କି ?”

ପାଉଲ୍ ଉତର୍ ଦେଲା “ଉଁ ।”

୨୮ ସେନାପତି କଇଲା, “ମୁଇ ରମିଅ ସର୍କାରକେ ତାରୁ ଦେଇକରି ଗଟେକ୍ ରମିଅ ଲକ୍ ଅଇଲି ଆଟି ।”

ପାଉଲ୍ କଇଲା “ମାତର୍ ମୁଇ ଜନମ୍ କଲାବେଲେଅନି ରମିଅ ଲକ୍ ।”

୨୯ ଏଟା ସୁନିକରି ଜନଲକ୍ମନ୍ ପାଉଲକେ ପାଟାରବାର୍ ଜାଇରଇଲା, ସେମନ୍ ପଡ଼କେ ଗୁଡ଼ଲା । ପାଉଲ୍ ଗଟେକ୍ ରମିୟ୍ ଲକ୍ ବଲି ଜାନଲାକେ, ସେମନ୍ ନେତା ମିସା ଡ଼ରଲା । କାଇକେବଇଲେ ପାଉଲକେ ସିକ୍ଲି ସଙ୍ଗ୍ ବାନ୍ଧବାକେ ସେ ସେ ତିଆରିରଇଲା ।

### ବଡ଼ ସବାର୍ ମୁଆଟେ ପାଉଲ୍

୩୦ ଜିଉଦିମନ୍ ପାଉଲକେ କାଇବଲି ନିନ୍ଦା କର୍ତ୍ତେରଇଲା, ସେଟା ଜାନବାକେ ସନିଅମନର୍ ମୁକିଅ ମନ୍ କର୍ତ୍ତେରଇଲା । ତେବର୍ପାଇ ତାର୍ ଆରକର୍ ଦିନେ ସବୁ ପୁଜାରିମନକେ ଆରି ବଡ଼ ସବାର୍ ମେମର୍ମନକେ ରୁଣ୍ଡାଇବାକେ ତିଆରଲା । ତାର୍ ପଟେ ସେ

ପାଉଲ୍‌କେ ବାନ୍ଦ୍‌ଲା ସିକ୍‌ଲି କୁସ୍‌ଲାଇ, ଦାରିକରି ଆନ୍‌ଲା ଆରି ବଡ଼ ସବାଇ ତାକର୍ ମୁଆଟେ ଚିଆ କରାଇଲା ।

## ୨୩

୧ ପାଉଲ୍ ବଡ଼ସବାର ଲକ୍‌ମନ୍‌କେ ସିଦା ଦେକି କଇଲା, “ଏ ଇସ୍ରାଏଲ୍‌ର ବାଇମନ୍ ! ଆଜିକେ ଜାକ ମୁଇ ପରମେସରର୍ ମୁଆଟେ କେନ୍ତାର୍ ଜିବନ୍ ବିତାଇ ଆତି, ସେ ବିସଇଟାନେ ମନ୍ ପୁରାପୁରନ୍ ନିର୍ମଲ୍ ଆଟେ ।” ୨ ଏ କାତା ସୁନିକରି ଅନନିଅ ନାଉର୍ ବଡ଼ ପୁଜାରି ପାଉଲ୍‌ର ଲଗେ ଚିଆଅଇରଇବା ଲକ୍‌ମନ୍‌କେ, ତାର୍ ଗାଲେ ଚାପଡ଼ ମାରା ବଲି ତିଆର୍‌ଲା । ୩ ☆ପାଉଲ୍ ତାକେ କଇଲା, “ଏ ରୁନ୍ ମାରିଅଇଲା ଦବ୍‌ଲା ଉଆଁରି କତି, ପର୍ମେସର୍ ତକେ ତଣ୍ଟ ଦେଇସି ଆକା । ନିୟ୍‌ମ୍ ଇସାବେ ମର୍ ବିଚାର୍ କର୍‌ବାକେ, ତୁଇ ତେଇ ବସିଆତୁସ୍ । ଏଲେ ମିସା, ନିୟ୍‌ମ୍ ବାଞ୍ଚିକରି ମକେ ମାର୍‌ବାକେ ତିଆର୍‌ଲୁସ୍‌ନି !”

୪ ଲଗେ ରଇବା ଲକ୍‌ମନ୍ ପାଉଲ୍‌କେ କଇଲାଇ, “ପର୍ମେସର୍ ବାଟିରଇବା ବଡ଼ ପୁଜାରିକେ ତୁଇ ନିନ୍ଦା କଲୁସ୍‌ନି !”

୫ ପାଉଲ୍ କଇଲା, “ଏ ଇସ୍ରାଏଲ୍‌ର ବାଇମନ୍, ସେ ବଡ଼ ପୁଜାରି ବଲି ମୁଇ ନାଜାନିରଇଲି । ସାସ୍‌ତରେ ଲେକାଆଟେ, ତମେ ନିଜର୍ ଜାତିର୍ ସାସନ୍‌କାରିଆକେ କରାପ୍ କାତା କଇବାର୍‌ନାଇ ।”

୬ ☆ବଡ଼ ସବାର୍ ମେମର୍‌ମନ୍‌ର ବିତ୍‌ରେ କେତେଟା ପାରୁସି ଆରି କେତେଟା ସାଦୁକିମନ୍ ରଇଲାଟା ଦେକି ପାଉଲ୍ ବଡ଼ ସବାର୍ ଲକ୍‌ମନ୍‌କେ ଦେକାଇ ଆଉଲି ଅଇକରି କଇଲା, “ଏ ଇସ୍ରାଏଲ୍‌ର ବାଇମନ୍, ମୁଇ ଗଟେକ୍ ପାରୁସି ଲକ୍, ମର୍ ଆୟ୍ ବାବା ମିସା ପାରୁସି । ମଲା ଲକ୍‌ମନ୍ ଆରିତରେକ୍ ଉର୍‌ବାଟା ମର୍ ଆସା ଆଟେ ବଲି, ଇତି ମର୍ ବିଚାର୍‌ନା ଅଇଲାନି ।”

୭ ପାଉଲ୍ ଏ କାତା କଇଲା ଦାପ୍‌ରେ, ପାରୁସି ଆରି ସାଦୁକିମନ୍‌ର ବିତ୍‌ରେ ଲାଗାଜଡା ଅଇଗାଲାଇ ଆରି ସେମନ୍ ବେଗ୍‌ଲି ଗାଲାଇ । ୮ ☆କାଇକେବଇଲେ ସାଦୁକିମନ୍‌ର ବିସ୍‌ବାସ୍ ଇସାବେ ମଲା

☆ ୨୩:୩ ୨୩:୩ ମାଡିଉ ୨୩:୨୭,୨୮ ☆ ୨୩:୬ ୨୩:୬ ପେରିଡ଼ ୨୬:୫; ପିଲିପିୟ୍ ୩:୫

☆ ୨୩:୮ ୨୩:୮ ମାଡିଉ ୨୨:୨୩; ମାର୍କ ୧୨:୧୮; ଲୁକ୍ ୨୦:୨୭

ଲକ୍ମନ ନ ଉଠେ । ସରଗର ଦୁଡ଼ କି ଆତ୍ମା ମିସା ନାଲ ବଲି, ବିସ୍‌ବାସ୍ କରବାଇ, ମାତର ପାରୁସିମନ୍ ଏ ତିନ୍‌ଟା ଜାକ ବିସ୍‌ବାସ୍ କରତେରଇଲାଇ ।<sup>୯୯</sup> ସେମନ୍ କିରଜାଟି ଅଇବାଟା ଅଦିକ୍ ଅଦିକ୍ ଅଇଆଇଲା । ପାରୁସି ଦଲର କେତେଟା ଦରମ୍ ଗୁରୁ ଉଟିକରି ତାଟ୍ ସଙ୍ଗ୍ କଇଲାଇ, “ଆମେ ଏ ଲକର ଟାନେଅନି କାଇ ଦସ୍ ମିସା ମିଲାଉ ନାଇ । କେଜାନେ ଆକେ ଗଟେକ୍ ସରଗର୍ ଦୁଡ଼ କି ଆତ୍ମା କାତା କଇରଇସି ।”<sup>୧୦</sup> ତାକର ଦଦାପେଲା ଅଦିକ୍ ଅଦିକ୍ ଅଇଗାଲାକେ ଲକ୍ମନ ପାଉଲକେ ଗନ୍ଦାଗନ୍ଦା କରି ଚିରି ପାକାଇବାଇ ବଲି ସନିଅମନ୍ ମୁକିଅ ଡରଲା । ତେବେ ସେ ଗଣ୍ଡଗଲ୍ ଅଇବା ଲକ୍ମନର ବିଡ଼ରେଅନି ପାଉଲକେ ରକିଆ କରି ଗଡ଼ ବିଡ଼ରେ ଦାରି ଜିବାକେ ସନିଅମନ୍‌କେ ଡିଆରଲା ।

<sup>୧୧</sup> ସେ ରାତି ମାପୁରୁ ପାଉଲର ଲଗେ ଚିଆଅଇ କଇଲା, “ଡର ନାଇ ! ମର୍ ପାଇ ଇତି ଜିରୁସାଲାମେ ତୁଇ ସାକି ଦେଇ ଆରୁସ୍ । ରମ୍ ଦେସେ ମିସା ତୁଇ ସେନ୍‌ତାରି କରବାର୍ ଆଚେ ।”

### ପାଉଲକେ ମରାଇବାକେ ଜଜନା କରବାଟା

<sup>୧୨</sup> ଆରକର ଦିନର୍ ସାକାଲେ କେତେଟା ଜିଉଦିମନ୍ ଗଟେକ୍‌ଟାନେ ରୁଣ୍ଡି ଜଜନା କଲାଇ । ପାଉଲକେ ନ ମରାଇବା ଜାକ ସେମନ୍ ଅରନ୍‌ପାନି ନ ଚିଉ ବଲି ସପଡ଼ କଲାଇ ।<sup>୧୩</sup> ଚାଲିସ୍‌ତେଇଅନି ଅଦିକ୍ ଲକ୍ ଏ ଜଜନା କଲାଇ ।<sup>୧୪</sup> ସେମନ୍ ଜାଇକରି ମୁକିଅ ପୁଜାରିମନ୍‌କେ ଆରି ପାର୍‌ଚିମନ୍ କେ କଇଲାଇ, “ପାଉଲକେ ନ ମରାଇବା ଜାକ ଅରନ୍‌ପାନି ନ ଚିଉ ବଲି ଆମେ ସପଡ଼ କରିଆଚୁ ।<sup>୧୫</sup> ତମେ ଆରି ବଡ଼ସବାର୍ ଲକ୍ମନ ରମିୟ ନେତା ପାଉଲକେ ଇତି ଆରିତରେକ୍ ଆନା ବଲି କବର୍ ପାଟାଆ । ତାର୍ ବିସଇର୍ ଟିକିନିକି ଜାନ୍‌ବାର୍ ଆଚେ ବଲି ମିଡ଼ କଇକରି ଆନାଆ । ସେ ବଡ଼ ସବାଇ ଆଇବା ବେଲେ ତାକେ ବାଟେ ଜାଗି ମାରି ମରାଇଦେବୁ ।”

<sup>୧୬</sup> ପାଉଲର ବାନ୍‌ଜା ଏମନ୍ କୁଟ୍ କାତା ସୁନିକରି ଗଡ଼ ବିଡ଼ରେ ଗାଲା ଆରି ସବୁ କାତା ପାଉଲକେ କଇଦେଲା ।<sup>୧୭</sup> ପାଉଲ ଗଟେକ୍ ରମିୟ ଅଦିକାରିକେ ତାକାଇ କରି କଇଲା, “ଏ ଦାଙ୍ଗ୍‌ତାକେ ସନିଅମନ୍ ମୁକିଅ ଲଗେ ଦାରି ଜାଅଡ଼ । ସେ ତାକେ କାଇଟାକି



କଇବାର୍ ଆଚେ ।”<sup>୧୮</sup> ସନିଅ ତାକେ ମୁକିଆର୍ ଲଗେ ନେଇ କଇଲା,  
“ବନ୍ଧି ରଇବା ପାଉଲ୍ ମକେ ଡାକି ଏ ଦାଙ୍ଗଡାକେ ତମର୍ ଲଗେ  
ଆନ୍‌ବାକେ କଇଲା । ତମ୍‌କେ ପନି ସେ କାଇଟା କଇବାର୍ ଆଚେ  
।”

<sup>୧୯</sup> ସନିଅମନର୍ ମୁକିଅ ତାର୍ ଆଡ଼ ଦାରିକରି ଗଟେକ୍ ପାଲିକେ  
ଡାକିନେଲା ଆରି ପାଚାର୍‌ଲା, “କାଇଟା କଇବାର୍ ଆଚେ କଅ !”

<sup>୨୦</sup> ଦାଙ୍ଗଡା କଇଲା, “ପାଉଲ୍‌ର ଟିକିନିକି ବିସଇ ଜାନ୍‌ବାର୍  
ଆଚେ ବଲି ନାତାଇକରି ତାକେ ଜିଉଦିମନ୍ ବଡ଼ ସବାଇ ନେବାକେ,  
ତମ୍‌କେ ଗୁଆରି କରବାଇ ।<sup>୨୧</sup> ମାତର୍ ତମେ ତାକର୍ କାତା ସୁନା  
ନାଇ । କାଇକେ ବଇଲେ ଚାଲିସ୍‌ତେଇଅନି ଅଦିକ୍ ଲକ୍ ଲୁଟିକରି  
ପାଉଲ୍‌କେ ମରାଇବାକେ ଜାଗିଆଚଡ଼ । ‘ତାକେ ନ ମରାଇବା ଜାକ  
ଅରନ୍‌ପାନି ନ କାଉଁ’ ବଲି ସପଡ଼ କଲାଇ ଆଚଡ଼ । ଏବେ ସେମନ୍  
ତମର୍ ଆଦେସ୍ ଦେବାଟାକେ ଜାଗିକରି ଆଚଡ଼ ।”

<sup>୨୨</sup> ସନିଅମନର୍ ମୁକିଅ କଇଲା, “ତୁଇ ମକେ ଏ କାତା ଜାନାଇ  
ଆଟି ବଲି କାକେ କଅ ନାଇ ।” ଏନ୍‌ତାରି କଇକରି ଦାଙ୍ଗଡାକେ  
ପାଟାଇ ଦେଲା ।

### ପାଉଲ୍‌କେ ସାସନ୍‌କାରିଆ ପେଲିକ୍‌ସ୍ ଲଗେ ପାଟାଇଦେଲାଇ

<sup>୨୩</sup> ସନିଅମନର୍ ମୁକିଅ ତାର୍ ତଲେ ରଇଲା ଦୁଇଟା ସନିଅକେ  
ତାକାଇ କଇଲା, “ଆଜି ରାତି ନଅଟା ବିତ୍‌ରେ ସିସେରିଆ ଜିବାକେ  
ଦୁଇସ ସନିଅକେ ତିଆର୍, ଆରି ସତୁରିଟା ଗଡାଇ ଚଗୁମନ୍  
ଆରି ଦୁଇ ସଅ ବର୍ତ୍ତି ଦାରୁମନକେ ଟିକ୍ କର୍ ।<sup>୨୪</sup> ପାଉଲ୍  
ଜିବା ପାଇ କେତେଟା ଗଡା ଦିଆସ୍ ଆରି ନିକ ସଙ୍ଗେ ତାକେ  
ସାସନ୍‌କାରିଆ ପେଲିକ୍‌ସ୍ ଲଗେ ଦାରି ଜାଆ ।”<sup>୨୫</sup> ସନିଅମନର୍  
ମୁକିଅ ପେଲିକ୍‌ସ୍‌କେ ଏନ୍‌ତି ଗଟେକ୍ ଚିଟି ଲେକ୍‌ଲା,

<sup>୨୬</sup> “ଏ ଚିଟି ମୁଇ କାଲାଡିଆକେ ଲିସିଆର୍ ସବୁର୍‌ଟାନେଅନି  
ଡାକ୍‌ପୁଟା ରଇବା ସନ୍‌ମାନର୍ ସାସନ୍‌କାରିଆ ପେଲିକ୍‌ସ୍‌କେ  
ଲେକ୍‌ଲିନି, ଜୁଆର୍ !<sup>୨୭</sup> ଆଗିଆ, ଜିଉଦିମନ୍ ଏ ଲକ୍‌କେ ଦାରି  
ତାକେ ମର୍‌ତେ ମାରିଦେବାକେ ଚେସ୍‌ଟା କର୍‌ତେ ରଇଲାଇ ।  
ସେ ଗଟେକ୍ ରମିୟ ଲକ୍ ବଲି ଜାନ୍‌ଲା ପଚେ, ମୁଇ ତାକେ ମର୍  
ସନିଅମନ୍ ସଙ୍ଗେ ତାକେ ରକିଆ କଲି ।<sup>୨୮</sup> ସେମନର୍ ବିରଦେ  
ସେ କାଇ ଦସ୍ କଲା ଆଚେ, ସେଟା ଜାନ୍‌ବାକେ ତାକେ ମୁଇ

ସେମାନର ବଡ଼ସବାଇ ଦାରିଗାଲି । ୨୯ ମାତ୍ର ସେ ମରନର କି ବନ୍ଧି ଡଣ୍ଡ ପାଇବା ପାରା କାଇମିସା ବୁଲ୍ କାମ୍ କରେ ନାଇ ବଲି ମୁଇ ଜାନିପାରଲି । ତାର ବିରଦେ ଅଇଲା ଦାବା ସବୁ, ତାକର୍ ନିଜର୍ ଦରମ୍ ବିସଇ । ୩୦ ଆରି ତାର ବିରଦେ ଗଟେକ୍ କୁଟ୍ ଜନ୍ନା ଅଇଲାନି ବଲି କବର୍ ସୁନି, ବେଗି ବେଗି ତମର୍ ଲଗେ ପାଟାଇ ଦେବାକେ ଟିକ୍ କଲି, ତାର ବିରଦେ ରଇଲା ଦାବା, ତର୍ ମୁଆଟେ ଜାନାଇବାକେ ତାର ଦାବାଦାରିମନ୍‌କେ ମୁଇ କଇଲିଆଟି ।”

୩୧ ସନିଅମନ୍ ସେ ଆଦେସ୍ ଇସାବେ ପାଉଲ୍‌କେ ସେ ରାତି ଆନତିପର୍‌ରିସେ କେଟାଇଦେଲାଇ । ୩୨ ତାର ଆରକର୍ ଦିନେ ଇଣ୍ଡିଜିବା ସନିଅମନ୍ ଗଡେ ବାଉଡିଗାଲାଇ ଆରି ଗଡାଇ ଜାଉ ସନିଅମନ୍‌କେ ଜିବାକେ କଇଲାଇ । ୩୩ ସନିଅମନ୍ ପାଉଲ୍‌କେ ଦାରି ସିସେରିଆଇ କେଟ୍‌ଲାଇ । ତେଇ ସନିଅମନ୍‌ର ମୁକିଅର୍ ଚିଟି ସଙ୍ଗେ ପାଉଲ୍‌କେ ସାସନ୍‌କାରିଆର୍ ଆଡେ ଜିମାଦେଇଦେଲାଇ । ୩୪ ସାସନ୍‌କାରିଆ ଚିଟି ପଡି ପାଉଲ୍‌କେ କନ୍ ରାଇଜେଅନି ଆସିଆରୁସ୍ ? ବଲି ପାଚାରଲା । ପାଉଲ୍ ସିଲିସିଆଇଅନି, ବଲି ଜାନଲା । ୩୫ ସେ କଇଲା, “ତମର୍ ଦାବାଦାରିମନ୍ ଆସି କେଟ୍‌ଲା ପଟେ, ମୁଇ ତର୍ କାତା ସୁନ୍‌ବି ।” ତାର ପଟେ ପାଉଲ୍‌କେ ଏରଦ୍ ରାଜାର ନଅରେ ବନ୍ଧି କରି ସଙ୍ଗଇବାକେ ଆଦେସ୍ ଦେଲା ।

## ୨୪

### ଜିଉଦିମନ୍ ପାଉଲ୍‌କେ ଦସି କଲାଇ

୧ ପାର୍‌ଦିନ୍ ପଟେ ବଡ଼ ପୁଜାରି ଅନନିୟ୍ କେଡେଟା ପାର୍‌ତିନ୍ ଆରି ତର୍‌ତୁଲସ୍ ନାଉର୍ ଗଟେକ୍ ଅକିଲ୍ ସଙ୍ଗ୍ ସିସେରିଆଇ ଗାଲାଇ । ସେମନ୍ ପେଲିକ୍‌ସର୍ ମୁଆଟେ ଚିଆଅଇ ପାଉଲ୍‌ର ବିରଦେ ସେମାନର୍ ଦାବା ଜାନାଇଲାଇ । ୨ ତାରପଟେ ପାଉଲ୍‌କେ ତେଇଆନି ଚିଆ କରାଇଲାଇ ଆରି ତର୍‌ତୁଲସ୍ ଏକ୍ତି ତାକର୍ ଦାବାମନ୍ ସବୁ ଜାନାଇଲା ।

“ ଆଗିଆଁ, ତମେ ଗଟେକ୍ ଡାକ୍‌ପୁଟା ଲକ୍, ତମର୍ ନିମାନ୍ ସାସନ୍‌ଅନି ଆମେ ବେସି ଦିନ୍ ଦାରି ସାର୍‌ଦା ଅଇ ସାନ୍ତି ସଙ୍ଗ୍ ଜିଇଲୁନି, ଆମର୍ ଦେସର ମଙ୍ଗଲ୍ ପାଇ ବେସି ଦରକାର୍ ରଇଲା କାମ୍‌ମନ୍ କରାଇଆଚାସ୍ । ୩ ସବୁଜାଗାଇ ଆରି ସବୁ ବେଲାଇ ଆମେ

ଏତାକେ ନାମ୍ଲୁନି, ଏଟାରପାଇ ଆମେ ତମ୍ବକେ ମାନି ଆଇଲୁନି ।  
 ୪ ସେଟା ଜାଇଟା ଅ, ମୁଇ ତମର୍ ଅଦିକ୍ ବେଲା ନେବାକେ ମନ୍  
 କରନାଇ । ସେଟାର ପାଇ ଆମର୍ ଗଟେକ୍ ଚଟ୍ ଅର୍ସାସଙ୍ଗର୍  
 କାତା ସୁନ୍ବାକେ ବାବୁଜିଆ କଲିନି । ୫ ଏ ଲକ୍ ଗଟେକ୍ ବେସି ବଡ଼  
 ଗଣ୍ଟଗଲ୍ କରାଉ ବଲି ଆମେ ଜାନୁ, ସେ ଦେସ୍‌ବିଦେସେ ସବୁ ବାଟେ  
 ବୁଲିବୁଲି ଜିଉଦିମନ୍‌କେ କିରମାର କରାଇବାକେ ଉସ୍‌କାଇଲାନି,  
 ସେ ନାଜରିଡ଼ ଦଲର୍ ଗଟେକ୍ ନେତା । ୬ ସେ ଆମର୍ ମନ୍ଦିର୍  
 ଅସୁକଲ୍ କରବାକେ ଚେସ୍‌ଟା କଲାବେଲେ ଆମେ ତାକେ ବନ୍ଦି କଲୁ ।  
 ୭ ଆମର୍ ନିୟମ୍ ଇସାବେ ଏ ଲକ୍‌କେ ବିଚାର୍ କରବାକେ ଆମେ ମନ୍  
 କର୍ତ୍ତେରଇଲୁ । ୮ ଆର୍ ବିରଦେ ଜନ୍ ସବୁ ଦାବା କଲୁଆରୁ, ସେଟା  
 ତମେ ଏ ଲକ୍‌କେ ପାଚାରିକରି ଜାନିପାରାସ୍ ।” ୯ ତେଇରଇଲା  
 ଜିଉଦିମନ୍ ଏଟା ସତ୍‌ବଲି ଡାଟ୍ ସଙ୍ଗ୍ ସେ କାତାଇ ରାଜି ଅଇଲାଇ  
 ।

**ପାଉଲ୍ ପେଲିକ୍‌ସର୍ ମୁଆଟେ ମାନିଆଇବାଟା**

୧୦ ତାର୍‌ପଟେ ସାସନ୍‌କାରିଆ ପାଉଲ୍‌କେ କାତା ଅଇବାକେ  
 ସାଗିଆ କଲାକେ ପାଉଲ୍ କଇଲା ।

“ମୁଇ ଜାନି ଜେ ବେସି ବରସ୍ ଦାରି ତମେ ଏ ଜାତିର୍ ବିଚାର୍‌କରୁ  
 ଅଇ ଆରୁସ୍, ସେଟାର ପାଇ ତମର୍ ମୁଆଟେ କଇବାଟା କେଡ଼େ  
 କରମର୍ କାତା । ୧୧ ଆଗିଆ, ତମେ ନିଜେ କଜିକରି ଜାନିପାର୍‌ସା  
 ଜେ, ପାକାପାକି ବାରଦିନ୍ ତଲେ, ମୁଇ ଜିରୁସାଲାମେ ପାର୍‌ତନା  
 କରବାକେ ଜାଇରଇଲି । ୧୨ ମନ୍ଦିରେ କାର୍ ସଙ୍ଗ୍, ମୁଇ ଦଦାପେଲା  
 କରବାଟା ଜିଉଦିମନ୍ ଦେକି ନ ରଇଲାଇ କି ପାର୍‌ତନା ଗର୍ମନ୍‌କେ  
 କି ଗଡର୍ କନ୍ ବିନ୍ ଜାଗାଇ ଲକ୍‌ମନ୍‌କେ ଉସ୍‌କାଇବାଟା ଦେକି  
 ନ ରଇଲାଇ । ୧୩ ସେଟାର ପାଇ ମର୍ ବିରଦେ ଏବେ ଆନିରଇବା  
 ଦାବାର୍ ପାଇ, ସେମନ୍ କାଇମିସା ସାକି ଦେଇ ନାପାରଡ଼ । ୧୪ ଏଲେ  
 ମିସା ମୁଇ ତମର୍ ଲଗେ ରାଜି ଅଇଲିନି ଜେ, ଜନ୍ ବାଟ୍ ସେମନ୍  
 ମିର୍ ବଲି କଇଲାଇନି, ସେ ବାଟେ ଜାଇ, ଆମର୍ ଆନିଦାଦିମନ୍‌ର୍  
 ପରମେସର୍‌କେ ପାର୍‌ତନା କଲିନି । ମାତର୍ ମୁଇ ମିସା ମସାର୍  
 ରିତିନିତି ଆରି ବବିସତ୍‌ବକ୍‌ତାମନ୍‌ର୍ ସାସ୍‌ତରେ ଲେକାଅଇଲା ସବୁ  
 ବିସଇ ବିସ୍‌ବାସ୍ କଲିନି । ୧୫ ଏମନ୍‌ର୍ ପାରା, ମାପ୍‌ରୁର୍ ଲଗେ ମର୍

ଗଟେକ୍ ଆସା ଆଚେ ଜେ, ନିକ ଲକ୍ ଅଅଡ଼ କି କାରାପ ଲକ୍ ଅଅଡ଼, ସବୁ ମଲାଟାନେଅନି ଉଟ୍‌ବାଇ । ୧୭ ସେଟାର୍ ପାଇ ପରମେସରର୍ ଆରି ମୁନୁସର୍ ମୁଆଟେ ନିର୍ମଲ୍ ବିବେକ୍ ଇସାବେ ଚଲାଚଲ୍‌ତି କର୍‌ବାକେ ସବୁବେଲେ ଚେସ୍‌ଟା କଲିନି ।

୧୭ ✧ “ବେସି ବରସ୍ ଦାରି ଦୁରିକେ ରଇଲା ପଚେ, ଜିରୁସାଲେମର୍ ଲକ୍‌ମନର୍ ପାଇ କିଟି ତାରୁ ନେବାକେ ଆରି ବଲିଦେବାକେ ମୁଇ ତେଇ ଜାଇରଇଲି । ୧୮ ମୁଇ ନିର୍ମଲ୍ ଅଇବା ବିଦି ସାରାଇଲା ବେଲେ, ସେମନ୍ ମକେ ମନ୍ଦିରେ ଦେକ୍‌ଲାଇ । ସେଡ଼କିବେଲେ ମର୍ ଲଗେ ବେସି ଲକ୍ ନ ରଇଲାଇ କି କାଇମିସା ଗଣ୍ଟଗଲ୍ ଅଇ ନ ରଇଲା । ୧୯ ମାତର୍ ତେଇ ଆସିଆ ଦେସର୍ କେତେଟା ଜିଉଦି ରଇଲାଇ, ଜଦି ସେମନ୍‌କେ ମର୍ ବିରଦେ କାଇଟା କଇବାର୍ ରଇଲା, ଆଗ୍‌ତୁ ସେମନ୍ ନିଜେ ତମର୍ ମୁଆଟେ ଆସି ଦାବା କର୍‌ବାର୍ ରଇଲା । ୨୦ ଆରି ତରେକ୍ ମୁଇ ଜେତେବେଲା ବଡ଼ ସବାର୍ ମୁଆଟେ ଚିଆଅଇରଇଲି, କନ୍ ଅପରାଦେ ଦସି ଅଇଲି, ସେଟା ଇତି ରଇଲା ଲକ୍‌ମନ୍ କଅଡ଼ । ୨୧ ✧ ଏଲେମିସା ମୁଇ ଗଟେକ୍ କାତା କଇରଇଲି । ସେମନର୍ ମୁଆଟେ ଚିଆ ଅଇରଇଲା ବେଲେ ମଲାଲକ୍‌ମନ୍ ଆରିତରେକ୍ ଉଟ୍‌ବାଇ ବଲି ତାଟ୍ ସଙ୍ଗ୍ ବିସ୍‌ବାସ୍ କର୍‌ତେ ରଇଲାର୍ ପାଇ ଆଜି ତମର୍‌ଟାନେ ବିଚାର୍‌ନା ପାଇଲିନି । ଏଟାକେ ଚାଡ଼ି ଆରି ସେମନର୍ ମୁଆଟେ କିଟି କଇନାଇ ।”

୨୨ ପେଲିକ୍‌ସ୍ ସେ ବାଟ୍ ବିସଇର୍ ଚିକିନିକି ଜାନି ରଇଲାର୍ ପାଇ ସୁନାଇବାଟା ବନ୍ଦ୍ କରି କଇଲା, “ ସନିଅମନର୍ ମୁକିଅ ଲିସିଅସ୍ କେଟ୍‌ଲା ପଚେ, ମୁଇ ତମର୍ ବିଚାର୍‌ନା ସୁନାଇବି ।” ୨୩ ତାର୍‌ପଚେ ସେ ଅଦିକାରେ ରଇବା ମୁକିଆକେ କଇଲା, “ପାଉଲ୍‌କେ ବନ୍ଦି ଇସାବେ ଜାଗିରଇବାର୍ ଆଚେ, ମାତର୍ ତାକେ ଦର୍‌କାର୍ ଅଇବା ଜିନିସ୍ ତାର୍ ଲକ୍‌ମନ୍ ଆନିଦେଲେ, ସେଟା ତେବାଇବାର୍ ନାଇ ।”

**ପେଲିକ୍‌ସ୍ ଆରି ଦୁର୍‌ସିଲାର୍ ମୁଆଟେ ପାଉଲ୍**

୨୪ କେତେଦିନ୍ ପଚେ ପେଲିକ୍‌ସ୍ ତାର୍ ଜିଉଦି ମାଇଜି ଦୁର୍‌ସିଲା ସଙ୍ଗ୍ ତେଇ ଆଇଲା । ସେ ପାଉଲ୍‌କେ ଡାକାଇ ଜିସୁକିରିସ୍‌ଟକେ

✧ ୨୪:୧୭ ୨୪:୧୭ ପେରିଡ଼ ୨୧:୧୭-୨୮ ✧ ୨୪:୨୧ ୨୪:୨୧ ପେରିଡ଼ ୨୩:୭

ବିସ୍ୱାସ କରବା ବିସଇ, ତାର କାତା ନିକକରି ସୁନ୍‌ଲା । ୨୫ ମାତର୍ ଜେଡେବେଲେ ପାଉଲ୍ ଦରମ୍ ତଲାଚଲ୍‌ତି ଆରି ଲକ୍‌ମନ୍ ନିଜର୍ ପାପର୍ ଗୁନ୍‌ଚଲନ୍ ଇସାବେ ନ ଜାଇକରି ନିଜେ ଦାରିଅଇରଇବା ବିସଇ, ଆରି ଆଇବା ଦିନର୍ ବିଚାରନା ବିସଇ କଇବାକେ ଦାରଲା, ପେଲିକସ୍ ଡରିଜାଇକରି “ତମେ ଏବେ ଜାଇପାରାସ୍ ।” ବଲି କଇଲା, “ବେଲା ପାଇଲେ ଆରି ତରେକ୍ ମୁଇ ତମକେ ଡାକାଇବି ।” ୨୬ ସେ ବେଲା ପାଉଲ୍ ତାକେ କେତେକ୍ ତାବୁ ଲାଟ୍ ଡେଇସି ବଲି ସେ ଆସା କରି ରଇଲା, ସେଟାର ପାଇ ସେ ତରକେ ତର ତାକେ ଡାକାଇ ତାର ସଙ୍ଗ୍ କାତାବାର୍ତା ଅଇବାର୍ ଦାରଲା ।

୨୭ ଏନ୍ତି ଦୁଇ ବରସ୍ ଗାଲାପତେ ପରକିୟସ୍ ପେସ୍‌ଟସ୍ ପେଲିକର୍ ଜାଗାଇ ସାସନ୍‌କାରିଆ ଅଇ ଆଇଲା । ପେଲିକ୍‌ସ୍ ଜିଉଦିନେତାମକେ ବଲ୍‌ବଲାଇ ଅଇବାକେ ମନ୍ କରି ପାଉଲ୍‌କେ ନ ମୁକ୍‌ଲାଇ ବନ୍ଦି ଗରେ ଚାଡ଼ି ଉଟିଗାଲା ।

## ୨୫

### ସମ୍‌ରାଟର୍ ଲଗେ ପାଉଲ୍‌ର୍ ଗୁଆରି

୧ ପେସ୍‌ଟସ୍ ସାସନ୍‌କାରିଆ ଅଇକରି ଆଇଲା ଜାଗାଇ, ତିନ୍ ଦିନ୍ ପରେ, ସେ ସିସିରିଆ ଅନି ଜିରୁସାଲମେ ଗାଲା । ୨ ସେ ଜିରୁସାଲମେ ରଇଲାବେଲେ, ତେଇ ମୁକ୍‌ଅ ପୁଜାରି ଆରି ଜିଉଦିନେତାମନ୍ ଆରି ତରେକ୍ ପାଉଲ୍‌ର୍ ବିରଦେ ରଇବା ଦାବି ନେଇ, ସେମନର୍ ଲଗେ ଗାଲାଇ । ସେମନ୍ ପେସ୍‌ଡେସ୍‌କେ ବାବୁଜିଆ କଲାଇ, ୩ ଜେନ୍ତିକି ପାଉଲ୍‌କେ ଜିରୁସାଲାମେ ଆନ୍‌ବାକେ ଗୁଆରି କଲାଇ । କାଇକେବଇଲେ ବାଟେ ଜାଗିରଇ ସେମନ୍ ପାଉଲ୍‌କେ ମାରିମରାଇବାକେ ଜଜ୍‌ନା ତିଆର୍ କରିରଇଲାଇ । ୪ ପେସ୍‌ଟସ୍ କଇଲା, “ପାଉଲ୍‌କେ ଗଟେକ୍ ବନ୍ଦି ଇସାବେ ସିସିରିଆଇ ରକାଅଇଲା ଆଟେ ଆରି ବେଗି ମୁଇ ତେଇ ବାଉଡ଼ି ଜିବି । ୫ ଜଦି ସେ କାଇ ଦସ୍ କଲା ଆଟେ, ତେବେ ତମର୍ ନେତାମନ୍ ମର୍ ସଙ୍ଗ୍ ସିସିରିଆଇ ଆସଡ୍ ଆରି ତାର ବିରଦେ ସେମନର୍ ଦାବା ଜାନାଅଡ୍ ।”

୬ ପେସ୍‌ଟସ୍ ସେମନର୍ ସଙ୍ଗ୍ ଆର୍ ଦସ୍ ଦିନ୍ ଜିରୁସାଲମେ ରଇକରି ସିସିରିଆଇ ବାଅଡ଼ଲା । ତାର ଆରକର୍ ଦିନେ ବିଚାର୍ କରବା

ଗରେ ବସି ପାଉଲ୍‌ଙ୍କେ ଆନ୍‌ବାକେ ଆଦେସ୍ ଦେଲା । <sup>୭</sup> ପାଉଲ୍ ଆଇଲା ଦାପ୍‌ରେ ଜିରୁସାଲମେଅନି ଆସିରଇବା ଜିଉଦିମନ୍ ତାକର୍ ଚାରିବେଟ୍‌ତି ବେଡି ଚିଆ ଅଇଲାଇ ଆରି ତାର ବିରଦେ କେତେକ୍ କେତେକ୍ ବଡ଼ ବଡ଼ ଦାବା କଲାଇ, ମାତର୍ ସେମନ୍ ଏ ସବୁ ସଡ଼ ବଲି ଦେକାଇ ନାପାରୁଲାଇ । <sup>୮</sup> ମାତର୍ ପାଉଲ୍ ନିଜେ ନିଜର୍ ବାଟେ ଅନି କଇଲା, “ଜିଉଦିମନ୍‌ର ରିତିନିତି, ମନ୍ଦିରର୍ କି ରମିଅ ସାସନ୍‌କାରିଆ, କାର୍ ମିସା ବିରଦେ ମୁଇ ଦସ୍ କରିନାଇ ।”

<sup>୯</sup> ମାତର୍ ପେସ୍‌ଟସ୍ ଜିଉଦିମନ୍‌ଙ୍କେ ବଲ୍ ବଲାଇ ଅଇବାକେ ମନ୍ କରି ପାଉଲ୍‌ଙ୍କେ ପାଚାରୁଲା, “ଜିରୁସାଲମେ ଜିବାକେ ଆରି ତେଇ ମର୍ ମୁଆଟେ, ଏ ସବୁ ଦାବାର୍ ବିଚାର୍ କର୍ବାକେ ତୁଇ କାଇ ରାଜି ଅଇସୁ କି ?”

<sup>୧୦</sup> ପାଉଲ୍ କଇଲା, “ମୁଇ ବଡ଼ ସାସନ୍‌କାରିଆର୍ ନିଜର୍ ବିଚାର୍‌ନା ଜାଗାଇ ଚିଆ ଅଇଲିଆତି, ଇତିସେ ମର୍ ବିଚାର୍ ଅଇବାର୍ ଦରକାର୍ । ତମେ ନିକକରି ଜାନାସ୍ ଜେ, ମୁଇ ଜିଉଦିମନ୍‌ର ବିରଦେ କାଇମିସା ଦସ୍ କରିନାଇ । <sup>୧୧</sup> ଜଦି ମୁଇ ରିତିନିତି ନ ମାନି ମରନ୍ ଡଣ୍ ପାଇବାପାରା କାଇ ଦସ୍ କଲିଆତି ବଇଲେ, ମର୍ବାକେ ନ ଡରି । ମାତର୍ ସେମନ୍ ମର୍ ବିରଦେ ଆନିରଇବା ଦାବା ବିଡ଼ରେ କାଇମିସା ସଡ଼ ନ ରଏ, ତେବେ କେ ମିସା ମକେ ସେମନ୍‌କେ ସର୍ପିଦେଇ ନାପାରଡ଼ । ବଡ଼ ସାସନ୍‌କାରିଆ ଆକା ମକେ ବିଚାର୍‌ନା କର ବଲି ଗୁଆରି କଲିନି ।”

<sup>୧୨</sup> ତାର୍‌ପଟେ ପେସ୍‌ଟସ୍ ତାର୍ ସବାଇ ରଇଲା ଲକ୍‌ମନ୍‌ର ସଙ୍ଗ୍ କାତାବାର୍‌ତା ଅଇ କଇଲା, “ତମେ ବଡ଼ ସାସନ୍‌କାରିଆ ବିଚାର୍ କର ବଲି ଗୁଆରି କରିଆଚାସ୍, ସେଟାର୍ ପାଇ ତମ୍‌କେ ବଡ଼ ସାସନ୍‌କାରିଆର୍ ଲଗେ ପାଟାଇବି ।”

### ଆଗ୍ରିପା ଆରି ବର୍ନିକିର୍ ମୁଆଟେ ପାଉଲ୍

<sup>୧୩</sup> କେତେଦିନ୍ ପଟେ ରାଜା ଆଗ୍ରିପା ଆରି ବର୍ନିସ୍ ପେସ୍‌ଟସ୍‌କେ ଜୁଆର୍ ଜାନାଇବାକେ କାଇସରିଆଇ ମିସ୍‌ବାର୍ ଆଇଲାଇ । <sup>୧୪</sup> ତେଇ ସେମନ୍ କେତେ ଦିନ୍ ରଇଲା ପଟେ ପେସ୍‌ଟସ୍ ପାଉଲ୍‌ର୍ ବିସଇ ରାଜାକେ ଜାନାଇଲା, “ପେଲିକସ୍ ବନ୍ଦିକରି ଜାଇରଇବା ଗଟେକ୍ ଲକ୍ ଇତି ଆଟେ ।” <sup>୧୫</sup> ମୁଇ ଜେଡେବେଲା

ଜିରୁସାଲମ୍ ଜାଇରଇଲି, ଜିଉଦିମନର୍ ମୁକିଅ ପୁଜାରିମନ୍ ଆରି ସେ ଦରମର୍ ପାର୍ତିନିମନ୍ ତାର ବିରଦେ କେତେଟା ଦାବା କଲାଇ ଆରି ତାକେ ଦସି କର୍ବାକେ ମକେ କଇଲାଇ । <sup>୧୭</sup> ମାତର୍ ମୁଇ ସେମନ୍‌କେ କଇଲି ଜେ, ଗଟେକ୍ ଦସିକେ ବିଚାର କର୍ବା ଗରେ, ତାକେ ଦାବା କରୁମନର୍ ମୁଆଟେ ନିଜର୍ ବାଟେଅନି କଇବାକେ ବେଲା ଦେବା ଆଗତୁ, ତାକେ ଦସି କର୍ବାଟା ଆମର୍ ରମିୟମନର୍ ନିୟମେ ନାଇ । <sup>୧୮</sup> ସେମନ୍ ଇତି ଆଇଲା ପତେ ମୁଇ ଅଲ୍‌ସମ୍ ନ କରି, ତାର ପର୍ଦିନେ ବିଚାର କର୍ବା ଗରେ ବସଲି ଆରି ସେ ଲକ୍‌କେ ବିତ୍‌ରେ ଆନବାକେ ଆଦେସ୍ ଦେଲି । <sup>୧୯</sup> ମର୍ ବାବ୍‌ବାଟା ବୁଲ୍ ରଇଲା, ସେମନ୍ ତାର ବିରୁଦେ ଆନିରଇବା ଦାବି, ସେ କରିରଇବା କରାପ୍ ବିସଇ ଅଇରଇସି ବଲି ବାବ୍‌ଲି, ମାତର୍ ସେନ୍ତାର୍ ନ ରଇଲା । <sup>୨୦</sup> ସେମନ୍‌ର୍ ଦାବି ତାକର୍ ନିଜର୍ ଦରମ୍ ବିସଇ ରଇଲା, ଆରି ଜିସୁ ବଲି ଗଟେକ୍ ମରିଜାଇରଇବା ଲକ୍‌ର୍ ବିସଇ ରଇଲା । ମାତର୍ ସେଲକ୍ ବର୍‌ଲି ଆଟେ ବଲି ପାଉଲ୍ କଇଲା । <sup>୨୧</sup> ଏ ସବୁ ବିସଇର୍ ସତ୍ କେନ୍ତ୍ର ବାରକରାଇବି ବଲି ମୁଇମିସା ନାଜାନିରଇଲି, ତେବେ ଏ ସବୁ ବିଚାରନା କର୍ବାକେ ପାଉଲ୍‌କେ ଜିରୁସାଲମେ ଜାଇସୁ କି ନାଇ ବଲି ପାଚାର୍‌ଲି । <sup>୨୨</sup> ମାତର୍ ପାଉଲ୍, ନିଜେ ରମ୍ ରାଇଜର୍ କାଇସର୍ ରାଜା, ତାର ବିଚାର କର ବଲି କଇ ସନିଅମନ୍ ରକିଆ କରତ୍ ବଲି ମନ୍ କଲା । ସେଟାର୍‌ପାଇ ବଡ଼ ସାସନକାରିଆ ଲଗେ ପାଟାଇବା ଜାକ ବନ୍ଦି କରି ରକ୍‌ବାକେ ଆଦେସ୍ ଦେଲିଆଟି ।

<sup>୨୩</sup> ଆଗ୍‌ରିପା ପେସ୍‌ଟସ୍‌କେ କଇଲା, “ମୁଇ ନିଜେ ଏ ଲକ୍‌ର୍ କାତା ସୁନ୍‌ବାକେ ମନ୍ କଲିନି ।” ପେସ୍‌ଟସ୍ କଇଲା,

“କାଲିକେ ତମେ ତାର କାତା ସୁନ୍‌ସା ।”

<sup>୨୪</sup> ତାର ଆରକ୍‌ର୍ ଦିନେ ଆଗ୍‌ରିପା ଆରି ବରୁନିସ୍ ଆସି କେଟ୍‌ଲାଇ । ସେମନ୍ ରାଜାମନ୍ ପିୟଲାପାରାଟା ପିନ୍‌ର ଇଲା । ସନିଅମନ୍‌ ନେତାମନ୍ ଆରି ସେ ଗଡ୍‌ର୍ ବଡ଼ ବଡ଼ ଲକ୍‌ମନର୍ ସଙ୍ଗ୍ ବେସି ତାକ୍‌ପୁଟା ସଙ୍ଗ୍ ଆସି, ବିଚାରନା ଜାଗାଇ ପୁରଲାଇ । ପେସ୍‌ଟସ୍ ଆଦେସ୍ କଲାକେ, ପାଉଲ୍‌କେ ବିତ୍‌ରେ ଆନଲାଇ । <sup>୨୫</sup> ପେସ୍‌ଟସ୍ କଇଲା, “ରାଜା ଆଗ୍‌ରିପା ଆରି ରୁଣ୍ଡି ରଇଲା ସବୁ ଲକ୍‌, ତମେ

ଏ ଜନ୍ମ ଲକ୍ଷ୍ମକେ ଦେଖିଲାସୁଦ୍ଧା, ତାର ବିରଦେ ଇଡ଼ିର ଜିଉଦିମନ୍ ଆରି ଜିରୁସାଲମର ଜିଉଦିମନ୍ ମର ଲଗେ ଦାବା କଲାଅ ଆଚଡ଼ । ସେମନ୍ ତାକେ ମରାଉଁ ବଲିକରି କଇ ଆଉଲି ଅଇଲାଇନି ।  
 ୨୫ ମାତର ମୁଇ କଜି ବାରକରାଇଲି ଜେ, ଏ ଲକ୍ଷ୍ମ ମରନ୍ ଡ଼ଣ୍ଡ ପାଇବା ଏଡ଼କି, କାଇ ଦସ୍ କରେନାଇ । ସେ ନିଜେ ବଡ଼ସାସନ୍କାରିଆକେ ଗୁଆରି କଲାର୍ ପାଇ, ମୁଇ ତାକେ ତେଇ ପାଟାଇବାକେ ଟିକ୍ କଲି ଆଟି ।  
 ୨୬ ମାତର ତାର ଦାବି ବିସଇ ଟିକ୍ ସଙ୍ଗ୍ ବଡ଼ସାସନ୍କାରିଆକେ ଲେକ୍ବାକେ ମର ଲଗେ କାଇଟା ନାଇ । ସେଟାର୍ପାଇ ମୁଇ ସବୁର୍ ମୁଆଟେ ଆରି ଏ ଆଗ୍ରିପା ରାଜା, ତମର୍ ମୁଆଟେ ଆନ୍ଲି ଆଟି, ଜେକ୍ତି କି ତାର ବିସଇ ତମେ ନିକ ସଙ୍ଗ୍ କଜ୍ଜଲା ପଚେ ବଡ଼ସାସନ୍କାରିଆକେ ଲେକିପାର୍ବି ।  
 ୨୭ କାଇକେବଇଲେ ଗଟେକ୍ ବନ୍ଦିର୍ ବିରଦର୍ ଦାବା ନିକସଙ୍ଗ୍ ନ ଦେକାଇ, ବଡ଼ସାସନ୍କାରିଆର୍ ଲଗେ ପାଟାଇବାଟା ଟିକ୍ ନଏଁ ବଲି ମୁଇ ବାବ୍ଲିନି ।”

## ୨୬

ଆଗ୍ରିପାର୍ ମୁଆଟେ ପାଉଲ୍ ନିଜର୍ ବିସଇ ସାକି ଦେବାଟା

୧ ଆଗ୍ରିପା ପାଉଲ୍କେ କଇଲା, “ତକେ ତର୍ ନିଜର୍ ବିସଇ ଜାଇଟା କଇବାର୍ ଆଚେ, ସେଟା କଇବାକେ ଅଦିକାର୍ ଦିଆଅଇଲା ।” ପାଉଲ୍ ଆଡ଼ ଉଟାଇକରି ନିଜର୍ବାଟେଅନି କଇଲା,

୨ “ରାଜା ଆଗ୍ରିପା ! ଜିଉଦିମନ୍ ମକେ ଜନ୍ ସବୁ ବିସଇ ନେଇ ଦସି କରିଆଚଡ଼, ସେଟାର୍ ବିରଦେ ତମର୍ ମୁଆଟେ, ନିଜର୍ ବାଟେଅନି କଇବାକେ ବେଲା ପାଇଲାର୍ ପାଇ ମୁଇ କେତେ କରମର୍ ଲକ୍ଷ୍ମ ବଲି ବାବ୍ଲିନି ।”  
 ୩ କାଇକେବଇଲେ ଜିଉଦିମନ୍ ରିଡିନିଡି ବିସଇ ଆରି ସେମନ୍ ଲାଗାଜଡ଼ା ବିସଇ ତମେ ନିକସଙ୍ଗ୍ ଜାନାସ୍ । ମୁଇ ଗୁଆରି କଲିନି, ତମେ ବିଜାର୍ ନ ଅଇକରି ମର୍ ସବୁକାତା ସୁନା ।

୪ “ପିଲାବେଲେଅନି କେକ୍ତି ମୁଇ ଜିଇଲି ଆଟି, ସେଟା ଜିଉଦିମନ୍ ଜାନଡ଼ । ପର୍ଡୁମ୍ ମର୍ ନିଜର୍ ଦେସେ ଆରି ପଚେ ଜିରୁସାଲମେ ମୁଇ କେକ୍ତି ଜିବନ୍ କାଟ୍ଲି ଆଟି, ସେଟା ମିସା ସେମନ୍ ଜାନଡ଼ ।  
 ୫ \*ଆଗେଅନି ମୁଇ ଜିଉଦି ନିୟମ୍ ସବୁ ମାନିକରି ପାରୁସିମନ୍



ପାରା ଚଲାଚଲ୍ଲତି କଲିଆଟି, ସେ ବିସଇ ସେମନ୍ ସାକି ଦେଇପାରଡ଼ ।”<sup>୬</sup> ପର୍ଯ୍ୟେସର୍ ଆମର୍ ଆନିଦାଦିମନ୍‌କେ ଜନ୍ କାତା ଦେଇ ରଇଲା, ତେଇ ମର୍ ଆସା ରଇଲାରପାଇ ଆଜି ମୁଇ ଇତି ବିଚାରନା କରାଇଅଇବାକେ ଚିଆ ଅଇଲିଆଟି ।<sup>୭</sup> ମାତର୍ ଏ ରାଜା, ଏ ଆସା ଆମର୍ ବାରଟା ଜିଉଦି ଜାତିର୍ ଲକ୍ ଦିନ୍ ରାତି ମାପୁରୁକେ ପାର୍ତନା କରି, ପାଇବାକେ ଆସାକଲାଇନି । ଆରି ଏ ଆସାର୍ ଲାଗି ଆମର୍ ଜିଉଦିମନ୍ ମକେ ଦସି କରିଆତଡ଼ ।<sup>୮</sup> ପର୍ଯ୍ୟେସର୍ ମଲା ଲକ୍‌କେ ଉଟାଇସି, ବଲି କାଇକେ ବିସବାସ୍ କରିନାପାରୁଲାସିନି ?

୯ ✧ “ମୁଇ ମିସା ସେମନ୍‌ର୍ ପାରା ରଇଲି । ନାଜରିତିୟ୍ ଜିସୁର୍ ବାଟେ ଜିବା ସବୁ ଲକ୍‌ମନ୍‌ର୍ ବିରୁଦେ ମର୍ ଜେଡକି ବପୁ ସଙ୍ ମିସା କାମ୍ କର୍‌ବାର୍ ଆଟେ ବଲି ଚିନ୍ତା କଲି ।<sup>୧୦</sup> ମୁଇ ଜିରୁସାଲାମେ ସେକ୍ତି କଲି । ମୁକିଅ ପୁଜାରିମନ୍‌ର୍‌ତେଇଅନି ଅଦିକାର୍ ଚିଟି ପାଇ, ପର୍ଯ୍ୟେସର୍‌ର୍ ବେସି ଲକ୍‌ମନ୍‌କେ ବାନ୍ଦି କରି, ବନ୍ଦି ଗରେ ପୁରାଇଦେଲି । ଆରି ସେମନ୍‌କେ ମରନ୍‌ର୍ ଡଣ୍ଟୁ ଦେବାକେ ବିଚାରନା କଲାବେଲେ, ସେମନ୍‌ର୍ ବିରୁଦେ ଚିଆଅଇଲି ।<sup>୧୧</sup> କେତେ କେତେ ତର୍ ପାର୍ତନା ଗର୍‌ମନ୍‌କେ ସେମନ୍ ବିସବାସ୍ ଚାଡ଼ତ ବଲି ମାର୍‌ବାକେ ତିଆର୍‌ଲି, ସେମନ୍‌ର୍ ଉପରେ ଏତେ ରିସା ଅଇଜାଇରଇଲି ଜେ, ସେମନ୍‌କେ କସ୍‌ଟ ଦେବାକେ ବିଦେସେ, ରଇବା ଗଡ଼ମନ୍‌କେ ମିସା ଜାଇରଇଲି ।”

ନିଜେ ବାଦ୍‌ଲାଇଲା ବିସଇ ପାଉଲ୍ କଇବାଟା

୧୨ “ଏଟା କର୍‌ବାକେ ମୁଇ ମୁକିଅ ପୁଜାରିମନ୍‌ର୍‌ତେଇଅନି ଅଦିକାର୍ ଚିଟି ଆରି ଆଦେସ୍ ନେଇ ଦାମାସ୍କସେ ଜାଇରଇଲି ।<sup>୧୩</sup> ଏ ରାଜା ଏଗ୍ରିପା, ଅଟାଡ଼ ଦିନେକ୍ ମୁଣ୍ଟୁବେଲା ଲଗେ, ଜିବାବାଟେ ବେଲ୍ ତାରାସେଅନି ଅଦିକ୍ ଉଜଲ୍ ଦେକ୍‌ଲି । ସର୍‌ଗେଅନି ସେ ଉଜଲ୍ ଆସି ମକେ ଆରି ମର୍ ସଙ୍ ଜିବା ଲକ୍‌ର୍ ଚାରିବେଟ୍‌ତି ବିଟି ଅଇଲା ।”<sup>୧୪</sup> ଆମେ ସବୁ ଲକ୍ ତଲେ ଅଦ୍‌ରି ତୁଲିଦେଲୁ ଆରି ଇବ୍‌ରୁ ବାସାଇ ମକେ କଇତେରଇବା ଏ କାତା ସୁନ୍‌ଲି, “ସାଉଲ୍, ସାଉଲ୍ !” ତୁଇ ମକେ କାଇକେ କସ୍‌ଟ ଦେଲୁସିନି ? କସ୍‌ଲାବେଲେ କସ୍‌ବାଲକ୍ ବଲଦ୍‌କେ ତୁତାରିବୁସଲେ ବଲଦ୍ ଲାଡ଼ମାର୍‌ବା ପାରା, ତୁଇ ନିଜେ

କସ୍ତ ପାଇଲୁସନି । ୧୫ “ମୁଇ ପାଚାରୁଲି, ‘ମାପରୁ ତମେ କେ ?’ ସେ କଇଲା, ‘ମୁଇ ଜିସୁ, ମକେସେ ତୁଇ କସ୍ତ ଦେଲୁସନି ।’ ୧୬ ମାତର୍ ଉଚିକରି ଚିଆ ଅ । ତକେ ମର୍ ସେବାକାରିଆ କର୍ବାକେ, ଦର୍ସନ୍ ଦେଲିଆଚି । ଆଜି ତୁଇ ମର୍ ବିସଇ ଜାଇଟା ଦେକ୍ଲୁସ୍ ଆରି ପର୍କେ ମିସା ମୁଇ ଜାଇଟା ଦେକାଇବି, ସେ ବିସଇ ତୁଇ ବିନ୍ ଲକ୍ମନକେ ସାକିଦେସ୍ । ୧୭ ଜନ୍ ଜିଉଦି ଆରି ଜିଉଦିନଇଲା ଲକ୍ମନର୍ତେତେ ତକେ ପାଟାଇବି, ସେମନର୍ତେତେ ଅନି ତାଡ଼ନା ପାଇଲେ, ମୁଇ ତକେ ରକିଆ କରବି । ୧୮ ତୁଇ ସେମନର୍ ଆକି ପିଟାଇଦେସ୍ ବଲି ମୁଇ ତକେ କଇଲିନି । ଜେନ୍ତିକି ସେମନ୍ ଆନ୍ଦାରେଅନି ଉଜଲେ ଆରି ସଇତାନର୍ ବାନ୍ଦନେଅନି ମାପରୁର୍ ବାଟେ ବାଅଡ଼ବାଇ । ଜେନ୍ତିକି ମକେ ବିସବାସ୍ କଲାରୁ ପାଇ, ସେମନର୍ ପାପ୍ କେମା ଅଇସି । ଆରି ମାପରୁ ବାଚ୍ଲା ଲକ୍ମନର୍ ସଙ୍ଘ୍ ସେମନକେ ମିସା ଡାକିନେବାଇ ।”

**ନିଜର୍ କାମ୍ ବିସଇ ପାଉଲ୍ ସାକି ଦେବାଟା**

୧୯ “ସେଟାରୁପାଇ ଏ ରାଜା ଆଗ୍ରିପା ମୁଇ ସର୍ଗେଅନି ଜନ୍ ଦର୍ସନ୍ ପାଇଲିଆଚି, ସେଟା ପୁରାପୁରୁନ୍ ମାନୁଲି । ୨୦ ☆ସେନ୍ତାରି ମୁଇ ପର୍ତମେ ଦାମାସ୍କସେ ଆରାମକରି ତାରପଟେ ଜିରୁସାଲାମେ, ପଟେ ଜିଉଦାର୍ ସବୁବାଟେ ଆରି ଜିଉଦିନଇଲା ଲକ୍ମନର୍ ବିତରେ ମାପରୁର୍ ବିସଇ ଜାନାଇଲି । ଜେନ୍ତି କି ସେମନ୍ କରିରଇବା ପାପ୍ ଏତାଇ, ଦୁକକରି ମାପରୁର୍ବାଟେ ବାଅଡ଼ବାଇ । ଆରି ସେମନ୍ ଜନ୍ଟା ମାନିଆଇଲାଇ ଆଚଡ଼, ସେଟା ତାକର୍ ଚଲାଚଲୁଡିଅନି ଜାନିଅଇସି । ୨୧ ଏଟାରୁପାଇ ମୁଇ ମନ୍ଦିରେ ରଇଲାବେଲେ ଜିଉଦିମନ୍ ମକେ ଦାରି ମରାଇବାକେ ଚେସ୍ଟା କଲାଇ । ୨୨ ମାତର୍ ପର୍ମେସର୍ ମକେ ଆଜିକେଜାକ ରକିଆ କଲାଆଟେ ଆରି ସେଟାରୁପାଇ ଆଜି ସାନ୍ ବଡ଼ ସବୁ ଲକର୍ ଲଗେ ସମାନ୍ ଇସାବେ ମର୍ ସାକିଦେବାକେ ଚିଆକରାଇଆଟେ । ବବିସଡ଼ବକ୍ତା ଆରି ମସା ଜାଇଟା ଗଟ୍ସି ବଲି କଇରଇଲାଇ, ଚିକ୍ ସେ କାତା ମୁଇ କଇଲିନି । ୨୩ ☆ମସିଅ ଦୁକ୍ ପାଇସି ଆରି ମଲାଲକ୍ମନର୍ ବିତରେଅନି ସିଗ୍

☆ ୨୭:୨୦ ୨୭:୨୦ ପେରିଡ଼ ୯:୨୦,୨୮:୨୯ ☆ ୨୭:୨୩ ୨୭:୨୩ ୧ମ କରନ୍ତିୟ ୧୫:୨୦

ପରତୁମେ ଉଚି, ଜିଉଦି ଆରି ଜିଉଦି ନଇଲା ଲକ୍ମନର ଲଗେ ମୁକ୍ତିର ଉଜଲ୍ ଦେକାଇସି ।”

୨୪ ପାଉଲ୍ ନିଜର ବାଟେଅଇ କଇଲା ବେଲେ, ପେସ୍ଟସ୍ ତାକେ ଆଉଲିଅଇ କରି କଇଲା, “ପାଉଲ୍, ତୁଇ ବାୟା ଅଇଗାଲୁସ୍ ! ତୁଇ ପାଟ୍ ପଡ଼ି ବେସି ପାଇରଇବା ଗିଆନ୍ ତକେ ବାୟା କଲାଆଟେ ।”

୨୫ ପାଉଲ୍ କଇଲା, “ଏ ମାପ୍ତୁ ପେସ୍ଟସ୍, ମୁଇ ବାୟା ଅଇନାଇ, ମୁଇ ଜାଇଟା କଇଲିନି ସେଟା ପୁରାପୁରୁନ୍ ସତ୍ । ଆରି ତବିର୍ ବୁଦିର୍ କାତା କଇଲିଆଟି । ୨୬ ଏ ରାଜା ଅଗ୍ରିପା ! ତମେ ଏ ବିସଇ ଜାନିରଇଲାଟ୍ ପାଇ, ତମର୍ ମୁଆଟେ ଏ କାତା କଇବାକେ ସାଆସ୍ କଲିନି ! ମୁଇ ଜାନାଇରଇବା ସବୁ ବିସଇର୍ କାଇ କାତା ମିସା, ସେ ନାଜାନେ, ବଲି ମୁଇ ବିସ୍ବାସ୍ କରିନାଇ ! କାଇକେବଇଲେ ଏଟା ଲୁଚ୍ତେ କରାଅଏ ନାଇ । ୨୭ ରାଜା ଆଗ୍ରିପା, ତମେ ବବିସତ୍ ବକ୍ତାମନ୍ତକେ ବିସ୍ବାସ୍ କଲାସ୍ନି ତ ? ମୁଇ ଜାନି ତମେ ବିସ୍ବାସ୍ କଲାସ୍ନି !”

୨୮ ଆଗ୍ରିପା ପାଉଲ୍‌କେ କଇଲା, “ଏ ଅଲପ୍ ବେଲା ବିତ୍ରେ ତୁଇ କାଇ ମକେ ବିସ୍ବାସି କରିଦେବି ବଲି ବାବ୍ଲୁସ୍ନି କି ?”

୨୯ ପାଉଲ୍ କଇଲା, “ଚନେକ୍ ଅ କି ପରେକ୍ ଅ, ପର୍ମେସରର୍ ଲଗେ ମର୍ ଏଡ଼କି ମାଙ୍ଗ୍ଲିନି । ଅବ୍‌କା ତମେସେ ନାଇ ରାଜା, ଆଜି ମର୍ କାତା ସୁନିରଇବା ସବୁ ଲକ୍ ମର୍ପାରା କିରିସ୍ଟର୍ ସିସ୍ ଉଆ । ମାତର୍ ମର୍ପାରା ଏକ୍ତି ସିକ୍ଲିସଙ୍ ବାନ୍ଦାଇ ଉଆ ବଲି ମୁଇ କଇନାଇ ।”

୩୦ ତାର୍ ପଟେ ରାଜା, ସାସନ୍‌କାରିଆ, ଆରି ବରନ୍‌ସ୍ ଆରି ବିନ୍ ଲକ୍ମନ୍ ଜିବାକେ ଉଚ୍‌ଲାଇ । ୩୧ ସେମନ୍ ବାରଇଲା ବେଲେ ତାକର୍ ତାକର୍ ବିତ୍ରେ କଇଲାଇ, “ଏ ଲକ୍ ଏକ୍ତି କାଇମିସା କାମ୍ କରେ ନାଇ, ଜନ୍‌ଟା କି ସେ ମରନ୍‌ର୍ ତଣ୍ଟ୍ ପାଇବାକେ କି ବନ୍ଦି ଅଇବାକେ ।” ୩୨ ଆଗ୍ରିପା ପେସ୍ଟସ୍‌କେ କଇଲା, “ଜଦି ଏ ଲକ୍ ବଡ଼ସାସନ୍‌କାରିଆଟାନେ ବିଚାର୍ ପାଇବି ବଲି ଗୁଆରି କରି ନ ରଇଲେ, ତେବେ ଆମେ ତାକେ ଚାଡ଼ି ଦେଇତୁ ।”

## ୨୭

ପାଉଲ୍ ରମ୍ ଦେସେ ଗାଡ଼ ଗାଡ଼ ଜିବାଟା

<sup>୧</sup> ଆମେ ଜେଡେବେଲେ ପାନି ଜାଜେ ବସି ଇଟାଲି ଜିବାକେ ଟିକ୍ କଲାଇ, ସେଡକିବେଲେ କେଡେଟା ବନ୍ଦି ଅଇଲା ଲକ୍‌କେ ଆରି ପାଉଲ୍‌କେ ରମିୟ ସନିଅମନର୍ ସେନାପତି ଜୁଲିୟସ୍‌କେ ସର୍ପି ଅଇଲାଇ । <sup>୨</sup> ଆମେ ସବୁଲକ୍ ରମ୍ ରାଇଜର୍ ଆସିଆ ଜାଗାର୍ ଗାଡ଼କଣ୍ଡି ରଇଲା ବିନ୍ ବିନ୍ ଜାଗାଇ ଜୁ ବଲି ଆଦରାମୁଦିୟମର୍ ଗଟେକ୍ ପାନିଜାଜେ ବସି ଗାଲୁ । ଆରି ମାକିଦନିଆ ବଲି ଗଟେକ୍ ଜାଗାର୍ ଆରିସ୍‌ତାକସ୍ ନାଉର୍ ତେସ୍‌ଲନିକି ଲକ୍ ଆମର୍ ସଙ୍ଗ୍ ରଇଲା । <sup>୩</sup> ଆରକର୍ ଦିନେ ଆମେ ସିଦନେ କେଟ୍‌ଲୁ । ଜୁଲିୟସ୍ ପାଉଲ୍‌କେ ବେସି ଦୟା ଦେକାଇତେରଇଲା । ପାଉଲ୍‌ର୍ ସଙ୍ଗାରିମନର୍ ଟାନେଅନି ତାର୍ ଦରକାର୍ ଅଇବା ଜିନିସ୍‌ମନ୍ ଟୁଲିଆଇବାକେ ତାକର୍‌ସଙ୍ଗ୍ ଜାଇ ମିସଡ୍ ବଲି ପାଉଲ୍‌କେ ଆଦେସ୍ ଦେଲା । <sup>୪</sup> ଆମେ ତେଇଅନି କେଡେଦୁର୍ ଗାଲାପଟେ ପବନ୍ ଅଇଲାଜେ ସାଇପରସ୍ ଗାଡର୍ ପାଲି ପାଲି ଗାଲୁ । <sup>୫</sup> ସିଲିସିଆ ଆରି ପପୁଲିଆ ନାଉର୍ ଦୁଇଟା ଜାଗା ଜିତିକରି ଲୁକିଆ ବଲି ମୁରା ନଅର୍ ଜାଗାଇ ଆଇଲୁ । <sup>୬</sup> ତେଇ ସେନାପତି ଆଲେକ୍‌ଜାଣ୍ଡରିଆର୍ ଗଟେକ୍ ପାନି ଜାଜ୍ ଇଟାଲି ଜାଇତେରଇଲାଜେ ଆମ୍‌କେ ଦେକି, ସେ ଜାଜେ ବସାଇଲା ।

<sup>୭</sup> ପଟେ ଆମ୍‌କେ ବେସିଦିନ୍ ଲାଗିଗାଲା ଦିରେ ଦିରେ ଜାଇ କରି କେଡେକ୍ କସ୍‌ଟେ କିଦ୍ ନାଉର୍ ଗଟେକ୍ ଜାଗାଇ କେଟ୍‌ଲୁ । ତେଇ କେଟ୍‌ଲା ପଟେ ବେସି ପବନ୍ ଆଇଲାଜେ ଆମେ ଆରି ଆଗ୍‌କେ ଜାଇ ନାପାର୍‌ଲୁ । ତେବେ ସାଲନି ବଲି ଗଟେକ୍ ଜାଗାର୍ ମୁଆଟ୍ ବାଟେ ଜାଇ କିରିତର୍ ପାଲି ପାଲି ଗାଲୁ । <sup>୮</sup> ଆରି ପାଲି ପାଲି ଆସି ବଡେ କସ୍‌ଟେ ସୁନ୍ଦର୍ ବନ୍ଦ୍ ବଲି ଗଟେକ୍ ପାନିଜାଜ୍‌ମନ୍ ଲାଗ୍‌ବାଟାନେ ଆସି କେଟ୍‌ଲୁ । ସେଟା ଲାସିଆ ସଅର୍ ଲଗେ ରଇଲା ।

<sup>୯</sup> ସେ ଜାଗାଇ ଆମେ ବେସିଦିନ୍ ରଇଲୁ । ଜିଉଦିମନର୍ ଉପାସ୍ ମାନିଅଇବା ପରବ୍ ସାରି ଜାଇରଇଲା । ତେବେ ଗାଡ଼ ଗାଡ଼ ଜିବାଟା ବିପଦ୍ ରଇଲା । ସେଟାର୍‌ପାଇ ପାଉଲ୍‌ ସେମନ୍‌କେ ଜାଗ୍‌ରଡ୍ କରାଇ କଇଲା, <sup>୧୦</sup> “ମଇଡର୍‌ମନ୍ ଆମେ ଏ ଗାଡ଼ ଗାଡ଼ ଗାଲେ ସରି ଜାଆଜ୍ ଆରି ଜିନିସ୍‌ପତର୍ ଆକା କେଡି ନ ଅଏ, କେଡେବେଲେ ଜାଜେ ଜିବା ଲକ୍‌ମନର୍ ମିସା ଦସା କେଟ୍‌ସି ।” <sup>୧୧</sup> ମାତର୍ ସେନାପତି ପାଉଲ୍‌ର୍ କାତା ବିସ୍‌ବାସ୍ ନ କରି, ଜାଜ୍ ଚାଲାଉ, ଜାଜ୍ ସାଉକାରର୍ କାତା

ବିସ୍ବାସ କଲା । <sup>୧୨</sup> ସେ ଗାଡ଼େ ସିଡ଼ଫାସେ ରଇବାଟା ବେସି କସ୍ଟ ରଇଲା । ତେବେ କେନ୍ଦ୍ରି କରି ମିସା କସ୍ଟେ ମସ୍ଟେ ପେନିକସ୍ ବଲି ଗଟେକ୍ ଜାଗାଇ କେଟି, ଦରକାର୍ ପଡ଼ଲେ ତେଇ ରଇବାକେ ଜାଜେ ଜିବା କେତେଲକ୍ମନ୍ କରତେରଇଲା । ପିନିକସ୍ ଅଇଲାନି କିରିତେ ଦକିଣ୍, ପଟିମ୍ ଆରି ଉତର୍ ପୁରୁବ୍ ଦିଗେ ରଇବା ଗଟେକ୍ ଜାଗାର୍ ନାଉଁ ।

### ସମ୍ବୁରେ ପାନିପବନ୍ ଆଇବାଟା

<sup>୧୩</sup> ଜେତେବେଲେ ଦକିନ୍ ଦିଗ୍ବାଟେଅନି ଅଲପ୍ ଅଲପ୍ ପବନ୍ ଆଇଲା, ସେତେବେଲେ ଜାଜେ ବସିରଇବା ଲକ୍ମନ୍ ଏଟା ଗଟେକ୍ ସୁବକବର୍ ବଲି ବାବ୍ଲାଇ । ଜାଜ୍ ଅଟ୍‌କାଇବା ପାର୍ଦା ଟେକିଦେକ୍ଲାଇ ଆରି କିରିଡ଼ ଗାଡ଼ ପାଲି ପାଲି ଜାଜ୍ ଚାଲାଇ ଚାଲାଇ ନେବାର୍ ଦାର୍ଲାଇ । <sup>୧୪</sup> ମାତର୍ ଚନେକ୍ ଗାଲା ପଟେ କିରଡ଼ବାଟେଅନି ଉତର୍ ପୁରୁବ୍ ବଲି କଇବା ପବନ୍ ଆଇଲା । <sup>୧୫</sup> ସେ ପବନ୍ ଅପରବଲ୍ ଆସି ଜାଜେ ପିଟିଅଇଲା । ପବନ୍ ଆଇବା ମୁଆଟ୍‌ବାଟେ ଜାଜ୍ ନେବାକେ ଚେସ୍ଟା କରି କରି ନାପାରି ତାକିଗାଲୁ । ତେବେ ପବନ୍ ଜାଜ୍‌କେ ପାନି ଟାନେ ଉପ୍‌କାଇକରି ନେଅ ବଲି ଚାଡ଼ିଦେଲୁ । <sup>୧୬</sup> ଆରି କାଉଦ୍ ବଲି ଗୁଲାଇ ବାଟେ ପାନି ରଇକରି ମଜାଇ ସୁକ୍ଲା ବୁଇଁ ରଇବା ଜାଗାର୍ ଦକିଣ୍ ଦିଗ୍ବାଟେ ଗାଲାବେଲେ ଅଲପ୍ ପବନ୍‌ଟାନେ ଅନି ରକିଆ ପାଇଲୁ । ତେଇ ଆମେ କସ୍ଟେମସ୍ଟେ ଜାଆଜର୍ ସାନ୍‌ଡ଼ଙ୍ଗା କାଇ ବିପଦ୍ ନଇତେ ସଙ୍ଗାପାର୍ଲୁ । <sup>୧୭</sup> ଜାଜ୍ ଚାଲାଉମନ୍ ସାନ୍ ଡ଼ଙ୍ଗା ଜାଜ୍‌ଉପ୍‌ରେ ଟେକି ନେଲାଇ ଆରି ତର୍ ସଙ୍ଗ୍ ଡାଟ୍‌କରି ଜାଜର୍ ଚାରିବେଟ୍‌ତି ନ ବାଙ୍ଗ ବଲି ବାସି ଦେଲାଇ । ଜାଜ୍ ଚାଲାଉମନ୍ ଜାଜ୍‌କେ ଲିବିଆର୍ ପାଲି ପାଲି ବାଲିବନ୍ ବାଟେ ଉଟିଜାଇସି ବଲି ଜାଜେ ବାସି ରଇବା ତେରା ଉଡ଼ରାଇକରି ପବନେ ସେ ବୁଲି ବୁଲି ର ବଲି ଚାଡ଼ି ଦେଲାଇ । <sup>୧୮</sup> ଚନେକ୍ ମିସା ନ ତେବି ଅପରବଲ୍ ପବନ୍ ଆଇବାର୍ ଦାର୍ଲା ଜେ, ତାର୍ ଆରକର୍ ଦିନେ ସେମନ୍ ଜାଜେଅନି ଜିନିସ୍ ପତର୍ ପାନିତେଇ ପିଙ୍ଗ୍‌ବାର୍ ଦାର୍ଲାଇ । <sup>୧୯</sup> ତାର୍ ଆରକର୍ ଦିନେ ସେମନ୍ ଜାଜର୍ ପାଇ ଦରକାର୍ ଅଇବା କେତେଟା ଜିନିସ୍ ବେଟି ପିଙ୍ଗ୍ ଦେଲାଇ । <sup>୨୦</sup> ବେସି ଦିନ୍ ଅଇଗାଲା ଆମେ ବେଲର୍ ମୁକ୍ ନାଇ କି ତାରାର୍ ମୁକ୍

ଦେକୁନାଇ ସେନ୍ତି ରଇଗାଲୁ । ପବନ୍ ଚନେକ୍ ମିସା ତେବେ ନାଇ,  
ଅଦିକ୍ ଅଦିକ୍ ଆଇତେସେ ରଇଲା । ସାରାସାରି ଆମେ ବଞ୍ଚିବାର୍  
ଆସା ଚାଡି ଦେଇରଇଲୁ ।

୨୧ ଏତେକ୍ ଦିନ୍ ଅଇଲା ସବୁ ଲକ୍‌ଜାକ ନ କାଇ ନ ପିଇ  
ରଇଲା ପଚେ ପାଉଲ୍, ଜାଜେ ଜିବା ଲକ୍‌ମନର୍ ମଜାଇ ଚିଆଅଇ  
କଇଲା, ମଇତର୍‌ମନ ତମେ ମର୍ କାତା ଦାରି କିରତେଅନି ଜାଜ୍  
ନ ଆନି ରଇଲେ ଆମ୍‌କେ ଏ ଦସା ନ ଆଇତା । ୨୨ ମାତର୍  
ଏବେ ତମ୍‌କେ ଗୁଆରି କରି କଇଲିନି, ନ ଡରି, ବରସ୍ ଅଇରୁଆ  
। ତମର୍ ବିଡ୍‌ରେଅନି କେ ମିସା ନ ମରାସ୍ । ଜାଜସେ ନସ୍‌ଟ  
ଅଇସି । ୨୩ କାଇକେବଇଲେ ମୁଇ ଜାର୍ ଲକ୍ ଅଇଲିଆଚି, ଆରି  
ଜନ୍ ପର୍‌ମେସର୍‌କେ ପାର୍‌ତନା କଲିନି, କାଲି ରାତି ତାର୍ ଗଟେକ୍  
ସରଗର୍ ଦୁଡ୍ ମକେ ଆସି କଇଲା, ୨୪ ପାଉଲ୍ ତୁଇ ଡର୍ ନାଇ  
। ବାଇଦରେ ସମ୍‌ରାଟର୍ ମୁଆଟେ ତୁଇ ଚିଆ ଅଇସୁଆକା ।  
ପର୍‌ମେସର୍ ତକେ ଜିବନ୍ ଦୁକାଇଲାଆଚେ । ଜେ କି, ତକେ ଆରି  
ଡର୍ ସଙ୍ଗ୍ ଜାଇତେ ରଇବା ସବୁ ଲକ୍‌ମନ୍କେ ବଞ୍ଚାଇସି । ୨୫ ତେବେ  
ବାଇମନ୍ ତମେ ନ ଡରି ବରସ୍ ଅଇରୁଆ । କାଇକେ ବଇଲେ ମୁଇ  
ପର୍‌ମେସର୍‌କେ ବିସ୍‌ବାସ୍ କଲିନି, ମକେ ଜେନ୍ତି କଇଲାଆଚେ ଚିକ୍  
ସେନ୍ତାରିସେ ଅଇସି । ୨୬ ମାତର୍ ଆମେ ଆମ୍‌କେ ଗାଲେ ଗଟେକ୍  
ଗୁଲାଇବାଟେ ପାନି ରଇକରି ମଜାଇ ରଇବା ସୁକ୍‌ଲା ଜାଗାଇ ପବନ୍  
କେଟାଇସି ।

୨୭ ଏନ୍ତାରି ଆମେ ବାଉପବନ୍ ଆରାମ୍‌ଅଇକରି ଚଉଦ ଦିନ୍ ଚଉଦ  
ରାତି ମିସା ଅଇଗାଲା । ପବନ୍ ଆମ୍‌କେ ବୁମ୍‌ଦ୍ ସମ୍‌ଦୁରେ ଏନେ  
ତେନେ ନେଇତେରଇଲା । ମଜାରାତି ଅଇଲାକେ ଜାଜ୍ ଚାଲାଉମନ୍  
ଗଟେକ୍ କଣ୍ଡିପାଲି ଲଗାଲଗି ଆଇଲୁ ବଲି ଅନ୍‌ମାନ୍ କଲାଇ ।  
୨୮ ତେବେ ସେମନ୍ ଗଟେକ୍ ବଜ୍ ଜିନିସ୍ ଡର୍‌ସଙ୍ଗ୍ ବାନ୍ଦିକରି ନାପିକରି  
ଜାନ୍‌ଲାଇ ଜେ, ତେଇ ସଏ କଡେ ପୁର୍ ପାନି ତେଙ୍ଗ୍ ରଇଲା ।  
ଆରି କଣ୍ଡେକ୍ ଦୁର୍ ଆଇଲାଇକେ ନବେ ପୁର୍ ପାନି ନାପ୍‌ଲାଇ ।  
୨୯ ପାନି ଜାଜ୍ କନ୍‌ଆଲେ ଡଙ୍ଗ୍‌ରର୍ ପାକ୍‌ନାଇ ତୁକାଇ ଅଇଜାଇସି  
ବଲି ଡରିକରି ସେମନ୍ ପର୍‌ବାଟେ ଚାର୍‌ଗା ଜାଜ୍ ଅର୍‌କାଇବାଟା  
ପାକାଇଲାଇ । ଆରି ଦାପ୍‌ରେ ସାକାଲ୍ ପାଅ ବଲି ପାର୍‌ତନା

କଲାଇ । ୩୦ ତାର ପରେ ଜାଜ୍ ଚାଲାଉମନ୍ ଜାଜେଅନି ଲୁଚି ପାଲାଇବାକେ ଚେସ୍ଟା କଲାଇ । ସାନ୍ ତଙ୍ଗା ବାନ୍ଦିରଇବା ଡର୍ ବେଟି ତଙ୍ଗା ସମ୍ବୁରେ ଉଡ଼ରାଇଲାଇ । ସେମନ୍ ଆରି କେତେଟା ଜାଜ୍ ଅଟ୍‌କାଇବାଟା ମୁଆଟ୍‌ବାଟେ ପାକାଇବୁ ବଲି ନାତାଇଲାଇ । ୩୧ ମାତର୍ ପାଉଲ୍, ସେନାପତି ଆରି ସନିଅମନ୍‌କେ କଇଲା, “ଜଦି ଜାଜ୍ ଚାଲାଉମନ୍ ଜାଜେ ନ ରଇଲେ ତମେ ମରିଜାଇସା ।” ୩୨ ସେଟାରୁପାଇ ସନିଅମନ୍ ତଙ୍ଗାର୍ ଡର୍ କାଟି ଦେଲାଇ ଆରି ପାନି ଉପ୍‌ରେ ବୁଲି ଜାଅ ବଲି ଚାଡ଼ି ଦେଲାଇ ।

୩୩ ପାଉଲ୍ କୁକ୍‌ତାତାକେ ସବୁ ଲକ୍‌କେ କାଆ ବଲି ବାବୁଜିଆ କଲା । ସେ କଇଲା, ଆଜିକେ ଚଉଦ ଦିନ୍ ଅଇଗାଲା କାଆସ୍ ନାଇ, ପିଆସ୍ ନାଇ, ବୁକେସେ ଆଚାସ୍ । ୩୪ ତେବେ ମୁଇ ତମ୍‌କେ କାଇଟା ଆଲେ କାଆ ବଲି ବୁଜାଇଲିନି, କାଇକେ ବଇଲେ, ବୁଟି ରଇବାର୍ ଆଲେ କାଇବାର୍ ଆଚେଆକା । ତରା ନାଇ ! ତମ୍‌କେ କାଇଟା ନ ଅଏ । ୩୫ ପାଉଲ୍ ଏନ୍ତାରି କଇକରି ରୁଟି ଦାରଲା ଆରି ସବୁ ଲକ୍‌ର ମୁଆଟେ ପର୍‌ମେସର୍‌କେ ଦନିଅବାଦ୍ ଦେଇ ରୁଟି ଚିତାଇ କାଇବାର୍ ଦାରଲା । ୩୬ ତେଇ ସେମନ୍ ସବୁ ଲକ୍ ସାଆସ୍ ଅଇକରି ଆରି ନିଜେ ନିଜେ କାଇବାର୍ ଦାରଲା । ୩୭ ଆମେ ସେ ଜାଜେ ସବୁ ଲକ୍ ମିସି ଦୁଇସ ସତୁରି ଚଅ ଲକ୍ ରଇଲୁ । ୩୮ ସବୁ ଲକ୍ ପେଟ୍ ପୁରତେ କାଇ ସାରଲା ପତେ ଜାଜ୍ ଉସାସ୍ ଅ ବଲି ଜାଜେ ରଇଲା ସବୁ କାଦିକଣ୍ଡା ସମ୍ବୁରେ ପିଙ୍ଗି ଦେଲାଇ ।

### ଜାଜ୍ ତୁକାଇ ଅଇଲା

୩୯ ସାକାଲ୍ ପାଇଲାକେ କଣ୍ଡିର୍ କନ୍ ଜାଗାଇ ଆସି କେଟ୍‌ଲୁଆବୁ ବଲି ଜାଜ୍ ଚାଲାଉମନ୍ ଜାନି ନାପାରଲା । ମାତର୍ ସେମନ୍ ଦେକ୍‌ଲାଇ, ଜେ ସେଟା ଗଟେକ୍ ସମ୍ବୁର୍ ଆରି ଗାଡ଼ ମିସ୍‌ଲା ବାଲିପଟା ଜାଗା । ଜଦି ପାରଲେ ତେଇ ଜାଜ୍ ଲାଗାଉଁ ବଲି ଚେସ୍‌ଟା କଲାଇ । ୪୦ ସେଟାରୁପାଇ ଜାଜ୍ ଅଟ୍‌କାଇବାକେ ବାନ୍ଦି ରଇବା ଡର୍ ସବୁ କାଟି ଦେଇ, ସେଟା ସବୁ ସମ୍ବୁରେ ତପି ଅଇବାକେ ଚାଡ଼ି ଦେଲାଇ । ଆରି ଜାଜ୍ ସଲ୍‌କାଇବାକେ ବାନ୍ଦି ରଇବା ଡର୍ କୁସ୍‌ଲାଇଦେଇ ମୁଆଟେ ବାନ୍ଦି ଅଇରଇବା ତେରାକେ ଚେକି ଦେଲାଇ । ସେନ୍ତା କଲାକେ ଜାଜ୍ ପର୍‌ନେ ଟେଲାଇ ଟେଲାଇ

ଅଇକରି କଣ୍ଠିବାଟେ ଜିବାର ଦାରଲା । ୪୧ ଗାଡ଼ ଆରି ସମ୍ବୁତୁର ମିସ୍ଲା ସାଙ୍ଗାମର୍ ବାଲିପାଟାଇ, ଜାଜ୍ ଡୁକାଇ ଅଇ ମୁଆଁର୍ ବାଟର୍ଟା ତଲେ ତପିଅଇ ଅଟ୍ଟକି ଦେଲା । ଅପର୍ବଲ୍ ଲଉଡ଼ି ଆସି ଜାଜର୍ ପର୍ବାଟେ ଡୁକାଇ ଅଇଲାକେ ପର୍ ବାଟର୍ଟା ମିସା ବାଙ୍ଗି କଣ୍ଠ୍ କଣ୍ଠ୍ ଅଇଗାଲା ।

୪୨ ସନିଅମନ୍ ବନ୍ଦି ଲକ୍ମନ୍‌କେ ପଅଁରି ପଅଁରି ଉଟିଜିବାଇ ବଲି ବାବି କରି ମାରିମରାଇବାକେ ବାବ୍‌ଲାଇ । ୪୩ ମାତର୍ ସେନାପତି ପାଉଲର୍ ଜିବନ୍ ବଂଚାଇବି ବଲି ବାବ୍‌ତେ ରଇଲା । ତେବେ ସେ ସନିଅମନ୍‌କେ ସେନ୍ତାରି କରାନାଇ ବଲି ମନାକଲା । ଜେଡୁକି ପଅଁରି ପାର୍‌ବା ସବୁ ଲକ୍ମନ୍‌କେ ପାନିଟାନେ ତେଗଇକରି ପଅଁରି ପଅଁରି କଣ୍ଠିତେଇ ଜିବାକେ ଆଦେସ୍ ଦେଲା । ୪୪ ଆରି ବାକି ଲକ୍ମନ୍‌କେ ଜାଜର୍ ବାଙ୍ଗିଲା ପାଟା ଆରି କାଇ କାଇଟାମନ୍ ଦାରି ପଅଁରି କରି ବାରୁଆ । ବଲି କଇଲା । ଏନ୍ତାରି ଅଇ ସବୁଲକ୍ କାଇଟା ନ ଅଇତେ କଣ୍ଠି ଆସି ବାରଇଲାଇ । ସାରାସାରି ଆମେ ସବୁଲକ୍ କଣ୍ଠି କେଟ୍‌ଲୁ ।

# ୨୮

## ମାଲ୍‌ଟା ଜାଗାଇ ପାଉଲ୍

୧ କାଇଟା ନ ଅଇ, କଣ୍ଠିପାଲି ଜାଇ ଦେକ୍‌ଲୁ ଜେ, ଆମେ ମେଲିତି ନାଉଁର୍ ଚାରିବେଟ୍‌ତି ପାନିର୍ ମଜାଇ ରଇବା ସୁକ୍‌ଲା ଜାଗାଇ କେଟିଆରୁ । ୨ ତେଇ ପୁର୍ବେଅନି ରଇବା ଲକ୍ମନ୍ ଆମ୍‌କେ ଆଲାଦ୍ ଦେକାଇଲାଇ, ସେବେଲେ ବର୍‌ସା ମାରି ସିଡ୍ ଅଇତେ ରଇଲା । ସେଟାର ପାଇ ସେମନ୍ ଆମ୍‌କେ ଜଇ ଲାଗାଇ ଗତିଆ ମାନ୍‌ଲାଇ । ୩ ପାଉଲ୍ ଗଟେକ୍ ବିଡା ଦାରୁ ଜଇତେଇ ପାକାଇବା ବେଲେ ଜଇ ତାତିର୍ ଲାଗି ବିଡାଇଅନି ଗଟେକ୍ ବିସ୍‌ରଇବା ସାଁପ୍ ବାରଇଲା ଆରି ପାଉଲ୍‌ର୍ ଆତେ ଚଗି ଚାବି ତସିରଇଲା । ୪ ସେ ଜାଗାର୍ ଲକ୍ମନ୍ ପାଉଲ୍‌ର୍ ଆତେ ଚାବିକରି ତସି ଜୁଲ୍‌ତେ ରଇବା ସାଁପ୍‌କେ ଦେକି ତାକର୍ ତାକର୍ ବିଡ୍‌ରେ କୁଆବଲା ଅଇଲାଇ, “ଏ ବାଇଦରେ ଗଟେକ୍ ନର୍‌ମାରୁ ଲକ୍, ସେ ଜାଇଟା ମିସା ଅ ବେ, ସେ ସମ୍ବୁତୁରେ ରକିଆ ପାଇରଇଲେ ମିସା ତାର୍ କରମ୍ ତାକେ ବଂଚିବାକେ ନ ଦେଏ ।” ୫ ମାତର୍ ପାଉଲ୍ ତାର୍ ଆଡ୍ ଜିଞ୍ଜାଡ୍‌ଲାକେ ସାଁପ୍ ଜଇତେଇ



ଅଦରଲା ଆରି ତାକେ କାଇଟା ଅଏନାଇ ।<sup>୬</sup> ଲକ୍ମନ୍ ପାଉଲର୍ ଆଡ୍ ପୁଲିଜାଇସି ନଇଲେ ଅଟାଡ୍ ଅଦ୍ରି ମରିଜାଇସି ବଲି ଜାଗିରଇଲାଇ, ମାତର୍ ବେସି ପର୍ ଜାଗିକରି ଦେକ୍ଲାଇ ମିସା ତାକେ କାଇଟା ଅଏ ନାଇ । ପଟେ ସେମନ୍ କାତା ପାସ୍ଲାଇକରି କଇଲାଇ “ଏ ଗଟେକ୍ ଦେବ୍ତା !”

<sup>୭</sup> ତେଇଅନି ଅଲପ୍ ଦୁରିକେ ସେ ଜାଗାର୍ ମୁକିଅ ନେଡା, ତାର୍ ନାଉଁ ପବ୍ଲିଅ । ତାର୍ କେତେଟା ପଦା ରଇଲା, ସେ ଆମ୍ବେ ଗତିଆ ମାନିକରି ଡାକିନେଲା । ଆରି ଆମେ ତିନ୍ ଦିନ୍ ଜାକ ତାକର୍ ଗରେ ଗତିଆ ଅଇ ରଇଲୁ ।<sup>୮</sup> ସେବେଲେ ପବ୍ଲିଅସର୍ ବାବା ଜର୍ ଆରି ରକଡ୍‌ଜାତା ଦାରାଇଅଇ ଡୁଲିରଇଲା । ପାଉଲ୍ ତାକର୍ ବାକ୍‌ରାଇ ଜାଇ ତାର୍‌ପାଇ ପାର୍‌ତନା କରି ତାର୍ ଉପରେ ଆଡ୍ ଚିଇ ତାକେ ନିମାନ୍‌କଲା ।<sup>୯</sup> ଏ ଗଟ୍‌ନା ପଟେ ସେ ଜାଗାର୍ ଜେଡ୍‌କି ରଗିମନ୍ ସବୁ ପାଉଲର୍ ଲଗେ ଆସି ନିମାନ୍ ଅଇଲାଇ ।<sup>୧୦</sup> ସେମନ୍ ଆମ୍ବେ ବେସି ବିନ୍ ବିନ୍ ରକାମର୍ ଜିନିସ୍ ଇନାମେ ଦେଲାଇ ଆରି ଆମେ ତେଇଅନି ଜାଜେ ବସି ଜିବାବେଲେ ସେମନ୍ ଆମ୍ବେପାଇ ଦର୍‌କାର୍ ରଇଲା ସବୁ ଜିନିସ୍ ଜାଜେ ଆନି ଦେଲାଇ ।

### ମାଲ୍‌ଟା ଜାଗାଇଅନି ରମ୍ ଦେସେ

<sup>୧୧</sup> ସେ ଜାଗାଇଅନି ବାରଇବାକେ ଆମ୍ବେ ତିନ୍‌ମାସ୍ ଲାଗଲା । ସିଡ୍‌ଦିନ୍ ଅଇରଇଲାକେ ତବିରଅଇଲା ଆଲେକ୍‌ଜାଣ୍ଡ୍ରିଆ ନଅରେଅନି ଆସିରଇବା ଗଟେକ୍ ଜାଜେ ଆମେ ବାରଇଲୁ । ସେ ଜାଜର୍ ନାଉଁ ରଇଲା ଜ୍‌ଲି ଦେବ୍ତା ।<sup>୧୨</sup> ପର୍‌ଡୁମ୍ ସିରକ୍‌ସ୍ ନାଉଁର୍ ନଅରେ କେଟି ତେଇ ତିନ୍‌ଦିନ୍ ରଇଲୁ ।<sup>୧୩</sup> ତେଇଅନି ଆରି ତରେକ୍ ଜିବାଟା ଆରାମ୍ କରି ଆମେ ରେଜିଅମ୍ ସଅରେ କେଟ୍‌ଲୁ । ତାର୍ ଆର୍‌କର୍ ଦିନେ ଦକିଣ୍ ଦିଗେଅନି ପବନ୍ ଆଇଲା ଆରି ଦୁଇଦିନ୍ ପଟେ ପୁଡେଅଲି ସଅରେ କେଟ୍‌ଲୁ ।<sup>୧୪</sup> ତେଇ କେତେଟା ଜିସୁକେ ବିସ୍‌ବାସ୍ କର୍‌ବା ବାଇମନ୍‌କେ ମିସ୍‌ଲୁ । ତାକର୍ ସଙ୍ଗ୍ ଗଟେକ୍ ଆଟ୍ ରଇବାକେ ସେମନ୍ ଆମ୍ବେ ବାବୁଜିଆ କଲାଇ । ସାରାସାରିପଟେ ଆମେ ରମ୍ ଦେସେ ଜାଇ କେଟ୍‌ଲୁ ।<sup>୧୫</sup> ଆମେ ଗାଲା କବର୍ ସୁନିକରି ରମ୍ ଦେସର୍ ବିସ୍‌ବାସି ବାଇମନ୍ ତେଇଅନି ଆପିଅ ଜାଗାର୍ ଆଟେ ଆରି ତିନ୍‌ସରା ନାଉଁର୍ ନଅର୍‌ମନ୍ ଜାକ ଆମ୍ବେ ବେଟ୍ ଅଇବାକେ

ଇଣ୍ଡି ଇଣ୍ଡି ଆଇଲାଇ । ସେମନ୍‌କେ ଦେକି ପାଉଲ୍ ପର୍‌ମେସର୍‌କେ ଦନିଅବାଦ୍ ଦେଲା ଆରି ବେସି ସାର୍‌ଦା ଅଇଲା ।

### ରମିୟମନର୍ ନଅରେ ପାଉଲ୍

<sup>୧୭</sup> ଆମେ ରମ୍ ଦେସେ କେଟ୍‌ଲା ପତେ ପାଉଲ୍‌କେ ଗଟେକ୍ ସନିଅ ସଙ୍ଗ୍ ଗଟେକ୍ ଗରେ ରଇବାକେ ଆଦେସ୍ ମିଲ୍‌ଲା ।

<sup>୧୭</sup> ତିନ୍ ଦିନ୍ ପତେ ପାଉଲ୍ ସେ ଜାଗାର୍ ଜିଉଦି ନେତାମନ୍‌କେ ଗଟେକ୍ ସବା କର୍‌ବାକେ କବର୍ ପାଟାଇଲା । ସେମନ୍ ଆସି ରୁଣ୍ଡିଲାଇକେ ପାଉଲ୍ ସେମନ୍‌କେ କଇଲା, “ଏ ଇସ୍ରାଏଲର୍ ବାଇମନ୍, ମୁଇ ଆମର୍ ଲକ୍‌ମନର୍ ବିରୁଦେ କି ଆମର୍ ଆନିଦାଦିମନର୍ ଟାନେଅନି ସିକିରଇବା ରିତିନିତି ବିରୁଦେ କିଟି କରିନାଇ, ଏଲେ ମିସା ଜିରୁସାଲାମର୍ ଜିଉଦିମନ୍ ମକେ ଦାରି ବନ୍ଦିଗରେ ପୁରାଇ ରମିଅମନ୍‌କେ ସର୍‌ପିଦେଲାଇ । <sup>୧୮</sup> ମକେ ପାଟାର୍ ଉଟାର୍ କଲା ପତେ ମରନ୍ ଡଣ୍ଡ ପାଇବା ଏଡକି କାଇ ଅପୁରାଦ୍ କରେ ନାଇ ବଲି ଜାନଲାଇ । ପତେ ରମିଅ ଲକ୍‌ମନ୍ ମକେ ମୁକ୍‌ଲାଇବାକେ ମନ୍ କର୍‌ତେ ରଇଲାଇ । <sup>୧୯</sup> ମାତର୍ ଜିଉଦି ଲକ୍‌ମନ୍ ମକେ ଚାଡ଼ବାକେ ରାଜି ଅଅଡନାଇ । ତେବେ ମର୍ ନିଜର୍ ଲକ୍‌ମନର୍ ବିରୁଦେ ମର୍ କାଇ ଦାବି ନ ରଇଲା ମିସା, ମୁଇ ବଡ଼ସାସନ୍‌କାରିଆକେ ଗୁଆରି କର୍‌ବି ଆକା ବଲି ବାବ୍‌ଲି । <sup>୨୦</sup> ସେଟାର୍‌ପାଇ ଏ ବିସଇ କାତାବାର୍‌ତା ଅର୍‌ ବଲି ମୁଇ ତମ୍‌କେ ଡାକାଇ ଆଟି । ଇସ୍ରାଏଲର୍ ଲକ୍‌ମନ୍ ଏବେ ଜାକେ ଆସା କରି ଆଇଲାଇନି, ତାର୍‌ପାଇ ବଲିକରି ମୁଇ ଆଜି ସିକ୍‌ଲି ସଙ୍ଗ୍ ବାନ୍ଦାଇ ଅଇଆଟି ।”

<sup>୨୧</sup> ସେମନ୍ କଇଲାଇ, “ଆମ୍‌କେ ଜିଉଦା ଦେସେଅନି ତମର୍ ବିସଇ କାଇ ଚିଟି ଗଟେକ୍ ମିସା ମିଲେ ନାଇ, କି ବାଇମନର୍ ବିଡ଼ରେଅନି କେ ମିସା ଇତି ଆସି ତମର୍ ବିସଇର୍ ବୁଲ୍ କାତା ସୁନାଅଡ଼ ନାଇ କି କଅଡ଼ ମିସା ନାଇ । <sup>୨୨</sup> ମାତର୍ ତମେ କାଇଟା ବଲି ବିସ୍‌ବାସ୍ କଲାସନି, ସେଟା ତମର୍‌ଟାନେଅନି ଆମେ ସୁନ୍‌ବାକେ ମନ୍ କଲୁନି । କାଇକେବଇଲେ, ଗୁଲାଇବାଟର୍ ଲକ୍‌ ତମର୍ ଦଲ୍ ବିରୁଦେ କାତା ଅଇଲାଇନି ।”

୨୩ ସେମନ୍ ଗଟେକ୍‌ଦିନ୍ ଟିକ୍ କଲାଇ ଆରି ଟିକ୍ କଲା ଦିନେ ସେମନ୍‌ର ବିଡ଼ରେଅନି ବେସି ଲକ୍ ପାଉଲ୍ ରଇବା ଜାଗାଇ ଆଇଲାଇ । ପାଉଲ୍ ସେମନ୍‌କେ ସାକାଲେଅନି ସଞ୍ଜୁଜାକ ପରମେସର୍ ରାଇଜ୍ ବିସଇ ବୁଜାଇଦେଲା ଆରି ମସାର୍ ରିଡିନିତି ଆରି ବବିସଡ଼ବକ୍‌ତାମନ୍ ଲେକ୍‌ଲା ସାସ୍‌ତରର୍ ବାକିଅ ଦେକାଇକରି ଜିସୁର୍ ବିସଇ ବୁଜାଇଲା । ୨୪ ତେଇ କେତେ ଲକ୍ ପାଉଲ୍ କଇଲା କାତା ବିସ୍‌ବାସ୍ କଲାଇ, ମାତର୍ କେତେ ଲକ୍ ବିସ୍‌ବାସ୍ କରଡ଼ ନାଇ । ୨୫ ତେବେ ତାକର୍ ତାକର୍ ବିଡ଼ରେ ଦଦାପେଲା ଅଇକରି ବାରଇ ଉଟିଗାଲା । ପାଉଲ୍ ଗଟେକ୍ କାତା କଇଲା, ସୁକଲ୍ ଆଡ଼ମା ତମର୍ ଆନିଦାଦିମନ୍‌କେ ଜିସାୟ୍ ବବିସଡ଼ବକ୍‌ତାର୍ ଡଣ୍ଡେଅନି ସଡ଼ କାତା କଇରଇଲା ! ୨୬ ସେ କଇରଇଲା,

“ଏ ଲକ୍‌ମନ୍‌କେ ଜାଇ କଅ, ତମେ ସୁନି ସୁନି ରଇସା, ମାତର୍ ନ ବୁଜାସ୍ ।

ଦେକି ଦେକି ରଇସା, ମାତର୍ ନ ଚିନାସ୍ ।”

୨୭ କାଇକେ ବଇଲେ ଏ ଲକ୍‌ମନ୍‌ର ମନ୍ ବେସି ଆଁଡ଼,  
ସେମନ୍ ନିଜର୍ ନିଜର୍ ଆଁକି ଲିମିଦେଇ ଆଚଡ଼ ଆରି କାନ୍ ବୁଟି ଦେଇ  
ଆଚଡ଼,

ସେମନ୍ ଜଦି ଆଁକି ଦେକ୍‌ତାଇ, ଆରି ବୁଟି ଅଇଲା କାନ୍ ଉଗାଡ଼ି  
ସୁନ୍‌ତାଇ ।

ସେନ୍ତାର୍ ଆଲେ ସେମନ୍ ମନେ ମନେ ବୁଜ୍‌ତାଇ ।

ଆରି ସେମନ୍ ମର୍ଲଗେ ବାଅଡ଼ତାଇ ଆରି ମୁଇ ସେମନ୍‌କେ  
ନିକ କରଡ଼ି ।

ଏଟା ପରମେସର୍ କଇଲାନି ।

୨୮ ସାରାସାରିପଟେ ପାଉଲ୍ କଇଲା “ତେବେ ପରମେସର୍‌ର ମୁକ୍ତି ଜିଉଦିନଇଲା ଲକ୍‌ମନ୍‌ର ପାଇ ଆଇଲା ଆଚେ । ଏଟା ତମେ ଜାନିରୁଆ, ସେମନ୍ ମିସା ସେଟା ମାନ୍‌ବାଇ ।” ୨୯ ପାଉଲ୍ ଏ ସବୁ କାତା କଇଲାକେ, ଜିଉଦିମନ୍ ନିଜର୍ ନିଜର୍ ବିଡ଼ରେ ଦଦାପେଲା ଅଇଅଇକରି ଉଟିଗାଲା । ୩୦ ପାଉଲ୍ ଗଟେକ୍ ଗର୍ ବାତାକରି ତେଇ ଦୁଇ ବରସ୍ ଜାକ ରଇଲା ଆରି ତାକେ ଦେକ୍‌ବାକେ ଆଇଲା ସବୁ ଲକ୍‌ମନ୍‌କେ ତେଇ ଗତିଆ ମାନ୍‌ତେରଇଲା । ଜେଡ଼କି ଲକ୍ ପାଉଲ୍‌ର ଲଗେ ଆଇତେ ରଇଲା ସେ ସବୁ ଲକ୍‌କେ ଡାକି, କାକେ

ନ ଡରତେ କଲା । ୩୧ ଆରି ତାକେ କେ ମିସା ତେବାଅଡ଼ ନାଇ । ସେ ପରମୋସରର୍ ରାଇଜ୍ ବିସଇ ଜାନାଇକରି ମାପୁରୁ ଜିସୁକିରିସ୍ଟର୍ ବିସଇ ସିକିଆ ଦେଇତେରଇଲା ।

**ସତ୍ତ୍ୱିୟ ବାବ୍**  
**The New Testament in the Desiya language of India:**  
**ସତ୍ତ୍ୱିୟ ବାବ୍ (Bible)**

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

**ସତ୍ତ୍ୱିୟ ବାବ୍**  
**ଦ୍ୱିତୀୟା ନିୟମ, 2020**

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde